

THIS NOTICE

2nd - 18.

172



collegio
1817, Domingo Siguencia

58

1720

Collegio de la compo de y de la
cion de la
LVDOVICI NONII
MEDICI

HISPANIA

SIVE


c. 12.

Populorum, Urbium, Insularum, ac
Fluminum in ea accuratio
descriptio.

De la Libreria de D. Joachin Cidlanascat.



ANTVERPIAE,
Ex Officina Hieronymi Verduſſi.
clō. 15c. vii.





CL^{mo} VIRO
D. FRANCISCO PAZ,
SER^{morum} ALBERTI
ET
ISABELLAE,
BELGICAE PRINCIPVM
ARCHIATRO.

DVdum mihi in votis fuit,
V. Cl. affectus in te mei
arrhabonem offerre, vt
amoris tui nexum, quo
me arctè deuinctum scio, si non sol-
uere, ex parte saltem laxare possem.
Nunc occasio, nunc facultas defuit; nu-
perus hic apud me natus fetus, voto me

EPISTOLA

exsoluet, HISPANIA, inquam, mea;
 quam nomini tuo inscribo: vel potius
 te illi patronum quæro. nam vt tenellis
 infantibus, amuleta quædam, officio-
 sæ nutrices appendunt, quo fascinan-
 tium oculos, linguasq. queant euadere.
 Ita etiam nomen tuum lubuit Hispaniæ
 meæ præfigere, ne calumniæ noxios af-
 flatus, aut sæuos inuidiæ morsus expa-
 uelcat: sed vt sequestrato timore, ausit
 frontem commasculare, & in publicum
 hunc famæ campum prodire. Nec deco-
 rum fuisset alium Patronum Hispaniæ,
 quàm te in ea honesto genere natum; &
 ad hoc doctrinæ & dignitatis culmen
 euectum ambire: neque vsquam medici
 fetus honestiùs, quàm ad Archiatrum,
 & ad ordinis nostri principem diuertet.
 Nec spernes hoc quamvis leuidensẽ mu-
 nus, vel Patriæ causã, quam à fugientis
 æui iniuria, conatus sum vindicare: &

pri-

DEDICATORIA.

pristinum illi splendorem pro virili restitueret. nam superioribus sæculis, quàm miserè defœdata fuit, norunt omnes. acerbis, ut opinor, neglecti Lacedæmoniorum moris pœnas luit, qui inituri prœlia Musis litabant; quo egregia sua facinora, Musarum ope posteris innotescerent. hinc nacti luculentos scriptores, qui res illorum gestas, patriamque ita exornarunt, ut pœnè nullum ibi fuerit sine nomine saxum. Secus Hispanis accidit, quibus fortia potiùs facere, quàm narrare, cura semper fuit. Quid? an non coëgit illos necessitas, Marti potiùs ultori, quàm Musis sacrificare? Per DCC. enim & plures annos, pro fartis relictis, cum Mauris multo mutuoque certarunt sanguine. Qua de causa nec patriam satis illustrare illis integrum, nec domi forisque gesta, in memorix templo sacrare. quota enim fa-

EPIST. DEDICAT.

cinorum pars ad posteros peruenit? aut

Aeternis famæ monumentis insita floret?

Sed desino hæc vulnera refricare. ad munus meum redeo; quod velim tali vultu suscipias; quali id ego animo, aperto nempe & candido tibi V. Cl. lubens merito, dono consecroque. Vale Antuerpiæ
Kal. Mart. c15. 15c. vii.



LECTO-

LECTORI.

EN tibi, quam Hispaniæ illustrandæ
opellam impendi, benigne Lector, quæ
non tam levis forsan, quàm inglo-
ria est, &

— unde laboris

Plus haurire mali est, quàm ex re decer-
pere fructus.

*Pretium tamen operæ me fecisse credo,
nobilissimam hanc Europæ partem, ex altis-
simis, quibus nimis diu damnata fuerat, tene-
bris eripere. nam per frequētes Barbarorum
inundationes, continuaq; bella, ita afflicta
fuit, vt nullum in ea vestigium prisca decoris,
nec sincerus ullus antiquitatis color eluceret.
Ita fabulæ omnia occupauerant, nec impunè
solùm, sed & cum laude passim persultabāt.
Compositis tandem bellis, melioris aliquot
Scriptores notæ patriæ deformatæ opem tu-
lere: sed patrio sermone & ἐν ῥόπῳ pleriq;. vnus
aut alter Latinè, sed sparsim & saltuatim,
provt Historiæ ratio postulabat. Quare con-*

*tinuata serie, Hispaniæ diuulsa membra, in
 vnum collegi, & antiqua nomina populo-
 rum, vrbium, fluminum, cum recentioribus
 composui, ex fide veterum & nobilium scri-
 ptorum. Nec omnia lubuit persequi; nec po-
 tui. Non mediocres enim, dicebat Varro,
 tenebræ in silua, vbi hæc captanda: neq-
 eò quò peruenire voluimus, semitæ tritæ:
 neque non in tramitibus quædam ob-
 iecta, quæ euntem retinere possunt. Sco-
 pus mihi fuit, illa præcipuè tangere, quorum
 apud priscos scriptores fit mentio, illosq; ea-
 dem opera, illustrare vel emendare: quo le-
 gentium ex parte tædium leniri posset. nam
 genus hoc scriptiois impeditum, nec ingenij,
 aut eloquentiæ est capax. Nec enim admit-
 tit excessus, aut Orationes, sermonesque
 aut casus mirabiles, vel euentus varios,
 non alia iucunda dictu, aut legentibus
 blanda. Et cum sæpè mutuis dissidijs variât
 auctores, meliori parti accedo, vel Scepticorū
 more OYΔEN OPIZΩ. in multis, & dubijs, pen-
 denti*

AD LECTOREM.

denti vestigio, & tamquam super ova & ari-
 stas incedo. Quid mirum in tanta scriptorum
 infrequentia & temporis incuria. Tu Lector
 cogita per salebras & inuia loca me ambu-
 lasse, quare si me alicubi lapsum videris, non
 indignaberis, sed ignosces & eriges: memor
 Pliniani illius dicti: Peculiarem in studijs
 causam eorum esse, qui difficultatibus
 victis, vtilitatem iuuandi prætulerunt
 gratiæ placendi. Quod tibi in mente velim
 sit mi Lector. Vale.



Index Capitum.

C A P. I.

DE Hispaniæ etymo. Plinius explicatus. Stephanus Byzantinus emendatus. Variè olim vocata.

Cap. ij.

Hispaniæ situs & figura. Diuisio sæpe mutata.

Cap. iij.

Fabula de priscis Hispaniæ Regibus exploditur. Berosus & Annius reiiciuntur.

Cap. iv.

Varij Hispaniæ incolæ. Romani variè illam rexerunt per Proconsules, Prætores, Legatos, Vicarios, Præsides.

Cap. v.

Hispaniæ laus à salubritatæ, fertilitate. Variæ hic metallorum secturæ. Immenisæ opes.

Cap. vi.

Incolæ bellicosi. Diutissimè cum Romanis pugnarunt. Fideles. Hospitales. Litteris dediti.

Cap. vij.

Bætica etiam *Turdetania* dicta. Martianus Capella emendatus. Oleis abundat. Minio nobilis.

Cap. viij.

Bætici nobiliores populi. *Turduli*, *Turdetani*, & τοῦπλοι ijdem. *Bastuli*, *Bastitani* & *Basetani* dicti. Appianus emendatus. Cunei.

Cap. ix.

Gades vnde dicta. Olim *Aphrodisiæ*, *Erythia*, *Iunonis insula*, *Cotinusa*, & *Tartessus* dicta. Frequens nobilitas, magna

I N D E X

magna potentia. Multa de templo Gaditano. Finis olim nauigationis.

Cap. x.

De Herculis columnis varia opiniones. *Briarei* & *Saturni* dictæ. *Abyla*, & *Calpes* varia nomina. Festus Auienus emendatur. Strabonis lectio stabilitur.

Cap. xi.

Carteiam non esse *Tariffam* aut *Cartagenam*, sed *Algerizæ*. *Colonia Libertinorum* vocata. Num eadem cum *Tartesso*. *Dion* & *Pausanias* emendantur obiter.

Cap. xij.

De prisco *Tartessi* situ, non exstare nostro ævo. Regnum *Tharles* hîc fuisse.

Cap. xiiij.

Xeres olim dicta *Asta Regia*. *Colonia Romanorum*, num *Ἰνδα* *Stephani Byzantini* fuit.

Cap. xiv.

Nebrissa cognominata *Veneria*. A *Baccho* & *Satyris* condita.

Cap. xv.

Ossuna olim *Vrso*, A. *Hirtio Vrsao*, *Appiano Orsona*. Situs eius ex A. *Hirtio* petitus.

Cap. xvi.

Hispalis cognominata *Romulensis*. *Isidori* opinio reiecta. Vnde dicta. Eius descriptio.

Cap. xvij.

De *Italicæ* situ disquisitio. A *Scipione Africano* condita. Hodie *Sinilla la veia*. Municipium Rom.

Cap. xviii.

Astigi cognominata *Augusta firma*, nunc *Eccia*. Conuentus *Bæticiæ*. Inscriptiones veteres.

Cap.

I N D E X.

Cap. xix.

Corduba *Patricia* dicta. A quo condita. Prima Colonia in Hispaniam deducta. Urbis descriptio.

Cap. xx.

Obulco. *Municipium Pontificense* dictum. Diuersa ab Antonini Bucula. Smileri error. Cur *Porcunna* dicta. Inscriptio vetus.

Cap. xxi.

Illiturgi etiam *Illurgis*, & *Illurgia* dicta. Non esse *Iaën*, sed *Anduxar*.

Cap. xxij.

Granata nec *Illipula*, nec *Illiberis* olim dicta. Sed Maurorum opus. Vnde nomen habet. Diuisa in quatuor partes.

Cap. xxijj.

Abdera à Pœnis aut Phœnicibus condita. Refellitur Franciscus Tarapha.

Cap. xxiv.

Malaca aliquibus *Menace*. Inscriptiones veteres.

Cap. xxv.

Cartima diuersa à T. Liuij *Certima*. Egregia inscriptio vetus.

Cap. xxvi.

Singylia nunc *Antiquera*. Ab Antonino *Anticaria*, dicta. Inscriptio vetus. Fons ibi medicatus.

Cap. xxvij.

Artigis *Iuliensis* cognominata. De eius thermis pauca.

Cap. xxviij.

Munda antiquum nomen obtinet. Inscriptio vetus. Metropolis olim Turdetaniæ.

Cap.

I N D E X

Cap. xxix.

Lusitania dicta etiam *Lysitania*. Limites eius. Strabo diuersus à ceteris. Stephani Byzantini hallucinatio. Non propriè Lusitania eadem cum *Portugalia* est. Diuersæ olim prouinciæ. Martiani Capellæ error.

Cap. xxx.

Lusitaniæ populi Duplices Turduli. Ijdem cum *Turdetanis* Ptolemæi. Celtici vnde fluxere. Vettones nunc Lusitania inclusi, nunc exclusi. Prouincia Vettonia.

Cap. xxxi.

Augusta Emerita ab Augusto condita. Lusitaniæ quondam metropolis. Reliquiæ theatri & Naumachiæ.

Cap. xxxij.

Ebora dicta *Liberalitas Iulia*. Inscriptiones veteres. De situ eius pauca.

Cap. xxxiiij.

Pax Iulia hodie *Beya* est. Iosephus Moletius & Tarapha refelluntur. Inscriptio vetus.

Cap. xxxiv.

Setubal à Cetobriga dicta, non à Tubale.

Cap. xxxv.

De Olisiponis nomine. Cognominata *Felicitas Iulia*. Equæ vento concipiunt. Varronis lectio stabilita. Triton hîc visus. Urbis descriptio.

Cap. xxxvi.

Scalabis dicta *Præsidium Iulium*. Cur vocata *Santarê*.

Cap. xxxvij.

Coimbra non esse *Lacobrigam*. Contra Oliuarium & Tarapham. Error Gerundensis Episcopi. Non esse *Aeminium* antiquorum. Academia nobilis.

Cap. xxxviii.

Salmantica non à Teucro condita. *Elmantica*, *Herman-*

I N D E X

mandica, Salinatis vocata. Academia quo an. instituta.
Cap. xxxix.

An *Norba Cesarea* sit Alcantara. Pœnorum opus creditur. Pons à Traiano exstructus. Inscriptio vetus. Quando Alcantaræ milites vocati.

Cap. xl.

Tarraconensis prouinciæ limites. Quando mutati. Martianus Capella emendatus.

Cap. xli.

Tarraconenses populi. Grauij originem à Græcis trahunt. Plinius obiter emendatus.

Cap. xliij.

Gallæci dicti & *Callaici*. Vnde nomen sumfere variæ opiniones. Gallæcia sexta prouincia effecta. Mores illorum.

Cap. xliij.

Astures vnde dicti. Bellaces. Asturcones. Aurifera est. Bifariam diuisa Asturia.

Cap. xliiv.

Cantabri à Laconibus orti. Mores illorum. Mons hic ferreus. Tamarici fontes.

Cap. xlv.

Carpetani vbi olim siti. A Polybio *Carpesij* vocati.

Cap. xlvi.

Vaccæi vbi olim habitarūt. Gétis mores. Bellicosi.

Cap. xlvij.

Olcades vbi olim siti.

Cap. xlviii.

Celtiberi *Celtoſcythæ*, & *Berones* dicti. Nominis etymon. Potentia illorum, & opes. Mores. Simples olim.

Cap.

I N D E X.

Cap. xlix.

Illergetés non esse *Illurgauonenses* Cæsaris, contra Fuluium Vrsinum. Numi *Eilota* Polybij sint.

Cap. L.

Cerretani dicti *Iuliani*. Cum Hercule in Hispaniam venerunt. Inscriptio vetus.

Cap. li.

Bracara Augusta. A quibus condita. Inter quatuor præcipuas Hispaniæ vrbes. Sedes Regum Sueuorum & Gothorum. De primatu Hispaniæ cum Toletocertat.

Cap. liij.

Quonam modo olim vocata sit Compostella. D. Iacobi corpus quando detectum ibi. Quando in prælijs nomen eius cœptum implorari.

Cap. liij.

Aquæ calidæ *Amphilochia* & *Aqua Celina* dictæ. Vnde *Orense* hodie. Thermæ hîc salubres.

Cap. liiv.

Flauium Brigantium esse *la Corunna*. Fabula explosa de speculo mirando. Pauli Iouij lapsus de Herculis Columnis.

Cap. lv.

Burgos non esse *Augustobrigam*, nec *Aucam* veterem. *Brauum* esse Ptolemæi. Vnde nomen mutatum.

Cap. lvj.

Duplex Pintia. Pisoraca amnis. Inscriptio vetus. Urbis descriptio.

Cap. lvij.

Legionensis vrbs ex Sublanciæ ruinis creuit. *Legio VII. gemina* vocata. Olim *Floris* cognomen habuit. Quando *León* cœpta dici.

Cap.

I N D E X.

Cap. lviii.

Zamorram non esse *Sisaponem* Ptolemæi, minùs *Orcelim*, vel *Numantiam*, *Senticam* esse. Vnde illi nomen.

Cap. lix.

De Toleti conditoribus reiecta opinio. Carpetaniæ caput. Quando Primatis Hispaniæ dignitas eò translata. *Vrbs Regia* vocata. Fatale hîc palatium.

Cap. Lx.

Segouia Plinio, eadem cum *Secubia* Ptolemæi. Etymon reijcitur. Aquæductus à Traiano exstructus.

Cap. lxi.

D. Virgo ad aquas Lupias. Quando sacra effigies huc delata, & miraculorum aliquot series.

Cap. lxij.

Oretum Germanorum num *Calatrana*. Taraphæ crassus error. Inscriptio vêtus. Origo Calatrauæ Militum.

Cap. lxiiij.

Talabricam non esse Talauera. Ptolemæi *Libora*, & T. Liuij *Ebura* eadem cum Talauera sunt.

Cap. lxiv.

Castulo Oretanorum vrbs. A Phocensibus condita. Appianus deprauatè *Castaca* vocat. Variè à Plutarcho & Strabone vocata. Res ibi gestæ.

Cap. lxv.

Murgim non esse *Murtiam* ostenditur. Num *Oreola* vocata. Fabula de eius origine explosa. *Menlaria* Ptolemæi est Murtia. Alphonso X. Regi fidissima.

Cap. lxvj.

Appiani error de Carthaginis nouæ auctore. Opinio Silij Italici reiecta. A Carthaginensibus condita. Cur *Spartaria* vocata. Urbis situs ex Liuiio, Argenti fodinæ celebres.

Cap.

I N D E X.

Cap. lxvij.

Dianium & *Hemeriscopium* dictum. Dianæ fan-
nobilitatum. A Phocensibus exstructum. Promon-
torium Ferrariæ, quod & *Tenebrium*.

Cap. lxviii.

Setabis & *Augusta Valeria* dicta. Tenuissimum hic
linum. Silius obiter correctus.

Cap. lxix.

Valentia à D. Iunio Bruto condita. Cur *Veterani* &
Veteres vocati, *Colonia Iulia* dicta.

Cap. lxx.

Saguntus olim vbi nunc *Moruedro*. A Zacynthijs
& Ardeatibus condita. Dianæ hic templū vetustissi-
mum.

Cap. lxxi.

Mantua Carpetanorum *Madritium* est. Escuriacum.
Moles ibi regia. Cap. lxxij.

Complutum hodie *Alcala de Henares*. Olim & *Al-
cala S. Iusti*. Academia hic illustris.

Cap. lxxiiij.

Carraca eadem cum Antonini *Ariaca*. *Guadalaia*,
hodie. Tagonius amnis. Sertorij Stratagema.

Cap. lxxiv.

Seguntia hodie *Siguenza*. Variè olim vocata. Reie-
cta opinio, quæ à Sagunto ortum dicit.

Cap. lxxv.

Bilbilim non esse *Calataiud*. Municipium fuit. Co-
gnominata *Augusta*. Aquis Salonis clara & ferri tem-
perie. Plinius emendatus. Cap. lxxvi.

Turiaffo hodie *Tarazona*. Ferri tēperie clara. Mons
Caunus. Martialis emendatus. Cap. lxxvij.

Clunia hodie *Crunna del Conde*. Municipium olim.
Sulpitia dicta. Plutarchus emendatus.

Cap.

I N D E X

Cap. lxxviii.

Numantia diutissimè Romanis restitit. Gerundensis Episc. duplex error. Ridicula opinio de etymo. Non esse *Zamorram*, sed *Soriam*. Pomponius Mela defensus.

Cap. lxxix.

Flauiobriga nunc *Bilbao*. Olim hîc Amanum portus. Situs eius & descriptio.

Cap. xxx.

Pompelon à Pompeio exstructa. Diuersa à Pompeij trophæis. Vbi hæc exstant. Occupatur à Ferdinando Rege.

Cap. xxxi.

Duplex Calaguris. Taraphæ error. Fidissima suis ducibus. Egregia inscriptio.

Cap. xxxii.

Cæsaraugusta Colonia immunis. *Salduba* vocata. Variæ opiniones & fabulæ de prisco nomine refelluntur. Colonia hûc ab Augusto deducta.

Cap. xxxiii.

Osca *Viatrix* cognominata. A Sertorio hîc scholæ instituta. Velleius Paterculus correctus.

Cap. xxxiv.

Ilerda hodie *Lerida*. Sardones vbi. De origine Ilerdæ. Sicani nomen à Sicori æmne traxerunt. Antiqua hîc Academia.

Cap. xxxv.

De Tarraconis origine. Scipionum opus. Dicta *Colonia Iulia Viatrix Tyrrhenica*. Strabonis lapsus. Circi vestigia. Inscriptiones veteres. Vino linoque nobilis.

Cap. xxxvi.

Emporiæ hodie *Ampurias*. A Phocensibus condita. Incolæ diuersi. Inscriptio vetus.

Cap.

I N D E X.

Cap. xxcvij.

Montis Serrati descriptio. Quando D. Virgini hic exstructum templum.

Cap. xxcvij.

De Barcinonis origine reiectæ fabulæ. A Carthagenensibus condita. *Barcinus* & *Barcilona* dicta. *Fauntia Iulia Augusta* cognominata. Urbis descriptio.

Cap. xxcix.

De Gerundæ origine varia. Hodie *Girona* dicta. Situs eius & descriptio.

Cap. xc.

Pyrenæi montes. De etymo varia.

Cap. xci.

Rhuscino olim Galliæ annexa. Perpinianum veteribus ignotum. Opinio Annij Viterbiensis explosa. Descriptio eius.

Cap. xcij.

Salsulæ hodie *Salsas*. Fontis ibi descriptio. Depiscibus fossilibus multa.

Cap. xcij.

Cassiterides stanno nobiles. De situ illarum disquisitionis. Plinij lectio controuersa. *Oestrymnides* Festo, *Hesperides* Dionysio Alex. dicta. Festus Auienus correctus. Vbinam hodie sint.

Cap. xciv.

Pityusæ insulæ, *Ebusus* & *Ophiusa*. Serpētibus infesta *Ebusus*. Eiusdem nominis vrbs. Colonia Carthaginensium. Isidorus emendatus. Plinij lectio defensa contra Suritam.

Cap. xc.

Baleares insulæ cur *Gymnesia* dicta. Antonini lectio stabilita contra Simlerum. Vnde nomen. Funditores optimi. Laticlauo primi vsi. Mores & ritus.

N O B I.

NOBILIORES
HISPANIAE
FLVII.

<i>Anas.</i>	<i>Minus.</i>
<i>Batis.</i>	<i>Monda.</i>
<i>Cinga.</i>	<i>Salo.</i>
<i>Cogedus.</i>	<i>Sicoris.</i>
<i>Durius.</i>	<i>Sucro.</i>
<i>Iberus.</i>	<i>Turia.</i>
<i>Lethe.</i>	<i>Tagus.</i>

LVDO.



LVDOVICI NONII

HISPANIA

CAPVT I.

De Hispaniæ nomine, & etymo. Plinius explicatus. Stephanus Byzantinus emendatus. Variè olim vocata,

Gentium primordia, urbiumque origines in obscuro esse, Scriptorum fœda adulatio, vanitasque plerumque facit. Dum enim gloriam, ex vetustate auidi venantur, initia populorum augusta, splendidaque comminiscuntur: & Poëtarum licentia, miscendo vera falsis, ad inanes Deos & Heroës deducunt. Hinc fictæ urbium origines, inauditæ Regum series, nominaque defluxere: ipsamque antiquitatem, dum anxie suis student asserere, fabulis

bulis mendacijsque miserè defœdant. Largiter hac in parte deliquere Hispani Scriptores: nam cum patriam antiquitati sacrare conantur, ab Hispano Herculis filio, vel ab Hispalo Rege, Hispaniæ nomen fluxisse, vno consensu contendunt omnes. Sed citra classici alicuius auctoris calculum. Ego verò veterum scriptis insistens, à Pane Dionysij comite, non vnus, aut proletarij scriptoris suffragio, deriuatum esse euincam. Agmen mihi ducat C. Plinius lib. iij. cap. i. *Lusum*, inquit, *Liberi patris, aut Lysam cum eo bacchantem, nomen dedisse Lusitaniæ; Pana verò præfectum eius vniuersæ.* Vides clarè duo hîc dici, à Luso vel Lysa Lusitaniam, à Pane verò vniuersam nominatam HISPANIAM; sed hoc vt fabulosum eliminabit aliquis, non ego, qui sciam Plinium subtexere: *At quæ de Hercule, ac Pyrene, vel Saturno traduntur, fabulosa in primis arbitror.* Quid ni idem de Pane, aut Lysa dixisset, si commenticia iudicasset? Idem apertiùs longè docet Plutarchus libello De fluminibus & montibus cap. xvi. *Mox cum Satyros & Panas in militiam delegisset, suo imperio Indos subiecit, atque deuictâ Iberiâ, Pana illis locis præfecit, qui regionem de seipso PANIAM vocauit, at iuniores vocabulum inde deducentes SPANIAM dixerunt, uti voluit Sosthenes libro XIII. rerum Ibericarum.*

Clarè hîc ostendit, primò Paniam à Pane, deinde

inde & *Spaniam* vocatam. In vsu etiam fuisse postremum hoc nomen, testis est vetus Iuuenalis Scholiastes ad Satyram XII. vbi *Spaniam Beticam*, pro Hispania Bætica vocat. Idem docet multæ eruditionis Ambrosius Morales, Notis suis ad D. Eulogium Cordubensem. Facem hoc loco mihi præfert Plutarchus, ad illustrandum Stephani Byzantini locum libro De vrbibus. Vidit illum diligentissimus Abrahamus Ortelius, sed corruptum præterijt, cuius verba sunt in dictione ἰσπανία:

Ἰσπανία, δύο Ἰταλίας ἐπαρχία, ἡ ᾧ μεγάλη, ἡ δὲ μικρά ἐκλήθη ἡ καὶ ἰβηρία καὶ παννωνία. Id est: *Hispaniæ, duæ sunt Italiæ præfecturæ, maior & minor, vocatur etiam Iberia, & Pannonia.* Sed quis vñquam quæso, HISPANIAM *Pannoniam* dictam scripsit? quæ tantùm ab hac nostra,

Quantùm Hypanis Veneto distat ab Eridano.

Apagè ergò hanc vocem, quam nec per somnium quidem auctor scripsit, & eius loco substitue audacter *πανία*, Hispaniam scilicet, olim dictam Iberiam & Paniam. Quod cùm imperitis non arrideret, litterarum Non interiectione *Pannoniam* effinxerunt. Ioannes etiam Goropius Becanus lib. iv. rerum Hispanicarum luculentè satis docet, HISPANIAM primò fuisse dictam *Paniam*, & postea syllabæ *His* adiectione *Hispaniā*: quod Cimmeria seu Teutonica lingua,

Occiduam Paniam significat, ad discrimen Orientalis Panie, quæ Hesychio teste, Peloponesus erat. Et cùm constat Italiam olim *Saturniam* dictam, in Saturni memoriam, & *Latium*, quòd in illa latuerit, quis mirabitur *HISPANIAM* in Panis Dei honorem, *Paniam* olim dictam? præsertim cùm & ipse Stephanus, Arcadiam *παρία* quondam vocatam referat. Dicta etiam *Hesperia*, vel ab Hespero Rege, Atlantis fratre, vel potius ab Hespero stella, quæ ibi primò conspicitur. Sed non simpliciter *Hesperia* dicta, vt Italia; sed, vt docet Isidorus lib. xiv. cap. iv. *Vltima Hesperia*. Vnde Horatius lib. i. Carminum oda XXXVI.

Qui nunc Hesperia sospes ab vltima.

A Lucano tamen, citra vllam adiectionem, vocatur *Hesperia*:

Qui ferit Hesperiam, post omnia flumina Bætis.

Diodoro verò Siculo lib. vi. Bibliothecæ, & Appiano Alexandrino *Celtiberia*, à præpotente Celtiberorum populo. A Græcis verò passim *Iberia* dicitur, ab *Ibero* fluuio, vt Stephano Byzantino placet, vel ab *Ibero* Tubalis filio, vt Pseudo-beroso & nugatori Annio Viterbiensi; sed vero propiùs est, ab *Iberis* Asiæ populis, qui in Hispaniam venêre (si Varroni apud Plinium fides habenda) amni & regioni nomen inditum esse: licet Dionysio Alexandrino aliter visum sit, nempe

Orien-

Orientales Iberos, ab Hispanis ortum & nomen
sumfisse, quod & Eustathio eius Commentatori
& Nicephoro Callisto Eccles. Historiæ lib. viij.
cap. xxiv. persuasum video. Auctor est Strabo sub
finem libri tertij, olim Hispaniæ incolæ, *Igletas*
vocatos fuisse: qua de causa, me prorsus fugit,
nisi cum Cl^{mo} Casaubono placeat *Gletas* substi-
tuere. Teste enim Stephano: γλήτες ἔδνθ' ἰβηρικόν
μῆ, τοὺς κυνήτας. Id est: *Populus Hispaniæ apud Cy-
netas*: qui, eodem teste, & *Cynesij* vocantur, erantq.
ad Oceanum circa Herculis Columnas, vnde
& *Cyneticum promontorium*: quod Ortelius non
procul à Sacro collocat. Non multum ab his di-
uersus Festus Auienus in Iambis, nisi quod Anam
amnem per Cynetas dicat fluere:

Ana amnis illic per Cynetas effluit

Sulcatque glebam.

Vnde, vt in aperto est, hos populos in confinio
Lusitaniæ & Bæticæ olim fuisse, ita etiam æquè
obscurum quinam illi fuerint.



CAP. II.

*Hispania situs & figura. Diuisio
eius sæpe mutata.*

EXtrema terrarum ad solis occasum est Hispania, quæ naturæ sollertis ingenio, velut alter orbis, partim Pyrenæis montibus, partim Oceani æstibus, & Tyrrheni maris litoribus coronata includitur. Corio bubulo humi protenso comparatur, Straboni lib. iij. Iustino libro xlv. propè quadratæ est figuræ: Paulo verò Orosio lib. I. cap. ij. & Æthico in Cosmographia sua trigona est: cuius longitudo, auctore Strabone, sex millia stadiorum, latitudo quinque millia complectitur, vt maximum. Appiano autem Alexandrino in Ibericis, tam longitudine quàm latitudine sua, decem millia stadiorum explet. Plinius non multum ab Appiani calculo discedit, nam mille & octuaginta duo M. P. habere in longitudine ostendit: latitudo inæqualis est.

In duas primùm diuisa prouincias, *Citeriorem & Vltiorem*, separante vtramque nobilissimo amne Ibero. Strabo in *Exteriorem & Interiorem* à Romanis diuisam dicit: Stephanus verò Byzantinus in

in *Maiorem* & *Minorem*, quarum hæc *Vltior*, illa *Citerior* commodè dicetur. Labente tamen æuo, & prouinciarum terminis mutatis, tres effectæ sunt, *Vltiore* in *Bæticam*, & *Lusitaniam* diuisâ; *Citerior* verò etiam *Tarraconensis* nuncupata, à *Tarracone* vrbe primaria. *Bætica* quidem à septemtrione clauditur *Ana* fluuius; ab occasu *Atlanticum*; à meridie *Balearicum* prospectat mare (quod est inter fretum *Herculeum*, & *Charidami* promontorium, vulgò *Cabo de Gata*;) ab oriente terminatur linea ducta ab hoc promontorio per *Castulonem*, ad *Anam* vsque flumen. *Lusitaniam* terminat à septemtrione amnis *Durius* (qui eam à *Tarraconensi* diuidit;) à meridie *Anas* amnis à *Bætica* eam separat; ab occidente *Atlantici Oceani* ea parte, quæ inter *Anæ* & *Durij* ostia est; ab oriente *Tarraconensi* prouincia distinguitur. *Tarraconensis* autem Prouincia à septemtrione in *Oceanum Britannicum*, ab *Oeasone* promontorio (quod *Mario Aretio Cabo Breton*, alijs *Fonterabia* est) ad *Nerium* promontorium vsque, vulgò *Finis terræ*; ab occasu in *Oceanum Atlanticum*, à dicto promontorio ad ostium *Durij* amnis excutrit; à Meridie *Lusitania*, & *Balearici maris* ora; ab Oriente *Pyrenæis montibus* includitur. His tribus *Hispaniæ* prouincijs duæ sunt additæ, *Constantini Magni* tempore, vt cum *Ioanne Margarino* Ge-

rundenſi Epifcopo , antiqua Hiſpaniæ teſtantur Concilia, Carthagenſis nempe, & Gallæcia; ſed non ſatis exactè. Nam è Sexto Aurelio Victore colligit rectè Onufrius Panuinius, ſub Hadriano Imperatore in VI. Prouincias diuiſam, vt refert & Sextus Rufus, & Iſidorus, in *Tarraconenſem, Carthagenſem, Luſitaniam, Gallæciam, Baticam, & trans freta Africæ Tingitanâ*. Liber etiam Notitiarum Imperij ſeptimam addit, *Inſularem*: quod demùm ſub Magno Constantino accidiffe, idem aſſerit exactiſſimus Romanæ Hiſtoriæ ſcrutator Panuinius. Superiori verò æuo diuiſa erat in XII. regna: *Legionis, Caſtellæ Antiquæ, & Nouæ, Aragoniæ, Portugalliæ, Nauarræ, Granatæ, Valentia, Toleti, Gallæciæ, Algarbiorum, Murtiæ, Cordubæ*, Ex quibus priora quinque maioris famæ nominſque fuere, quæque continuam Regum ſeriem habuerunt.

CAP. III.

Fabula de priſcis HISPANIÆ Regibus exploditur. Beroſus, & Annii Viterbienſis reiſciuntur.

CVM paſſim Hiſpanicarum rerum Scriptores, de primis HISPANIÆ Regibus multa tradant, pretium operæ fore credidi *πάρρηγον* hoc ad-

adtexere, & ab ouo hoc commentum refellere. Ferunt enim vnanimi consensu, Tubalem post cataclysmum vniuersalem, in HISPANIA traiecisse, sui que nominis vrbes condidisse *Serubalem*, & *Tudellam*; postea & Noënum hisce litoribus appulsum, *Noëlam* in Gallæcia, & in Asturia *Noëgam* exstruxisse: à Tubale longam Regum seriem fluxisse, nempe Iberum, Idubedam, Brigum, Tagum, Bætum, Siconum, Sicannum, aliosque, quos recensere molestum esset. Huius choreæ, & fabulæ præfultor fuit Ioannes Annius Viterbiensis, homo non religiosissimæ fidei: illum secuti ceteri

— *sicut grex totus in agris
Vnius scabie cadit & porrigine porci.*

Is Berosum Chaldæum primus in lucem dedit, & Commentario illustrauit, qui non solum de Chaldæorum, sed totius pœnæ orbis primordijs, Regibusque agit. Sed nihil hæc cum Beroso illo, quem Athenienses χρυσόγλωττον vocarunt. Nam cum is ante Alexandri Magni æuum vixerit, quo non solum Chaldæis, sed & Græcis Europæ res, & præcipuè HISPANIAE, in occulto erant, multisque etiam post sæculis latuerunt; donec victricibus Romanorum armis orbis passim detectus, & per commercia coniunctus fuit. Vnde ergò Beroso, tam immenso terrarum spatio ab

Hispania remoto, tam accurata illius Prouinciæ notitia contigit? sed demus hæc illi diuinitus fuisse cognita: cur posteriorum nemo Scriptorum, ad quos Berosi opera peruenerunt, horum meminit Regum? cur hoc ab Eusebio præteritum in Chronicis? Nihil agitis: puræ putæ nugæ sunt, nec genuini solùm hoc esse Berosi opus ausim inficiari, sed Anni potius Viterbiensis, aut alicuius malè feriatì commentum credo: cui sub specioso hoc titulo, posteritati illudere lubido fuit, ratus posteros omnes ita fungos fore, ut lupinos hos ab ære nescirent discernere. Sed quis tam modesti splenis est, dum Hispanica nomina, à Chaldæo homine audit è medio Latio peti, ut non risu diffuatur, nec Lucilianus ille Crassus hoc sibi imperabit. Anne aliquid ineptius, vel audaciùs dici potest, quàm *Setubalem* à Tubale conditam, qui numquam Hispaniæ pedem intulit, sed apud Ponti accolas Iberos habitauit? Nec *Setubalis* nomen Latino cælo, aut fido alicui Scriptori notum, nisi sub Catobrigis nomine, ut fusiùs suo loco patebit. An ideo dicemus *Noëgam*, aut *Noëlam* à Noë fundatam, quia vocis aliqua affinitas intercedit? Sic Iberum Tubalis filium fabulantur, à quo postea amni, & toti prouinciæ nomen inpositum: cùm constet ab Asiaticis Iberis hoc nomen emanasse. Sic Brigum Regem somniant,

niant, quia multæ in Hispania vrbes in Briga desinunt, vt *Segobriga*, *Flauiobriga*, *Mirebriga*, quod idem ac Germanis *Burgum*, & Gallis *Dunum*, vt *Augustodunum*, *Noviodunum*. Sed piget his diutiùs immorari ineptijs, quare

— *ne me Crispini scrinia lippi*

Compilasse putes, verbum non ampliùs addam.

Præsertim verò cum Becanus noster, & Gaspar Barrerius, dudum personam huic Pseudoberoso detraxere, multa que vero Beroso contraria habere ostenderunt. Quare auctor sim, vt cum interprete suo Annio

Aut fugiat Viicam, aut vnctus mittatur Ilerdam.

Sufficiant hæc de fabulosis Hispaniæ Regibus: de veris verò Regibus mirum, quàm altum vbique silentium, & paucorum admodùm nomen vel fama superest. Refert Iustinus, *Gargorim* quemdam vetustissimum Tartessiorum Regem fuisse, qui mellis colligendi vsum primus inuenit: huic ex filix stupro nepos successit *Habis*, per admirabiles casus, & stupenda pericula diuinitus seruatus, non secus ac Romæ conditores. Hic populum legibus iunxit, & ex agresti ciuilem effecit: quo mortuo, regnum per multa sæcula à successoribus eius retentum est. Macrobius etiam *Theronis* meminit, Citerioris Hispaniæ Regis. Mitto de Arganthonio & Geryone dicere: qui in
Bati-

Bætici angulo imperarunt, quia noti omnibus. Mandonium & Indibilim, etsi loquantur Historiæ, inter regulos potiùs & dynastas, quàm inter Reges numerandos puto.

C A P. IV.

Varij Hispaniæ incolæ. Romani variè illam rexerunt, per Procons. Prætores, Legatos, Vicarios, Comites, Præsides.

VARIOS venisse in HISPANIAM populos, tamquam ad asylum aliquod, narrant historiæ: quorum nonnulli auitis sedibus pulsî, ut Phœnices, Rhodij, &

— *Teucer Salamina, patremque*
Cum fugeret.

Alij abundante multitudine, patriæ graues, huc Colonias deduxêre, ut Celtæ. Aliqui verò provinciæ opibus, & fertilitate allekti, & mercimoniij causa hîc sedes fixêre: ut Phœnices, Tyrijq. Imperij verò cupidine, primi Carthaginenses; postea & Romani in illam traiecere, & tamquam pro Helena aliqua pugnantes mutuis illam claudibus nobilitarunt. Causam, cur primùm in

Hi-

Hispaniam Carthaginenses venerint, aperit Iustinus lib. xlv. *Gaditani, cum à Tyro, vnde & Carthaginensium origo est, sacra Herculis per quietem iussu in Hispaniam transtulissent, urbemque ibi condidissent, inuidentibus incrementis nouæ urbis, finitimis Hispaniæ populis, ac propterea Gaditanos bello laceffentibus, auxilium consanguineis Carthaginenses miserunt: ibi felici expeditione, & Gaditanos ab iniuria vindicauerunt, & maiorem partem prouinciæ imperio suo adiecerunt. Postea quoque, hortantibus primæ expeditionis auspicijs, Hamilcarè imperatorem cum magna manu ad occupandam prouinciã miserunt: qui magnis rebus gestis, dum fortunam inconsultius sequitur in insidias deductus occiditur. Occasione verò Saguntini excidij, traiecere in HISPANIAM Romani, qui variè & inæqualiter illam administrarunt (nam de Carthaginensium imperio, nihil, quod sciam, posteris transmissum.) Primus autem P. Scipio deuictis Carthaginensibus, in Prouinciã redegit HISPANIAM, vt ex T. Liuiò & Appiano in Ibericis est colligere. Per Procons. administrata primùm, à primis Scipionibus, ad Cornelium Lentulum, & L. Stertinium, qui anno ab V. C. 10. Lv. Procons. creati sunt: postea verò Prætores Prouinciã obtinuerunt, C. Sempronius Tuditanus Citeriorem, M. Heluius Vltiorem; anno ab V. C. 10. Lvij. quo tempore primùm*

VI. Prætores creatos , crescentibus Prouincijs, & latè diffuso imperio Rom. testis est T. Liuius lib. xxxij. Anno verò IO. LIX. gliscente bello, præter duos Prætores consulari duce & exercitu opus fuit , missusque M. Porcius Cato Cos. Pro mole verò belli nunc Prætores , nunc Proconsules , nunc Consules, prouinciã administrarunt, vt cuique obuium erit legenti Romanas Historias: vnum sit multorum instar exemplum. Bello, quod aduersus Sertorium gestum est , Q. Metellus Procos. & Cn. Pompeius Quæstor, cum potestate consulari missi sunt , vt refert Liuij Epitome lib. xci. Ipse etiam Pompeius HISPANIAM per Afranium , & Petreium legatos administravit. Augusti verò Cæsaris imperio, *Betica* S. P. Q. R. commissã fuit: *Tarraconensis* & *Lusitania* Cæsari seruatae sunt, teste Dione lib. xliij. Tiberij verò Cæsaris æuo , teste Strabone lib. iij. plebis nomine, in *Beticam* Prætor mittebatur, qui Legatum & Quæstorem habebat , in reliquam verò prouinciã Cæsar duos mittebat legatos, Prætorium, & Consularem. Prætorius quidem ius dicebat *Lusitaniæ* : Consularis verò vniuersæ *Tarraconensi* imperabat ; qui secum tres legatos habebat, quo commodiùs vastæ illi prouinciæ ius diceret. Mutatum tamen & hunc morem sub ipso Tiberio refert Tacitus lib. iv. Annalium, cùm dicat

dicat Vibium Serenum Procos. Vltioris Hispaniæ fuisse, quæ dignitas ad Gratiani Imperatoris tempora duravit, eiusque demum æuo defuisse videtur, vt apud Sulpitium Seuerum lib. ij. Sacræ historiæ videre est. Vltimumque fuisse Proconsulem Voluentium notat: in cuius locum vicarius substitutus fuit, *nam iam Proconsulem habere desierat*, vt ait. Postmodum verò nunc Præsidium, nunc Comitum, nunc Vicariorum nomen viguit. Sextus verò Rufus suo æuo dicit *Beticam & Lusitaniam* Consulares fuisse prouincias, *Tarracoensem* verò Præsidialem.

C A P. V.

Hispaniæ laus à salubritate, fertilitate. Variæ metallorum secturæ. Immensæ opes.

DE nomine, situ, & diuisione HISPANIÆ hætenus: æquum nunc est de natiuis eius bonis, & largitricis naturæ opibus dicere, ne, vt Amyclæ olim, silentio pereant. C. Plinius vltimis verbis vasti sui operis, Italiâ exceptâ, totius orbis primam laudem Hispaniæ defert. Decumanum hoc testimonium, & præiudicatæ auctoritatis sit

tis sit ad instar. Sed lubet singula inquirere, ne à fauore potiùs, quàm merito emanasse hoc quis putet. An cæli temperiem quæris? tota ea vitalis, ac perennis salubritatis est, adeò vt beatorum hîc felices sedes, & Elysios campos Homerus statuerit, Strabone teste. Quippe nec violento æstu excoquitur, aut nimio frigore tellus adurit, non ventorum procellis, aut graui paludum nebula obnoxia; sed aura est suda serenaque. fontium copia, nemorum frequentia, montium articulis, & portuosis litoribus egregiè ornata. At de soli forsitan felicitate dubitas? *In omnia*, inquit Iustinus, *frugum genera secunda est adeò, vt non ipsis tantum incolis, verum etiam Italiae, vrbiq; Romanæ, cunctarum rerum abundantia sufficiat.* Olei verò mellisque, & vini non abundans modò, sed & prodiga. Lina, & nobilia pecoris vellera, vbi gentium melicra?

*Nec varios discit mentiri hîc lana colores,
Ipse sed in pratis aries iam suaue rubenti
Murice, iam croceo commutat vellera luto.*

Martialis hoc disertè libro ix. Epigr. Lxij.

*Vellera natiuo pallent vbi flaua metallo,
Et linit Hesperium bractea viua pecus.*

Equorum verò tam pernices alit greges, vt non frustra vento conceptos antiquitus creditum sit. *Nihil denique in ea otiosum*, ait I. Solinus, *nihil sterile quidquid cuiuscumq; modi negat messes, viget pabulis,*
etiam

etiam quæ arida sunt ac sterilia, rudentum materiam nauticis subministrant. Dicam cum Marone, sed dicam verè:

*Hæc loca, non tauri spirantes naribus ignem
Inuertère, satis immanis dentibus Hydri,
Nec galeis, densis quæ virum seges horruit hastis:
Sed grauidæ fruges, & Bacchi Massicus humor
Impleuère, tenent oleæ armentaque læta.
Hinc bellator equus campo sese arduus infert.*

Summæ hæc telluris bona & in aperto sunt; sed & operta eius viscera recludere, & scrutari lubet. Mirabere tam variis, & multiugis passim diuitijs fetam. Strabo lib. III. Aurum, argentum, æs, ac ferrum nullibi terrarum, neque tantum, neque tam probatum generari est auctor. vnde vt lepidè ita, & verè Posidonius refert, loca subterranea hîc non à Plutone, sed ab opulentia Deo Pluto incoli. Plinius etiam lib. III. cap. III. *Metal-
lis, inquit, plumbi, ferri, æris, argenti, auri tota ferme
HISPANIA scatet. Citerior & specularibus lapidibus.
Bætica & minio: sunt & marmorû lapicidina.* Magna hæc sunt, sed maius multo, quod præter Diodo-
rum Siculum lib. VI. Bibliothecæ, refert Aristoteles, lib. de mirandis auditionibus: Phænices tantam auri, argentiq. copiam ex HISPANIA asportasse, vt, cum onustis nauibus argentum superaret, ex ipso anchoras conflauerint. Sed tam

inexhausta erat argenti copia, vt asserat Strabō, Carthaginenses duce Barca (*Amilcare* forsan) in Turdetania Hispanos inuenisse vtentes præsepibus & dolijs argenteis. Scio V. CL. Isac. Casaubonum per vocem *παρυν* *laquearia domus* accipere, & non *præsepia*: vtrumque tamen immensam, & poenè fastiditam argenti copiam ostendit. Sed de fide dubitabit non nemo, & dilutæ auctoritatis hæc queretur: videat quid Plinius dicat lib. xxxiiij. cap. IV. *Vicena millia pondo [auri] ad hunc modum singulis annis Asturiam, atque Gallaciam, & Lusitaniam præstare quidam tradiderunt, ita vt plurimum Asturia gignat, neque in vlla parte terrarum, tot sæculis hæc fertilitas.* Sed quota hæc HISPANIAE pars? quid vniuersam præstitisse dices? & ne videar, instar rorarij militis, eminus tantum tela spargere, lubet collato pede rem gerere, & per ipsas Romanorum triumphales prædas ire, vel ipso T. Liuiο ductore. Iuuabit vidisse tot Iasones ad auratam hanc prædam confluxisse, & tot spolijs auctos rediisse. P. Corn. Scipio, primus quod sciam, argenti pondo quatuordecim millia, trecenta quadraginta duo, & signati magnum numerum ærario intulit. L. Lentulus quadraginta quatuor millia argenti, auri verò bis mille quinquaginta pondo, præter pecuniam militibus diuisam, Corn. Lentulus, & L. Stertinius eodem poenè tem-

nè tempore, argenti septuaginta millia, auri mille quingenta pondo. M. verò Heluius argenti infecti quatuordecim millia, septingenta triginta duo pondo, signati bigatorū septemdecim millia, viginti tria, Oſcensis argenti centū vigintimillia, quadringēta triginta octo, ex vltiore Hispania asportauit. C. Minucius ex citeriore, triginta quatuor millia octingenta argenti, bigatorum septuaginta octo millia, argenti Oſcensis ducenta septuaginta octo millia ærario intulit. Et cui cupidus singulos triumphos colligere, ipsū Liuiū consulat, & in acervū cōtrahat triumphales has manubias, videbit exiguo annorum spatio populum Rom. deprædatum fuisse supra sexcenta millia argenti infecti pondo, argenti verò Oſcensis quadringenta millia, auri verò circiter decem millia, signati verò infinitam copiam. Mitto nunc ducum militumque rapinas, donatiua, stipendia, quæ dubio procul summam hanc multò superant. Et ex hostica hæc. Quid ex pacata prouincia opum illis venisse censebimus? vel vnus Plinij locus sufficiet, qui lib. xxxiiij. refert suo adhuc æuo per Hispanias durasse ab Hannibale inchoatos puteos, ex quibus qui *Bebelo* vocatur, CCC. Annibali pondo in diem subministravit, quæ Budæi calculo tria aureorum millia efficiunt. Potiori certè iure Aurēā messem quis HISPANIAM,

quàm cum Stratocle aut Dromoclida tribunal
vocabit: vbi pace, belloq. tanta opum seges indies
succresceret, adeo vt iure de illa animosus Poëta
Claudianus cecinerit, lib. de laudibus Serenæ:

*Quid dignum memorare tuis HISPANIAE terris
Vox humana valet? primo lauat æquore solem
India: tu fessos exactâ luce iugales
Proluis, inque tuo respirant sidera fluctu.
Diues equis, frugum facilis, pretiosa metallis,
Principibus secunda pijs.*

Sed hoc laudis agmen, mihi claudant Latini
Pacati Drepani, Panegyrico suo ad Theodosium
Augustū, verba: Sint, vt scribitur, Gargara prouentu
lata triticeo, Mevania memoretur armento, Campania
censeatur monte Gaurano, Lydia prædicetur amne Pacto-
lo, dum Hispaniæ vni, quidquid vbiq. laudatur, assur-
gat: hæc durissimos milites, hæc expertissimos duces, hæc
facundissimos oratores, hæc clarissimos vates parit: hæc
Iudicum mater, hæc Principum est. Prisca etiam nu-
mismata luculentè HISPANIAE dotes loquun-
tur. in Hadriani enim Imp. nummo depingitur
femina sedens cum oleæ ramo, & cuniculo ad pe-
des, olei vbertatem & cuniculorum frequentiam
denotans: vel, vt suspicor, non absurdè, ob metal-
lorum vberes secturas, quæ cuniculis sub terram
aguntur. Vnde Catullus vocat Celtiberiam cunicu-
losam. Galbæ verò Imp. nummus refert feminam
milita-

militariter ornatam: quæ clypeum & bina iacula finistrâ, dextrâ verò spicas frumenti gestat, vt bellacem, fertilemq̃ue simul designet prouinciam. Sed vnde tantum à prisca fertilitate degenerauit? an occulti aliqui & noxij siderum positus genitalem telluris vim infecere? an effeta & lassâ terra inani spe agricolas lactat? neutrum ego in causâ putem. Æquè enim ac priscis sæculis, in omnia frugum genera fecunda est. Sed deest industria. nam cùm natura sua in arma magis, quàm aratra propensi sint Hispani, per longinquas in vtramque Indiam expeditiones, & continuata bella, exhauritur iuuetus. Hinc agriculturalum infrequentia; hinc agri neglecti potiùs quàm steriles cernuntur. Nec desierunt hîc metalla; sed Regum interdicto, HISPANIAE parcî nunc iubetur, donec India thesauros suos suppeditat.

CAP. VI.

Incolæ bellicosi. Diutissimè Romanis resisterunt. Fideles. Hospitales. Litteris dediti.

Sufficiat modò, folia hæc aut umbras potiùs laudis, pendente manu attigisse. Sed quibus se verè iactat Hispania, nunc dicenda. Incolarum virtutes & ingenia, quæ domi forisque egregiè

conspicua, in bellū tamen & arma magis propensa: adeo vt plurimis, Iustino auctore, *militares equi & arma sanguine ipsorum cariora sint*. Ideo affluenti

Nec vitam sine Marte pati: quippe omnis in armis

Lucis caussa sita; & damnatum viuere paci.

Verissimum hoc Silij dictum memorabili exemplo confirmarunt, dum M. Porcius Cato, quorundam rebellione ictus, arma omnibus cis Iberum Hispanis ademit, quod adeo ægrè passos scribit Liuius, vt multi mortem sibi met ipsi consciuerint, *nullam vitam sine armis rati*. L. Florus ideo *Bellatricem, vixis armisque nobilem, seminarium hostilis exercitus, & Hannibalis eruditricem* appellat. Thucydides oratione, quam Alcibiades ad Lacedæmonios habuit, Iberos pugnacissimos barbarorum vocat: nec de Ponti accolis ibi sermo (vt non nemo forsan suspicatur) sed de Hispanis rostris. Indicio est Siciliæ, & Carthaginensium cum HISPANIA vicinitas, à qua altera Iberia nimis quàm remota. Imp. verò Claudius, apud Trebellium Pollionem, HISPANIAM VNÀ cum Gallia *Romani imperij vires esse dicit*: T. verò Liuius, *non quàm Italia modo, sed quàm vlla pars terrarū bello reparando aptiorem, locorum hominumque ingenys esse ait*: quod non sine suo periculo & clade essent fere Romani. Nusquam enim diutiùs & maiori mole certatū est, nec vlla prouincia tantum Romani

mani cruoris hausit. *Per ducentos enim annos, inquit Velleius Paterculus, in hac multo mutuoq. ita certatum est sanguine, ut amissis P. R. imperatoribus, exerciti-
busq. sæpè contumelia, nonnumquam etiam periculum Romano inferretur imperio. Illæ enim provinciæ Scipio-
nes consumserunt; illæ contumeliosæ viginti annorum bello, sub duce Viriato maiores nostros exercuerunt; illæ terrore Numantini belli P. R. concusserunt; in illis turpe Q. Pompeij fœdus, turpiusq. Mancini Senatus, cum ignominia dediti imperatoris rescidit; illa tot Consula-
res, tot Prætorios absumsit duces, patrûmque ætate, in tantum Sertorium armis extulit, ut per quinquennium, diiudicari non potuerit, Hispanis Romanisne in armis plus esset roboris, & vter populus alteri pariturus esset.*
Sed **HISPANIAE** numquam animus fuit, ait Florus, aduersus Romanos confurgere, numquã conferre vires suas lubuit, neque aut imperare, aut tueri libertatem publicè: alioquin ita vndique mari, Pyrenæoq. vallata, ut ingenio situs nec adiri quidem potuerit; sed antea à Romanis ob-
fessa est, quàm se ipsam cognosceret, & sola omnium prouinciarû vires suas, postquam victa est, cognouit. Bellaces hos egregiè fuisse, quis mirabitur? cùm corpora hominum ad inedia, & laborem, animi ad mortem parati erant, ideoq. in acie exultabant, tamquam gloriose vita excessuri: lamentabantur in morbo, tamquam tur-

piter & miserabiliter perituri. Nec defuere inui-
 cto illi robori, & pugnaci animo, egregiæ pacis
 artes, & togæ decora. An fidem in Socios vel
 Principes quæres? nuspiam poenè sanctiùs culta.
 Testis ipsa Sagùtus, vel maximè fidei infelix mo-
 numentum: quæ, potiùs quàm à societate P. R.
 descisceret, publico & communi rogo se concre-
 mauit. Celtiberi nefas esse ducebant superesse,
 cùm is occidisset, pro cuius salute spiritum deuo-
 uerant. Hinc C. Iulius Cæsar, teste Suetonio, sti-
 patores sibi elegit Hispanos, & Augustus Cæsar
 Calaguritanorum cohortem habuit. In aduenas
 verò quàm hospitales fuerint, Iuculentè testatur
 Diodorus Siculus: *Aduenientes externos benignè
 hospitio excipiunt, adeo ut quadam æmulatione inuicem
 pro illorum honore certent: quos verò aduenæ sequuntur,
 hos laudant, amicosque. Decorum esse putant.* Litterarum
 verò studijs & sapientia omni æuo claruerunt.
 Auctor est Strabo Turdetanos Bæticæ populos
 sapientia excelluisse, & memorandæ vetustatis vo-
 lumina habuisse, & poëmata ac leges à sex anno-
 rum millibus conscriptas versibus. Sed verus
 hoc exemplum non nemo spernet. An & illud,
 ab vltimis Gadibus T. Liuij fama excitos Ro-
 mam venisse Hispanos, ut illius aspectu frueren-
 tur, cuius eloquentiam tantopere admiraban-
 tur? Ausim dicere Italiâ exceptâ, nullam pro-
 uin-

uinciam claris ingenijs magis fecundā fuisse, nec
plura doctrinę lumina genuisse. Loquatur duo Se-
necę, Columella, Lucanus, Martialis, Iulius Hygi-
nus, Pomponius Mela, Auerroës, alijque sexcenti:

Quos aget penna metuente solui

Fama superstes.

Nec inter postrema eius ornamenta censendum
puto, Vespasianum Augustum, teste Plinio, pro-
cellis reip. iactatum, vniuersę HISPANIAE
ius Latij tribuisse, pręsagus forsan, orituros hinc
quandoque Imperatores: quorum auspicio &
virtute, eneruatum luxu, & intestinis discordijs
Imperium, pristinas vires resumeret, & lacertos
iterum moueret. Testes Traianus, Hadrianus &
Theodosius, nullis Principibus virtute vel forti-
tudine inferiores. Vnde meritò Claudianus:

Sola nouum Latijs veltigal Iberia rebus

Contulit, Augustos. fruges, araria, miles

Vndique conueniunt, totòque ex orbe leguntur:

Hęc generat, qui cuncta regant.

De religione quid attinet dicere? Cum nuspiam
poenę terrarū plus sanguinis pro Christo sit effu-
sum, nec purius alibi seruata, aut felicius in re-
motissimas orbis plagas propagata sit. Sed vbe-
riori hęc dicenda essent stilo, mihi sufficiat leui
hęc penicillo tantum adumbrasse. Nunc institu-
tum vrgeamus, ducto à Bætica initio.

CAP. VII.

*Betica, Turdetania dicta. Martianus
Capella emendatus. Oleis abundat.
Minio nobilis.*

VT ceteras prouinciarum, amœno cultu, & fertili nitore præcedit Bætica, ita etiam non immeritò ab illa mihi auspicandum duxi. Nomen habet à fluuio eam mediam secante Bæti. Plinio etiam *ulterior* vocata, Straboni verò lib. iij. *Turdetania* etiam: *Regio ipsa, à flumine Bætica, ab incolis Turdetania vocatur, à præpotenti scilicet Turdetanorum populo.* Hodie verò potior eius pars *Andaluzia* vocatur, corrupto nomine, à Vandalis olim incolis. A septemtrione, clauditur Ana fluuio; ab occasu, Atlantico Oceano; à meridie, mare Balearicū; ab oriente, linea ducta per Castulonem, ad Anam vsque terminat. Eius longitudo, à Castulone Gades vsque, teste Plinio, ex sententia M. Agrippæ, in CCCCLXXV. M. P. erat porrecta, latitudo verò eius à Carteiana ora CCXXIV. M. P. Diuersus à Plinio est Martianus Capella, qui lib. vi. *Eadem verò [Bætica] longitudinis dimensione distenditur à Castulonis opidi fine, in Gadi-tanum opidum, CCL. M. P. amplior æstimatur, latitudo*

rudo quoque in CCXXIV. M. P. excurrit. Sed cras-
 sior hic error est, quàm vt excusari possit. paulò
 enim inferiùs refellit perperam M. Agrippam:
 qui citerioris Hispaniæ longitudinem patere in
 CCCCLXXV. M. P. dicit, quod de Bætica Agrip-
 pam dicere ex Plinio patet Iuridicos in ea qua-
 tuor conuentus, *Gaditanum, Cordubensem, Hispalen-*
sem, & Astigitanum recenset Plinius. Fædè hîc ite-
 rum deprauatus Martiani Capellæ codex, qui duos
 tantùm agnoscit *Gaditanum & Cordubensem*. Malim
 certè codicem vtrobique accusare, quàm docto
 Afro inscitix notam inurere. Regio ipsa omnige-
 na frugum copia mirè luxuriat, siue vinearum
 prouentus, siue arborarios fructus requiras. Oli-
 uetis verò vnicè diues est, quod Plinius testatum
 reliquit lib. xvij. cap. xij. *Bætica*, inquit, *vberrimas*
messes inter oleas mittit: & lib. xv. cap. ij. post Italiã,
 inter Istriam & Bætiam, dicit par certamen de
 olei laude. vnde & Statius Papinius Silu. lib. ij.

Quæ Tritonide fertiles Athenas

Vnctis Bætica prouocas trapetis.

Cumque omnium ferax sit, tum vel præcipuè
 inexhausta & diuiti metallorum vena scatet. Sed
 minio inter cetera felix, maximæ olim apud
 Romanos auctoritatis: indicio est cura diligen-
 tiaque, qua illud seruabāt. vnde Plinius lib. xxxiiij.
 cap. VII. *Celeberrimum [minium] ex Sisaponensi re-*
 gione

gione in *Bætica* miniario metallo, vectigalibus populi *Romani*, nullius rei diligentiore custodia, non licet id ibi perficere excoqui que: *Romam* perfertur vena signata, ad dena millia ferè pondo annua.

Urbium etiam frequentia regionis felicitatem pandit. nam, teste *Plinio*, CLXXV. *Strabone* verò CC. memorabantur: quarum fama celebriores, quæ super amnes exstructæ aut æstuarijs adiacent: ad hæc litora vndique portuosa, orasque habet patentibus gremijs commercio aptissimas. Auræ hîc ita lenes, anni que tempestates adeo mites, ut non frustra antiquitas hac potissimum *Hispaniæ* in parte elysios campos esse crediderit. Sed *Bætice* illa pars, quæ *Anam* inter & *Bætum* amnes porrigitur, ut soli felicitate & vbertate à *Bætica* superatur, ita etiam mutato nomine *Bæturia* vocatur, in duas olim diuisa partes totidemque gentes, teste *Plinio*, *Celticos*, qui *Lusitaniam* attingunt, *Hispaniensis* conuentus, & *Turdulos*, qui *Lusitaniam* & *Tarraconensem* accolunt, iura *Cordubam* petebant. Hodie plerisque. *Estremadura* dicta. *Ioanni* verò *Genesio Sepuluedæ* doctissimo viro, *Petroche*, à *petrarû*, quæ ibi visuntur, frequentia, vocatur. *Strabo* macræ esse telluris regionem hanc, & immensæ siccitatis tradit.

CAP. VIII.

Bæticae nobiliores populi. Turduli, Turdetani, & τῦρδοι idem. Bastuli, Bastitani & Basetaei dicti. Appianus emendatus. Cunei.

TURDULI.

PRIUSquam ad Bæticae vrbes se flectat oratio, non inutile erit, nobiliores olim prouincię populos in medium producere, vt, quorum sparsim mentio incidet, iuuet illos semel & vno obtutu cognoscere. Primi, & magis illustres occurrunt *Turdetani* (qui & Bæticae Turdetanię nomen dedere) iidem & *Turduli* vocantur: licet Polybius apud Strabonem, eos diuersos faciat, & Turdulos finitimos esse Turdetanis ad septemtrionem dicat: T. autem Liuius lib. xxxiv. & Strabo nullum inter eos discrimen statuunt. Stephanus verò Byzantinus ex Artemidori sententia Turdetanię incolas τούρδοις, καὶ τυρδανέσι vocat. Ptolemęus inter Turdulos & Turdetanos discrimen ponit & confinia. nam Turdetanos dicit Lusitaniam attingere; Turdulos verò Tarraconensem: Plinius verò vtrosque *Turdulos* vocat his verbis:

Turduli,

Turduli, qui Lusitaniam & Tarraconensem accolunt, iura Cordubam petunt. Lilius vero citato loco ait: Omnium Hispanorum, maximè imbelles habentur Turdetani; freti tamen multitudine sua, obuiam ierunt agmini Romano. & subdit statim: Nec tamen ea pugna debellatū est: decem millia Celtiberū mercede Turduli conducunt, alienisque armis parabant bellum. Vbi clarum est utrumque nomen pro vno usurpari. Auctor est Strabo, hos inter HISPANIAE populos sapientia olim excelluisse, & litterarum studijs, leges quoque versibus à sex annorum millibus conscriptas habuisse. Incolebant olim potissima & mediterranea Bæticae, & quasi totam Andalusiam, demtis maritimis.

BASTULI.

Maritimam Bæticae oram accolunt *Bastuli*, qui & *Bastitani*, seu *Basjetani* vocantur. Strabo illos in ora illa, quæ Atlantico Oceano obuersa est, ad Anæ & Bætis ostia statuit: Plinius verò, non solam esse Bastulorum, sed & Turdulorum dicit. Cl. Ptolemæus eos *Pœnos* cognominat, ad discrimen forsan Bastitanorum, qui Tarraconensem inhabitant: an quia ora ea vniuersa originis Pœnorū est? vt Plinius ex sententia M. Agrippæ tradidit, & vt Pomponius Mela lib. ij. cap. VI. *Transvecti ex Africa Phœnices habitant.* Hos ego *Bastulos*

Bastulos Pœnos esse opinor, qui mendosè ab Appiano in Ibericis vocantur βλασφοίνικες, cùm potiùs βασοφοίνικες, vel βασυλοφοίνικες deberent dici: quod vt asserā facit ipse Appianus. nam illorum originem ad Annibalem refert his verbis: οἷς, φασιν, Ἀνίβαν τὴν ἀρχιδόνιον ἐποιχῆσά τινας ἐκ Λιβύης, καὶ παρὰ τοῦτο κληθῆναι βλασφοίνικας. Ita vt ex Bastulis indigenis & Phœnicibus, seu Pœnis aduenis nomen sit efformatum: ad quam forsan originem videtur Poëta Horatius allusisse lib. ij. Carm. oda II. vt bene obseruauit Abrahamus Ortelius

— quàm si Libyam remotis
Gadibus iungas, & vterque Pœnus
Seruiat vni.

Vterque enim Pœnus est, qui & Africæ & Hispaniæ maritimam oram colunt. Et cùm hi Pœnorum essent originis, mirum est, quòd Strabo referat illos coniugia more Græcorum contrahere, ægrotos verò Ægyptiorum ritu in plateis deponere, vt qui eo morbi genere tentati fuerint, illis simili remedio subuenire possint.

C V N E I.

INtra Herculis columnas degunt *Cunei*, teste Polybio lib. x. vbi refert Magonem hiemasse, quo tempore P. Corn. Scipionē in HISPANIAM traie-

traiecisse constat. Vocahtur autem *Cunei* à vicino Lusitanię promontorio, quod *Cuneus*. Plinio, Straboni verò in limine lib. iij. *ager Cuneus*, Græcis *σφει* dicitur. Mela verò lib. iij. cap. I. manifestò promontorium hoc etiam *Cuneum agrum* vocat: *Anæ proximum* [promontorium,] quia lata sede procurrens, paulatim se ac sua latera fastigiat, *Cuneus ager* dicitur. Appianus in Ibericis magnę vrbis, quam *Conistorgim* vocat, meminit inter *Cuneos* sitę, quàm refert à Cauceno Lusitano vi captam. Strabo verò in Celticis hanc urbem recenset, & *Conistorim* vocat. vnde colligere licet *Cuneos* illos olim fuisse circa Baturiam, vbi postea Celtici populi ex Lusitania adueniẽ sedes fixerunt. Ambrosius Morales credit illos eum tractum coluisse, vbi nunc *Nieblæ* comitatus est, cum adiacenti territorio.

CAP. IX.

Gades vnde dicta. Olim Aphrodisiæ, Erythia, Cotinula, Iunonis insulæ, & Tartessus dicta. Frequens nobilitas, magna potentia. Multa de templo Gaditano. Finis olim navigationis.

INsula est ad Batis ostia, quã Europa ab Africa dirimitur, & vnde Tyrrheni maris faucibus, Oceani æstus immittitur, angusto spatio à continenti,

tinenti, & veluti flumine abscissa, *Gades*, vel *Gadira* dicta, eò quòd videatur τῆς γῆς δειρά, id est, *Terræ collum*, vt refert Eustathius in Dionysium Alexandrinū: sed meliùs Hesychius, quod Phœnices *Gadira* περίφραγμα vocant, id est, *Sepimentum*. vnde & Plinius lib. iij. cap. XXII. *Pœni Gadira sua lingua sepem vocant*, eò quòd mari vndique sit circumsepta. Plato verò in Atlantico, seu Critia dialogo, aliam nominis originem adducit: Neptunum ex Clitone, Euenoris & Leusippes filia, refert quinque geminos masculorum partus suscepisse, primogenitum vocasse *Atlantem*, vnde & pelagus *Atlanticum*; alterum verò eodem partu editum *Gadirum* vocasse, qui Græcis εὐμηλος, id est, *Diues ovium*, dicitur, sortitū extremas Atlantice insulæ partes, ad columnas Herculis, suo nomine *Gadiricum* locum nuncupasse. Duæ olim erant insulæ, nunc vnica tantum: varijs olim nominibus dicta. ab Ephoro, & Philistide, referente Plinio, *Erythia*; à Timæo & Sileno *Aphrodisias*; ab indigenis verò *Iunonis* dicta. Dionysius Alexandrinus ante Tyriorum aduentum *Cotinusam* dictam ait, ἀπὸ τῶν κοτίνων, quod oleastris abundaret; Plinius verò à Timæo maiorem *Cotinusam* dictam refert; à Romanis verò *Tartesson*: cui adstipulatur Isacius Tzetzes, in Lycophronis Cassandrâ, qui scribit Tartesson insulam esse, & ciuitatē prope

Herculis columnas: in qua Arganthonius regnavit. Ex Sallustio refert etiam Priscianus *Tartessus* esse, quæ Punica lingua *Gadir* vocatur. Idem Festus Auienus, in descriptione oræ maritimæ:

Hic Gadir vrbs est, dicta Tartessus prius.

Dux in hac Insula olim erant vrbes, præter *Gaditanam*, teste Strabone: siquidem L. Cornelius Balbus, vir triumphalis, alteram extruxit: quam *Neapolim* vocarunt, & ex ambabus tertia deducta, *Sidon* dicta; Plinius verò Strabone posterior, vnius tantum meminit opidi his verbis: *Opidum habet civium Romanorum, quod appellatur Augusta vrbs Iulia Gaditana.* Sed cur *Civium Romanorum* vocet opidum, causam refert Dion Cassius lib. xli. C. Iulium Cæsarem, pacatâ Hispaniâ Gaditanos ciuitate Romana donasse, quam donationem deinde populus ratam esse iussit, atque ita eos somnij ergò remunerasse, quod quæstor ibi habuit. Visus enim sibi cum matre rem habuisse, atque inde rerum potiundi spem hausisse. Municipium verò olim fuisse ostendit vetusta inscriptio, quæ *Medinæ Sidoniæ* visitur:

M. ANTONIO. M. F. GARISIACO.

II. VIRI. MVN. AVG. GAD. D. D.

Eo verò incrementi paulatim, Romanorum amicitia, vrbs hæc peruenit, vt inter quatuor Bæticæ conuen-

conuentus annumeraretur. Tiberij verò Cæsaris tempore ad tantæ potentiæ culmen euaserat, vt Strabo scribat lib. iij. vno suo ætatis censu, equestris ordinis, Gaditanos viros, quingentos esse censos: quot in nulla Italicarum urbium, præterquàm Patauij, reperti sunt. Nobilissimam certè olim fuisse urbem, vel ex eo liquet, quòd Iuba Mauritaniæ Rex magni fecerit, huius vrbis se esse Duumvirum, teste Festo Auieno: cuius versus ex ora maritima lubet hîc adtexere, loquitur de Gadibus:

*At vis in illis tanta, vel tantum decus
Ætate prisca, sub fide rerum fuit:
Rex vt superbus omniumque præpotens
Quos gens habebat forte tum Maurusia,
Octauiano Principi acceptissimus,
Et litterarum semper in studio Iuba
Interfluoque separatus æquore,
Illustriorem semet, vrbis istius
Duumviratu crederet.*

Fidem verò potentiæ facit, quod Macrobius Saturnaliorum lib. i. cap. XX. refert: Theron, inquit, Rex Hispaniæ citerioris, cùm ad expugnandum Herculis templum ageretur furore, instructo exercitu nauium, Gaditani ex aduerso venerunt prouecti nauibus longis, commissioque prælio, adhuc æquo Marte consistente pugnâ, subito in fugam versæ sunt regiæ naues,

simulque improviso igne correptæ conflagrauerunt. Paucissimi, qui superfuerant hostium, capti, indicauerunt apparuisse sibi leones, proris Gaditanae classis superstantes: ac subito suas naues immissis radijs, quales in solis capite pinguntur, exustas. Cicero etiam oratione pro L. Cornelio Balbo, refert Gaditanos, Romanorum Imperatores commeatu, pecuniaque sæpe iuuisse, & populum Romanum in annonæ caritate, suppeditato frumento leuasse. Quod permagni faciet, qui sciuerit quanto frumento Romana vrbs olim indigebat.

Inter celeberrima verò huius Insulæ opera templum erat Herculis, quo plures Romanorum duces, magnis rebus gestis vota soluturi ventitabant, vt auctor est Diodorus Siculus lib. vi. Hannibalem etiam refert Silius Italicus, priusquàm in Italiam exercitum moueret, Gadibus vota exsoluisse. Hoc verò templum Herculi Ægyptio sacrum fuisse, testatur Pomponius Mela lib. iij. cap. VI. Philostratus verò lib. v. De vita Apollonij Tyanæi scribit, duos ibi Hercules cultos fuisse, *Ægyptium*, & *Thebanum*, nullo prorsus intus simulacro, cæterū *Ægyptio* duas aras æneas, *Thebano* vnā tantū erectam, iuxta quam duodecim Herculis labores conspicerentur, quod & Silius Italicus lib. iij.

*Sed nullæ effigies, simulacræue nota Deorum
Maiestate locum, & sacro impleuere timore.
In foribus labor Alcide.*

Cur verò sanctum sit refert Mela Pomponius, Templum, inquit, Ægyptij Hercules, conditoribus, religione, vetustate, opibus illustre, Tyrj condidere: cur sanctum sit, ossa eius ibi sita efficiunt: annorum, queis manet numerus, ab Iliaca tempestate, principia sunt: opes tempus aluit. Eustathius refert in Dionysium Alexandrinum, ex Æliani sententia, Gadibus altare, Anno & Mensi dicatum, vnum videlicet breviori tempori, alterum longiori: templumque Senectutis esse, quò reuereamur ætatem, quæ multa scit & didicit: & aliud Mortis, ad honorem communis omnium otij, vel eorum qui præter naturæ legem obierunt. Est etiam altare Penuriæ & Artis. Ars enim Penuriam profligat. Eadem ferè Philostratus, additque, illos solos hominum, festis cantibus mortem collaudare. In Herctilis quoque templo, auream Pygmalionis oliuam fuisse, idem auctor est: cuius præcipua pulcritudo in fructuū opere erat, qui ex smaragdo erant, veris oliuis similissimi. Persuasum etiam antiquis, Gades τὸν ἑσχατον πλοῦν esse, seu finem nauigationis, & ab ipso quidem Hercule constitutum refert Suidas, in dictione Γάδερα. Hactenus, inquit, progressus Hercules, cū ob sonitum & tenebras ulterius tendere

non posset, columnas ab indigenis sumtas erexit, quibus significaret eò usque peruiam esse terram & mare Vnde & Pindarus in Nemæis dicit Herculem columnas suas nauigationis terminum posuisse ode. III.

Ἡρᾶς θεὸς ἄς ἔθηκεν

Ναυτιλίας ἐσχάτας

μαρτύρας κλυτάς.

id est, *Quas diuinus heros posuit nauigationis vltima testes claros.* Et clariùs ode IV.

Γαδεΐραν τὸ πρὸς ζόφον οὐ

Πέρατον ἀπόξεως

Αὖτις εὐρώπῃ ποτὶ

Χέρσον ἐν λευγαῖᾳ.

Non esse scilicet vltra Gadiram nauigandum, sed ad Europam esse reflectendam nauem. Sic & Silius Italicus lib. I.

Atque hominum finem Gades, Calpémque secutus.

Hac in Insula Geryones vixisse, multorum fuit opinio, vt referunt Plin. & Solinus: nec iniuria. nam, Strabone teste, tanta hic pabuli est lætitia, vt pascentium pecorum lac non ferescat, caseumq. nisi multâ affusâ aquâ non efficiant, &, ni menstruo quoque tempore vena illis tundatur, ne nimio abdomine suffocentur, periculum est. Hæc de Insula dicta sint, nunc de Incolis videamus.

L. Cornelius Balbus hac vrbe natus, ob res fortiter in HISPANIA gestas, à Cn. Pompeio, ciuitate non solùm donatus est (vt videre est in oratione

oratione pro eodé à Cicerone habita) sed etiam *de Garamantibus triumphauit, primus omnium externo curru*, teste Plinio, lib. v. cap. V. Hunc & Cos. fuisse, & suæ ætatis homines tantùm diuitijs & magnificètia superasse, auctor est Dion lib. xlviii. vt populo Rom. moriens, in singula capita vices-nos quinos denarios legauerit.

L. etiam Iunius Moderatus Columella, qui De re rustica eleganter & accuratè admodùm scripsit, hinc oriundus fuit, vt de seipso hoc versu testatum reliquit:

Et mea quam generat Tartessi litore Gades.

Martialis etiam Gaditanum dicit σύγχορον suum Poëtam Canium, hoc Hendecasyllabo:

Gaudent iocosæ Canio suo Gades.

Hodierno die Insula hæc nauigationis beneficio & salinis fouetur, tum ex thynnorum piscatura multum emolumentum capit: omnis generis frugum & generosi vini feracissima. Non procul ab opido collapsi Theatri ruine complures, aliaque non spernenda vetustatis vestigia spectantur. Et cum Insula hæc olim à continente septingentis passibus, quâ proximè distabat, diuulsa esset, nunc, quæ rerum est vicissitudo, ponte cum continente coniungitur.

CAP. X.

De Herculis Columnis variae opiniones.

Saturni & Briarei dictæ. Abylæ & Calpes varia nomina. Festus Avienus emendatur. Strabonis lectio stabilitur.

HO c loco vicinas Gadibus vrbes recensere ordo postularet, nisi Herculis tantopere decantatæ columnæ me retraherent. Præsertim cùm & Pindaro Γαδίριδαι πύλαι vocentur, plurimisque persuasum sit, Gadibus illas fuisse: sed obtinuit vsus, Gaditano freto vtrimque impositos montes, Herculis columnas vocari, de quibus Martianus Capella eleganter lib. vi. *Europa*, inquit, *Calpe*; *Africa Abyla monte despicitur*: qui vrimque prominentes, dici columnæ Herculis meruerunt, quòd testimonio vetustatis, laboris Herculei limes in illis sit consecratus: siquidem ultra eum progredi, consumptæ telluris inuia prohibebant. Denique etiam hoc de eius sacra virtutis possibilitate persuasum, quòd cùm antea natura terris maria dispararet, ac tanto cingi circuitu firmaret Oceani, montium prædictorum effossis radicibus, diuulsoque confinio camporum, deuexis lacunisque terrarum, improuisum pelagus in vsum mortalitatis admisit, permutas orbis faciem naturæq. discrimina.

Idem

Idem referunt C. Plinius in proœmio lib. iij. & Pompon. Mela lib. I. Africæ enim hæſiſſe olim **HISPANIAM** innuit & Ann. Seneca Quæſt. Nat. lib. vi. cap. xxix. *Hispanias*, inquit, à contextu *Africæ mare eripuit*.

Diuerſam longè ab hac opinionem refert Diodorus Siculus lib. v. cap. II. non perfodiſſe Herculem hos montes, ſed vtrumque congeſta humo adeo ampliäſſe: vt cùm longè lateque antea, inter vtrumque continentem ſe Oceanus effunderet, his, quaſi clauſtris, vtrimque arctarit, ne grandia cete in noſtra maria poſſent penetrare: & ad nominis ſui æternam famam, vtrique monti columnam impoſuiſſe. Varia autem nomina his montibus indita, præſertim à Græcis. Iſacius Tzetzes in *σχολεῖον* *Lycophronis* poëma, has columnas vocat *Alybam* & *Abennam*; Paulus verò Oroſius lib. I. cap. II. *Abennam*, & *Calpem* vocat; Euthathius in Dionyſium Alex. ait alteram, quæ Europam definit, à barbaris *Calpem*, à Græciſ verò *Alybam* vocari: illam verò, quæ Africæ imminet, ab illis *Abennam*, ab his *Cynegeticam*. ſed contra omnium Geographorum mentem, *Alybam*, vel *Abylam* (vel, vt vocat Suidas, *Abyllica*, vt verò *Æthicus*, *Abylenam*) cum *Calpe* confundit, cùm palam ſit diuerſos eſſe montes. *Ælianus* lib. v. Var. hiſt. ex Ariſtotelis mente, refert columnas

has primò *Briarci*, postea verò, cùm Hercules terrarum orbem monstris tyrannisque expiasset, tamquam de humano genere bene meritus, *Herculis* vocatas fuisse. Idem Pindari Scholiast. Nem. od. III. & Ilacius Tzetzes, ex sententia Clearchi; Eustathius verò primò *Saturni*, postea & *Briarei*, tandem *Herculis* fuisse dictas auctor est. Cur verò *Saturni* aut *Briarei* appellatæ fuerint, sollerti Lectori indagandum relinquo, nisi placeat cum Zenodoto ex sententia Clearchi sentire, *Briarei* nomine etiam Herculem vocatum. Festus Auienus in descriptione oræ maritimæ *Abylæ* & *Calpes* etymon explicat, ita vt Maurusijs *Abyla* idem sit, quod *Mons altus* Latinis; *Calpe* verò Græcis, quod nobis *Caui vasis* & *teritis* species, cuius versus non pigebit in medium producere:

Sunt parua porrò saxa prominentia

Abyla atque Calpe: Calpe in Hispano solo,

Maurusiorum est Abylæ. namque Abyla vocant

Gens Punicorum, mons quod altus barbaro est,

Id est Latino, dici vt auctor Plautus est.

Calpæque rursum in Græcia, species cauæ

Teretisque visu, nuncupatur, & iugi.

Sed obscurum hoc esse *Calpes* etymon cuius manifestum, quamobrem ita legendum puto:

— *species cauæ*

Teretisq; vasis nuncupatur, & iugi.

Notum

Notum enim est hydriam, urnam, & quod cavum protuberat, Græcis κάλπην dici. Ab hoc vasis genere Græci montem hunc *Calpem* dixere, quia teste Pomp. Mela lib. ij. cap. VI. *Calpe mirum in modum concauus, & pænè totus in mare prominet.* Strabo lib. iij. refert ex multorū sententia hasce Herculis columnas, Gadibus in templo fuisse ex ære cubitorum octo, in quibus construendi templi sumtus inscriptus erat: communi tamen opinioni subscribit mōtes hos esse *Abylam*, & *Calpem*. Philostratus autem refert has ex auro, argentoque simul fuso conflatas esse, litteris inscriptis, quæ à nemine legi possent, illasque esse terrarum Oceanique vinculū, ab Hercule in domo Parcarum inscriptas, nequa elementis contentio accederet, neque amicitiam disjungeret, qua inuicē tenentur. Credidere nonnulli, referente Strabone & Eustathio, *Errantes scopulos, vel Symplegadis*, Herculei laboris metas, & celebres columnas fuisse. Hæc ideò adduxi, ut sciant quàm variè de ijs senserit vetustas.

Ad radices autem montis *Calpes*, eiusdem nominis sita est vrbs, olim, ut ex Timosthene refert Strabo, *Heraclea* vocata, in Herculis memoriam exstructa, vbi & Hispanorum armamentarium fuit: cuius adhuc suo ævo vestigia existisse refert. Scio Cl^{mum}. virum Casaubonum lectionem hanc Strabonis non recipere, & loco κάλπη, legere;

καρτεία, quia nemo veterum *Calpes* urbis meminit, præter Antonini Itinerarium, quod ut deprauatum etiam reijcit; sed quàm verè, viderit Lector. mihi parum firmæ eius rationes, ut à codicum omnium consensu recedam, videntur: præsertim, cùm eò loci hodierno æuo urbs sita est, *Gibraltar* dicta, qua Poeni primùm in HISPANIAM irrupere, acciti à Iuliano Comite, nomenq. illius priscum in Ducis *Tarif* memoriam mutatum. Coniecturæ meæ fauet Amb. Morales lib. xij. cap. lxiix. & P. Ioan. Mariana Rerum Hisp. lib. vi. c. xxij. vocat *Gibraltar*, *Heracleam*. Eodem prorsus modo opposita columna, & montis & urbis nomen præbet *Abyla*, hodie *Ceuta*, ut Castaldo placet. Adde Antonini itinerarium *Calpem* & *Carteiam* (licet corruptè *Tarteiam* habeat) ut diuersa opida recensere. Sed ne longiùs abeam, multorum instar sit Hesychius in Lexico, qui dum varias, in dictione *εἰλα*, de Herculis columnis recenset opiniones, dicit aliquos urbes sic vocatas credidisse. verba eius lubet opponere : *ἐνιοὶ αὐτὰς νήσους εἶναι φασιν, οἱ δὲ προσχώματα, οἱ δὲ τῆς ἡπείρων ἄκρας, οἱ δὲ πόλεις, καὶ οἱ μὲν δύο, οἱ δὲ τρεῖς, οἱ δὲ μίαν, οἱ δὲ τέσσαρας.* Id est: *Aliqui ipsas insulas esse dicunt, alij aggeres, alij continentis promontoria, alij urbes, alij duas, alij tres, alij vnam, alij quatuor.* Circa has Herculis columnas, auctor est Aristoteles lib. De mirandis auscultationibus, incendia

condia erumpere, alia quidem iugi flamma, alia verò per intervalla, & tantùm noctu. Sed solus hoc, quod sciam: præterquam quòd hoc ævo nulla ibi eructari incendia omnium ore constat. Non absimile est, quod refert Festus Auienus columnas has Herculis,

— *horrere siluis vndique*

Inhospitâsque semper esse nauticis:

Inesse quippe dicit ollis Herculis

Et templa & aras: inuehi aduenas rates

Deo litare, abire festino pede,

Nefas putatum demorari in insulis.

CAP. XI.

Carteiam non esse Tarifam, aut Carthagenam, sed Algerizam. Colonia libertinorum dicta. Num eadem cum Tartesso. Dion & Pausanias emendati obiter.

Quia superiori capite, in *Carteia* mentionem incidimus, opportunè hîc mihi videor de illa acturus. Cl. Ptolemæus inter *Bastulos*, qui & *Pæni* cognominantur, ad fretum Gaditanum collocat. quænam hodierna die vrbs sit, fluctuant recentiores. Franciscus Tarapha, & Io. Goropius Becanus *Tariffam* esse; Carolus Clusius, & Iosephus

phus Moletius, *Carthagenam*, opinantur; Ioannes Oliuarius in Pomponium Melam, *Cartaiam* credit, quæ non procul ab Ana fluuio est; sed à vero omnes deuiare paucis ostendam. Sita erat *Carteia* teste T. Liuiolib. xxviij. illa in ora Oceani, vbi primùm è faucibus angustis panditur mare, & vt ait Pomp. Mela lib. ij. cap. vi. illo in sinu, quem Calpe efficit. *Tariffa* verò nec in primis illis freti angustijs, nec in Calpes sinu sita est. Adde si lubet *Tariffæ* oram importuosam esse, & infidam nauibus stationem; *Carteia* verò portum habet commodum. Hic enim Cn. Pompeius, post sinistram ad Mundam prælium, fugiens, conscendit naues, vt præter A. Hirtium, testantur Appianus Alex. & Strabo. C. etiam Lælius pugnaturus aduersus Hannonem *Carteia* naues soluit, & victor huc classe reuectus. Proinde luce clarius est, non esse *Tariffam*: sed potius, vt auctor est Ambrosius Morales, vir de Hispaniæ antiquitate optimè meritus, *Algerixæ*. Hæc enim & commodum habet portum, & in sinu ipso, quem Calpe efficit, sita est. Non esse *Carthagenam* clarius est, quàm vt probatione indigeat, sola ipsa distantia redarguit: cùm hæc in *Tarraconensi*; illa verò in *Bætica* sit. Non esse *Cartaiam*, licèt nominis similitudo suadere posset, situs differentia conuincit: siquidem *Cartaia* ad Anam flumē est. Alterius etiam *Carteia*

T. Liuius

T. Liuius lib. xxi. meminit, quam Olcadum caput, & ab Annibale expugnatam dicit. Carolo Sigonio tamen hoc loci ex Polybio & Stephano placet *Altheiam* legere, licet aliquis dubitaret, quia apud eundem Liuium, *Carteia ad Oceanum* vocatur hæc nostra. Cur vero adiectio hæc, si huius nominis vnica tantum vrbs? Sed nihil ad Barchum hæc.

Latinam hanc Coloniam esse factam, & *Liber- tinorum* appellatam, auctor est T. Liuius lib. xliij. quod eò noui coloni deducti essent: *Et alia*, inquit *noui generis hominũ ex HISPANIA legatio venit, ex militibus Romanis, & ex Hispanis mulieribus, cum quibus connubium non esset, natos se memorantes, super quatuor millia hominum. Orabant vt sibi opidum, in quo habitarent, daretur. Senatus decreuit, vt nomina sua apud L. Cannideium profiterentur, eorumque siquos manu misisset, eos Carteiam ad Oceanum deduci placere.*

Neoterici nonnulli ab Arganthonio Rege conditam credunt hanc urbem: ego illum regnasse hic ex Silio Italico lib. iij. adducor, vt credam:

*Arganthoniacos armat Carteia nepotes,
Rex proauus fuit humani ditissimus æui,
Ter denos decies emensus belliger annos.*

Anacreon verò (vt obiter hoc tangā) hunc CL. annis vixisse; Plinius verò lib. vij. cap. xlvij. octuaginta regnasse, & quadragesimo incæpisse
auctor

auctor est, qui tantum CXX. anni sunt. Urbem hanc eandem esse cum *Tartesso* Græcorum, idem Plinius asserit lib. iij. cap. I. Strabo dubitat: Nonnulli, inquit, *huius ætatis Tartesson appellant Carteiam*. Pomponius etiam Mela lib. ij. ambigit: In eoque [sinu] *Carteia*, ut quidam putant, aliquando *Tartessus*. Illud tamen miror, cum Silius Arganthonium *Carteie* regnasse dicat, illam tamen à *Tartesso* diuersam eum facere, cum Græcis omnibus dicatur *Tartessi* regnasse, ut Anacreon testatur, alijque. Vnde & campos *Arganthoninos* Sidonio dictos vocat Cl. Scaliger *Tartessiacum* hunc tractum Notis in Ausonium. Diuersam autem à *Carteia* esse *Tartessum* his versibus Silius declarat, cum de *Carteia* locutus esset:

*Armat Tartessus stabulanti conscia Phœbo,
Et Munda.*

Sed cum & Gades ostensum est, ex Plinij, Salustij & Tzetze sententia *Tartessum* dici, non absurdè quæri posset, an plures fuerint *Tartessi*, vel an totus ille tractus à Gadibus columnas ad usque *Tartessi* nomen obtinuerit, quod curioso Lectori anquirendum relinquo. Vicinam verò Algerizæ urbem *Tariffam*, multi credunt olim *Tartessum* fuisse: quæ anno à Christo nato D. CCXIII. à Pœnorum duce *Tarif* (qui eo loci ex Africa ad occupandam *HISPANIAM* traiecit) nomen sumfit,

sumsit, priori oblitterato, de quo inferiùs. Agno-
uit ergo Silius Italicus, pro diuersis vrbibus *Car-*
teiam & Tartessum; Strabo & Mela dubitarunt.
Algerixæ hodierno die copiosus admodùm est pis-
catus, ex quo incolis lucrum ingens, quo etiam
superioribus sæculis non caruisse crediderim. Au-
ctor enim est Strabo, *Carteia* præter thynnorum
frequentiam, murices & purpuras librarum X.
esse. Quod ne cui mirum sit, lubet referre, quid
Plinius de mirandæ magnitudinis Polypo, ob-
tinente L. Lucullo Procos. Bæticam, lib. ix. cap.
xxx. dicat: *Carteia, in cetarijs assuetus [Polypus] exi-*
re è mari in lacus eorum apertos, atque ibi salsamenta
populari, conuertit in se custodum indignationem, assi-
duitate furti immodici. Sepes erant obiectæ; sed has trans-
scendebat per arborem, nec deprehendi potuit, nisi canum
sagacitate: hi redeuntem circumvasere noctu, concitique
custodes, expauere nouitatem. Primum omnium magni-
tudo inaudita erat, deinde color muria obliti odore diro.
Quis ibi polypum exspectasset, aut ita cognosceret? cum
monstro sibi dimicare videbantur. namq. & afflatu terri-
bili canes abigebat, nunc extremis crinibus flagellatos,
nunc robustioribus brachijs, clauarum modo incussos,
egreg. multis tridentibus confici potuit. Ostendere Lu-
cullo caput eius, dolij magnitudine, amphorarum quinde-
cim capax, atque (vt ipsius Trebij verbis utar) barbas,
quas vix vtroq. brachio complecti esset, clauarum modo
D torosas,

*torosas, longas pedum XXX. acetabulis siue caliculis
 vernalibus peluuium modo, dentes magnitudini respondentes.
 reliquiae asservatae miraculo, pependere pondo DCC.
 Sepias quoque & lolligines eiusdem magnitudinis
 expulsi in litus illud, idem auctor est. Antiqua
 etiam numismata, geminis thynnus insignita,
 hic reperta fidem faciunt, ut refert Ambrosius
 Morales, & Antonius Augustinus Dialogis antiquitatum.
 Plinius vero lib. xxxi. cap. viij. scombro
 hic incolas refert piscari, ad conficiendum garum.
 Monendum mihi hoc loco apud Dionem lib. xliij.
 deprauate legi *Crantiam* pro *Carteia*: Οὐαρῶ δ' ὁ παρὰ
 τῷ Διδίῳ περὶ κραντίαν ἐναυκραλίδι, καὶ εἶγε μὴ περὶ χαλ-
 ουγὸν ἐς τὴν γῆν. Id est: *Varus* vero à *Didio* apud
Crantiam nauali praelio superatus in terram euasit. Sub-
 stituendum vero esse *Carteiam*, velex *Floro* col-
 ligi potest, lib. iij. cap. II. Primum in ostio Oceani
Varus Didiusque legati conflixere. quo loco nus-
 quam *Crantie* mentio ab assiduo aliquo proditur
 auctore, sed *Carteia*, ut ex *Liui*o patet. Similiter
 & apud *Pausaniam* lib. II. Eliacorum pro *Καρτία*,
 legendum puto *Καρτία*. nisi quis & ita dictam
 fuisse asserat.*

CAP. XII.

De prisco Tartessi situ. Non ex stare nostro æuo. Regnum Tharses hic fuisse.

TArtessus vrbs, & Græcis, & Latinis Scripto-
ribus notissima, sed, vt rerum est omnium
orbis, ignorantia caligine nostro æuo latet. quare
vt viatores, spissa nocte deprehensi, dubia spe, huc
illuc lapsanti vestigio errantes, si procul gratæ lu-
cis indicium affulget, eò votis, pedibusque con-
tendunt: ita ego ad veterum Scriptorum facem,
conabor accedere, vt *Tartessi* situm, locumque
detegam. Variè autem *Tartessi* nomen acceptum.
nam & *Gades* ita dictas, & *Carteiam* ostendimus;
sed præter hæc urbem ab his diuersam fuisse *Tar-*
tessum nunc docebo. Strabo lib. iij. refert inter ge-
mina *Tartessi* amnis (qui nunc Bætis est) ostia
situm quondam fuisse opidum eiusdem nomi-
nis: quod & Pausanias in Eliacis asserit. Idem Ste-
phanus Byzantinus: Ταρτησὸς πόλις Ἰβηρίας ἀπὸ πο-
ταμοῦ ἀπὸ τοῦ ἀργυροῦ. ὅρως ῥέωντος. Id est: *Tartessus*
Iberia vrbs est dicta à flumine, qui ex argenteo monte
fluit: qui ipse Bætis vel *Tartessus* est. Vnde cùm
palam sit *Tartessus* esse sitam ad Bætīm, nequit
eadem cum *Carteia* esse: siquidem multis ab hoc

amne passibus remota est, in sinu illo scilicet sita, quem Calpe efficit. Quod verò nonnemo credat *Tarissam* esse priscam *Tartessum*, procul eos à vero aberrare in confesso est: cum *Tariffa* etiam nimium à *Beti* dissita sit. quod ut indubitatum credo, ita maximè mihi dubium, priscum ipsius *Tartessi* situm demonstrare. Nam cum *Betis* olim geminis se ostijs mari mergeret, temporis decursu alterum illi oblimatum est, & aliquantulum ab antiquo se torsit itinere, ut alij plerique amnes. Quò fit, ut quæ circa illa loca erant vrbes, nunc in obscuro sint. Sed quid Suidam mouerit, quod *Tartessum* prope Auernū lacum fuisse dicat, nulla mihi ratio occurrit. Nobilem verò & opulentam fuisse urbem, vel Poëta ille apud Stephanum inuit, dum illam vocat *Ταρτεσσιον ὀλβιον ἄστυ*. Vnde & Anacreon, inter opimas felicitates, quas respuit, nolle se, ait, *Tartessi* centum & quinquaginta annis imperare, Arganthonium significans. Cùm verò *Tartessus*, inter vltima occidentis loca esset, ansam Poëtis fabulandi dedit, ut Tartarum circa *Tartessum* fingerent, quod ex Homero ostendit Strabo. Latinis etiam Poëtis frequens est dicere, Tartesso solem se mergere. Ovidius *Metamorph. XV.*

Presserat occiduus Tartessia litora Phœbus.

Ausonius etiam cum stridore mergi dicit:
Condide-

*Condiderat iam solis equos Tartessia Calpe,
Stridebatque freto Titan insignis Ibero.*

Vnde & Statius Papinius Siluarum lib. ij. de
Bætica loquens:

*Felix heu nimis & beata tellus:
Quæ pronos Hyperionis meatus,
Summis Oceani vides in vndis.
Stridoremque rotæ cadentis audis.*

Hausere id ex Posidonio Philosopho Poëtæ,
qui solem circa hæc litora multo maiorem occi-
dere affirmabat, & cum strepitu, perinde atque in
profundum ibi incideret, pelagusque ad eius con-
tactum efferuesceret. Sed mitto has tellenas nu-
gas, vbi ne scintilla veri apparet. Io. Goropius Be-
canus lib. v. rerum Hispanicarum, non obscure
docet, *Tartessum* vocari in sacris litteris, regnum
Tharses, quò Rex Salomon simul & in *Ophir* clas-
sem mittebat, ad aurum argentumque aduehen-
dum. Nam quod hætenus plurimis persuasum
fuit, *Tharses* vel mare vel Carthaginem denotare,
vniuersis rationibus refellit, quas hîc prætereo libens,
ne actum agam. Sanè regionis circumiacentis fe-
licitas, auri, argenti que perennis fecunditas, &
Scriptorum ea de re vnanimis sententia facit, vt
non inuitus illi assentiar: præsertim verò, cùm
ipsos Tyrios & Phœnices (qui cum Salomonis

classe mittebantur) immensam argenti vim ex vicina hac regione asportasse dicant Strabo & Aristoteles.

CAP. XIII.

Xeres olim dicta Asta regia. Colonia Romanorum. Num Ençà Stephani Byzantini fuit.

DE prisca *Xeres de la frontera*, appellatione dissentiunt auctores. Ioan Magarinus Episcopus Gerundensis *Sisaponem* fuisse; Clusius *Asfidonam*; Lucius Marineus celebrem illam funesto prælio *Mundam*: quæ sigillatim refellere, esset Lectorum opera abuti. Ego verò *Astam* puto, quæ à Plinio *Regia* cognominatur, Colonia Romanorum, inter Bætis æstuarium sita. Quod ut asseram multa faciunt. Strabo lib. iij portum *Mnestheci* non procul ab *Asta* collocat: qui hoc ævo portus *B. Mariæ* indigetatur, capaci tutaque navium statione celebris, duabus tantum leucis à *Xeres* distat. Licet Ambrosius Morales credat locum esse inter *Xeres de la frontera*, & *Puerto B. Mariæ*, qui hoc ævo *la Mesa de Asta* vocatur. Ptolemæus etiam ad *Astam* æstuarium collocat, quod Moletio aliisq.

Sanlucar

Sanlucar est, non procul à *Xeres*, & vt Straboni, Plinio, & Ptolemæo, *Nebriffa* & *Asta* vicinæ vrbes sunt, & in'er Bætis æstuarium sitæ, ita etiam *Xeres* à *Nebriffa* non totis quinque leucis dissita. Stephanus Byzātinus ἑρπᾶς opidi ad Herculis columnas meminit, quod an *Xeres* nostrū sit, nominis sitūsq. vicinitas facit vt credam, suoq. forsan tempore relicto antiquo nomine *Aste*, nouum assumserit, vt multis alijs vrbibus accidit. A Hirtius hanc urbem *Hastam* vocat, cū ceteri sine aspiratione legāt: iuxta quā refert duces Cn. Pompeij, qui funesto Mundenſi prælio superfuerāt, omnes à Cæsare extra vallum concisos, cū coniurassent castrorū cædem. Strabo refert conuentum Turdetanorum fuisse. Hoc æuo vrbs est murorum ambitu conspicua: ager est, vineis, aruiſque lætissimus: nulla eius portio inculta, aut otiosa; sed vel vitibus, aut frugiferis arboribus egregiè confitus, aut oleo, segeteq. ornatus. generosissima vina fundit, quæ non solū Europæi nostri, sed alio sub sole calentes Indi expetunt. Equorum greges alit mira pernecitate laudabiles, quos incolæ *Ginettes* vocant. Moris hac in vrbe est ditioribus, immensæ altitudinis puteos defodere, quibus annonam multos in annos cōseruant, quos lapidum mole contextos, sine peculiari Senatorum consensu aperire vetitum. vnde cū an. cl. l. lxi.

arcta re frumentaria Germania premeretur, incredibili copia ab hac vrbe prouisum fuit. Auctor est T. Liuius lib. xxxix. C. Catinium post fusos Lusitanos in agro Astensi, urbem Astam expugnasse, sed dum incautiùs muros subit, ictum, post paucos dies obiisse. Refert Morales alijsque Historici, non procul à *Xeres*, luctuosum illud praelium, inter Arabes & vltimum Gothorum Regem Rodericum, commissum fuisse, vbi Gothi ad internecionem cæsi, & HISPANIA in Arabum potestatem & prædam celsit.

CAP. XIV.

*Nebrissa cognominata Veneria. A Baccho
& satyris condita*

TUrdetaniæ vrbs est *Nebrissa*, teste Ptolemæo Romanorum colonia, cognomine *Veneria*, vt ait Plinius, hodie *Lebrixa* dicta, sita inter Bætis æstuarium; sed nunc à Bæti octo M. P. distat, obli-
mato altero illius ostio meridionali, vnà cum al-
neo. Conditam ferunt

Tempore quo Bacchus populos domitabat Iberos,
ducentis prope annis, ante Troianum excidium,
vt colligit Antonius Nebrissensis in Historiæ suæ
præfa-

præfatione , à quo & urbem conditam putat. Silius verò Italicus ad Satyros Dionysij, seu Bacchi comites, originem velle videtur referre, non ablu-
dente etymo. Nebris enim pellem hinnuli signi-
ficat , qua Bacchantes induti sacrificare solebant.
Sed lubet Poëtam audire lib. iij.

*Ac Nebrissa Dionyseis conscia Thyrsis,
Quam Satyri coluere leues, redimitaque sacra
Nebride, & hortano Menas nocturna Lyao.*

Opidum est peramcenū, cum vetusta arce, agro
vndique beatissimo cinctum. Hoc enim præcipuè
Bæticiæ tractu, lætissimas fruges , vina lectissima,
mella optima, sapidissimos arborum fructus, tel-
lus producit : vt non immeritò tam luxuriosus
ager à Baccho , aut à petulca Satyrorum manu,
ad condendam urbem dilectus videatur. Sed non
tantum se iactat hæc vrbs, quòd conditorem ha-
buit madidum & lasciuum illum Deum, quàm
quòd ciuem produxerit *Ælium Antonium* : qui
Vandalicis , Punicisque armis pulsas tota Hispa-
nia, Latinas Musas, primus reduxit, & extirpatâ
pafsim barbarie, pristino illas nitore restituit. Re-
rum à Ferdinando & Isabella Regibus gestarum
binas decades cum laude conscripsit: tantumque
HISPANIA *Ælio Antonio*, ob restitutas post-
liminiò litteras , quantum Ferdinando Regi ob-
fufos fugatosque Mauros, se debere fatetur.

CAP. XV.

*Ossuna olim Vrsō. A. Hirtio Vrsao. Appiano Orsona. Situs eius ex Hirtio
petitus.*

NON procul à Nebrissa spectatur *Ossuna*, quæ Straboni & Plinio *Vrsō*, & *Genua urbanorum* vocata: Antonius August. legit, *Geminam urbanorum* pro *Genua*, teste Ortelio. Ab A. Hirtio, *Vrsaonē*, ab Appiano in Ibericis *Orsonam*, à Ptolemæo *Oleastrum* dici auctor est Ios. Moletius. Conuentus olim Astigitani, distans à Singilia, quæ nunc *Antiquera*, circiter M. P. XXX. ab Astigipius minúsue. Sed lubet A. Hirtij verba adducere, qui graphicè urbem nobis eiusque situm ob oculos ponit: *Ad opidum, inquit, recuperandum occasionem non prætermittunt, & reliquos viuos capiunt, ac deinde Vrsaonem proficiscuntur, quod opidum magnamûnitione continebatur, sic vt ipse locus non solum opere, sed etiam natura editus ad oppugnandum hostem appetere. Hoc acciderat, quòd aqua, præterquàm in ipso opido non erat. nam circumcirca riuus nusquam reperiēbatur, propius M. P. octo, quæ res magno erat adiumento opidani. Tum præterea accedebat, vt agger materiesq̃, vnde solitæ*

*Solita sunt turre agi, propius M. P. VI. non reperi-
bantur.* Ex quibus non solum patet urbem fuisse
egregie munitam & magni momenti, sed etiam
descriptionem quadrare optimè *Ossuna*. Opidum
enim aqua caret contermina, arborum genus nul-
lum præter oleam profert ager: quam etiam à
Pœnis agriculturæ studiosis illatam fuisse credi-
derim. Quibus fidem etiam faciunt fragmenta
quædam, & cippi cum vetustis inscriptionibus,
in ipso opido reperta, quæ nomen *Vrsonis* osten-
dunt. Nostro ævo illustrissimæ Gironum familiæ
est, quæ relicto titulo Comitum *Vreniæ*, Ducum
Ossunæ, anno M. D. LXII. annuente Philippo II.
nomen sibi vindicauit. Academia hîc exstructa,
anno M. D. XLIX. insignis, à Ferdinando Matta-
moro. Ager est pecoris, messiumque vberrimus:
olei etiam fecundus, aër saluberrimus.

C A P. XVI.

*Hispalis cognominata Romulensis. Isidori
opinio reiecta. Vnde dicta. Eius
descriptio.*

VT ceteras HISPANIAE prouincias Bætica,
& ita Bæticiæ vniuersas vrbes *Hispalis*, nobili-
tate, opibusque longè antecedit, Colonia fuit olim
Roma-

Romanorum, cognomine *Romulensis*, & ex quatuor eiusdem prouinciæ conuentibus, teste Plinio. De origine eius ambigunt Scriptores: Franciscus Tarapha, alijque sublestæ fidei Scriptores, ad Hispalum Herculis Libyci filium, ex Berofimēte, referunt; Isidorus verò lib. xv. Originum, Iulium Cæsarem refert *Hispalim* condidisse, eamq. ex suo & vrbis Romæ nomine, *Iuliam Romuleam* nuncupasse. Sed cum veritate hoc pugnare, in aperto est. Nam apud Hirtium aliosque, frequens *Hispalis* mentio, eaq. post Mundense prælium recuperatâ, dum beneficiorum memoriam Hispalensibus Cæsar refricat, non præterijset vrbis se conditorem. nec *Iuliæ Romuleæ* illi cognomen, sed *Romulensis*. Ego in re tam vetusta, & inter fluctuantes Scriptorum opiniones nihil certi ausim statuere. Sufficiat coloniam fuisse Romanorum, quæ à Philostrato in vita Apollonij Tyanæi lib. v. cap. l. *Ispula*; à Silio verò Italico *Hispal* vocatur, vnde ait:

Et celebre Oceano, atque alternis æstibus Hispal.

In antiqua verò inscriptione (quam Hispali repertam dicit Ambrosius Morales) *Romulea* vocatur, nullo alio addito nomine:

61

LVDOVICI NONII
 M. AVRELIO. VERO. CÆS. IMP.
 CÆSARIS. TITI. ÆLII. HADR.
 AVG. PII. P. P. F. ANTONINO.
 COS. II. SCAPHARI. QVI.
 ROMVLEÆ. NEGOTIANTVR.
 D. S. P. D. D.

Vocatam autem *Hispalim*, vult Isidorus à situ, eò quòd in solo palustri, suffixis profundo palis locata, ne lubrico & instabili fundamento caderet. Arias verò Montanus apud Ortelium ait *Hispalim*, Phœnicum nomen esse, à *Spila* vel *Spala* deflexum, quod planiciem siue virentem regionem significat, quam suburbanus eius ager egregiè refert.

Vrbs certè est amœnissima, & in primis, non Hispaniæ modò, sed & Europæ, nobilis & opulenta, ad Bætici amnem apposita, murorū ambitu, ædificiorum structura & cultu conspicua. suburbium habet amœnum & amplum, cui *Triana* nomen, Bæti amne discretum, sed ponte sublicio vrbi coniunctum. Ager vicinus planus est, & latissimus, summumq. hîc Liberi Patris cum Cerere certamen, sed præcipuus oleæ prouentus: nec vspiam generosior eius liquor. oliuas muria maceratas (quas Græci *κολυμβάδας*, Romani *Drupas*,
aut

aut *Natantès* vocant) insigni tum magnitudinē tum suauitate suppeditat. frugiferis arboribus, sed præcipuē vario citriorum genere felix: &, ne in singula me effundam, naturæ gaudentis & lasciuientis opus est: vt nihil sit hîc quod natura negauerit, nihil quod cultura præterierit. Ferunt Scriptores, quo tempore D. Ferdinandus Maurorum illam iugo eripuit, circa annum M. CCXVII. plus quàm centum millia pagorum, Hispalensis territorij numerata fuisse: quod immensam agri vbertatem arguit, licet incolarum infrequentia, ad magnam raritatem delapsi sint. Iam à Strabonis æuo emporium fuit non incelebre, ita & hac tempestate, longè opulentissimum euasit. huc enim ex vniuersi orbis plagis, maximè verò ex occidua India, & Peruuiano orbe, incredibiles opes aduehuntur. Binæ quotannis classēs auro, argento, gemmisque onustæ, noui orbis diuitias hîc exponunt: vnde liberali manu in vniuersum orbem dispensantur. Ita vt non queratur HISPANIA desisse sibi nobiles suas metallorum secturas, sed præbente Indiâ opes suas, gaudet visceribus suis ab auaris manibus parci. Hîc iterum omnigenis mercibus ornata, milite & com meatu instructa Indiam petunt. Vnde opibus ita pollet, vt Regi suo ferant, annuo sesquimillionem aureorum obsequij & vectigalium ergo pendere, quantum vix

integrâ

intēgrā alibi regna. Templum habet celeberrimum, & mole sua maximum, turremque egregiæ altitudinis illi adnexam: D. Virgini id sacrum, in cuius impensas annuas, triginta millia aureorum destinata ferunt. Archiepiscopatum habet opimum, splendidumque, & qui, Toletano excepto, nulli opibus & dignitate cedat; centum & amplius illi aureorum millia in annuos proventus suppetunt: qui tantæ erat olim auctoritatis, ut tempore Hormisdæ Papæ, tota vltior Hispania Bética scilicet & Lusitania illius obsequium agnosceret. Immò auctor est D. Illefonfus, supplemento ad D. Isidori Chronicon, Primatis HISPANIÆ dignitatem, Hispalensis primò Præsulis fuisse: donec Theodiscus, D. Isidori successor, regnante Chintilane Gothorum Rege, heresi infectus, Archiepiscopatus honore deiectus fuit. Toletum sic dignitas translata, ibique in hoc æuum permanfit. Mirum est quod Plinius refert, lib. ij. cap. XCVII. *Hisपालi* puteum fuisse, qui crescente maris æstu minueretur, augeretur verò decedente, ceteris natura vulgaris.

Et licet vrbs hæc Mercurio magis, quàm Phœbo semper dedita, & commercijs quàm litteris notior fuerit, summa tamen ingeniorum fastigia edidit. Quem enim *D. Isidoro* præferas? vitæ enim sanctitate, litteris tum sacris, tum profanis

fanis paucis æqualis, inferior nemini. Satis eum superque doctum illud Originum opus posteris commendat. Nostra etiam memoria eloquenti philosophia, & philosophica eloquētia insignem virum *Sebastianum Foxium Morzillum*, & *Benedictum Ariam Montanum*, Theologum, poëtam, linguarum peritia (Hebraicæ præsertim) nemini secundum protulit.

C A P. XVII.

De Italica situ disquisitio. A Scipione Africano condita. Hodie Siuilla la veja. Municipium Romanorum.

QUamvis *Italica*, nihil præter deformes ruinas, & diuulsa rudera ostendat; optimorum tamen Imperatorum manibus pauca hæc dentur, ut natale illorum solum cunctis innotescat: multis enim situs eius priscus ignoratur. Auctor est Appianus Alexandrinus in Ibericis, à Scipione Africano conditam, peracto bello Hispanico, ubi emeritos, & mutilatos membro aliquo milites reliquit, quo tamen loco illam condiderit, non exprimit. Ptolemæus illam in Bætica collocat, ex Plinio verò, *Ilipam* prius vocatam colligunt aliqui.

aliqui. ait enim : *Ilipa* cognomine *Italica*; collocat autem illam prope Hispalim. Eodem modo apud Strabonem legendum esse asserit doctiss. Is. Casaubonus: cuius verba sunt : *Posse has Italica & Ilipa super Bæti*, emendat autem, *quæ & Ilipa*, sed quàm exactè, viderit Lector. *Italica* enim non est cognominata *Ilipa*, ut hæc præ se fert lectio; sed *Ilipa*, *Italica* postea dicta. Auctor est Vassæus ignorari à plurimis antiquum situm, aliqui *Nieblam* esse putât; Ambrosius Morales *Siuilla la Veja* ostendit esse, & Hieronymus Surita. Multa enim hîc indicia antiquæ urbis, & Romanæ magnificentiae impressa vestigia. Inter cetera non penitendæ Amphitheatri ruinæ visuntur. Antoninus in itinerrario, Hispali Italicam nullum passuum apponit numerum, indicio exiguam fuisse distantiam, & cunctis notam; & hodierno die vix quarto lapide abest. Referunt Ioan. Vassæus, & Ambrosius Morales, bello, quod excitatum fuit inter Regem Leuigildum patrem, sed Ariana hæresi infectum, & Ermenegildum filium Catholicæ fidei assertorem, qui Hispali obsessus erat, anno Domini D. LXXXIV. ut Bæti commercia obsessis auferrentur, iussisse Leuigildum, mœnia *Italica* vetustæ urbis restaurari, atque ita Hispalenses ad deditionem compulisse; quæ certè omnia *Siuilla la Veja* quadrant. Bæti enim apposita, &

leuca tantum ab Hispali distat. De qua Lucas Tundensis: *Inueni, inquit, in chronicis, quod Italica est Hispalis antiqua, vnde populata fuit hæc Hispalis quæ nunc est*; sed postremum hoc prorsus à veritate alienum est. Adde quòd hodie circumiacentes campi, *los campos de Talca*, ab indigenis vocantur, mutilata voce, tamquam *Campi Italicae*. Iuxta hanc urbem refert Paulus Orosius lib. v. cap. xxij. Herculeum Q. Sertorij legatum cum Metello congressum, viginti millia peditum perdidisse. Fuisse *Italicam* Coloniam olim, videre est in fragmento basis Vulfinijs in Italia reperto: **ITEM COLON. ITALICENSIVM IN PROV. BÆTICA.** qui reliquam inscriptionem volet, consulat Smetij Antiquitates.

Municipium tamen fuisse auctor est Agellius lib. xvi. cap. xij. ex oratione D. Hadriani, quam de Italicensibus habuit. Miratur enim Imperator, cur Italicenses, & quædam alia municipia antiqua, cum suis moribus, legibusque viuere possint, in ius Coloniarum mutari gestiuerint.

Hac vrbe orti Imperatores *Traianus*, & *Hadrianus*, vt testantur Appianus, Ælius Spartianus, Eutropius. Magnum etiam *Theodosium* hæc vrbs tulit, vt plurimorum fert opinio, & ne quid deesset, *Silium* etiam *Italicum* poëtam egregium, teste Petro Crinito, tametsi dissentiant Ioan. Camers Scho-

Scholijs ad L. Florum, & Hieronymus Surita. Felicem *Italicam*, quæ virtutum, & doctrinæ hæc fastigia edidit! iactent sese aliæ vrbes, murorum structura, situs opportunitate, agri cælique benignitate, illa verò (quamvis nihil horum illi defuisse olim crediderim) maximorum Heroum natalibus, qui numquam ignorantia tenebris illam patientur latere, se attollat. Episcopalis vrbs fuit elapsis sæculis, primum Episcopum D. Geruntium Confessorem habuit.

C A P. XVIII.

Astigi cognominata Augusta firma, nunc Eceia. Conuentus Beticæ. Inscriptiones veteres.

VRbs olim clarissima, nec hodie obscura *Astigi*, hoc tempore consentientibus Hispaniæ Scriptoribus, *Eceia* dicitur, Romanorum quondam Colonia, cognomine *Augusta firma*, ut auctor est Plinius. Inter Turdetanos à Ptolemæo reponitur, à qua quartus Beticæ conuentus *Astigitanus* vocatus. Pomponius Mela urbem hanc inter præcipuas totius Beticæ recenset, his verbis: *Urbium de mediterraneis in Tarraconensi clarissimæ*
E 2 fuerunt

fuerunt Pallentia & Numantia, nunc est Caesar augusta: in Lusitania Emerita, in Bætica Astigi, Hispalis, Corduba. Conditā dicit Franciscus Tarapha ab Astyre Memnonis auriga, qui amisso ad Troiam hero, in HISPANIAM venit, vbi & Asturibus nomen dedit, de quo Silius lib. iij.

*Venit & auroræ lacrymis perfusus in orbem
Diuersum, patrias fugit cū deuius oras,
Armiger Eo: non felix Memnonis Astyr.*

Monendum hīc obiter, quo loco apud Strabonem lib. III. *Astenas* reperitur, legendum *Astygā*, vt auctor mihi est V. Cl. H. Casaubonus. In antiquis inscriptionibus nunc *Astigis*, nunc *Augustæ* firmæ fit mentio. vtriusque exemplum ipsa vrbs nobis suppeditat:

P. NVMERIVS. MARTIALIS.
ASTIGITANVS. SE VIRALIS.
SIGNVM. PANTHEI.
TESTAMENTO. FIERI. PONIQ.
EX. ARGENTI. LIBRIS. C.
SINE. VLLA. DEDVCTIONE. IVSSIT.

In hac verò Colonix etiam fit mentio;

BONI. EVENTVS.

APONIA. C. F. MONTANA.

SACERD. DIVAR. AVGVSTAR.

COL. AVG. FIR.

EDITIS. OB. HON. SAC. CIRCENSIB.

ET. OB. DEDICAT. ALIIS.

EX. ARG. LIBRIS. CL.

D. S. P. D. D.

Vrbis solum vndique fecundum, & compascuum, & pecori maximè pascendo idoneum: unde incolæ lanificio maximam operam impèdunt, hincq. illis quæstus luculentus, cui maximè fauet Singylis fluuius, vulgo *Chenil*, vrbem alluens, è niuosis prope Granatam montibus erumpens, cuius aqua perpurgandæ lanæ mirum in modum efficax. Olim Episcopalis vrbis erat, nunc Archidiaconatus Hispalensis est Ecclesiæ.

CAP. XIX.

Corduba Patricia dicta. A quo condita. Prima colonia in Hispaniam deducta. Urbis descriptio.

AD Bætis ripas apposita est *Corduba*, dicta *Colonia patricia*, teste Plinio, ceteris Bæticæ urbibus; exceptâ Hispali, præferenda. Ioan. Gerundensis Episc. dictam putat, tamquã *Cor Bæris*: sed tam ineptum hoc etymon est, ut huic peponem pro corde fuisse quis posset credere. Priscis temporibus fuit urbs celeberrima, in qua & iuridicus conuentus agebatur. Strabo Marcelli opus esse asserit; sed cuius Marcelli dubitatur hætenus. Vasaëus illius putat esse, qui tempore civilis belli, inter Cæsarem & Pompeium, res in **HISPANIA** gessit: cui coniecturæ suffragatur quòd nusquam ante illud tempus, *Cordubæ* mentio fiat. Nam & T. Liuius cum multas Bæticæ urbes commemoret, hanc silentio transmittit, sed cum, eodem Strabone teste, prima hæc colonia sit, in **HISPANIAM** à pop. Rom. deducta, non potest illius Marcelli opus fuisse, tum quia mentio aliqua illius rei facta fuisset ab A. Hirtio, præcipue

puè seditione illâ ortâ inter Marcellum, & Cassium Cæsaris duces prope *Cordubam*. Scio Casaubonum eius esse opinionis, vt dicat ideo *Cordubam* opus esse Marcelli, eò quòd Colonia eius tempore, aut ductu huc missa sit; sed cum ipso Strabone pugnat, vt ostendi. Non enim illo tempore prima potuit Colonia deducta esse, cùm Scipionum tempestate nonnullæ fundatæ fuerint.

Vrbs est agri nitore, & soli felicitate conspicua, vt non immeritò à Silio Italico, *aureum solum* vocetur:

Nec decus aurifera cessauit Corduba terræ.

Strabo etiam asserit, agri virtute, & magnitudine, fauente amne Bæti, primùm ibi nauigabili, vt ait Plinius, *Cordubam*, suo æuo, & nominis claritate & potentia polluisse. Huc facit, quod idem Plinius lib. xix. cap. viij. asserat carduos apud Carthaginem nouam, & Cordubam præcipuè, sestertia sena millia vt parciùs reddere. Quid censebis cetera holera, horarios, ceterosque fructus, segetemque reddidisse, si carduorum prouentus centum quinquaginta millibus circiter aureorum æstimatus fuit.

Nobili etiam platano ornata olim fuit, ob umbras tantùm expetita arbore, & quòd æstate solem arceat, hyeme admittat: in quâ Martialis peculiari lusit epigrammate, lib. ix. epigr. Lxij.

*In Tartessiacis domus est notissima terris,
 Qua diues placidum Corduba Bætin amat.
 Vellera natiuo pallent vbi flaua metallo,
 Et linit Hesperium bractea viua pecus.
 Ædibus in medijs, totos amplexa penates,
 Stat platanus, densis Cæsariana comis.
 Hospitis inuicti posuit quam dextera felix,
 Cæpit & ex illa crescere virga manu.*

Nec æris metalla Cordubensi agro defuerunt. Plinij siquidem tempestate maximo in honore erant: ait enim lib. xxxiv. cap. ij. *Summa nunc gloria* (loquitur de ære) *in Marianum conuersa, quod & Cordubense dicitur.* Vocabatur autem Marianum, quòd in Marianis montibus, non procul ab hac vrbe reperiabatur.

Sed ingeniorum præcipuè fecunditate se iactet *Corduba*, quæ cunctis HISPANIAE vr-
 bibus, non modò venit præferenda, sed paucissi-
 mis totius Europæ comparanda. At præcipuo-
 rum solùm meminero, inter quos *Senecæ* duo fa-
 miliam facile ducunt, *Rhetor* pater, & filius *Stoicus*
Philosophus, idemque *Tragicus*, vnà cum affine
 suo, *Annao Lucano*, Poëta heroici spiritus: inuidia
 omni maiores, & quorum opera

— fama loquetur anus:

De quibus *Martialis*:

Duosque

*Duosque Senecas, vnicumque Lucanum
Facunda loquitur Corduba.*

Porcius etiam *Latro*, cuius solùm in *Catilinã* declamatio exstat, hac vrbe putatur oriundus, vti & *Sextilius Hena* Poëta, cuius *Seneca Rhetor* lib. I. *Suasoriarũ* meminit: *Sextilius Hena*, fuit homo ingeniosus magis, quàm eruditus: inæqualis poëta, & pœnè quibusdam locis talis, quales esse *Cicero Cordubenses Poëtas* ait, pingue quiddam sonantes, & peregrinum. Quin occupatã iam à Pœnis *HISPANIA*, proculcatissimè itudis, non defuere præclarissima ingenia huic vrbi, *Auenzoar*, *Auicenna*, *Auerroës*: quorũ hic Philosophus acutissimus & Græcorum cuilibet comparandus; ille verò (licèt multi pro *Cordubensi Auicennam* non agnoscant) medicus præstantissimus, vt monumenta testantur. Patrum etiam memoria hac vrbe prodire *Ioannes Mena*, Poëta vernaculi sermonis, magni ingenij, & *Ambrosius Morales* regius Historiographus: cuius diligentia & acri iudicio in Antiquitate indaganda, plurimum perpetuò debebit Hispania, qui & prolixè patriæ suæ laudes descripsit. Hac vrbe etiam ortus *Gonzalius Ferdinandus d' Aguilar*: qui florentissimum illud Neapolitanum regnum, è Gallorum manibus, summa virtute eripuit, & magna cum laude Hispanis stabiliuit, vir maximis antiquorum ducibus comparandus: vt non immeritò

Magni ducis cognomé obtineat. Et ne solidæ laudis cumulo quidquam deesset, sola hæc vrbs tot Martyres constantissimos, tot Virgines castissimas tulit, quot vix alibi integræ prouinciæ. Quæ certamina B. Eulogius Cordubensis Episcopus descripsit accuratè, nostraque memoria latinè quoque *P. Martinus de Roa*, Cordubensis & ipse, & Societatis I E S V presbyter disertus.

Ambrosius Morales ex antiqua inscriptione ostendit etiam Cordubam, aliquando *Patriciam* tantùm vocatam, quam lubet hîc apponere.

L. LVCRETIO. SEVERO.
PATRICIENSI,
ET. IN. MVNICIPIO. FLAVIO. AXATITANO.
EX. INCOLATV. DECVRIONI.
STATVAM. QVAM. TESTAMENTO.
S. PONI. SIBI. IVSSIT.
DATIS. SPORTVLIS. DECVRION.
.....M. F. AXATITANI.....



C A P. XX.

Obulco Municipium Pontificēse dictum.

*Diuerſa ab Antonini Bucula. Smileri error. Cur
Porcunna dicta. Inſcriptio verus.*

TUrdetanorum in Bætica opidum eſt *Obulco*,
teſte Ptolemæo, quod à Plinio etiam *Pontifi-*
cenſe cognominatur. A. Hirtio lib. iv. de bello
Alexandrino *Obulcula*, Stephano verò *Ὀβόλκων*
vocatur, nulla pœnè olim de cauſſa notius, quàm
feſtino C. Cæſaris in Hiſpaniam aduentu, qui ad-
uerſus Pompeij liberos properans, XXVII. die
quàm Roma diſceſſit, *Obulconem* peruenit, te-
ſte Strabone lib. iij. Hoc æuo eſſe *Vbedam* credit
Moletius; Marius verò Niger *Siguram*; ſed Ant.
Auguſtinus, Dialogo VIII. & Ambroſius Mora-
les, eſſe *Porcunna* firmiter aſſerunt, quibus & ego
lubens aſſentior. Adde quod Plinius *Obulconem*
ab amne Bæti XIV. M. P. in mediterranea diſtare
dicit, cui ſitus *Porcunnæ* ad amuſſim reſpondet,
ſiquidem tribus, ſed magnis admodùm leucis, à
Bæti diſtare *Porcunnam* in conſeſſo eſt. An verò
hæc eadem cum Antonini *Bucula* ſit, credit Smi-
lerus, & *Obulculam* reſtituit: ſed à calore, non à
iudicio hæc eſt emendatio. nam cùm Strabo *Obul-*
conem

conem. XXX. circiter stadijs à *Corduba* distare dicat, quæ non explent III. M. P. non video, qui cum Antonini *Bucula* cōuenire posset. Nam LII. M. P. à *Bucula* *Cordubam* numerat. Sed vnde *Obulconis* in *Porcunnæ* nomen mutatum, quæret aliquis, licèt arduum sit in tanto ætatis decursu causam indagare; placet tamen *Moralis* opinio (quam & ab Ant. Augustino cōfirmatam video) à celebri & antiqua scrofæ statua fluxisse, quæ triginta fetus enixa fuerat, in cuius memoriam, misso priori nomine *Porcunna* dicta fuit, non secus ac *Sarabris* à *Tauri* effigie, hodie *Toro* vocatur. Statuæ verò hæc *ἡγεμένη* inscripta est, vt hodie in D. *Benedicti* æde visitur.

C. CORNELIVS. C. F.

C. N. GAL. CÆSO.

ÆD. FLAMEN. II. VIR.

MVNICIPII. PONTIF.

C. CORNEL. CÆSO. F.

SACERDOS. GENT. MVNICIPII.

SCROFAM. CVM. PORCIS. XXX.

IMPENSA. IPSORVM.

D. D.

Ex qua

Ex qua etiam inscriptione patet, vocatum fuisse hoc opidum *Municipium Pontificense*, prætermisso *Obulconis* nomine. Exstat & ibidem alia inscriptio, in qua non solum proprium urbis nomen, sed & cognomen inscriptum est:

L. PORTIVS. L. F. GALERIA. STILO.
 OBVLCONENSIS. AN. LXV.
 ÆDILIS. II. VIR. DESIGNATVS.
 P. I. S. H. S. E. S. T. T. L.
 HVIC. ORDO. PONTIFIGENSIS.
 OBVLCONENSIS.
 LOCVM. SEPVLTVRÆ.
 IMPENSAM. FVNERIS.
 LAVDATIONEM.
 STATVAM. EQVESTREM.
 DECREVERE.

Vrbem hanc frugum gloria & fertilitate fuisse quondam claram, ostendunt prisca ab Ant. Augusto producta numismata: quorum quædam *Obulconis* nomen, unà cum tritici & hordei spicis ferebant, alia verò aratrum cum spicis, & serpente in Cereris memoriam

CAP. XXI.

*Illiturgi etiam Illurgis & Illurgia dicta.
Non esse Iæen, sed Anduxar.*

PVnicis bellis nobilem validamq. urbem fuisse *Illiturgim*, in confesso est: & licet hodierno die à prisca nobilitate declinavit, res tamen circa ipsam gestæ vetant illam silentio præteriri. Ptolemæus *Illurgim* nominat, & inter *Turdulos* collocat; Stephanus verò Byzantinus, & Polybius *Illurgiam*; T. Liuius & Plinius *Illiturgim* vocant. Forum *Iulium* cognominabatur, conuentus olim Cordubensis. Ant. Beuterus credit, *Iæen* urbem *Illiturgim* fuisse, sed rectius multò Ambrosius Morales colligit fuisse, vbi nunc vicus *Anduxar el vejo* vix leuca ab vrbe distans: quod confirmat tum cippus marmoreus, ibidem refoffus, cum hac inscriptione:

ORDO. ILLITVRGITANORVM.
IMPENSAM. FVNERIS. DECREVIT.

Tum etiam Itinerarium Antonini, vbi enim Corduba Castulonem iter prosequitur, Illiturgi Castulonem XX. M.P. numerat, qui pænè ipsas V. Leucas ab *Anduxar el vejo Castlonem* vsque (vbi
Castulo

Castulo sita fuit) conficiunt. T. etiam Liuius *Illiturgis* & *Castulonis* simul semper mentionem facit, siue defectionem, seu excidia earum recenset. Cùm enim ad Romanos primùm defecissent ducibus Magone, & Amilcare, à Pœnis obsessum fuit, à Scipionibus tamen magna cum hostium clade obsidione exempti fuere: postmodùm iterum à Pœnis obsessis Cn. Scipio opem tulit, & cæsis xij. millibus hostium, recessum est ab obsidione, vt refert Liuius lib. xxij. & xxiv. Post cladem verò Scipionum, non solùm ad Pœnos defecerunt, beneficiorum immemores, sed defectionem scelere cumularunt: dum ex residua clade profugos Romanos hosti prodiderunt, qua de causâ Africano Scipioni meritas perfidiæ pœnas dedere, captâ per vim vrbe, auctore Liuius lib. xxvij.

Opidum ipsum hac tempestate, amplum, & opulentum, templis, cœnobiisq̃ue egregiè ornatum, abundat vino, oleo, tritico, ferina carne, melle, fructibusq̃ue omnis generis: copiosum ibi ferricum, nobilitas frequens, & illustris. Consentiunt Hispani scriptores hac in vrbe floruisse, & nunc sepultum esse Sanctum *Euphrasium*, ex septem primis Episcopis, qui Apostolorum iussu in HISPANIA Euangelium propagarunt.

CAP. XXII.

Granata nec Illipula, nec Illiberis olim dicta. Sed Maurorum opus. Vnde nomen habet. Diuisa in quatuor partes.

Nobilissimi regni caput *Granata*, & omnium totius *HISPANIAE* urbium maxima, teste *L. Marinæo*. *Illipulam* magnam *Ptolemæi* credit fuisse *Gerundensis* Episcopus, sed toto cælo eum errare *Strabo* ostendit: qui auctor est ad *Bætîm* appositam fuisse, inter *Hispalim* & *Cordubam*, qui *Ilipam* eam vocat: *Granata* verò, à *Bæti* procul distat. *Ambrosius Morales* ostendit *Illipulam* esse *Pennaflor*, exiguum opidum inter *Hispalim* & *Cordubam*. *Tarapha* verò, aliiq̃ue non pauci, *Illiberim* olim vocatam fuisse, quam *Stephanus Elibrigem* dicit. Sed non probatur *Vasæo* aut *Ambrosio Morali*, qui monent *Illiberim* non procul à *Granata* fuisse eo in colle, qui nunc *Eluire* vocatur, vnde & urbis porta nomen sumfit, & non à fæmina, vt quidam somniant. Urbs autem noua est *Pœnorum* colonia, quam ita dictam volunt nonnulli à *Cocco*, quem *Hispani Granam* vocant, qui insigni copia in hoc regno legitur; alij verò à mali punicæ similitudine, quod & *Granata* dicitur.

Nam

Nam vt illud est granosum, & densissimis acinīs refertum, sic & vrbs hæc, dehiscientis granati in modum, confertissimas ædes habet: adde, incolas pro auitis insignibus mala punica gestare, quo nominis etymon referrent.

Vniuersa vrbs multis collibus distincta, inter quos gemini ceteris altiores cōsurgunt, quos amnis Darrus per mediam vallē fluens interfecat: in quatuor primarias vrbis regiones, situ quasi separatas, diuiditur. Ea vrbis regio, quæ maximo decoratur templo, *Granatæ* nomine gaudet, vicos habet plurimos, & arctos ob insignem ædium frequentiam, licet à Christianis laxiores sint reddit. templum habet augustissimum, ea pœnè forma, qua Pantheon Romæ: sacrarium continet sumtuosum, in quo Rex Ferdinādus cum Isabel-la coniuge (qui hanc urbem à Pœnorum tyrannide anno Domini M. CCCC. xcij. vindica-uit) sepulti sunt. Secunda regio *Alhambra* vocata, in qua regium est palatium vetus, vermiculato opere, & immensis sumtibus exstructum: tantæ quidem magnitudinis, vt ciuitas potiùs quàm domus dici posset, tota mœnibus, turribusq. cincta. Nouum hîc palatium Hispaniarum Reges exstruxere, cui ad magnificentiam nec architecturæ concinnitas, nec materiæ nobilitas, nec hortorum amœnus nitor, aut fontium vndiq. erumpentium

iucundum murmur deest: quacumque enim prospexeris, multa sunt, quibus oculos animumque pascas. Ab vno enim latere, vndique luxuriantis agri felicissima amœnitas; ab altero verò inaccessi montes, perpetua niue canentes, vel flagrante Siro, sese offerunt. Quantum verò in septemtrionem se oculorum acies extendere potest, porrecta camporum æquora, floridis & irriguis distincta pratis occurrunt: hîc passim consiti xysti, & siluulæ frugiferarum arborum: hîc leporaria frequentibus feris, in regium oblectamentum conspiciuntur: hîc in ipsa Alhambra antiqua visitur inscriptio, quæ *Iliberis* nomen profert:

IMP. CÆS. M. AVRELIO.
 PROBO. PIO. FELICI. INVICTO.
 AVG. NVM. MAIESTATI Q.
 DEVOTVS. ORDO. ILLIBER.
 DEDICAT. P.P.

Tertia vrbs regio, *el Aluesim* dicta, duobus collibus ornata. Magna hîc ædium frequëntia, solis olim Mauris incolebatur, agricultura & ferici textrinis hîc victitant. Vltima regio est *Antiquerula* dicta, ædium frequentia & structura ceteris non inferior, situ est plano. Passim hîc bombycinus pannus

nus elaboratur, vestis item serica, & holobera præstantissima. Opificum frequentia, qui serico texendo victitant, quanta sit, vel ex eo colligi potest, quòd ex solis mori arboris folijs, quibus bombyces vescuntur, præter multas serici libras, Regibus triginta millia quotannis pœnè aureorum in vectigal cedant. Ambitu suo vrbs circiter M. P. XII. complectitur: tota vndique muris cincta, & propugnaculis mille triginta ornata, aëris hîc temperies saluberrima, nec nimijs austrinis obnoxia æstibus, aut arctois frigoribus obiecta; sed media axis vtriusque, vernanteque gaudet temperie. vnde & fructuum præstantia, bonitasque, & aquæ saluberrimæ insignis copia. Est præterea Episcopali dignitate insignita, Iliberitanâ vicinâ sede, vt multorû fert opinio, huc translata: iuridicus etiam hic celeberrimus conuentus habetur. Ludum hîc parentum memoriâ aperuît (quis credat?) *Ioannes Æthiops* genere, *Latinus* hinc dictus, at præstanti forma, & Musicæ ac Poëticæ in paucis peritus. Lusit enim carmen gratulatorium in Ioannis Austriaci victoriam ad Echinadas insulas, de Turcis anno **CLC. IC. LXXI.** naturali prælio partam.

CAP. XXIII.

*Abdera à Pœnis, aut Phœnicibus condita.
Franciscus Tarapha refellitur.
Vnde Almeria dicta.*

MArimum Bæticiæ opidum, non procul à Charidami promontorio, est *Abdera*. Gerundensis Episcopus hoc æuo credit *Veram* esse; potior tamē Scriptorum pars *Almeriam* dicit: cui & ego subscribo. Inter Bastulos, seu Bastitanos populos à Ptolemæo recensetur, & *Abdera* illi vocatur. Franciscus Tarapha à Thracibus conditā putat, nominis similitudine motus, quam habet cum Democriti patria: sed vnde id Tarapha? quod neque fictum, neque pictum, nec scriptum vspiam est. Meliùs Strabonis, aut Plinij vestigijs institisset, quorum ille à Phœnicibus, hic verò ex opinione M. Agrippæ à Pœnis originem trahere, vt & oram illam vniuersam, dicit. *Almeria* verò cur postea vocata sit, dicit Tarapha ab Almarico Gothorum Rege: qui anno Domini Io. xv. vel, vt alij, Io. xxx. **HISPANIIS** præfuit, nomen habuisse: qui cum à Childeberto Francorū Rege bello peteretur, propriis diffusus viribus, fuga salutem quærens, hîc interfectus fuit. Vrbs hæc

an. cId. C.XLVII. memorabili illa expeditione ab Alphonso VIII. Aragonum Rege, S. P. Q. Genuensi, & Raymondo Comite Barcinonensi suscepta, Mauris erepta fuit. Occupatâ verò vrbe, Genuensibus in præmium nauatæ operæ, catinus ex solido smaragdo, immensi pretij, oblatuſ fuit, vt auctor est Rodericus Ximenius, Toletanus Archiepiscopus, Rerum Hisp. lib. vij cap. xi. Ligurum tamen Annales, non Almeriæ, sed Cæsareæ in Palæstina, Guilielmo illorum Duci, qui primus muros ascenderat, obtigisse illum referunt. Antiquissimum hîc fuisse Episcopatum, docent Concilia in Hispania celebrata: cuius primus Episcopus S. Ctesipho, B. Iacobi Apostoli discipulus fuit, vt auctor est Ioannes Valæus.

CAP. XXIV.

Malaca aliquibus Mænace. Veteres inscriptiones.

QV A mediterraneum mare prospectat Bætica, fecunda est vrbs *Malaca*, hodie vix mutato nomine *Malaga* appellatur; licet Mario Aretio aliter visum sit, qui *Malacam* olim fuisse, vbi nunc *Caput Maduce*; *Salaubam* verò fuisse, quæ nunc

Malaga. Sed hoc est ex meridie tenebras facere: nam & situs, nomen, ceterique Scriptores contra asserunt; inter Bastulos à Ptolemæo memoratur. Primarium fuisse opidum auctor est Strabo, qui nonnullos credidisse refert, olim *Manacem* dictam: quam Stephanus videtur *Μάινον* vocare, nisi *Μελίτην* illam esse scriberet; sed perperam, cum hæc Phocensium urbium ultima, quæ ad occasum vergunt, & longius à Calpe distat, quàm *Malaca*, quæ Phœnicum ciuitatis propiorem retinet formam. Licet Festus Auienus, in descriptione sua oræ maritimæ, vnam eandemque urbem esse dicat, his versibus:

*Hos propter autem mox iugum Barberium est
Malachéq, flumen, vrbe cum cognomine;
Manace priore quæ vocata est sæculo.*

Fluuius verò hic *Malaca*, de quo Poëta, idem est cum Ptolemæi *Saduca*, qui hodierno æuo ab accolis *Guadalqueuireio* indigetatur, teste Floriano lib. i. cap. ij. licet perperam Marius Aretius *Saldubam* hunc vocet, Dialogo suo, cui *Calipho* nomē, cum nemo Cosmographorum illius meminerit.

Plinius à Pœnis originem trahere asserit; Franciscus Tarapha à Phœnicibus ante Christi aduentum annis Io. III. exstructam putat, quo auctore, nescio. Hoc tempore vrbs est non obscura. nam emporium est satis frequens, agro vndique felici,
& amicæ-

& amœnissimo cinctum: huc statim temporibus, vndiq. mercatores magna copia confluunt, præcipuè Belgæ, vt sapidissimos & passos autumnales fructus, ad septemtrionales plagas auerant. Vini & olei copia fecunda, vnde luculentum incolis lucrum. turribus, propugnaculisque egregiè instructa, vt facile omnes hostiles minas contemnat. Indicio est, longa obsidione à Ferdinãdo & Isabella Regibus vexatam, nec nisi urgente fame captam fuisse. Armamentariũ omni telorum, & machinarum bellicarum genere, longè instructissimum habet, vnde limitaneis Africæ locis, vt Madauro (quod vulgò *Oran* appellatur) necessarij commeatus telaque suppeditantur. Episcopalis vrbs à multis annis fuit, Martyresque habuit SS. Cyriacum & Paulam, sub Diocletiano passos. Non possum hoc loco præterire inscriptionem, quã Malacæ in honorem Imp. Septimij Seu. Pert. existare refert Morales:

IMP. CÆS. L. SEPT. SEVERO.
PIO. PERTINACI. AVG.
PARTH. ARAB. ADIAB.
PACATORI. ORBIS.
ET. FVNDATORI. IMP. ROM.
IN. EIVS. HONOREM. RESP. MALAC.
TEMPLVM. MARTI. D.D.

Non procul à Malaca vicus est *Cannete*, olim *Sabora* dictus, vbi superioribus annis, æneatabula vnà cum insigni inscriptione reperta, quæ quia Imperatoriam breuitatem refert, & scire operæ pretium erat, religiosum putavi hîc omittere:

IMP. CÆS. VESPASIANVS. AVG.
PONTIFEX, MAXIMVS.
TRIBVNICIÆ. POTESTATIS. VIII.
IMP. XIIX. CONSVL. VIII. P. P.
SALVTEM. DICIT. IIIIVIRIS.
ET. DECVRIONIBVS.
SABORENSIVM.

CVM. MYLTIS. DIFFICVLTATIBVS.
INFIRMITATEM. VESTRAM. PREMI. INDICETIS.
PERMITTO. VOBIS. OPIDVM. SVB. NOMINE. MEO.
VT. VOLTIS. IN. PLANVM. EXSTRVERE.
VECTIGALIA. QVÆ. AB. DIVO. AVG.
ACCEPISSE. DICITIS. CVSTODIO.
SI. QVA. NOVA. ADIICERE. VOLTIS.
DE. HIS. PROCONSVLEM. ADIRE. DEBEBITIS.
EGO. ENIM. NVLLO. RESPONDENTE.
CONSTITVERE. NIL. POSSVM.
DECRETVM. VESTR. ACCEPI. VIII. KAL. AVG.
LEGATOS. DIMISI. III. KAL. EASDEM.
VALETE.

II VIRI. C. CORNELIVS. SEVERVS.
ET. M. SEPTIMIVS. SEVERVS.
PVBLICA. PECVNIA, IN. ÆRE. INCIDERVNT.

CAP.

CAP. XXV.

Cartima. Diuersa à T. Liuij Certima.

Egregia vetus inscriptio.

NOn procul à Malaca, amœnum est opidum *Cartama*, olim verò *Cartima*, vel *Municipium Cartimitanum* vocatum, vt ex antiqua mox patebit inscriptione: quæ multum diuersa est à T. Liuij *Certima*, cuius lib. xl. meminit. nam in vltima illam Celtiberia statuit, à Tib. Sempronio Graccho obsessam, ad deditionemque compulsum: nostra verò hæc *Cartima* ad maximi montis radices sita (qui num Ptolemæo *Ilipula* vocetur, alijs inuestigandum mando) qui quantum in aquilonem patet sterilis est, & aspretis siluisque horridus, sed aduersa parte culturæ patiens, & passim vinetis confitus, Græcas nuces, seu amygdala, ficusque sapidissimas magna copia producit, quæ in boreales regiones magno emolumento incolarum asportantur. Adiacent frequentes siluæ glandiferæ, & gallæ feraces, quarum tum ad atramentum conficiendum, tum ad densanda hircorum caprarumque coria (vulgò *corduana*) magnus est vsus. pulcerrimam hoc loco exstare inscriptionē refert Ambrosius Morales, qua Lectorem defraudandum non putauit.

IVNIA. D. F. RVSTICA.

SACERDOS. PERPETVA. ET. PRIMA.
IN. MVNICIPIO. CARTIMITANORVM.

PORTICVS. PVBLICAS.

VETVSTATE. CORRVPTRAS.

REFECIT.

SOLVM. BALINEI. DEDIT.

VECTIGALIA. PVBLICA. VINDICAVIT.

SIGNVM. ÆREVM. MARTIS.

IN. FORO. POSVIT.

AD. BALINEVM. SOLO. SVO.

CVM. PISCINA. ET. SIGNO. CVPID.

EPVLO. DATO. ET. SPECT. EDITIS.

D. S. P. D. D.

STATVAS. SIBI.

ET. C. FABIO. IVNIANO. F. SVO.

AB. ORDINE.

CARTIMITANORVM. DECRETAS.

REMISSA. IMPENSA.

AVIÆ. STATVAM. ET. C. FABIO.

FABIANO VIRO.

D. P. S. F. D.

CAP.

C A P. XXVI.

*Singylia nunc Antiquera , ab Antonino
Anticaria dicta. Inscriptio vetus.
Fons ibi medicatus.*

GRanatenſis regni venuſtum eſt opidum *Antiquera*, Plinio olim *Singylia* dictum, vt ex antiquis probant inſcriptionibus Amb. Morales, & Car. Cluſius. Nomen illi forſan, à vicino amne *Singyli*, qui Bæti infunditur, hodie *Xenil* dictus. num vero eadē ſit cum Antonini *Anticaria*, quam itinere à Gadibus Cordubam ſtatuit, incertuſum. Sed nominis vicinitas, parum diſcrepante ſitu, ſuadet, vt idem, cum Ortelio, credam eſſe opidum cum *Singylia*. Quid enim miri à Plinij ætate in Antonini æuum nomen mutatum eſſe? cū plerisque id eueniſſe palam eſt: hinc vix duo Scriptores idem nomen efferunt. Situm eſt opidum in colle leuiter vndique aſpero, & inæquali, ſed amœno, & fecundo, firmum ſatis & munitū. Caſtrum habet in vertice cum portis ferreis, vbi Granatenſium Regum frequens, & tutus olim erat ſeceſſus. Iucundus in ſubiectos agros proſpectus, hinc per porrectos agros latiffimè vagatur

tur, hinc cæduis montibus coërcetur : adest fontium perenniũ, & egelidorum frequẽtia, quorum inter confragosa loca ebullientium suauissimum murmur aures demulcet : & limpidæ vndæ visui gratæ. Salinas habet copiosas, vnde ingens quæstus exiguo labore venit. non enim, sicut in Germania & Zelandia, ignis adminiculo coquitur, sed æstiuis mensibus, fontanâ vel cælesti aquâ in stagnum collectâ, multo sole concrescit. Vnde & vicini montes candidissimi salis grumos præbêt : habet etiam non contemnendas latumias, ad incolarum ædificia. Egregia hîc inscriptio seruatur, quæ prisci nominis, & vetustatis memoriâ refert:

GALLO. MAXVMIANO. PROCOS. AVG.
ORDO. SINGILIENSIVM.
OB. MVNICIP. DIVTINA. BARBAR. OBSID. LIB.
PATRONO.
CVRANTIBVS. C. FAB. RVSTICO.
ET. L. AEMILIO. PONTIANO.

Secundo ab vrbe milliari medicatus est fons, ad multa morborum genera, sed præcipue ad calculorum vitia celeberrimus, indigenis dictus *Fuente de Antequera*. Superiori etiam æuo in honorem fuisse, prisca inscriptio ab Amb. Morales producta testatur, quam hodieque Singylia dicit conspici:

FONTI. DIVINO. ARAM.
L. POSTVMIVS. STATVLIYS.
EX. VOTO, D.D.D.

CAP. XXVII.

*Artigis Iulienſis cognominata. De eius
Thermis pauca.*

Singylia fontis ſalubritas in memoriam mihi
reducit *Alhamæ* nobiles, & vicinas thermas,
quarum occasione de ipſa vrbe pauca dicenda
erunt. Credit Ioſephus Moletius, *Alhamam* eſſe
Artigim Ptolemæi, quam Plinius *Iulienſem* dicit
cognominari. Turdulorum opidum quondam,
ſed quibus coniecturis fultus hoc aſſerat, incertus
ſum: quare neque confirmare argumentis, nec
reijcere mihi in animo eſt. Diſtat nunc à Granata
ſeptem miliaribus: immenſis vndiquè præcipi-
tijs, & aſperrimis rupibus ambitur, agro tamen
lætiffimo fruitur: in pratis, hortis, aruiſque mira
paſſim luxuries: Granatenſibus olim Regibus
amœniſſimum otium, & delicias præbebat. Sed
ſalubres, & vberri mi hîc ebullientes fontes, locum
præcipuè commendabant: qui ſecreto quodam
naturæ miraculo, ex intimis terræ viſceribus, ſe-
cum calorem beneficum ferunt, nullius externæ
flammæ indigi, vt caleſiant. Cùm enim multis
in locis terra opertos ignes tegat, quibus iuge pa-
bulum aluminis, ſulphuris, aut bituminis vena
præbet,

præbet, fit vt eorum ardore incalescenstellus, fer-
 dum vaporem in superiora emittat loca, quo of-
 fensi vicini fontes efferuescunt inter venas suas,
 atque ita profluunt calidi; incorrupto interdum
 sapore, si remotiores ab ignis pabulo fontium or-
 tus. Quod si verò per ipsa loca sulphure, aliave
 materia plena fluant aquæ, calorem non solùm
 illius contactu, sed & saporem, & odorem trahere
 in confesso est. Sed cum studio hæc inquirent, qui
 naturæ arcanis nobiles curas intulerunt, instituti
 enim mei minimè est exactè hæc persequi. Tem-
 peratum adeò huius fontis calorem prædicant, vt
 nudo corpori nulla inde noxa. ipsa verò aqua
 pacata adeò, & limpida fluit, vt numerare inie-
 ctas stipes, & relucètes calculos facilè quivis pos-
 sit. Epotam varijs ægitudinibus, & neruorum
 præcipuè ferunt conferre; Martio præsertim &
 Septembri utilis mensibus. Adauget etiam stru-
 cturæ elegantia natiuam loci amœnitatem. Re-
 gum enim cura, & liberalitate, thermæ hîc ex-
 citatæ magnis impensis, adeò vt inter Hispaniæ
 balnea nobilissimæ habeantur, & cum Statio Pa-
 pinio I. Sylu. liberè dicam.

*Nec si Baianis veniat nouus hospes ab oris,
 Talia despiciat (fas sit componere magnis
 Parua:) Neronea nec qui modò lotus in vnda,
 Hic iterum sudare neget.*

CAP. XXVIII.

*Munda antiquum nomen retinet. Inscriptio
vetus. Metropolis olim Turdetaniæ.*

A Etatis iniuria, & posterorum incuria effecit,
ut, quo loco quondam fuerit *Munda*, pœnè
ignoretur. alij enim *Rondam*, alij *Mundecaram* ho-
die vocari credunt. Sed P. Ioan. Mariana, & Amb.
Morales, ostendunt incorruptum nomen, post
tot sæcula seruatum, & *Mundam* esse, quæ viginti
millibus à Malaca distat. Suffragatur vetus in-
scriptio templi foribus præfixa:

IVLIVS. NEMESIVS. NOMENT.
VICE. M. AVRELII. IMP.
SACRA. BÆTICAM. GVBERNANS.
PRÆTORIVM. IN. VRBE. MVNDA.
QVO. PATRES. ET. POPVLVS.
OB. REMP. RITE. ADMINISTRAND.
CONVENIANT. F. MAND.

Erat autem *Munda*, teste Plinio, Colonia immu-
nis, sita editiori in grumo, modico præterfluente
amne, palustri & voraginoso solo, ad dextram
partem

partem (vt refert A. Hirtius) quem lata planities excipit, vbertate & amœnitate conſpicua, & in vniuerſa frugum genera facilis, vt nihil fit quod natura negauerit, nihil quod cultura præterierit, Sed nulla re notior, quàm cruento, & ancipiti circa illam commiſſo prælio, inter Pompeij liberos, & Dictatorem Cæſarem : vbi tanta Pompeianorum ſtrage bellatum fuit, vt, cùm ſe Mundæ proſugi recepiſſent, & Cæſar obſideri victos imperaſſet, aggeriſque exſtruendo deeſſet materia, congerie hoſtilium cadauerum, pilis traguliſque conſixa (quia roboreæ ſudes deerant) urbem vallerent. Auſtor eſt Dion lib. xliij. hoc loco ſtatim à victoria palmæ germen enatum eſſe. Sed magis mirandum, quod C. Plinius lib. xxxvi. cap. xvij. refert, palmatos circa *Mundam* lapides reperiri, idque quoties fregeris. Strabo lib. iij. refert *Mundam* quaſi metropolim fuiſſe vniuerſæ Turdetaniæ.



CAP. XX. X.

Lusitania. Dicta etiam Lysitania. Limites eius. Strabo diuersus à ceteris. Stephani Byzantini hallucinatio. Lusitania & Portugalia diuersæ olim prouinciæ. Martiani Capellæ error.

HISPANIÆ vltioris altera prouincia est *Lusitania*, cui *Lusum* Liberi patris, aut *Lyssam*, cum eo bacchantem nomen dedisse auctor est Plinius lib. iij. cap. I. vnde & promiscuè apud veteres nunc *Lusitania*, nunc *Lysitania* scriptum est. Terminatur secundùm Ptolemæum, à septentrione amne Durio (qui illam à Tarraconensi diuidit,) à meridie flumine Ana (qui illam à Bætica,) ab occidente Oceano Atlantico; ob oriente à Tarraconensi separatur, linea ducta ab Oretania veteri, vsque ad pontem Durij, è regione *Septimancas*. Strabo verò lib. iij. diuersus à Ptolemæo, ceterisque Geographis, Lusitaniæ limites describit: *Huius regionis Australe latus Tagus cingit; ab occasu verò, & septentrione Oceanus; ab aurora Carpetani, Vettones, Vaccaei, & Callaici, famæ maioris populi.*

Ex quibus patet, Strabonem *Lusitaniam* à Tago inchoare, regionem verò, quæ inter Tagum & Anam est, *Lusitania* excludere, ab altera verò

G

parte

parte vltra Durium illam extendere: siquidem & Minium amnem, & Artabros *Lusitania* comprehendit, qui à Ptolemæo in Tarraconensi statuuntur; sed cùm Plinius etiam Ptolemæo suffragetur, & Durio Anaque fluminibus *Lusitaniam* includat, missâ Strabonis descriptione, Ptolemæi vt veriori magisque receptæ adhærendum. Quid Stephanum Byzantinum libro De vr̃ibus mouerit, quòd *Lusitaniam* Beticæ partem asserat, me latet: quemadmodum etiam, quod dicit ex Artemidori sententia, *Belitanos* eosdem esse cum *Lusitanis*. Nam Plinius lib. iij. cap. iij. prope Cæsaraugustam *Belitanos* Ciuium Romanorum collocat, & Ptolemæus eodem pœnè loco urbem *Beliam* recenset, satis procul à *Lusitania*: nisi forsandicamus *Belitanos* à *Lusitanis* originem trahere, & ideò eosdem esse cum *Lusitanis*. Martianus Capella *Lusitaniam* dicit permeari sui cognominis fluuiò, sed vbi gentium hic fluuius, mihi prorsus ignotum, nisi Anam quis suspicetur esse. Sed terminat amnis hic *Lusitaniam*, non transit. Quare mittamus Sybillina hæc folia. Hodierna die *Portugalia* dicitur, non tamen satis propriè: siquidem nec tota *Portugalia* *Lusitaniæ* finibus circumscripta est, nec etiam totam *Lusitaniam* complectitur; licèt potissima eius pars *Portugaliæ* subiaceat. nam tota inter amnis prouincia, vulgò *entre Douro & Minho*,

Minho, extra Lusitaniam erat, secundum Plinium, & Ptolemæum: nisi Straboni accedamus, qui ait maximam Callaicorum partem *Lusitanos* appellari; & alibi dicit, Minium omnes Lusitaniæ amnes magnitudine superare. Eadem etiam ratione Lusitaniæ pars, quæ Tarraconensem spectat, *Portugalia* non comprehenditur, ut *Castra Cecilia*, *Castra Iulia*, *Placentia*, *Abila*, *Salmantica*; tum non paucæ vrbes, quæ circa Anam sunt, & inter illas *Augusta Emerita*, olim conuentus Lusitaniæ. Nomen verò *Portugaliæ*, teste Andrea Resendio, à portu *Calis* circa Durij ostia deducitur, & non à portu *Gallorum*, ut insulse L. Marineus Siculus, alijque: unde leuiter inflexo nomine *Portugale*. Paulatim ad Braccarios Galleciæ partem diffusum, ut auctor est Rodericus Ximenius Archiepisc. Tolet. lib. v. cap. xij. *Interea Alcorexi Rex Agarenorum eam partem Galleciæ, quæ nunc Portugalia dicitur, & vsque ad S. Iacobum, non veritus Apostolum, deuastauit.* Et lib. vi. cap. xi. *Lusitaniæ, & Portugaliæ*, ut diuersarum prouinciarum, simul meminit, vbi de Ferdinando I. agit: *Cumq; in tranquillitate secura gauderet, congregato exercitu processit, ut Lusitaniam & Portugaliam occuparet, quas tunc temporis Arabes detinebant.*

Lusitania autem omnis in tres iuridicos conuentus, auctore Plinio, distincta erat, in *Pacensem*, *Scalabitanum*, & *Emeritensem*: rota vndique magnis

nobilibusque fluviijs irrigua, Durio, Munda, Callipode, Minio, & ab omnibus ob auríferas arenas celebrato Tago: fontium perennium tanta copia, vt, teste Vafæo, vltra viginti quinque millia, in ea numerentur, inter quos mirandi aliquot. Refert enim Plinius lib. ij. cap. iij. *In Carinenfi* (feu vt Refendius emendat, *Catinenfi*) *Hispaniæ* agro, duos fontes iuxta fluere, alterum omnia refpuentem, alterum abſorbentem. poſtremum hunc fontem, non procul à Tentugalenſi municipio, loco dicto *Cadima*, cōſpici ait Vaſæus, & corā Rege Ioanne III. periculum factum, non ſolū in arborū truncis, ramisq̃ue, ſed etiam in iumento, quod fonti admoto pede paulatim abſorberi cœptum, ægrè tandem à famulis extractum eſt. octo leucis à *Conimbrica* abeſt hic fons, & indigenis nunc *Ferventia* vocatur.

Præter auriferum verò Tagum, tellus etiam auri ferax, ita vt Luſitaniam, Galleciam, & Aſturiam, vicena millia pondo annis ſingulis præſtitiffe dicat Plinius lib. xxxij. cap. iv. plumbi, & cryſtalli etiam fecundam eſſe, alijs locis idem eſt auctor. Huius provinciæ vbertatē, cultum, amœnitatem quid opus eſt multis efferre? multorum inſtar crit Athenæi viij. Dipnoſoph. de illa encomium: qui ex ſententia Polybij Megalopolitani poſt multa: *Sus*, inquit, *qui ad centum librarum pondus*

pondus accedit, quinque drachmis in cœnas emitur, ovis duabus, ficuum talentum tribus obolis, vitulus drachmis quinque, bos iugo aptus decem: siluestrium verò animalium carnes neque pretio ullo dignæ putantur; sed has inter se conferunt, benigneq. admodum vicissim largiuntur, ac mutant.

De incolarum verò virtute, ingenio, & bellica gloria quid attinet multa dicere? Diodorus Siculus fortissimos omnium Celtiberorum *Lusitanos* ait; Strabo etiam lib. iij. *Lusitaniam* ait plurimis annis Romanorum armis oppugnatam. Abunde etiam Florus *Lusitanorum* virtutem ostendit lib. ij. cap. xvij. *Totam certaminum molem cum Lusitanis fuisse, & Numantinis: nec immeritò, quippe solis gentium duces contigerunt.* Vnus Viriatus sufficiet, qui annos quatuordecim, varia victoria Romanos fatigavit, & si fortuna fauisset, meritis, qui *HISPANIAE* Romulus fuisset.

Nec emarcuit nostra tempestate Martius ille vigor, nam patrum memoria, felici ausu, & audaci felicitate, superato Bonæ Spei promontorio, ignotum antea vastissimum illud Atlanticū mare primi nobis aperuere *Lusitani*, detexêre latentes Africæ immensas oras, & secunda nauigatione penitissinia Indiæ penetrarunt: vbi non cum inermi, aut fugaci Mauro, sed cum potentissimis Indiæ Regibus, vniuersi orientis robore, cum Per-

sis, inquam, & Turcis maxima bella felicissimè,
terra, marique gesserunt.

CAP. XXX.

*Lusitaniæ populi. Duplices Turduli. Idem
cum Turdetanis Ptolemæi. Celtici vnde fluxere. Vete-
rones nunc Lusitania exclusi, nunc inclusi. Prouincia
Veretonia.*

TVRDVLI.

INter Lusitaniæ incolas, numero famaue no-
tissimi fuere *Turduli*. Diuisi olim in *Turdulos
veteres*, & *Turdulos* citra adiectionem dictos: cele-
berrimi erant *veteres*, & quasi ceterorum parentes,
tam eorum qui Lusitaniam, quàm qui Bæticiam
incolebant. Pomponius Mela eos habitasse à Ta-
gi ostio ad Durium vsque lib. ij. cap. i. refert; Pli-
nius verò circa Durium amnem eos collocat, his
verbis, lib. iv. cap. xxi. *A Durio Lusitania incipit,
Turduli veteres. Præfuri. flumen Vacca.* Vnde parum
exactè Abrahamus Ortelius in veteris suæ Hispa-
niæ descriptione, circa Promontorium sacrum
Turdulos veteres ponit, cùm multis hinc millibus
Durius amnis remotus sit. Ceteros verò *Turdu-
los* circa Anam flumen degere testatur Plinius
lib. ix. cap. xxij. *Ab Ana*, inquit, *quo Lusitaniam à
Bætica*

Betica discreuimus, C. XXI. M. P. à *Gadibus* C.I.M. P. additis, gentes *Celtici*, *Turduli*, & circa *Tagum Vettones*. Ita enim legit *Andreas Resendius*, cùm prius legeretur *Varduli*, qui citerioris prouinciæ circa *Vascones* sunt populi.

Hos ego *Turdulos* eosdem crediderim, cum *Turdetanis*, quos *Ptolemæus* in *Lusitania* recenset, ab *Anæ ostijs* ad *Promontorium Barbarium*, vulgò *Cabo de Pixeles*, vbi nunc *Regnum Algarbij* est: & cùm ceteri *Scriptores* de *Turdetanis* in *Lusitania* fileant, & *Turdulorum* situs cum *Ptolemæi Turdetanis* idem prorsus sit, eosdem ausim asserere. Præter verò hos *Turdulos* meminit *Plinius* citato cap. xxij. *Turdulorum*, qui *Barduli* & *Tapori* vocantur, de quibus quid dicam planè anceps sum, cùm nemo hos præter illum agnoscat.

CELTICI.

PRæpotens in *Lusitania Celticorum* populus, à *Gallis Celtis*, vt fama est originem ducens: iuxta *Anam*, teste *Plinio*, habitabant, ad *Turdulos* & *Vettones* longè lateque diffusi, eo pænè loci, qui hodiè *Alemteyo* vocatur, multas præclarasque vrbes occupantes, quas inter autum pænè & gentilitium nomē seruarunt *Heluæ*, nostro æuo non obscura vrbs, ab *Heluijs Gallis* conditoribus sic vocata.

Varij ab his *Celticis* fluxere populi, inter cete-

ros verò, qui Beturiæ partem incolebant, Celtici, teste Plinio lib. iij. cap. I. *Celticos, à Celticis ex Lusitania aduenisse manifestum est, sacris, lingua, opidorum vocabulis, quæ cognominibus in Bætica distinguuntur, ita enim legendum, & non à Celtiberis, ut vulgati codices, monet Resendius. nulli enim Celtiberi in Lusitania. Sed etiam in Citeriori prouincia Celtici cognomine Neræ, & Celtici Pasamarici qui omnes circa promontorium Nerium, aut Celticum dictum habitant: quorum Strabo luculentè meminit lib. iij. loquitur verò de promontorio Nerio: Circum habitabant Celtici, qui colentes Anam fluvium cognatione contingunt. Nam cum ij pariter atque Turduli, socijs eò armis peruenissent, seditionem egisse ferunt, postquàm Limiam fluvium traiecerunt: ceterum post seditionem, eorum amisso duce, palantes ac dissipati ea in regione defederunt: hac de causâ flumen Mons, id est, Oblivionis appellatum.*

V E T T O N E S.

Frequentem maximè fuisse, & diffusam *Vettonum* nationem, nemo vel obiter in Geographis, & prisca Historia versatus inficiabitur: hinc pugnancia inter sese mutuò Scriptorum sunt testimonia. Nunc enim illos inter Lusitanos recensent, nunc excludunt. Ptolemæus illos Lusitaniæ adscribit, & maximè orientales facit (licèt antiqua exemplaria *Odygænes* habeant; Plinius autem lib. iv.

lib. iv. cap. xxij. circa Tagum statuit *Vettones*; Cæsar verò primo belli Ciuilis Commentario, illos Lusitania videtur excludere: vbi enim Afranij, Petreij, & Varronis, Pompeij legatorum præfecturas diuifit, fubdidit: *Vt Petreius ex Lusitania per Vettones cum omnibus copijs ad Afranium proficifcatur.* Strabo etiam lib. iij. à Lusitania illos videtur excludere: *Huius regionis [Lusitaniæ] latus australe Tagus cingit; ab occafu verò & feptemtrione Oceanus; ab aurora Carpetani, Vettones, Vaccaei, & Callaici famæ maioris populi.* Idem tamen ftatim fubdit Strabo: *Contra verò nonnulli & hos Lufitanos nominant.* Vnde alterutrum fequi neceffum eft, vel duos diuerfos populos fuiife; aut, vt exordio dixeram, frequentem admodùm fuiife gentem, quæ anguftis fuæ prouinciæ terminis non contenta, in citerioris prouinciæ partem, aggrauante copiâ, fe diffuderat. quod & Andreæ Refendio probari video, qui addit, feparatâ illos etiam prouinciâ effeciffe, occupatis vicinorû agris, cuius caput *Augufta Emerita* à Prudentio ftatuitur. Confirmat hoc vetufta infcriptio, ab eodem producta, quæ Emeritæ vifitur.

D. M.

P. ÆLIO. VITALI. AVG. LIB. TABVL.
PROVINC. LVSITANIÆ. ET. VETTONIÆ.
STEPHANVS. LIB.
ET. HERES. PATRONO. FECIT.

G 5

Vnde

Vnde verum esse comperimus, quod Plinius iam suo ævo conquerebatur: *Aliunde alijs exordium mensuræ est, & alia meatus, ita fit, ut nulli duo concinant..*

Ab his populis *Vettonicam* laudatam, & nunc notissimam herbam nomē sumfisse refert Plinius lib. xxv. cap. viij. Auctor est Strabo lib. iij. *Vettones*, cū primū Romanorum castra intuentes quosdam centuriones, deambulationis causa destitūte viam cernerent, insanire homines sunt suspicati: itaque eis præcedentes, viam ad tabernacula commonstrabant, perinde ac, aut fixos per quietem manere, aut pugnare necessarium arbitrentur.

CAP. XXXI.

Augusta Emerita ab Augusto condita. Lusitanie quondam metropolis. Reliquiæ hinc Theatri, & Naumachie.

Post deuictos Cantabros, pacatamque Hispaniam ab Augusto Cæsare, ab emeritis militibus, *Augustam Emeritam* conditam urbem, præter Dionem lib. liij. & D. Isidorum, sentiunt Scriptores, inter quinque Lusitanie colonias Plinio recensetur: celebremque eius ætate fuisse, vel ex eo patet

eo patet, quòd inter tres conuentus Lusitanix ab eo reponitur. Pomponius etiam Mela suo æuo celeberrimam Lusitanix urbem fuisse ostendit. Non defuere inter recentiores, qui nugis suis omnia inuoluentes, dicant, vel à *Myrmidonibus*, vel in *Herculis* memoriã tamquam *Memoridam* dictam. Quis non ridebit tam inficetas etymologias? Ptolemæus inter Celticos; Strabo verò illam inter *Turdulos* collocat; poëta verò *Prudentius*, hymno in *S. Eulaliã Emeritensem*, inter *Vettones* recenset:

*Nunc locus Emerita est tumulo,
Clara Colonia Vettonix,
Quam memorabilis annis Anas
Præterit, & viridante rapax
Gurgite, mœnia pulcra alluit.*

Et licèt auctores hi dissentire videantur, facile lis hæc componi poterit, si temporum decursu variè mutatas prouincias reputauerimus, de quo & *Plinius* suo æuo conquirebatur lib. iij. cap. i. *Quæ causa*, inquit, *magnoꝝ errores computatione mensuræ sæpiùs parit, alibi mutato prouinciarum modo, alibi itinerum auctis & deminutis passibus; incubuere maria tam longo æuo, alibi processere litora, torsere se & fluminum aut correxere flexus.* Proinde non erit mirum, *Strabonis* tempestate, qui sub *Tiberio Cæsare* floruit, *Turdulos* viribus opibusq. claruisse; Pruden-

Prudentij verò æuo, qui sub Theodosio, Arcadio & Honorio vigit, Vettones superiores fuisse, partemque Turdulorum agri occupasse, atque ita *Emeritam* inter Vettones annumeratā, cū prius inter Turdulos esset:

Vrbem hanc Lusitanix caput fuisse, non solum reliquix antiquorum ædificiorum, sed & Poëta Ausonius testatur:

*Iure mihi post has memorabere nomen Iberum,
Emerita, æquoreus quam præter!abitur amnis,
Submittit cui tota suos Hispania fasces.*

Prudentius etiā dicto hymno luculentè id testatur:

Lusitanorum caput opidorum Vrbs.

Sita est *Emerita* loco campestri, iuxta flumen Anam, vulgò *Guadiana*: qui pulcerrimo stratus ponte, vt ex architecturæ concinnitate conijcere licet, Romanam magnificentiam refert. hac in vrbe olim duo erant aquæductus, quorum adhuc hinc inde sparsi arcus visuntur, qui operis splendorem præferunt. Vrbi etiam contigua moles est, quam incolæ *Septisolum* vocant, quòd referant statò tempore, septem Pœnorum Reges hac in vrbe cōuenire solitos fuisse, & his sedibus sedisse. sed germanæ nugæ sunt, cū sedilium ne vmbra quidem hæc moles referat; sed theatrum fuisse ait Gasparus Barrerius, quod arcus planè habet collapsos, parietes verò diuersis in locis integros;

gros, ruderum adgestione planè deformatum. Arcus etiam hîc prope D. Iacobi ædem spectatur, quem incolæ plurimique Scriptores triumphalē fuisse putant: sed præterquàm quòd falsum sit, triumphales arcus alibi quàm Romæ fuisse, structuræ quoque sunt magis illustris & operosæ: res gestas, fûsos hostes, victoriasque insculptas habent; vnà cum titulo Imperatoris, vt Romæ videre est in arcu Imp. Septimij Seueri, & Titi Vespasiani. Emeritensis verò arcus nihil horum præfert, ideoque non abs re Barrerius suspicatur, fuisse tropæum aliquod. Insigne præterea antiquitatis opus conspicitur hîc, Naumachia. Figura campi est oualis, M. CCCC. pedes in longitudinem porrecta, latitudo verò longitudini respondet: circumdata est magno muro in arcus & fornices deducto, vt nonnullis in locis adhuc vestigia monstrant. Vrbs hæc olim nobilissima ad magnam incolarum infrequentiam delapsa est, & præter priscae claritatis ruinas nihil ostendit.

Auctor est Plinius lib. ix. cap. xli. circa Emeritam coccum esse maxima in laude. Idem lib. xv. cap. iij. prædulces oliuas per se tantùm siccatas vuisque passis dulciores, admodum raras circa Emeritam Lusitanix esse refert. Gothorum tempestate Episcopalis vrbs erat, postea & Archiepiscopatum obtinuit, nunc vtroque spoliata.

Metro.

Metropolitana verò dignitas à Callisto II. Pont. Max. translata fuit Compostellam, vt refert Vassæus Brugenfis. Hac vrbe orta est *D. Eulalia*, vt supra citatis versibus meminit Prudentius. eadem oriundus poëta *Decianus*, vt testatur Martialis:

Gaudet iocosæ Canio suo Gades,

Emerita Deciano meo.

C A P. XX XII.

Ebora dicta liberalitas Iulia. Inscriptiones veteres. De situ eius pauca.

PER antiquam fuisse Lusitaniæ urbem Eboram, vt nemo dubitat, ita de primo eius conditore, cuncti pœnè ambigunt: quod in tanta vetustatis caligine mirum non est Iacobus Mœnetius Vascocellus IC. Lusitanus, non ineptè suspicatur, hanc urbem nominatam fuisse, ab *Eburonibus*, seu *Eburonicibus* Galliæ Celticæ populis, cùm compertum sit tractum hunc Celtas incoluisse: vnde forsan & *Eburobritium*, & in Bætica *Ebura* ad finem Gaditanum, & in Carpetania T. Liuius *Ebora* nomen sumfere. Viriati certè magni illius Lusitani Ducis tempore floruisse, constat ex antiqua inscriptione, quam ab Andrea Resendio libello
De

De antiquitate Eboræ defumtam , Lectori hîc
propono:

L. SILO. SABINVS.

BELLO. CONTRA. VIRIATVM.
IN. EBOR. PROV. LVSIT. AGRO.
M VLTITVDINE. TELORVM.

CONFOSVS.

AD. C. PLAVT. PRÆT.

DELATVS. HVMERIS. MIL.

H. SEP. E. PEC. M. M. F. I.

IN. QVO. NEMINI. VELIM. MECVM.
NEC. SERV. NEC. LIB. INFERRI.

SI. SECVS. FIET.

VELIM OSSVA. QVORVMCVMQ.
SEPVLERO. MEO. ERVI.

SI. PATRIA. LIBERA. ERIT.

A Q. Sertorio habitatam & peculiariter dilectam,
muris cinctam, & aquæ ductu ornatum fuisse, te-
statur vetus hæc inscriptio, quam, licet mutilam,
non pigebit adducere:

Q. SER-

Q. SERTOR.
 HONOREM. NOMINIS. SVI.
 ET. COHOR. FORT. EBOR. MVNIC.
 VET. EMER. VIRTVTIS. ERGO.
 DON. DON. BELLO. CELTIBER.
 DEQVE. MANVBIIS.
 IN. PVBLIC. MVNIC. EIVS.
 VTILITATEM.
 VRBEM. MOENIVIT.
 EOQVE. AQVAM.
 DIVERSIS. IN. DVCT. VNVM.
 CONLECTEIS. FONTIBVS.
 PERDVCENDAM. CVRAVIT.

Cognominata postea hæc vrbs *Liberalitas Iulia* datūq; illi ius veteris Latij, vt testatur Plinius lib. III. Cap. XXII. *Opida*, inquit, *veteris Latij, Ebora, quod Liberalitas Iulia, & Myrtilis, ac Salacia*: quis verò veteris Latij ius primū *Eboræ* concesserit incertum. Non absurdum erit suspicari, id C. Iulij Cæsaris beneficio obtinuisse, ideoq; etiam cognominata *Liberalitas Iulia*, cui fauet antiqua hæc inscriptio, à Resendio producta:

DIVO

DIVO. IVLIO.

LIB. IVLIA. EBORA.

OB. ILLIVS. IN. MVN.

ET MVNIC. LIBERALITATEM.

EX. D. D. D.

QVOIVS. DEDICATIONE.

VENERI. GENETRICI. CÆSTVM.

MATRONAE. DONVM. TVLERVNT.

Sita autem est *Ebora* loco campestri, situ planè amœno. Finge tibi amphitheatrū aliquod immensum, quale rerum natura sola opifex possit effingere: lata & porrecta est planicies, quæ impendentibus vndique montibus clauditur: ipsi montes non inuestes aut steriles, sed densis vetustisquæ nemoribus ornati: campi subiacentes fertilissimi, & optimæ messis feraces. at tantæ felicitati solus amnis deficit. Fidem Christi amplexa est in ipsis nascentis Ecclesiæ primordijs, auctore D. Mancino, Domini nostri Discipulo, qui sub Traiano, aut, vt alij, sub Nerone Martyrio affectus fuit, hac vrbe oriundi *D. Vincentius*, *Sabina*, & *Christetis* sorores ipsius, qui *Abulæ* sub *Daciano* Præfide martyrio affecti fuere.

Vrbs hæc ab Arabibus circiter CCCC. annis possessa fuit, & tandem regnante Alphonso Henrico primo Lusitaniæ rege, à Christianis occupata fuit, opera & virtute fortissimi viri Giraldi cognomine *intrepidi*. Episcopalis vrbs fuit, sub Paulo verò III. Pót. Max. Archiepiscopali dignitate ornata, vt & Academia omnium disciplinarum illustrata. viros habuit doctrina conspicuos, *L. Andream Resendum*, diligentissimum antiquitatis indagatorem : cui quantum , non solùm patria *Ebora*, sed & vniuersa debeat Lusitania, testantur eius opera. habuit etiam *Thomam Rodericum à Veiga*, medicum doctissimū, qui pauca, sed erudita, sed elaborata in lucem edidit.

CA P. XXXIII.

Pax Iulia hodie Beja. Iosephus Moletius & Tarapha reiecti. Inscriptio vetus.

INter celeberrimas Lusitaniæ ciuitates, numerata est *Pax Iulia*, vna ex quinque Colonijs, in qua & iuridicus olim conuentus, vt auctor est Plinius lib. IV. cap. xxij. à Iosepho Moletio, & Frãcisco Tarapha, censetur *Badajoz* esse; sed longè hos errare vel Antonini docet Itinerarium, qui

qui numerat ab Esuri per compendium Pacem Iuliam M. P. LXXVI. hoc modo : *Myrtilim M. P. xl. Pacem Iuliam xxxvi.* Esuris verò, vt hoc obiter moneam, opidum est, non procul à Marianis montibus, hodie dictum *Xeres*, vt docet Resendius: *Xeres* verò à *Badajoz* tantum xv. M. P. abest, & non LXXVI. vt ostendit Antoninus. quamobrem melius cum L. Andrea Resendio, & Gaspare Barrerio sentiendum, *Pacem Iuliam*, esse *Bejam* hodie dictam. Primò enim competit passuum numerus Antonini, à Myrtili Pacem Iuliam usque M. P. xxxvi. cum nouem leucis, quæ *Mertola Bejam* numerantur. Hac in vrbe non pauci antiqui cippi marmorei eruuntur, qui Pacis Iuliæ nomen ostendunt, inter ceteros cippus hic integer & non inelegans:

L. ÆLIO. AVREL. COMMODO.

IMP. CAES. AELII.

HADR. ANTONINI. AVG.

PII. P. P. FILIO.

COL. PAX. IVLIA. D. D.

C. PETRONIO. MATERNO.

C. IVLIO. IVLIANO. II. VIR.

Apud historiographos etiam superioris ævi, & barbaros passim legitur *Pacca*.i. *Beja*, vt latius videre est apud Resendum. nam quod obijciunt, *Badiozæ* Episcopum, *Pacensem* nuncupari, leuius est quàm vt quempiam mouere debeat. cui enim ignotum post funestam illam *HISPANIAE* illatam à Pœnis cladem, magnam circa sedes Episcopales mutationem accidisse? Emerita enim Augusta, olim Lusitaniæ metropolis, omni nunc honore spoliata iacet. Igæditanorum Episcopatus, in urbem Gardiam translatus, veterem retinet appellationem, sic *Badajoz*, quæ prius forsan se ex illa clade collegit, *Pacensis* pontificatus titulo ornata fuit: quorum exempla in Hispaniæ Annalibus

— *adeò sunt multa loquacem vt
Delassare queant Fabium.*

Hac in vrbe aquæductus Romani operis multa vestigia, nec pauca veteres inscriptiones exstant, pristinae claritatis indicia. Floruit hîc olim *Isidorus* cognomine *Pacensis*, cuius opera mendis referta circumferuntur. *Apringius* etiam Episcopus, non ineruditus, cuius in Apocalypsim explicationes ceteris omnium præfert *Isidorus*, & *Sisenandus Iunior*, qui Cordubæ martyrio affectus fuit, hîc viguere.

CAP. XXXIV.

Setubal à Cetobriga, non à Tubale dicta.

Opidum est Turdetanorum, teste Ptolemæo, *Cetobrix*, vel *Cetobrica*, ut Antonini habet Itinerarium, ad ostia fluminis Callipodis (qui hodie, ut auctor est Resendius, *Iadun*; Beçano verò in Hispanicis, *Palma* dicitur:) *Setubal* nunc vocatur, ut Gaspari Barrerio, & And. Resendio visum. Florianus verò Occampo, Antonius Beuterus, alijque Annalium Hispaniæ confarcinatores, ex Annio Viterbiensi asserunt *Setubal*, non corruptum adulteratumque esse nomen, sed antiquum & purum putum putant esse, à conditore suo *Tubal* inditum, dictumque. *Setubal*, quasi cæterum *Tubalis*, quòd ibi sedes fixerit in Hispaniã veniens: sed ridiculum est nimis ad *Tubalem* etymon referre ob nominis exiguam affinitatem; cùm constet facilius multò à *Cetobriga* defluxisse corruptum vocabulum *Cetobala*, & inde *Setubal*. *Cetobriga* enim dicta à *cetis* & *briga*; veteri namque Hispanorum sermone *Briga* urbem designat: ut in *Lacobriga*, *Medobriga*, *Talabriga*, videre est. magna autem cetaceorum, utpote thynnorum, & ceterorum magnorum piscium hîc luculenta piscatura, ita ut

nomen designare videatur *urbem cetaceorum*. Iosephus verò Moletius, & Carolus Clusius, putant *Setubal* esse *Salaciam*, quæ Plinio *Imperatoria urbs* cognominatur, sed diligentissimus Barrerius ostendit *Salaciam*, esse urbem vicinam *Alcazer do sal* dictam, corruptè admodum, cum primùm *Alcazer de Salacia* vocata fuerit à Pænis, quasi *Castellum Salaciæ*: insequenti verò ævo *Alcazer do sal* vocari cœpit (ex qua magnus ille Mathematicus *Petrus Nonius* oriundus fuit, quo illustriorem non vidit HISPANIA.) Hodierna die urbs est non incelebris. portu enim gaudet commodo, & nobiliū piscium piscatura abundat: quade causâ mercatores, ex penitiori Hispania gregatim huc confluunt. Accedit ingens candidissimi salis inexhausta copia, ob insignem toto illo sinu salinarum frequentiam: cuius gratia ab usque septentrione magnus huc nauium numerus confluit, ita ut opidum breui redditum sit opulentissimum, nec magnarum urbium inuideat claritati. Accedit ager vini, triticique feracissimus. Laudatus hîc etiam Iaspis, & Porphyrites effoditur. Arbusi hîc etiam genus est, ex quo coccus colligitur, ad tingendam purpuram, Emeritensi, quam Plinius adeò extollit, vix inferior.

CAP. XXXV.

De Olisiponis nomine. Felicitas Iulia cognominata. Equæ vento concipiunt. Varronis lectio firmata. Vbi mons Tagrus. Triton hîc visus. Urbis descriptio.

Olisiponis prima incunabula, post tot annorum decursa spatia, anxie nimis velle inquirere, ut operosum duco, ita etiam ex vetustissimis Lusitanix urbibus esse, facile est asserere. Melior Scriptorum pars ab Ulyssæ conditam dicit, hinc Straboni Οὐσσαία, Stephano verò Byzantino Οὐσσαῖς dicitur; Solino verò Ulyssippo; Plinio & Varroni Olyssippo; apud Ptolemæum autem corruptè Ὀλίσσιον, pro Οὐλισίππων legitur; ut verò ex antiquis inscriptionibus licet colligere, *Olisipo* est scribendum, testis illa, quæ hac in vrbe visitur:

IMP. CÆS. M. IVLIO.
PHILIPPO. FEL. AVG.
PONTIF. MAX.
TRIB. POT. II.
P. P. CONS. III.
FEL. IVL, OLISIPO.

Municipium autem erat olim ciuium Romanorum *Olisipo*, cognominata *Felicitas Iulia*, teste Plinio. Miror ego Iosephum Moletium, Franciscum Tarapham aliosque, tam fluxo, & supino animo fuisse, in Plinij lectione, vt audent asserere, ab illo *Olisiponem* cognominatam esse *Salaciam*: cum puncto interiecto legendus sit textus, aliàs in latinitatem peccaret nimis crassè. subiungam eius verba ex lib. iv. cap. xxij. *Opida memorabilia à Tago, in ora Olisipo, equorum è vento fauonio conceptu nobile; Salacia, cognominata vrbs Imperatoria.* Adde Plinium eodem capite, *Salaciæ* seorsum mentionem facere: *Opida, inquit, veteris Latij, Eboræ, quod item Liberalitas Iulia, & Myrtilis, ac Salacia, quæ diximus.*

Sita autem est hæc vrbs in promontorio Magno, quod & *Olisiponense* vocatur, ad Tagi amnis ripas, vbi Sociennis stipatus aquis, latissimo alueo Oceano se immiscet: cuius beneficio quotannis maximas classes in Atlanticum & Indicum mare emittit, quibus immensæ vndique opes ob Indis, Afris, & Americis aduehuntur, quas deinde magno emolumento, per vniuersam Europam, liberali manu dispensat, quibus non immeritò videtur Tagus iacturam auriferæ arenæ resarciisse: licèt hanc potiùs incolarum inertia, quàm fluminis sterilitati tribuendâ puto. Vrbs tota quinq. collibus

collibus distincta iacet, ita vt pars eius in cliuos amœnos blandè assurgat, pars verò in valles pendula porrigatur, quæ varietas intuentium animos mirè recreat. Vniuersus vrbis ambitus VII. M.P. complectitur. Soli, cæliq. mira felicitas. ager suburbanus in omnia frugum genera mira luxuria, se effundit, quæ magna copia, & rara bonitate profert. Interioris vrbis magnificentia & amplitudo tanta est, vt vix vlli Europæ vrbium cedat, sed cum præcipuis contendat: ædificia tam publica quàm priuata pleraque elegantis, & sumtuosæ structuræ: fontes habet complures, & rara aquarum præstantia conspicuos: cœnobia habet plurima, & ornatissima. Et ne singula huius vrbis recenseam, vnum tantùm adducam, ex quo & munificentiam, & pietatem incolarum quivis colligere potest. Templum est *Misericordiæ* vocatum saxo quadrato, nobiliq. exstructum, quod non copioso prædiorum censu, aut numerosis prouentibus instructum est, sed sola piorum hominum liberalitate fouetur, fidem tamen pœnè superat, quantum in singulos annos, ex gratuita hac & collatitia stipe, in egenos erogetur. à fide dignis accepi, superare sæpiùs expensi summam, quadraginta & quinquaginta millia aureorū. Huic præfunt viri electi, nominis claritate, & vitæ integritate conspicui, qui *sodales*, seu *fratres Misericordiæ*

vocantur: horum opera omnium inopiæ confulitur, nefasque ducunt, vltra annum quidpiam pecuniarum in hoc ærario seruari. Nosocomium etiam est pauperum, quod & structura, diuitijs, amœnitate loci, nulli totius HISPANIAE valetudinario secundum. Tanta vero hîc munditia, diligentiaque curantur ægri, vt optimates plurimieò curandi se gratia conferant.

Armamentarium habet vrbs, omnium armorum telorumque genere instructissimum, qualia pauca Europa: ita vt hinc quadraginta millia pedum, equitum verò tria millia armari olim potuerint, teste Damiano à Goës. Mitto de nautico apparatu, immésæq. magnitudinis nauibus dicere. pictores enim imitari cogor, qui dum exigua tabella plurima volunt exprimere, reluctâtibus loci angustijs, rerû tantùm apices ob oculos ponunt.

Constans inter veteres est opinio, circa huius vrbs confinia, equarum feturam ventis maritanti-
bus inolescere. Vnde Silius Italicus lib. iij.

*Hîc adeò, cùm ver placidum, flatusq. tepeſcit,
Concubitus seruans tacitos, grex proſtat equarum,
Et Venerem occultam genitali concipit aura.
Sed non multa dies generi, properatque ſeneſtus,
Septimaq. hiſ ſtabulis longiſſima ducitur ætas.*

Luculentè idem confirmat Plinius, lib. viij. cap. xlij. ſed de ætate multùm à Poëta diuerſus:

sus : *Constat in Lusitania , circa Olisiponem opidum & Tagum amnem, equas fauonio flante obuersas, animalem concipere spiritum, idque partum fieri , & gigni perniciosissimum ita, sed triennium vitæ non excedere .* Sed suspectæ fidei apud nonnullos erit Plinius: qui tamé ex M. Varrone hæc hausit lib. ij. De re rustica cap. I. *In fetura , inquit, res incredibilis est in Hispania, sed est vera, quòd in Lusitania ad Oceanum, in ea regione, vbi est opidum Olisipo, monte Tagro, quædam è vento certo tempore concipiunt equæ, vt hîc gallinæ quoque solent, quarum oua ὀρνέμια appellant , sed ex his equis, qui nati pulli, non plûs triennium viuunt.* Sed vbi gentium mons hic Tagrus? V. Cl. Ios. Scaliger Coniectaneis suis in Varronem , asserit legendum *Monte sacro* , ex Columellæ verbis lib. vi. cap. xxvij. sed, pace tanti viri dixerim, Columella potiùs ex Varrone emendandus, vnde locus desumptus est. nam cum sacer mons Iustino in Gallecia sit, quem incolæ ferro violare nefas habent, clarum est de illo neque Varroné, neq. Columellam loqui: procul enim ab Olisipone, & extra Lusitaniæ terminos est. Quod verò quidam per sacrum montem, *Promontorium sacrum* intelligunt, hodie *Cabo de san Vincente* dictum , magis ab Olisipone remotum est, quàm vt Varronis verbis quadret. Quare Varronis lectionem retinendam putem: præsertim cùm Damianus à Goës , & Andreas

dreas Resendius Lusitani doctissimi, dicant montem Tagrum esse, incolis dictum *Sintram*, à quo Lunæ promontorium in mare prorumpit; ubi pernicitatis mirandæ equorum greges aluntur, ut idem refert Resendius. Circa Olisiponis litora conspectos non semel, tantopere Poëtis decantatos Tritones & Nereides, refert Plinius lib. ix. cap. v. *Tiberio Principi nunciassse Olisiponensium legationem ob id missam: visum auditumq; in quodam specu, concha canentem Tritonem, qua noscitur forma.* Hic in cathedrali templo corpus D. Vincentij Leuitæ & Martyris, ex Sacro promontorio allatum, summa cum reuerentia asseruatur. D. etiam Antonius (vulgò *de Padua* dictus) hîc natus, cuius natalibus iure merito se hæc vrbs iactat. Episcopalis olim tantùm vrbs, nunc Emeritenſi, postea & Braccarenſi Ecclesiæ parebat, donec Ioannis primi Portugalix Regis tempore in metropolitanam Ecclesiam euecta fuit. Labet hîc Cl. V. Iulij Cæs. Scaligeri nobile hac de vrbe præconium adtexere:

Ergo grauis græmus quo pallidus emicet auri,

Insomni tellus scissa ligone gemit.

Cernis, ubi aduectus peregrinis flatibus orbis?

Cernis, ubi in paruo est India tota sinu?

Pressa maris facies, domita est violencia cæli:

Quid reliqui est, nisi te carpere sceptrâ poli?

Haud

*Haud potis esse Deus, non vis homo vivere, forse
Ex homine egressum tertia quando capit?*

C A P. XXXVI.

Scalabis dicta Præsidium Iulium, Cur vocata Santaren.

OPidum peruetustum, Tagi ripis appositum, quinquagesimo ab Olisipone lapide, aduerso flumine distans. Colonia fuit Romanorum, dicta *Scalabis* Plinio, Ptolemæo verò *Scalabiscus*: sed perperam, ut primus monuit Hier. Surita. nam cum forsan scriptum esset, *σκάλαβις καὶ* seu *Scalabis Colonia*, legerunt coniunctim *Scalabiscus*; postea *Præsidium Iulium* vocatum, hodie *Santarenum*. scio Tarapham ea in opinione esse, ut *Scalabim* credat dictam urbem *Trugilho*; sed conuincitur à Barreio, qui *Castra Iulia* esse *Trugilho* ostendit, vnam ex contributis Colonij.

Vrbs priscis temporibus non in gloria, siquidem teste Plinio, inter tres Lusitaniæ conuentus annumerata. Mutationis nominis causam refert Vassæus in Chronico suo. Nam cum anno Domini DC. LIII. D. Irene in opido *Tomar*, procorum libidini pudicitiam Deo votam prostituere noller, ab

ab iisdem interfecta, & in Nabanis fluente corpus proiectū à sicarijs, per Tagum Scalabim secundo flumine delatum fuit, ibique magno cum honore sepultum: vrbs relicto prisco nomine, coepta dici *S. Lrenes*, & labente ævo in *Santaren* corruptū fuit. Vrbs ipsa editiori in colle sita, præterlabentem aureum Tagum despicit: ager olei viniq̃ue maximè fecundus, tritici feracissimus, & licèt arctis limitibus conclusum sit territorium, ingentes tamen tritici acervos fundit. Testis est luculentus Damianus à Goës, in Olisiponensis vrbs descriptione, tantam esse soli vbertatem, vt sexagesimo à semente iacta die, segetes momento ferè temporis adultæ & præmaturæ demittantur. Admiretur nunc quis felices Africę messes extollant beatam Campaniæ oram, iactitet se Cereris dono Sicilia; nihil video cur *Santareno* præferantur. hinc vrbs incrementum, hinc sanctæ & innoxie incolarum diuitiæ.



CAP. XXXVII.

Coymbra non esse Lacobrigam, contra Oliuarium & Tarapham. Error Gerundensis Episc. Non esse Æminium antiquorum. Academia nobilis.

DE antiquo *Coymbræ* nomine variant Scriptorum sententiæ: Ioannes Oliuarius Scholijs suis in III. *Melæ*, & *Tarapha Lacobrigam* olim fuisse autumant; sed toto cælo eos errare certum est: siquidem *Mela Lacobrigam* & *Portum Hannibalis* in Promontorio sacro numerat, quod hodie *Cabo de S. Vincēte* dicitur, à quo multis millibus distat *Coymbra*. Adde peritissimo Lusitanicarum antiquitatum Resendio *Lacobrigam*, esse *Lagos* non-nihil deflexo nomine, opidum nostro æuo non infrequens, quod eo in promontorio situm est, & pharo à Ioanne III. Lusitaniæ Rege ornatum. Gerundensis verò Episc. non semel dicit *Colimbricam* olim dictam fuisse *Mundam*, illam celebrem funesto prælio, inter Iulium Cæsarem, & Pompeij filios, inductus, vt videtur, quòd *Colimbricam* flumen *Munda* præterfluat, à quo *Mundæ* opido nomen inditum putat: sed mirandum, hominem Hispanum, & non indoctum, tam turpi-
ter

ter lapsum, cùm *Munda* in Bætica sit, non procul à Corduba; *Colimbrica* verò in extima pœne Lusitania. Plurimi verò putant Plinij *Conimbricam* nostram esse *Coymbram*, non abludente nomine, sed illa fuit, vbi hodie *Condexa* vetus, eodem teste Resendio, Vasæo, alijsque tersæ auris Scriptoribus, quæ nihil præter miserandas antiquitatis ruinas ostendit: ab Alanis (quibus Lusitania in barbarorum illa illuue obtigit) diruta, ex cuius ruinis vicinam *Coymbram* enatam ferunt, vt & plurimis HISPANIAE VRBIBUS euenisse palam est. Non defuere, qui *Coymbram* olim *Æminium* dictam crediderint, cuius Plinius, & Ptolemæus meminere. Sed cum Plinio pugnat hæc coniectura, ait enim lib. iv. cap. xxij. *Opidum & flumen Æminium* (non vt vulgata lectio, *Minium*:) *Coymbræ* verò flumen *Munda* est: nec poterat *Munda* & *Æminium* idem flumen esse. subiungit enim Plinius: *A Durio Tagus CC. M. P. interueniente Munda*. At *Æminium* Vasæo, & Iac. Mœnetio Vasconcello est opidum vulgò, dictum *Agada*, vel *Aguida*, quod eiusdem nominis fluuio alluitur. Sit igitur prout ratio, *Coymbram* ex antiquæ *Conimbricæ* cineribus excitatam, quæ, vt multis placet, *Colimbria* aut *Colibria* vocanda. de nomine enim solo parum anxius sum.

Urbs est loco sita amœnissimo, in rupe vndique
oliuarum

oliuarū siluis, vinetisq. cincta, ad *Mundam* amnem
Ptolemæo & Plinio, *Muliadē* verò Straboni, vul-
gò *Monãego* dictum posita: qui duas vrbis partes
diuisas pulcerrimi operis ponte coniungit. distat
autē à fluuij ostio VIII. leucis. vicina arua om-
nis generis fructus magna copia proferunt: multis
& limpidissimis fontibus rigatur, præcipuè verò
aquæductu celebri, à Rege Sebastiano an. cIo. Io.
LXXII. maximo sumtu perfectò. Hinc enim ad
editiorē vrbis collē, qui ponē Regiam est, vbi stu-
diosorū forum est, tanta optimæ aquæ copia in
marmoreū stagnū erumpit, vt per omnes plateas,
torrentis instar, in varios incolarū vsus deriuetur.

Sed præcipuum illi decus & ornamentum, ex
vniuersali disciplinarum Academia, cuius prima
fundamenta ferunt anno M. CC. XC. à Dionysio
Rege inchoata; Olisiponem postea translata,
tandem verò circa annum M. D. L. à Ioanne eius
nominis III. luxuriante nimis per Indica com-
mercia Olisipone, ne teneros iuventutis animos
contages hæc vitiorum arroderet, iterum Co-
nimbricam, tamquam ad natium solum, deducta
fuit. Vbi incredibile dictu, & Regū profusa libe-
ralitate, & genio loci adiuta vberrimos ingenio-
rum fructus effudit, quibus breui, non modò Lu-
sitaniā, sed & Hispaniā vniuersam ditauit. iuuē-
tus hîc studiosa & frequēs, & prisco more togata.

CAP. XXXVIII.

Salmantica non à Teucro condita. Elmantica, Hermandica, & Salmatis vocata. Academia quo anno instituta.

S*Almantica* Lusitaniæ vrbs, Academia toto orbe Sillusttris, licèt extra Portugaliæ terminos hodie sita, & Castellæ veteris sit, tamen, quia Ptolemæus illam inter Vettones Lusitaniæ populos recenset, non erit mihi hîc prætereunda. Io. Marinus Episc. Gerundensis, alijsque non pauci, à Teucro conditam volunt, in Salaminis memoriam, sed exigui apud me ponderis est hæc opinio. Iustinus enim lib. xliv. auctor est Teucrum ea loca occupasse, vbi nunc Carthago noua est, inde Gallæciam transiisse, nusquam *Salmantica* mentionē faciens. Adde solitos fuisse Græcos relictis mediterraneis maritima occupare, commercij causa, vt videre est Olisipone, Emporijs, alijsq. mille locis, vbi sedem fixere.

Dubitant non pauci, num hæc eadem sit vrbs cum *Elmantica* Stephani, & T. Liuij *Hermandica*. Ego eandem ausim asserere: nec me mouet quòd Stephanus dicat citra Iberum esse, cum *Salmantica* non longè à Durio amne sit; sed error hic, cum alijs

alijs plusculis, Græco homini & Hispanicarum rerum imperito condonandus. Sed vnde colligam easdem esse vrbes, quæres? Liuius lib. xxi. refert post vastatas Hermandicam & Arcabalam Carteiorum vrbes (seu, vt Sigonius ex Polybio emendat, *Vaccaorum*) Carpetanos, Vaccæosque incitatos ab exulibus Hermandicæ & Olcadum, adortos Hannibalem non procul à Tago. Vnde colligere licet *Hermandicam* non procul à Carpetanis & Vaccæis fuisse. Vettones autem, inter quos sita est Salmantica, his populis vicinos fuisse testis est præter Strabonē Plinius lib. iij. cap. iij. his verbis: *Primi in ora sunt Bastuli, post eos, quo dicitur ordine, intus recedente, Mentefani, Oretani, & ad Tagum Carpetani, iuxta eos Vaccæi, Vettones & Celtiberi.* Coniecturæ nostræ fauet Plutarchus, qui lib. De mulierum virtutibus urbem hanc *Salmanticam* nominat: *Cum Hannibal, inquit, priusquam in Romanos moueret, Salmanticam obsideret, & promissis CCC. obsidibus & totidem talentis, obsidionem soluit, quæ cum incolæ soluere recusassent, reuersus Hannibal militibus urbem diripiendam dedit. perterriti Salmāticenses urbem liberis corporibus saluis tradiderunt, cumque urbem exirent, coniuges arma clam asportarunt, quibus postea opportunè viris traditis, non solum libertatis eorum, sed & recuperandæ patriæ causa exstiteret.* Polyænus Stratagematū lib. vij. idem narrans vocat urbem

Salmatidem, quam Plutarchus *Salmanticam* appellat. Non immeritò itaque dicemus, *Elmanticam* Stephani, *Hermanticam* Liuij, & Polyæni *Salmatidem* esse *Salmanticam* nostram, cùm res circa illas gestæ eandem ostendant esse.

Vrbs est fluuio *Tormis* apposita, qui se in *Durium* amnem exonerat, non solùm læto agrorum prouentu felix, sed & Episcopali dignitate, & Equitum frequëntia conspicua: quibus accedit Academia, omnium disciplinarum genere instructissima, iurisprudentiæ potissimùm sacrata. quæ cùm primùm esset *Pallentiæ*, tandem à Ferdinando tertio Castellæ Rege, anno Domini 1600. XL. huc translata fuit, quòd aptior hinc Musarum locus videretur. nec opinione sua frustratus Rex: siquidem vrbs hæc nunc totius *HISPANIAE* ornamentum, & alteræ Athenæ. Hinc enim tamquam ex Oceano, in vniuersam *HISPANIAM*, ingeniorum & virtutum riuuli deducuntur, hinc populi iura & leges petunt, hinc ad Regis curiã Senatores, Doctores, & cuiuscumq. scientiæ lumina mittuntur. ad hoc etiam Gymnasium magna frequentia, non solùm Hispani, sed & exteri, tamquam ad celeberrimum Mineruæ emporium indies confluunt, quæ urbem præclaram & nobilem alioquin, opulentio rem & clario rem efficiunt. In D. Pelagij templo non inelegans mar-

marmoreus cippus visitur, cum hac inscriptione,
quæ, quòd vrbis nomen referat, hîc adducitur:

D. M. S.

L. IVLIO. CAPITONI.

SALMANTIC.

ANN. LXX.

IVLIA. RVSTICELLA.

SOROR. PIENTISSIMA.

H. S. E. S. T. T. L.

CAP. XXXIX.

An Norba Cæsariana sit Alcantara. Pæ-
norum opus creditur. Pons à Traiano exstructus.

Inscriptio vetus. Quando Alcantaræ
militēs vocati.

AD Tagi ripas sita est *Alcantara*, mirandi ope-
ris ponte præcipuè spectanda. hanc priscis
sæculis *Norbam Cæsarianam* (vnam ex quinque
Lusitaniæ Colonijis, teste Plinio) dictam asserunt
Gaspar Barrerius, Iosephus Moletius, alijq. non
obscuri nominis Scriptores. Scio Episc. Gerun-

densẽm credere, *Norbam Cæsarianam* bello civili à Pompeianis ducibus solo æquatam fuisse, quòd Cæsari impensius faueret, in cuius locum Augustum Cæsarem, postea vicinam Emeritam condidisse; sed non est, quòd hæc figmenta quispiã ad-admittat, præsertim cùm Ptolemæus, nec Plinius de illa vt euerfa loquantur. And. verò Resendius, & Ambr. Morales negāt *Norbam* fuisse, vbi nunc est *Alcantara*: at hic ingenuè profitetur se ignorare, vbi olim illa sita fuerit, creditque nullam fuisse urbem olim, vbi nunc est *Alcantara*, sed nomen hoc illi à Pœnis inditū fuisse, quod pontem significat. quia cùm pons hic militari viæ esset appositus, illius commoditatibus & pulcritudine inuitatos vicinos, paulatim hîc domos extruxisse, atque ita in urbem excreuisse. nam si hoc loco fuisset vrbs aliqua, iniquum fuisset illam præteriri, in tabula illa, vbi recensentur Municipiorum nomina, quæ collata stipe pontem hunc perfecerunt, immò in ipso frontispicio memoratur *Igeditani*, quorū vrbs hodie vocatur *Idañhala Veja*, quæ non procul admodum Alcantara distat. Nobilitatur præcipuè vrbs hæc magnifico & imperatoria maiestate digno ponte, quem plerique Traiano ascribunt, non secus ac Segobiensem Aquæductum, licet proletarij Scriptores, ad Hispanum, vel Herculem vanissimè referant, longi-
tudine

tudine sua DC. LXX. pedes, latitudine circiter xxviij. pedes complectitur: altitudo verò aqua tenus CC. pedum est, totus autem pons sex concamerari operis pilis subnititur. Traiani verò Imperatoris opus esse confirmant inscriptiones antiquæ, quæ inibi visuntur, quas non pigebit recensere, vt nauseantem forte Lectorem hoc nouo ferculo recreem, vt in cubitum iterum se reponat. Ex vtraque arcus parte:

IMP. CÆSARI. D. NERVÆ. F.

NERVÆ. TRAIANO. AVG.

GERM. DACICO.

PONT. MAX. TRIB. POTEST. VIII.

IMP. VI. COS. V. P. P.

In ipso ponte quatuor erant magnæ & marmoreæ tabulæ, quibus Municipiorum erant inscripta nomina, quorū ope & pecunia opus hoc erat perfectum, trium vacuæ apparent sedes, quarta verò cum hac inscriptione visitur:

MUNICIPIA.

PROVINCIAE. LVSITAN.

STIPE. CONLATA.

QVÆ. OPVS.
 PONTIS. PERFECERVNT.
 IGÆDITANI.
 LANCIENSES. OPIDANI.
 TALORI.
 INTERAMNIENSES.
 COLARNI.
 LANCIENSES. TRANSCVDANI.
 ARAVI.
 MEIDVBRIGENSES.
 ARABRIGENSES.
 BANIENSES.
 PÆSVRES.

In ipso pontis limine, exiguum est sacellum,
 D. Iuliano sacrum, ex ipsa rupe excisum, in cuius
 frontispicio, vnà cum his versibus, hæc visitur
 inscriptio:

IMP. NERVÆ. TRAIANO.
 CÆSARI. AVG.
 GERM. DACICO. SACRVM.

*Templum in rupe Tagi superis, & Cesare plenum,
Ars ubi materia vincitur ipsa sua.*

*Quis, quali dederit voto, fortasse requiret
Cura viatorum, quos noua fama iuuat.*

*Ingentem vasta pontem quòd mole peregit,
Sacra litaturo fecit honore Lacer.*

*Qui pontem fecit Lacer, & noua templa dicauit,
Illic se sola vota litant.*

*Pontem perpetui mansurum in sæcula mundi
Fecit diuina nobilis arte Lacer.*

*Idem Romuleis templum cum Cesare diuis
Constituit, felix vtraque causa sacri.*

C. IVLIVS. LACER. H. S. F.

ET. DEDICAVIT. AMICO.

CVRIO. LACONE. IGAEDITANO.

Vrbs hæc ab Alphonso VIII. Mauris erepta, anno circiter CIO. XIII. & Calatrauæ militibus dono data; vnde tamquam ex munitissima arce in hostium fines incurrerent, & in posterum propugnaculum esset ad hostiles impetus eludendos: anno demum CIO. CCCC. XI. à Calatrauæ militibus auctoritate Benedicti XIII. Pont. Max. cruce viridi se destinxere: cùm antea cucullo & rubra fascia tantùm distincti essent, & nunc milites *Alcantaræ* vocantur.

CAP. XL.

*Tarraconensis prouinciæ limites quando
mutati. Martianus Capella
emendatus.*

Tarraconensis prouincia angustis magis limitibus olim erat arctata: Pyrenæis enim montibus, & Ibero amne claudebatur, vnde & *Citerior* olim dicta quòd cis Iberum esset, licèt Isidorus Orig. lib. xiv. cap. iv. *Citeriorem* dictam putet, quasi *circa terras*. Florenti enim Pœnorū imperio quidquid à freto Gaditano Iberum vsque terrarum erat, Vltiori Hispaniæ ascribebatur, cetera *Citeriori*; sed postquā vniuersa Hispania pulsus Carthaginensibus, populi Rom. victorijs cessit, longè latiores terminos habuit, adeò vt, qui olim *Citerioris* Hispaniæ limes & finis erat Iberus, vmbilicus pœnè effectus fuerit. vnde & Plinius in limine capitis tertij lib. iij. ait *Citerioris* Hispaniæ, vt & complurium prouinciarum, veterem formam mutatam esse. A meridie enim Lusitaniæ, & Balearici maris ora terminata fuit; à septentrione Oceanum Britannicum, ab Oëasone (seu *Olarfone* vt Plinius, non, vt Martianus Capella lib. vi. *Tar-*
sone

fone aut *Gersone*) ad promontorium Nerium; ab occasu Oceanum Atlanticum, à dicto promontorio ad ostium amnis Durij; ab oriente Pyrenæos montes pro limitibus habuit.

Longitudo eius, teste Plinio, à Pyrenæo ad finem Castulonis D.C.VII. extensa; M.P. latitudo verò à Tarracone, ad Olarsonis litus CCC.viiij. M.P. Diuisa fuit vniuersa, pro eius magnitudine, in iuridicos conuentus septem, quot Bætica, & Lusitania simul habent, *Carthaginensem, Tarraconensem, Cæsaraugustanum, Cluniensem, Asturum, Lucensem, Braccarum*. Non prætereundum puto, apud Martiā Capellam, vbi de Hispania agit, lib. vi. lacunam esse supplendam. Ita enim ait : *At vniuersa prouincia, habet conuentus septem, Carthaginensem, Tarraconensem &c.* quæ enim vniuersa prouincia habet septem conuentus? an Hispania? sed superius dixerat Bæticam duos habere conuentus, atque ita erunt nouem. quare ita legendum puto : *At vniuersa citerior prouincia conuentus habet septem.* nam de Bætica & Lusitania egerat, restabat de Tarraconensi dicere.

Vniuersa hæc prouincia omnis generis metallis abundat, marmorum latumijs, & speculari lapide, messibus, oleo, vinoque fecunda admodum, sed bellaci præcipuè populo nobilis. Testes Celtiberi, Cantabri, Vascones & exitio suo clari Numantini.

mantini. hoc æuo in multa regna diuifa est: siquidem complectitur *Murciæ regnum, Valentia, Aragonum, Cataloniam, Castellam veterem, Gallæciam, Nauarram, Biscaiam.*

CAP. XLI.

Tarraconenses populi. Grauij originem à Græcis trahunt. Plinius obiter emendatus.

VArij Tarraconensem prouinciam incolunt populi, sed immensi operis & laboris esset, singulos è vetustatis latebris protrahere: nobiliores tantùm & memoratu digni dicentur, ceteri verò, vt ignobiles, silentio inuoluentur. nam verbis indulgere, in rerum inopia quid attinet? citra fastidiũ verò nominentur primo loco *Grauij*. nam *Lusitaniæ* collimitanei sunt, ad flexũ enim *Durij* amnis eos *Pomp. Mela* statuit. A Græcis illos originẽ trahere auctor est *Plinius lib. iv. cap. xx. Helleni, Grauij, castellum Tydæ, Græcorum sobolis omnia*: quo tamen loco malle geminato *L. Helleni* legere, vt originem suam exprimerent. præit mihi *Strabo lib. iij. In Callaicis, inquit, quosdam ex Teucricommilitonibus habitasse, ibique opida fuisse, quo-*
rum

rum vnum Εἰληνες, *alterum* Αἰμίλοχοι *nominatū est.*
 Vocantur verò hi *Grauij*, à Mela *Gronij*, à Ptole-
 mæo autem ἑρῶοι, corruptè vt credo vtròbique.
 Fama est Diomedem ab Ægiale vxore adultera,
 patria domoque prohibitum, Hispaniæ litoribus,
 supra Lusitaniam appulisse, inibi que urbem in
 patris memoriam *Tydem* condidisse, quæ à Pro-
 lemæo *Tude* vocatur, & hodie *Tuy* dicta (vnde
 Lucas Tudentis Episcopus, non vltimus rerum
 Hispanicarum Scriptor originem habet.) confir-
 mat hoc Silius Italicus lib. iij.

*Et quos nunc Grauios violato nominè Graiūm,
 Oeneæ misere domus Ætolaque Tyde.*

CAP. XLII.

*Gallæci dicti & Callaici. Vnde nomen sum-
 sere. Gallæcia sexta prouincia effecta.
 Mores illorum.*

GRauios attingunt *Gallæci*, frequēs nec igno-
 bilis populus, amne Durio à Lusitania diuisi,
 qui etiam *Callaici* vocantur, hodie verò *Gallegos*.
 Antonius Beuterus à Gallis & Græcis, in vnum
 commixtis populis, nomen & originem illos tra-
 here comminiscitur; Franciscus Tarapha à Ga-
 lathe

Iathe Herculis filio dictos putat; Iustinus verò lib. xlv. *Gallæci*, inquit, *Græcam* sibi originē asserunt: siquidem post finem Troiani belli, Teucrū morte Aiacis fratris, inuisum patri Telamoni, cū non reciperetur in regnū, Cyprū concessisse, atque ibi urbem nomine antiquæ patriæ, Salaminam condidisse, inde acceptâ opinione paternæ mortis patriā repetisse; sed cū ab Eurisace Aiacis filio accessu prohiberetur, Hispaniæ litoribus appulsum, loca, ubi nunc est Carthago noua, occupasse, inde Gallæciam transisse, positisque sedibus genti nomen dedisse.

Isidorus Orig. lib. ix. cap. ij. Gallæcos à candore dictos putat, vt & Gallos, quia ceteris Hispaniæ populis candidiores sunt. Ptolemæus hos in binos populos diuidit, nempe in *Gallaicos Braccarios*, & *Lucenses*: illi inter Minium & Durium amnes ad mare habitabant, hodie tractus ille *entre Douro & Minho* nuncupatur, quorum primaria vrbs, *Augusta Braccara*: *Lucenses* verò prope Artabrum promontorium erant, vnde & conuentus Lucēsis, teste Plinio, quò xvi. populi conueniebant, qui hodie soli *Gallæci* vocantur. Lapsum verò ætatis diffusum fuisse & numerosum populum constat, utpote cū tempore Imp. Hadriani, quo veteris Hispaniæ termini mutati sunt, vni è sex prouincijs nomen dedit *Gallæcia*; immò Pauli Orosij tempestate (qui sub Honorio & Arcadio floruit) *Gallæciæ* termini Numantiam usque,

vsque, quæ Pelendonum vrbs erat, extensi erant. Strabo etiam refert sua ætate maximam Lusitanorum partem *Callaicos* vocatos esse. Incolæ bello dediti, pacis verò munia vxoribus committebāt, vnde Iustinus: *Feminæ res domesticas, agrorumque culturam administrant, ipsi rapinis & armis seruiunt.* Strabo illos bellacissimos vocat, & subiugatu difficiles, quos tandem D. Iunius Brutus magnò prælio vicit, vnde & *Callaicus* dici meruit, vt refert L. Florus lib. ij. cap. xvij. Silius verò Italicus lib. iij. graphicè illorum mores & viuendi normam his versibus depingit:

*Fibrarum, & pennæ, diuinarumque sagacem
Flammæ, misit diues Gallæcia pubem:
Barbara nunc patrijs vlulantes carmina linguis,
Nunc pedis alterno percussa verberare terra,
Ad numerum resonas gaudentem plaudere cetras:
Hæc requies, ludusque viris, ea sacra voluptas.
Cetera femineus peragit labor, addere sulco
Semina, & impresso tellurem vertere aratro
Segne viris, quidquid durum sine Marte gerundum
Callaici coniux obit irrequieta mariti.*

Strabo ab aliquibus *Gallaicos* ἀλλεῖους vocari refert, quod miror, cum Poëta illos augurijs & extispicijs deditos dicat.

Regio ipsa, olim auri & plumbi feracissima, vt non semel ostendit Plinius. Iustinus verò lib. xlv.

Aureo

Auro quoque ditissimam dicit, adeò vt etiam aratro frequenter glebas aureas excindant. In huius gentis finibus Sacer mons est, quem ferro violare nefas habetur, sed si quando fulgure terra proscissa est (quæ in his locis assiduares est) detectum aurum velut Dei munus colligere permittitur. Nobilis etiam hic Poëtarum fabulis est amnis Limia, qui & Obluionis & Lethes vocatur, de quo & Silius Italicus lib. iij.

*Quiq^{ue} super Grauios lucentes voluit arenas,
Infernæ referens populis obliuia Lethes.*

Romanis hic militibus adeò formidatus erat, vt bellante D. Iunio Bruto in Gallæcos, milites eius nollent fluuium transire, donec raptum à signifero signum ipse Brutus transtulit, & sic vt transgrederentur persuasit, vt refert Liuij epitome lib. Lv.

C A P. XLIII.

*Astures vnde dicti. Bellaces. Asturcones.
Asturia bifariam diuisa.
Aurifera est.*

Qua Pyrenæi iugum, haud procul secundo Oceano, sub septentrionem deducitur, habitant *Astures* Gallæciæ portio, vt auctor est Paulus

lus Orosius lib. vi. cap. xxi. ita dicti ab Astura fluvio, qui regionem illam alluit, teste Isidoro lib. ix. cap. ij. Silius verò Italicus ab Astrye Memnonis auriga dictos credit lib. iij.

*Venit & Auroræ lacrymis perfusus in orbem
Diuersum, patrias fugeret cùm deuius oras,
Armiger Eoi non felix Memnonis Astryr.*

Diuisi erant olim, in Transmontanos & Augustanos: teste Plinio lib. iij. cap. iij. in duodecim populos distincti. caput gentis erat Asturica, vrbs magnifica, quam Ptolemæus Asturicam Augustam vocat; hodie verò Astorga dicta.

Regio vniuersa aspera, montibus siluisque horrida, incolæ bellaces, & libertatis apprimè tenaces, qua de causa non semel à Romanis defecere, & Augusti Cæsaris præsentia necessaria visa, vt arma ponerent. Vnde L. Florus sub calcem operis, periculum illius belli his verbis exaggerat: *Astures per idem tempus, ingenti agmine à montibus suis descenderant, nec timere subitus, vt barbaris impares; & positis castris apud Asturam flumen trifariò diuiso agmine, tria simul Romanorum castra aggredi pararunt: fuisset & anceps, & cruentum, & vti nam mutua clade certamen, tunc tam fortibus etiam subito, tam cum consilio venientibus.* In plana ab Augusto deducti, quo fera illa ingenia non secus ac siluestres plantæ mutatione soli mitescerent. Regio ipsa,

minij, chryfocollæ, & auri præcipuè fecunda. Pli-
nius auctor est lib. xxxij. cap. iv. *Asturiam, Lusit-
aniam, & Galleciam singulis annis vicena millia pondo
auri præstare, ita vt plurimum Asturia gignat.* Vnde
& Silius lib. I.

— *Astur avarus,*

Visceribus laceræ telluris mergitur imis,

Et redit infelix, effosso concolor auro.

Asturcones equos laudatos etiam admodum gi-
gnit *Asturia*, quibus non vulgaris in cursu gra-
dus, sed mollis alterno crurum explicatu glome-
ratio, de quibus Silius lib. iij.

Hic parvus sonipes, nec Marti notus, at idem

Aut inconcusso glomerat vestigia dorso,

Aut molli pacata celer trahit effeda collo.

Martialis verò epig. lib. xiv. vocat *Asturum equum*:

Hic brevis ad numerum rapidos qui colligit ungues

Venit ab auriferis gentibus Astur equus.

Hoc æuo diuisa est *Asturia* in duas partes, in
Austuriam de Ouiedo, & *de Santillana* dictas: nomen
illis vrbes hæ duæ præcipuæ dederunt.

Asturiæ verò debet vniuersa *HISPANIA*, &
Christianam religionē, & auitam nobilitatē con-
seruatam: nam post fatalem illam à Pœnis Hispa-
niæ illatam cladem, quæ supererat nobilitas, &
Gothici sanguinis reliquæ vnà cum clero, in
Asturiam profugère, vbi naturæ loci fisci, Mauro-
rum

rum impetus primùm hebetarunt: demum ductu Pelagij, excusso Maurorum iugo, continuis bellis vniuersam Hispaniam recuperarunt.

CAP. XLIV.

*Cantabri à Laconibus orti. Mores illorum.
Mons hinc ferreus. Tamarici fontes.*

Vicini Asturibus sunt *Cantabri*, ita dicti ab vrbis vocabulo, & Ibero amne, cui insident, teste Isidoro lib. ix. cap. ij. prope Iuliobrigam enim in Cantabris oriri Iberum testatur Plinius; sed vbi gentium vrbs illa sit, vnde nomen deducitur, est qui referat nemo. Incolas à Laconibus originem ducere, auctor est Asclepiades Myrlianus, apud Strabonem lib. iij. partem enim Cantabriæ illos quondam habuisse, fortitudo egregia, & innata illis in laboribus patientia, & pertinax libertatis defendendæ animus indicio sunt. hinc verè & egregiè Silius Italicus lib. iij.

*Cantaber ante omnes, hyemisque, æstusque, famisq;
Inuictus, palmamque ex omni ferre labore,
Mirus amor populo, cum pigra incanuit ætas
Imbelles iam dudum annos peruertere saxo,
Nec vitam sine Marte pati; quippe omnis in armis
Lucis caussa sita est, & damnatum viuere paci.*

Quum Augustus Cæsar magno tandem labore illos debellasset, ne seruitutem seruirent, potior pars igne, ferro, aut veneno se à captiuitate vindicauit, vt refert L. Florus lib. iv. capite vltimo. Strabo verò lib. iij. refert matres bello hoc Cantabrico, priusquàm in hostium potestatem venirent, proles suas necasse: & puerum quemdam, accepto à patre ferro, parentes, & fratres captiuos interemisse: nonnullos verò in crucem ab hostibus suffixos, lætitiæ Pæana cecinisse, quasi nihil iuris in illorum libertatem haberent.

Regio vbique montuosa & aspera, & Hispaniæ pœnè dissimilis, Baccho prorsus inimica, Marti verò, & Vulcano adeò amica, vt non immeritò quis illius Dei officinam vocet, ex qua plena manu natura Martio huic populo arma largiatur. Nam præter plumbum, & magnetem lapidem, (quem nonnulli *ferrum viuum* vocant) copiosas adeò ferri venas fundit, vt auctor sit Plinius lib. xxxiv. cap. xiv. *Cantabriae maritima parte, quam Oceanus alluit, montem esse præruptè altum, incredibile dictu, totum ex ea materia [ferro.]* Inexhausta hæc ferri copia & in nostram vsque ætatem durat, quam per Hispanias, Galliasque incolæ magno quæstu distribuunt. Mirum est, quod de *Tamaricis* fontibus in Cantabria prodit Plinius lib. xxxi. cap. ij. his verbis: *In Cantabria fontes Tamarici in augurio habent.*

habentur, tres sunt, octonis pedibus distantes, in vnum alueum cœunt, vasto amne, singulis diebus siccantur duodecies, aliquando vicies, citra suspensionē vllam aquæ, cùm sit vicinus illis fons, sine intermissione largus: dirum est non profluere eos aspicere volentibus, sicut proximè Lartio Licinio legato post præturam, post septem dies accidit.



Vniuersa hæc regio hodie in Biscaiam & Guipuscoa diuisa est, immunitatibus gaudet maximis, quas & acerrimè incolæ propugnant.

CAP. XLV.

Carpetani vbi olim siti, à Polybio Carpesij vocati.

NO N ignobiles in Citeriori Hispania olim fuere *Carpetani*, qui teste Cl. Ptolemæo, à septemtrione confines erant *Vaccæis*; ab oriente *Celtiberis*; à meridie *Oretanos* attingebant; ab occidente verò *Vettones*. Polybius libro iij. auctor est, illos ferocia & hominum multitudine, ceteros eius provinciae antecellere. vnde magna pugna deuictis ab Hannibale circa Tagum *Carpetanis*, nulli vltra Iberum *Carthaginensium* armis restitere populi, vt fusè narrant T. Liuius

lib. xxi. & Polyb. lib. iij. At circa illorum nomen aliquantulum dissentiunt Scriptores. Plutarch. in Hannibale & Strabo lib. iij. *Carpentanos* vocant; Lilius verò passim *Carpetanos*; sed tenue est discrimen: maius verò Polybij, qui *Καρπηνοίους* hos vocat, solus quod sciam. Nam quos Lilius lib. xxiiij. *Carpesios* vocat, diuersi sunt à *Carpetanis*, quos ramen Henr. Glareanus *Tartessios* credit esse. attamen si Stephano credimus, circa Iberum amnem siti sunt, vnde diuersi erunt, non solum à *Carpetanis*, sed etiam à *Tartessys*. Mihi incertum, quo loco olim fuerint. C. Plinius lib. xix. cap. viij. refert in Carpetania laudatissimū cuminum prouenire, vnde & *Vicus cuminari* Antonino in Itinerario dictus, itinere quodam Emerita Cæsaraugustam vsque, quem Ambr. Morales credit esse, *Sancta Crus de la carxa*, eò quòd toto illo tractu nullus cumini prouentus, quàm in hoc vico. *Carpetania* autem hoc reuo regnum *Toletanum* vocatur; cuius caput, vel Plinij tempore, erat Toletum.



CAP. XLVI.

*Vaccæi vbi olim habitarint. Gentis
mores. Bellicosi.*

INter Carpetanos, & Celtiberos siti sunt *Vaccæi*, quos Stephanus Byzātinus vocat Βακκαίους, eo olim tractu, quem nunc *Castellam veterem* appellant, bellica virtute quondam clari. Moris inter illos erat olim, teste Diodoro Siculo lib. vi. Biblioth. singulis annis, sortitos inter se agros colere, fructusque cum ceteris cōmunicare; cuique sua portione assignatâ, qua de causa & agricolis illatæ iniuriæ morte multabantur. Auctor est Appianus Alexandrinus in Ibericis, Licinium Lucullum, quem Liuiana Epitome *L. Liciniū Lucullū* nominat, inconsulto senatu, & iniusto bello *Vaccæos* laceßiuisse: qui cū illorum urbem Cauciam in deditionem recepisset, militibus diripiendam dedisse, incolasque omnes trucidasse, nullâ habitâ ætatis sexûsve ratione. Quare ceteræ eius regionis vrbes ad bellū se pararunt, & ab Intercatia, & Pallentia cum damno & ignominia eum repulerunt: iidem etiam Metellū Nepotem, obsidentē Cluniam Areuacorum urbem prælio fuderunt, &

urbem obsidione soluerūt, teste Dione lib. xxxix, insigni etiam clade Lepidum affecisse eos testatur Paulus Orosius lib. v. cap. v. nam cū prohibēte etiam Senatu Romano innoxios oppugnare pergeret, ad sex millia militum à Vaccæis cæsa sunt, ceteri castris exuti euaserunt. Appianus *Emilium* vocat, non *Lepidum*.

CAP. XLVII.

Olcades ubi olim fuit.

NON procul à Vaccæis erant *Olcades*, ut apud T. Liuium & Polybium videre est. Stephanus Byzantinus Carthagini nouæ finitimos facit, Auctor vitæ Hannibalis post Plutarchum, & Liuius ultra Iberum illos statuunt. P. Io. Mariana non malè suspicatur illos olim fuisse, ubi nunc est *Occanna*, regni Toletani vrbs, non multū abludente vocabulo, nec situ repugnante. Illorum urbem *Carteiam* refert ab Hannibale Liuius expugnatam, quam tamen Polybius, & Stephanus *Altheiam* vocant. Quare & Car. Sigonio magis placeat pro *Carteia*, *Altheiam* substituere.

CAP.

CAP. XLVIII.

*Celtiberi Celtoſcythæ, & Berones dicti.
Nominis etymon. Potentia illorum,
opes, mores. Simples olim.*

DIffuſum & potens olim, per HISPANIAM *Celtiberorum* nomen. Nam cùm, teſte Strabone lib. iij. plurimam fortune ac dignitatis acceſſionem Celtiberi ſibi vindicaſſent, finitimã omnem regionem eodem nominatam vocabulo reddiderunt, adeò vt tota Hiſpania *Celtiberia* vocata fuerit, vt ſuprà dictum. Vocati etiam olim *Celtoſcythæ* rudi ſæculo, eodem Strabone auctore lib. i. *Berones* etiam dictos idem refert lib. iij. Poſtea verò, quia teſte Iſidoro lib. ix. cap. ij. ex Gallis Celticis defluerunt, & circa Iberum fluuiũ conſederunt, mixto vtroque vocabulo *Celtiberi* vocati ſunt. Diod. autem Siculus lib. vi. diuerſus eſt ab hoc etymo. ait enim *Iberos* quondam *Celtaſq;* pro agris bello certafſe, pace demum firmatã, communicafſe inuicem patriam, & mutua ſanxiſſe connubia: vnde & commixtum nomen, & cùm eſſent dux validæ nationes, in vberi regione coniunctæ, effecere vt magnum eſſet *Celtiberorum* nomen, vnde & Lucaniſ *Pharſaliæ* lib. iv.

— profuzique à gente vetusta

Gallorum Celta miscentes nomen Iberis.

Martialis etiam lib. iv. Epigr. Lv.

Nos Celtis geniti & ex Iberis.

In quatuor olim populos diuisi fuere, testibus Plinio, & Strabone, qui tamen populorum nomina prætereunt, nisi quòd ille *Pelendones* recenseat. Prouinciæ verò caput *Segobrigã* Plinius, at Strabo nobilissimam ciuitatem *Numantiam* dicit fuisse. Constat frequẽtem & vsque eò populosam olim fuisse, vt Polybius scribat apud Strabonem CCC. illorum vrbes à Tib. Graccho subuersas fuisse, quod tamen Strabo, ritu comico, in Gracchi gratiam dictũ putat; quòd agri natura tantæ vrbiũ frequentiæ capax non sit. moderatiũs certè L. Florus, qui lib. ij. cap. xvij. CL. vrbiũ subuersione illos à Graccho multatos scribit. Bellica imprimis gloria clari fuere, vt Florus citato loco *Celtiberos Hispaniæ robur* nominet. In acie exultabant, vt ait Val. Maximus lib. ij. cap. vi. tamquam gloriose & feliciter vita excessuri; lamentabantur in morbo, quasi turpiter & miserabiliter perituri. addit & Silius Italicus lib. iij.

His pugna cecidisse decus, corpusque cremari

Tale nefas; calo credunt superisque referri,

Impastus carpat si membra iacentia vultur.

Iidem nefas esse ducebant, vt idem refert Val.

Maxi-

Maximus, prælio superesse, cùm is occidisset pro cuius salute spiritum deuouerant. opibus verò etiam adeò abundasse illos constat, vt referat Strabo ex Posidonij sententia, M. Marcellum ex Celtiberia talentum D C. tributi nomine exegisse. Nam licet ager illorum sterilis esset, auri, argenti que tamen egregiè fecundus erat. Armis verò ferro que abundabant raræ bonitatis. Nam præter Salonis ad Bilbilem aquas, quibus inuictam armorum temperiem parabant, peculiaris ipsis erat ratio ferri temperandi: siquidem, teste Diod. Siculo lib. vi. cap. ix. ferreas laminas in terram abscondentes, ibi tam diu esse sinunt, quoad infirmiori parte ferrugine exesâ, validior supersit, ex eo tum enses fortissimos, tum cetera ad belli vsus arma necessaria componunt: hoc pacto fabricatis cedunt omnia, vt neque scutum, neque galea, neque aliud vim eorum remoretur. Idem refert præter Strabonem lib. iij. circa victus munditiem illos esse elegantes, nisi egregia illos spurcicies foedaret, quod corpus vniuersum lauant vrina, & dentes fricant: vnde eleganter Catullus Epig. xl.

Nunc Celtiber in Celtiberia terra

Quod quisque minxit, hoc sibi solet mane

Dentem, atque russam defricare gingiuam:

Vt quò iste vester expolitior dens est,

Hoc te amplius bibisse prædicet loti.

Et rursus Epigrammate xxxviii.

Et dens Ibera defricatus vrina.

Tangit hoc & Appuleius in Apol. Quem, inquit, multo æquius erat spurcissimo ritu Iberorum, ut ait Catullus, sua sibi vrina dentem atque russam pumicare gingiuam.

Gentem hanc olim, non ut plerique Hispanorum, pro callida & vafra non esse habitam, ostēdit T. Liuius lib. xxx. agens de Graccho obsidente Certimam: Vbi, inquit, cum iam opera admoueret, veniunt legati ex opido, quorum sermo antiquæ simplicitatis fuit, non dissimulantium bellaturos, si vires essent. Petierunt enim, ut sibi in castra Celtiberorum ire liceret, ad auxilia accipienda, si non impetrassent, tum separatim eos ab illis se consulturos: permittente Graccho ierunt, & post paucis diebus alios legatos decem secum adduxerunt. Meridianum tempus erat, nihil prius petierunt à Præ-tore, quam ut bibere sibi iuberet dari, epotis primis poculis, iterum poposcerunt, magno risu circumstantium, in tam rudibus & moris omnis ignaris.

CAP. XLIX.

Illergetes non esse Illurgauonēses Cæsaris, contra Fulvium Vrsinum. Num Eilotæ Polybij.

Is Iberum sunt Illergetes, frequenti olim à populo Rom. defectione celebres, ducibus Indibili

dibili & Mandonio, donec Indibilis à L. Lentulo, & Manlio Acidino in acie cæsus, & Mandonius illis traditus, vt refert T. Liuius lib. xxix. Fuluius Vrsinus apud Ortelium credit *Illurgauonenses* Cæsaris hos esse *Illergetes*, sed cum Plinius præter *Illergetes*, etiam *Illurgauonensium* meminerit, non facile illi assentior, nec quadrant verba Cæsaris cum Fuluij opinione. Siquidem *Illurgauonenses* ad Iberum statuit, à quo *Illergetes* remoti sunt. Num vero *Eilotæ* Polybij sint, non immeritò quæri potest. nam lib. x. refert P. Scipionem cum primùm in Hispaniã venisset in *Eilotis* hyemasse: T. verò Liuius lib. xxvi. Tarracone hyemem transegisse refert, vnde certum est *Eilotas* non procul à Tarracone fuisse, vt nec *Illergetes*; sed cum idem Polybius lib. iij. *Illergetum* meminerit, non potest idem esse populus, nisi mendum subesse dicamus. nullus enim Scriptor horum meminit, præter vnum Polybium. Festus Auientus in ora maritima recenset *Ileates* populos, qui non multùm à Polybij *Eilotis* videntur discrepare, sed æquè mihi obscuri. refert Hieronymus Paulus Barcinonensis, *Illergetes* eum olim tractū coluisse, qui nunc *Vrgellensis* nuncupatur.

CAP. L.

Cerretani dicti Iuliani. Cum Hercule in Hispaniam venerunt. Inscriptio vetus.

Illergetibus esse conterminos *Cerretanos*, auctor est Ptolemæus: incolebāt autem Pyrenæi conualles. Plinius illos *Iulianos* appellat, an forsan ab vrbe *Iulia Libyca*, quam Ptolemæus ibi statuit? suspicari licet, præsertim cū nulla manifestior occurrat ratio. Cum Hercule illos olim in Hispaniam venisse innuit Silius Italicus lib. iij.

Nec Cerretani quondam Tyrinthia castra

Aut Vasco insuetus galeæ, ferre arma morati.

Dion lib. xlvij. refert *Cerretanos* cū à Pop. Rom. defecissent, à Domitij Caluini legato superatos, postea tamen ab illis circumventum fuisse, & desertum à proprijs militibus; sed decumato prius milite, iterum à Domitio Caluino debellatos. Strabo lib. iij. apud *Cerretanos* pernas optimè, & varijs modis condiri refert, vnde & Val. Martialis lib. xij.

Cerretana mihi fiet, vel massa licebit

De Menapis: lauti de petasone vorent.

Eodem etiam libro Poëta *Cerretana* vina commendat:

Cerre-

Cerretana nepos ponet, Setina probabis

Non ponit turbæ, cum tribus illa bibit.

Incolebant autem loca illa Cathalonix, Galliam versus, vbi hodie Comitatus Cerdaniæ est, vt notat Ambr. Morales lib.viiij.cap.ij. qui etiam refert hanc inscriptionem in Pyrenæis alibi extare : scribiturque tantum vnico R. nomen Cerretanorum:

AVGVSTO.

TERRA. MARIQ. VICTORI.

ELIMINATIS. SACERDOTIBVS.

BONAE. DEAE.

ET. COLLEGIO.

VII. EPVLONVM.

COMMUNI. POP. SENTENTIA

EXCLVSO.

CERETANI. TEMPLVM.

VICTORIAE. AVG. D.D.

CAP.

CAP. LI.

Braccara Augusta à quibus condita. Inter quatuor præcipuas Hispaniæ vrbes. Sedes Regum Sueuorum & Gothorum. De primatu Hispaniæ cum Toletis certat.

CVM *Braccara* ea in Portugaliæ parte, quæ *Interamnis* dicitur, hoc æuo sita sit, cuius tamē à me nulla est facta mentio inter Lusitanicas vrbes, eò quòd Lusitaniæ limitibus antiquis exclusa esset, ideò non abs re me facturum puto, si vbi Lusitania desijt, Tarraconensem prouinciam auspicatus fuero. Ptolemæus *Braccaram Augustam* vocat, & inter *Callaicos Braccarios* recenset; Antonini Itinerarium *Bragaram* vocat: hinc forsan hodiernum nomen *Braga* mansit. ex vetustissimis Hispaniæ vrbibus esse vt nemo ambigit, ita omnes pænè de conditore eius dubij. Episcopus Gerundensis lib. iij. à Pœnis conditam ait, & in memoriam amnis *Bragadæ* (apud quem M. Regulus portentosæ magnitudinis serpentē confecit) nomen *Braccaræ* inditum. Alij probabilius forsan, ad Gallos *Braccatos* originem referunt. Constans enim est auctorum opinio, Gallos totam illam oram occupasse, vnde *Celtici* populi, & *Gallæci*.
Iuri-

Iuridicum ibi fuisse conuentum testis est Plinius, à quo xxiv. ciuitates iura petebant. In antiquis inscriptionibus *Bracaraugusta* vnica voce, non semel legitur. Tarracone:

M. VLPIO. C. F.
QVIR. REBVRRO.
EX. BRACARAVG.
OMNIBVS. H.
IN. RE. P. SVA. FVNC.
FLAM. P. H. C.
P. H. C.


In ipsa vero Bracaraugusta hanc exstare ferunt:

ISIDI. AVG. SACRVM.
LVCRETIA. FIDA.
SACERDOS. PER P.
ROM. ET. AVG.
CONVENTVS. BACARAVG.
V. D.

Aufonius Poëta, suo æuo inter quatuor præcipuas Hispaniæ vrbes, in Catalogo illustrium vrbiũ recenset hoc versu:

Quæque maris sinu iactat se Braccara diues.

Priscis etiam Annalibus constat, Regum Sueuorum sedem fuisse circiter CLXX. annis, sub Gothicis verò Regibus CLXX. annis floruisse. Sita autem est ad Alestem amnem quinque leucis à mari, insigni agri cælique clementia prædita: Archiepiscopatu nobilissimo claret. De primatu Hispaniæ cum Toletana Ecclesia dudum certat, & indecisa lis in hodiernum æuum pendet. Cùm enim præcipuæ Hispaniæ vrbes & metropoles in Maurorum essent potestate, ab Alphonso I. cognomine Catholico anno D. CC. XL. prima omnium in libertatem vindicata est, omnesque Hispaniæ Episcopi Braccarensem, pro Metropolitano agnoscebāt. Hac in vrbe Lusitaniæ Regum primus sator Henricus Comes, pater Alphonsi Henriquez I. Lusitaniæ Regis, in summo templo est sepultus. Christi fidem, edocta à D. Petro Martyre S. Iacobi discipulo, amplexa est, & multo cum sanguine constantissimè conseruauit. Varia hîc Patrum Concilia celebrata.



CAP. LII.

Quonam modo olim vocata sit Compostella.

D. Iacobi corpus quando detectum.

*Quando in prælijs nomen eius
cæptum implorari.*

NVnc sese offert *Compostella*, non fluxæ antiquitatis vestigijs, aut rerum gestarum titulis tumens, sed Hispaniæ Tutelaris D. Iacobi reliquijs ornata: quibus ceteris urbibus meritò præferenda. De antiquo nomine variant scriptores: Episcopus Gerundensis *Compostellam* dictam putat, cum enim prisca Hispaniæ cultores his in locis Hesperum oriri vidissent, quam regioni illi salubrem stellam credebant, *Compotem stellam* nominarunt; vnde & *Compostellā* urbem dictā. Infalsa herculè & inepta etymologia, quæ cassam nucem non meretur. Franc. verò Tarapha & Ios. Moletius *Flauium Brigantium* Ptolemæi credunt, quod inter Callaicos Lucenses, in magno portu statuit; Guilielmus Soonus libello De orbis terrarum nouis incolis, putat *Flauium Brigantium* idem esse opidum cum *Flauionauia*, sed egregiè hallucinatur: siquidem *Flauionauia* à Ptolemæo inter Pæsicos collocatur,

Flauium verò *Brigantium* inter Callaicos Lucenses. Non absurdè suspicatur Tarapha in honorem Vespasiani esse exstructam, aut certè prænomen assumisse. Paulus Orosius lib. I. cap. ij. solùm *Brigantium* nominat, ibique altissimam esse pharū asserit; Io. Oliuarius Valent. Schol. in Melā, credit *Ianaſum* opidum inter Artabros esse *Compostellam*: sed in re tam dubia quid certi statuere meum non est; nisi *Flauium Brigantium* non esse, vt suo loco dicetur. D. verò Iacobi corpus quo pacto primum à discipulis *Iriam Flauiam*, postmodū verò *Compostellam* allatum sit, fusè referunt historiæ. cū verò multis sæculis latuisset, non solùm Pænorum tempestate, sed & ante Gothorum aduentum, anno demum D. CC. XCVIII. regnante Alphonso Casto, cælesti indicio, Theodomiro Iriēsi Episc. detectum fuit; quo tempore Imp. Carolus Magnus eò, religionis ergo, iter suscepit: qui à Leone III. Pont. Max. obtinuit, vt Episcopali dignitate ornaretur, ita tamen vt Iriensis Episcopi titulum retineret, quod & obseruatum fuit vsque ad annum circiter D. CCC. LXXVII. quo tempore Ioannes VIII. Pont. Max. Compostellanam Ecclesiam, ab Archiepiscopatu Braccarenſi exemit. Anno verò clb.c.xxiv. referente Cæsare Baronio Ecclesiast. Annalium tomo IX. Callistus Pont. Max. Emeritenſis Ecclesiæ Metropoliticum ius, efflagi-

efflagitante Hispaniæ Rege, Compostellam trans-
tulit, tum quia Emerita Saracenorum iugo pre-
mebatur; tum quia peregrinorum concursu &
religione Compostella in melius semper cresce-
rēt. nam ad illa vsque tempora exiguum tantum
facellum fuerat. Increbescente verò famâ, D. Ia-
cobi hîc latere corpus, non solum Hispani, sed
omnes pœnè nationes excitæ, frequentes cum
votis, donisq. venêre. Templum donarijs vario-
rum Regum splendidè ornatum. Aucta religio,
cùm paulò pòst anno D. CCC. XLVI. Ramiro
Regi ad Clauigium, intercedente Apostolo,
de innumera barbarorum multitudine, victoria
concessa. vnde cœptum est in prælijs nomen eius
patrociniumq. implorari, victorq. exercitus
vniuersam Hispaniam voto astrinxit, vt ex singu-
lis agri vineæq. iugeris, Compostellano templo
frumenti modium, aut vini amphoram quotan-
nis omnes penderent.



CAP. LIII.

*Aquæ calidæ Amphilochia, & Aquæ Celine dictæ. Vnde Orense hodie.
Thermæ hîc salubres.*

INter Cilenos populos in Gallæcia, Ptolemæus *Aquas calidas* opidum recenset, incolis hodie *Orense*: quod & *Amphilochiam* dictum prius credunt Aluarus Gomezius, & Beuterus, ab Amphilocho Teucris Comite, qui hîc, Strabone teste, diem clausit. ab Antonino verò in Itinerario, *Aquæ Celine* vocatur. Declinante autem imperio Romano, & irrumpentibus in Hispanias Gothorum populis, Gallæcia Suevis in sortem & sedem obtigit, & patrio idiomate urbem hanc *Warm see*, quod *lacum calidum* denotat, appellarunt: postmodum verò *Orense* (quasi *Warense*) corruptè nimis dictum est. Sed inscij etymologiæ vocarunt Latinè *Auriam*, quasi ab *auto* nomen illi esset.

Sita autem est ad amnis Minij ripas vrbs, agro fruitur non amœno solû, sed & felici: sapidissimis undique fructibus egregiè ornatur, præter generosi & nobilissimi vini copiam: templa habet,
structura

structura, & Religione exulta, Cathedrale præsertim: ornatur id signo Christi crucifixi, mira arte & vetusta incolarum pietate venerabili, & miraculis crebris claro. Sed præcipuè urbem nobilitant non vno loco erumpentes calidi, & salubres fontes; vnde & vrbi nomen: quorum nonnulli ita moderati sunt caloris, vt innoxie corpus eum queat perferre. alij verò tam intense feruent, vt tactus calorem aspernetur, & oua in illis facile coqui possint. tantus verò circa hos fontes æstus erumpit, vt vel rigente brumâ, & opertâ tellure niuib, vicinæ fontibus ædes numquam niue vel pruina albere conspectæ sint: diceres vna in vrbis regione hyemalem, altera verò vernalem & tepidam auram regnare. Mira etiam hîc naturæ prouidentia elucescit. nam cùm suburbanus ager raras siluas ferat, nec cædæ materiæ multū sit ferox, quantum vrbi ad focum opus esset, calidarum hanc copiam diuite vena effudit, qua incolæ ignis beneficio sine igne fruerentur. Cùm verò calidi omnes fontes, à latentibus sub terram aluminis, fulfuris & bituminis venis originem trahunt, vt refert Vitruuius lib. viij. cap. iij. vnde Poëta de illis:

Sine bitumineæ rapiunt incendia vires,

Luteæve ex ignis ardescunt fulfura fumis.

Discriminat naturam arcani metalli sapor, vel

odor aquæ impressus: huius tamen fontis aqua nulla peregrina qualitate adulterata, ex terra erumpit calida, quod mirum est,

Siue pares flammæ undarum lance rependens

Arbiter in fœdus mons elementa vocat.

Ne cedant superata sibi, sed legibus æquis

Alterius vires possit virumque pati.

Vt ait Claudianus elegans Poëta. Pro comper-
to enim habent incolæ, à sulfuris venis vires su-
mere, vnde & multis medetur malis, quæ sul-
furea curant balnea. sed remotum esse caloris fo-
mitem extra dubium est, vnde nullum eius vesti-
gium secum vehunt aquæ.

CAP. LIV.

*Flauium Brigantium esse la Corunna. Fa-
bula explosa de speculo mirando. Pauli
Iouij lapsus de Herculis Columnis.*

R Elicto celebri illo promontorio *Artabro*, vel
Celtico, vt Plinius, vt verò Ptolemæus vocat
Nereio, hoc æuo *cabo de finis terre*, inter Callaicos
Lucenses, in magno portu *Flauium Brigantium* à
Ptolemæo recensetur: Dion etiam lib. xxxvij.
vocat *Brigantiam*, ab Æthico verò & Paulo Oro-
fio,

sio *Brigantia* vocatur: altissima pharo memorandi operis ornata. Antonius Beuterus *Betancos* esse; Florianus verò Occampo & diligentissimus Gaspar Barrerius, *la Corunna* vocari assèrunt. Magnæ cuiusvis classis capaci portu ornata: in honorem gentis Flaviæ olim exstructâ nomen ipsum ostendit, Domitiani forsan ævo. Nam à Plinio nulla eius mentio, qui sub Vespasiano vixit. Incolæ ab Hercule conditam referunt, turrimque hîc esse ab eodem exstructâ, in qua speculum arcana arte fabricatum erat, vnde naues vel longissimo spatio distantes contemplari liceret. in tam ridiculam opinionem vorum ignorantia, & antiquitatis imperitia lapsi sunt: nam cùm turris illa specula dicatur, speculum illud mirandum, sine opifice vlllo confinxere, & vt ex inscriptione licet videre in Augusti honorem exstructa fuit, à Lusitano architecto; sed lubet illam apponere:

MARTI. AVG. SACR.

C. SÆVIVS. LVPVS.

ARCHITECTVS.

A. F. DANIENSIS.

LVSITANVS. EXVL.

Ab hac fabula persuasi nonnulli, credidere arcem Herculis fuisse, & alteras columnas ab illo hîc fixas, non secus ac circa Gades, dictamque urbem hanc *Corunna* tamquam *columnam*: quod egregium etymon apud Paulum Iouium, virum aliàs grauem & doctum, tantùm valuit, vt ab imperito aliquo Hispaniæ antiquitatis persuasus, huic opinioni etiam subscriberet, cùm in vita Gonsalui Ferdinandi d'Aguilar, agens de aduentu Regis Philippi I. in Hispaniam, ita scriberet: *Nec diu Philippus amicorum suorum studio, votaꝫ frustratus, vt sua regna ex arbitrio administranda susciperet, in Cantabriam Oceano deuectus, peruenit in portum, qui vocatur ad Columnas, fecisse quòd ibi quoque alteræ Herculis Columnæ, sicuti Gadibus, positiæ fuerunt, quum eo externo litore terre Hispanicæ finis.* Sed opinio hæc infirmiori tibicine fulsa, quàm vt rationibus conuelli mereatur. Non procul ab hoc opido præstantissimi Iaspidis sunt fodinæ.



CAP. LV.

Burgos non esse Augustobrigam, nec Aucam veterem. Brauum esse Ptolemæi.

Vnde nomen mutatum.

Celebris admodum, & Castellæ veteris metropolis *Burgos*, quã Florianus olim *Augustobrigam* dictam putat, quamque Ptolemæus in *Vettonibus* collocat; sed cum Geographis pugnat hæc opinio: siquidem, teste Plinio, *Durius lapsus per Creuacos Vaccaosque, determinatis ab Asturia Vettonibus, à Lusitania Gallæcis, ibi quoque Turdulos à Braccaris arcet.* At *Burgos* Asturiæ terminis contineri luce clarius est, atque ita *Vettonum Augustobriga* esse nequit. *Lucio vero Marinæo, & Francisco Taraphæ Auca* olim dicta. Displicet tamen non immeritò Ioan. Vafæo. nam xx. circiter M. P. supra *Burgos* fuit *Auca*, in monte *Iubeda*, qui & hodie saltus est *Aucensis*, in loco qui hodie *neustra Señora de Oca* vocatur, & in Hispaniæ Concilijs, non semel *Auxitanus* Episcopus legitur. Idem tamen & *Brauum Murbogorum* Ptolemæi aiunt esse, & olim *Masburgi* dictam; sed auctores vellem protulissent. *Brauum* etiam fuisse

Ios.

Ios. Moletius, & Villanouanus asserunt à Germanis oblitterato priori nomine *Burgam* fuisse vocatā, auctor est Tarapha, & an. D. CCC. XLVI. regnāte Castellæ Comite Didaco Porcelli, nouis incolis habitari cœptam. Licet Rodericus Ximinius Archiepisc. Toletanus lib. v. cap. xxv. dicat Comitē Castellæ Didacum Porcellum, ex multis pagis castrisq̃ue, vulgò *Burgi*, ciuitatē Burgensem frequentasse, atque inde nomen *Burgos* inditum.

Vrbs est magnis concinnisq̃. ædibus ornata, incolæ summa cum fide mercaturæ student, templa, & cœnobia habet frequentia. Inter cetera D. Augustini est monasteriū, vbi asseruatur magno honore imago Domini nostri Iesu Christi crucifixi, quam à Nicodemo factam perhibent, & à mercatore quodam, tempestate iactato in mari reperi- tam. Multis certè miraculis claret. Extra urbem alterum est monasterium Virginum monialium, vulgò dicunt *de las huelgas* : cuius auctor Alphon- sus VIII. Castellæ Rex perhibetur, nullis accessus patet, nisi Principū patriciorumq̃. filiabus. Huic monasterio XIV. non ignobilia opida, & XVII. monasteria, præter alia obscuriora XL. opidula parent. Hanc in urbem etiam anno cIo. xcviij. Episcopalis sedes, quæ Aucæ erat, translata fuit auctoritate Urbani XI. quo tempore Alphonfus VI. Christianis Toletum restituit.

CAP. LVI.

*Duplex Pintia. Pisoraca amnis. Inscriptio
vetus. Urbis descriptio.*

DVplicis *Pintia* meminit Ptolemæus, quarum
vnam inter Callaicos Lucêses statuit, quam
Villanouanus *Chirogam*, Moletius verò *Puerto ma-
gno* vocant: alterâ in Vaccæis collocat, quæ hodie
ab omnibus *Valladolid* dicitur, nobilissimum Hi-
spaniæ opidum, situm ad ripas *Pisurgæ* fluuij,
quem ex antiquis inscriptionibus *Pisoracam* vo-
cari constat, vt indicio est illa, quam ab Amb.
Morale desumfi:

NERO. CLAVDIVS.

D. CLAVD. AVG. F.

GERMANICI. CÆS. AVG. N.

TI. CÆS. AVG. PRON.

DIVI. AVG. ABN.

CAES. AVG. GERM.

PONT. MAX.

TRIB. POT. IMP. COS.

A. PISORACA. M. I.

Quod est, à *Pisoraca* milliare vnum, vel mille
passibus à *Pisoraca* viam statuit.

Hiero-

Hieronymus verò Surita Notis ad Antonini Itinerarium negat *Pinciam* esse *Vallisoletum*, sed cùm passim opinionē priorem inualuisse videam, non est quòd citra efficaces rationes illam relinquam. ædificijs tam sacris quàm profanis, publicis ac priuatis ornatissimum : omnium scientiarum nobilissimo Lyceò honestatur, ex quo præclarissimi ingeniorum riuuli in vniuersam Hispaniam deducuntur : mercatorum commercijs, & mechanicis artibus egregiè excultum : aëre item saluberrimo, nisi interdum obscuris Pisurgæ amnis nebulis fœdaretur. Et cùm in vniuersa Hispania tantum quatuor sint Iuridici Contentus, quos *Cancellarias* indigēt, Pintię vnus est, quæ de causa magna hîc hominum frequentia, siquidem hinc iura petunt populi omnes, qui à Tagi ripa, Castellam vsque comprehenduntur: vnde urbem alioqui claram aduenarum concursus clariorem multo efficit. hortis fontibusque amœnissima est, rerum omnium copiâ ditissima : ita vt vna hæc contineat, quidquid præcipuæ aliæ vrbes singulæ, Reges tamquam placidissimum domicilium illam libenter frequentant, & plurimi Hispaniæ Principes ædes hîc habent proprias. inter cetera verò forum habet rerum venalium amplissimum & pulcerrimum, quod ambitu suo septingentos passus complectitur: tanta hîc rerum copia varietasque

tasque venalis, vt non immeritò quis Amaltheæ hîc cornu copiæ esse diceret. Non exiguum splendorem Philippi II. potentissimi Monarchæ incunabula huic vrbi dedere. Natus & hîc *Ferdinandus Nonius*, vulgò *Pintianus* à patria cognominatus: qui vt Melam, ac Senecam Scriptores Hispanos egregiè illustrauit, sic & C. Plinij Naturalem Historiam integrè post Hermolaum Barbarum (bone Deus, quem & qualem virû!) emendauit.

CAP. LVII.

Legionensis vrbs ex Sublăciæ ruinis creuit.

Legio VII. gemina vocata. Olim Floris cognomen habuit. Quando Leon
cæpta dici.

Legionensem urbem eo tempore exstructam ferunt, Franciscus Tarapha, & Petrus Medina, qua Imperator Nerua Cocceius cōscriptis XIV. legionibus ad prouincialium motus compescendos, duas in Hispaniam misit, vt in arduis & montuosis fitas locis vrbes diruerent, & in planitiem deducerent, quò faciliùs Hispanorum seditionibus in posterum prospicerent, quos & suo pte ingenio, & natura loci ad seditiones paratos nouerat:

rat: atque inter ceteras Sublantium solo æquatam
fuisse, cuius adhuc vestigia exstant, sesquileuca ab
vrbe, loco incolis *Sollanco* vocato, ex cuius ruinis
Legionensem urbem creuisse fama est. Sita est
inter Astures. A Ptolemæo *Legio Germanica septi-*
ma vocatur; Ioannes verò Valsæus in Chronico
suo, non *Legionem septimam Germanicam*, sed *Gemi-*
nam legendum putat: quòd nusquam tota Hispa-
nia in vetustis inscriptionibus *Legionis septimæ*
Germanicæ mentio occurrat, *Geminæ* verò fre-
quentissimè. Vna hæc inscriptio multarum erit in-
star Aquiflaviæ in Lusitania (vulgò *Chaves*) re-
perta:

IMP. CÆS. VESP. AVG.
PONT. MAX. TRIB. POT. X.
IMP. XX. P. P. COS. IX.
IMP. VESP. CÆS. AVG. F.
PONT. TRIB. POT. VIII.
IMP. XIII. COS. VI.

.....

.....

C. CALPETANO. RANTIO.
QVIRINALI.

VAL.

VAL. FESTO. LEG. AVG. PR. PR.
 D. CORN. MÆCIANO. LEG. AVG.
 L. ARRUNTIO. MAX. PROC. AVG.
 LEG. VII. GEM. FEL.
 CIVITATES. X.
 AQVIFLAVIENSES.
 AOBRIGENSES.
 BIBALI.
 COELERNI.
 EQVAESI.
 INTERAMICI.
 LIMICI.
 AEBISOCI.
 QVARQVERNI.
 TAMAGANI.

Cui adstipulatur Ambr. Morales, P. Ioan. Mariana, alijque non imi subsellij viri. Illud mirari subit, quid Franciscum Tarapham mouerit, quòd hanc urbem dicat à XIV. Germanorum legionibus exstructam, quæ non urbem aliquam, sed or-

M

bem

berem possent exstruere : idem ait olim *Regiam legiam* vocatam fuisse. Refert & Hieronymus *Su-rita*, auctores esse, qui ante CCCC. annos proderunt Legionem vij. geminam, *Floris* cognomen habuisse. Gerundensis verò Episcopus lib. iij. urbem hanc primò à Pœnis ait conditam fuisse, & *Eleonam* dictam, à prouincia Eleona, Libyæ propinqua, in qua leonum magna copia: quam opinionè vnde hauserit, me prorsus fugit; sed ἀπὸς-
Σούρουα hæc mittamus.

Annorum verò decursu in Leouigildi Gothorum Regis honorem *Leon* vocari capta est, vt refert Isidorus libro ij. Chronicorum his verbis : *Leouigildus Rex Romanos milites apud Legionē urbem bello exstinxit, & ipsam eorum urbem cepit, quam ex suo nomine Lecnem vocauit.* A qua postea vniuersi regni Legionensis nomen manauit. Anno DCC. xxii. Pelagius Rex, à Mauris illam sibi vindicauit.

Vrbs est hoc æuo nobilissima, & inter cetera templo pulcerrimo conspicua, teste Lucio Marineo; qui, ne Hispalense templum quidem magnitudine sua, nec Toletanum, diuitijs ornamentisque illud superare affirmat. Nam artificio, & concinna architectura illa longè vincit. Augustum sacrarium habet, in quo XXXVII. Reges, & vnus Hispaniæ Imperator sepulti sunt. Nullius pœnè rei indiga, sed incolis suis liberaliter omnia

nia suppeditat. Præcipuè autem Sanctorum meritis, & reliquijs opulenta, inter ceteras verò D. Isidori Hispalensis Episcopi, qui anno Christi DC. LVI. obiit, Hispali verò in Legionensem urbem à Ferdinando Magno translatus est. Dignitate Episcopali ornata vrbs, & singulari privilegio, iam à Gothorum temporibus sedi tantum Apostolicæ obnoxia: nec Metropolitanum agnoscit. Auctor est Isidorus hac vrbe natos esse S. Marcellum Centurionem & Nonam uxorem eius, qui XII. filios Christi Martyres habuerunt.

CAP. LVIII.

Zamorra non esse Sisaponem Ptolemæi. Minus Orclim vel Numantiam. Senticam esse. Vnde illi nomen.

NON obscurum hoc ævo opidum est Zamorra, Maurorum verò tempestate celeberrimum fuit. de cuius prisco nomine discrepant auctores, conabor succinctè variantes opiniones recensere, ut illis euentilatis, probabiliori subscribam. Villanovanus credit esse Ptolemæi Sisaponem, sed cum illa inter Oretanos collocetur, Zamorra inter Vaccæos potius sita videatur, non quadra-

bit *Sisapones* situs, immò si Plinio, & Straboni fides, in Beturia *Sisapone* locanda erit (nisi aliam à Ptolemæi *Sisaponem* esse dixeris;) Antonius verò Nebrissensis *Orcelim* credit esse, sed & hæc vrbs inter Oretanos refertur, quam multi *Oriolam* putant, nec potest cum Zamorrensi situ conuenire. Non defuere, qui *Numantiã* illam celebrem fuisse suspicantur, sed nimis frigidè. Carolus verò Clusius, & Iosephus Moletius *Sarabrim* Ptolemæi dicunt; Ioannes Mariana, alijque *Senticam* Ptolemæi aiunt esse, in Vaccæis, non procul à Pintia, at cùm *Sarabrim* & *Senticam* Ptolemæus, vt vicinas recenset, non secus ac *Toro* & *Zamorra*, non facilè erit asserere, quænam illarum sit *Zamorra*. Ego plurium & doctiorum opinioni accedam, vt, si falli contingat, erroris patronos habeam. *Senticam* itaq. Ptolemæi esse cum Resendio alijsq. asseram: *Zamorra* autem etymon refert Vassæus in Chronico ex Floriano Occampo, ab Arabibus olim *Medinam Zamorathi* appellatam, atque ea voce significasse ciuitatem *Turquesarum*. nam *Zamorathi* Pœnis lapis cyaneus, vulgò *Turquesa* dicitur. totus enim *Zamorrensis* tractus scatet diuite vena lapidis cyanei, quæ passim in vicinis rupibus se frequentè ostendit. Postquàm ab Almanzore Rege funditus diruta fuit, ab Alphonso Magno, veleius patre Ferdinando instauratam ferunt,

ferunt, & propugnaculis ita egregiè munitam, vt omnem ferè hostilem impetum eluderet, nec nisi fame ad deditiōem compelli posset. Vnde Hispani patrijs rythmis, epithetum illi *la bien cerca-da*, seu egregiè munitam addunt. Episcopo hæc vrbs circa annum cIo. cxix. donata fuit, à Callisto II. Pont. Max. vt refert Vasaëus. Verusta hîc inscriptio visitur, nec ex triuio, quam lubuit hîc adtexere:

DEO. MENIVM.

VIACO.

M. ATILIVS.

SILONIS. F.

QVIR. SILO.

EX. VOTO.

CAP. LIX.

De Toleti conditoribus reiecta opinio. Carpetaniæ caput quando. Primatis Hispaniæ dignitas eo translata. Vrbs Regia vocata. Fatale hîc palatium.

VT Romanorum æuo *Toletum*, neque magna admodùm, neque clara vrbs fuit, ita Gotho-

rum sæculo, ad summum incrementum peruenit, vt nulli Hispaniarum vrbi inferior sit. Liuius certè lib. xxxv. paruam urbem fuisse dicit, anno ab Vrbe Condita D. LVI. quando M. Fuluius Proconsul illam expugnauit, his verbis : *Ad Tagum ire pergit. Toletum ibi parua vrbs erat, sed loco munita. Eam cum oppugnaret, Vertonum magnus exercitus Toletanis subsidio venit, cum his signis collatis, prosperè pugnavit, & fuis Verthonibus, operibus Toletum cepit.* Plinij verò tempore clarior fuit, nam & Carpetaniæ caput erat. Quo tempore condita fuit, non constat inter auctores: Rodericus enim Ximenius Toletanus Archiepiscopus lib. i. cap. iij. & ex eo Tarapha, alijque aiunt C. VIII. annis priusquàm C. Iulius Cæsar rerum potiretur, Coss. Tolemone & Bruto exstructam fuisse: quorum nomina cum nusquàm in Fastis reperiantur, meritò prætereunda hæc est opinio. Episcopus Gerundensis lib. v. dicit à D. Iunio Bruto, qui ex deuicta Gallæcia, *Gallaici* nomen meruit, conditam esse, sed ex T. Liuij verbis constat, ante Bruti ætatem multo tempore conditam fuisse, proinde hæc vt incerta mittamus.

Sita est autem in *Carpetanis*, in totius pænè Hispaniæ vmbilico, loco aspero & cliuoso, maioriq; ex parte nobilissimo amne Tago ambitur, à reliqua verò parte muris validissimis, & Cl.
pro-

propugnaculis egregiè munita : cæli , agrique insigni felicitate fruitur: lanificij , sericiq̃ue commercio opulenta admodum : equitum nobiliumq̃. virorum insignis frequentia, sacerdotum magna opulentia. Aquæductus hîc est mirandi operis. nam cum vrbs editiori sit loco sita, quàm vt Tagi aquis commodè frui posset, qui humiliorem vrbs partem alluit, ingenio & arte Ianelli Turiani Cremonensis, celeberrimi Mathematici, facta est hydraulica machina, quæ magna versatili rota aquam, magno impetu per tubos ductiles & fillanos in editissimam vrbs partem pertrahit, vnde in multos riuulos vrbs commodo deriuatur.

Augustissimo & splendidissimo templo nobilitatur, quod reliquas Hispaniæ sacras ædes longè superat: Archiepiscopo paret, qui dignitate opibusq̃. omnes Hispaniæ procures antecedit, quem Urbanus II. totius Hispaniæ Primatem constituit, XVII. illi opida stipendiaria, præter alia minoris famæ, quæ annuò plusquàm ducenta milia coronatorum pendent. Anno D. L. xxxix. tempore Regis Flauij Reccaredi, III. Toletano Concilio vocata fuit *Vrbs Regia*, quia sub Leouigildo Reccaredi patre, Gothorum aula & regia sedes Toletum migravit. qua de causâ insequentibus Reges varijs operibus exornarunt. Primus verò Rex V Vambapomœriū eius dilatauit, am-

plioriꝑ. muro cinxit, varijsꝑ. ædificijs illustravit,
quod testatur epigraphæ vrbis portis inscripta:

Erexit fautore Deo, Rex inclytus urbem

VVamba, suæ celebrem protendens gentis honorem.

Extra muros septemtrionem versus, vestigia
magni olim theatri sparsa visuntur. Auctor est
Rodericus Toletanus Archiepiscopus, ante Ara-
bum in Hispanias irruptionē, hîc fatale palatium
fuisse, quod inuicti vectes, & æterna ferri robora
claudebant, ne reseratum Hispaniæ excidium ad-
ferret, quod in fatis non vulgus solū, sed & pru-
dentissimi quique credebant: sed Roderici vlti-
mi Gothorum Regis animum infelix curiositas
subijt, sciendi quid sub tot vetitis claustris obser-
uaretur: ingentes ibi superiorum Regum opes, &
arcanos thesauros seruari ratus. seras & pessulos
perfringi curat, inuitis omnibus: nihil præter ar-
culam repertum, & in ea linteum, quo explicato
nouæ & insolentes hominum facies habitusꝑue
apparuerunt, cum inscriptione Latina, *Hispaniæ ex-*
cidium ab illa gente imminere, vultus habitusꝑue
Maurorum erant. quamobrem ex Africa tantam
cladem instare Regi ceterisꝑue persuasum; nec
falsò, vt Hispaniæ Annales etiamnum queruntur.
Venit autem in Maurorum potestatem an. D. xv.
Iudæorum prodicione, dum Christiani Domini-
ca palmarum, pro veteri more securi extra muros
ad

ad D. Leocadiæ ædes supplicât. Ab Alphonso verò VI. iugi obsidione, in Christianorum potestatem redactum. Euangelica luce donatum fuit à D. Eugenio martyre, B. Dionysij Areopagitæ socio, qui & primus vrbis Episcopus fuit. habuit & Archiepiscopos vitæ sanctimonia, & eruditione conspicuos *S. Iulianum*, & *S. Illephonsum*, quorum hic à B. Virgine ipso Annuntiationis festo, ornamentis ad sacrificandū donatus fuit: hodiernoq. die altare in rei gestæ memoriam ostenditur. D. etiam Leocadiæ, martyrio sub Deciano affectæ, magnus hîc cultus, cui tria diuersa templa dicata sunt. Illud certè memorabile xvii. hîc Concilia Toletana celebrata fuisse, quot alibi nusquā. Non pigebit referre *Aloysiam Sigæam* virginem Toletanam, quæ cum sui æui doctissimis viris conferri posset, fuisseq. quinque linguarum adeò peritam, vt non immeritò Paulus III. Pont. Max. litteras illius ad se scriptas videns Latinè, Græcè, Hebraicè, Syriacè & Arabicè, admiratus fuerit in tenella hac & mustea virgine tam multiplicem ingenij fructum, in viris etiam rarum. Mitto nunc Toletanos insigniter doctos, linguarumque in primis peritos, bina fratrum paria, *Ioannem & Franciscum Vergaras*, *Didacum & Antonium Couarruias*, Iureconsultos egregios. Duos item taceo *Aluaros Gomezios*, Poëtam alterum domi nobilem, alte-

rum Historicum. Eleganti in marmore insculpta hæc inscriptio visitur, quæ, quia refert antiquum nomen, non pigebit hîc adponere:

IMP. CÆS.
M. IVLIO. PHILIPPO.
PIO. FEL. AVG.
PARTHICO.
PONT. MAX. TRIB. POT.
P. P. CONSVLI.
TOLETANI. DEVOTISS.
NVMINI. MAIEST. QVE. EIVS.
D. D.

CAP. LX.

*Segouia Plinio, eadem cum Ptolemæi Secu-
biæ. Etymon rejicitur. Aquæductus à
Traiano exstructus.*

QUod paucissimis Hispaniæ vrbibus, id *Sego-
biæ* accidit, vt incorruptum nomen inter tot
barbaras gentes posteritati transmitteret. Plinius
in *Areuacis*, cum *Vxama*, & *Seguntia* collocat,
Ptole-

Ptolemæus *Secubiam* vocat ; Iosephus Moletius eandem putat esse cum *Segortia Lactea* Ptolemæi, eodem in populo ; sed Villanouanus dicit esse *Se-pulueda* ; Ant. Augustinus ex vetusto numismate, *Coloniā Latinā* cognominatā fuisse docet ; Rodericus Archiepisc. Toletanus lib. i. cap. vij. ab Hispano Rege exstruatam putat, iuxta promontorium, quod *Cobiam* vocat, ideoque vocasse *Secubiam* tamquam *secus Cobiam* sita. Sed ridiculum hoc etymon, & ἀγέλας ille Crassus rideret. Ioan. Vassæus auctor est, à Celtiberis, dum in Lusitaniam pars eorum patriæ grauis transfiret, conditam esse, & in Segobrigæ memoriā vocatam esse *Segouiam*.

Est & *Segouia* in Bætica ad Silicense flumen A. Hirtio auctore, non procul ab Astigi, quam hoc æuo vocari *Segouia la menor*, testatur Vassæus inter Hispalim & Cordubam.

Vrbs est nostro æuo non ignobilis, editiori in loco sita, turribus vndique & propugnaculis munita, lanificio præcipuè clara, nec nobilior tota Hispania pannus, quàm Segouix textitur, vnde incolis magnæ opes. Quodque mirandum magis, refert Vassæus vix tota hac vrbe mendicum inueniri, nisi quem ætas aut morbus ab opere excusant. Atrium hîc est visendum in quo omnium pene Hispaniæ Regum effigies conspiciuntur. Præcipuum verò vrbis ornamentum, aquæductus est miran-

mirádi operis, quem Rodericus idem, & Alphonsus de Carthagena, ab Hispano Rege exstructum somniant: sed eruditionibus & antiquitatis peritis, Traiani Imp. opus perhibetur, in quo facilè, Romanæ architecturæ maiestatem, & magnificentiam intueri licet, tantæque firmitatis est moles, vt, cùm sæpè particula aliqua reficiatur, vix ad decennium illa perduret, cùm prisca structura in hodiernum æuum illæsa seruetur: vrbi hinc de aquarum copia prospicitur, non publicè solum, sed & priuatim. Nostrâ hîc memoriâ Germanorum ope, & aquarum, inuenta ratio est cudendæ monetæ, non malleis colliso, sed fuso ac liquato, demumque impresso ductili ære, auro & argento. Priscis ea res inuisa sæculis atque inaudita. Solum habet fecundum admodum, nihil vt incolis desit, quo commodè lauteque viuant: templa habet & cænobia piè & egregiè instructa: quibus accedit Episcopatus splendidus & opimus, vt-pote qui in annuos redditus plusquàm quatuordecim ducatorum millia numeret. Patronum agnoscit S. *Fructuosum* Confessorem.



CAP. LXI.

*D. Virgo ad aquas Lupias. Quando sacra
effigies huc delata. Miraculorum
aliquot series.*

CVM hæc vrbs, ob imaginem D. Virginis toto
Corbe celeberrimam excitata sit, operæ pre-
tium me facturum arbitror, si paucis retulero,
vnde primùm imago hæc allata, vbi postmodùm
reperta, quando coli cæpta. Sciuente per vniuer-
sam Europam circa annum Domini DC. gra-
uissimâ peste, regnante Riccaredo Hispaniarum
Rege, Gregorius Magnus Pont. creatus, priùs
quàm inaugurandus esset, solemni indictâ suppli-
catione, frequentem iussit clerum populumque
adesse, vt Dei iram, patrocicante D. Virgine,
(cuius peculiarem effigiem manu gestabat) de-
precaretur. nec mora, pijsimi Pontificis precibus
pestis elanguit, & sedata fuit. Hanc postmodùm
effigiem D. Leandro Hispalensi Præsuli, vnâ cum
Moralibus in Iob libris, alijsque reliquijs dono
misi. In Cathedrali templo summo cum honore
seruata fuit, donec luxu libidineque eneruatam
HISPANIAM, Pœni impunè vastarent, Chri-
stianis

stianis vndique fugientibus. Hispalenses aliquot sacerdotes, infidelium manibus elapsi Toletum fugerunt, ablatis aliquot Sanctorum reliquijs, una cum sacra hac effigie, qui cuncta hæc prope amnem *Guadalupe*, barbarorum metu, in marmoreo sepulcro, adiunctis litteris in rei gestæ memoriam, ingestâ tellure condidere. multis demum elapsis sæculis, tempore Alphonsi XI. accidit, ut bubulcus amissum bouem aduerso amne *Guadalupe* inuestigaret, quem mortuum reperiens, dum parat corio nudare, reuixisse videt attonitus: cum se illi D. Virgo augusta specie derepentè obtulit, imperans ut clero significaret, ut eò loci occultam sacram effigiem effoderent, ibique dedicatâ æde collocarent. Pastor hic domum rediens, inuoluta in Deum flamma, & D. Virginem religione accensus, ut cælestibus mandatis obtemperaret; ecce tibi familiam omnem luctu & mærore obstitam, ob filij mortem, sed ipse insolita quadam in D. Virginem spe, preces tanto animi feruore fudit, ut iterum cunctis stupentibus vitalis cerneretur. Statimq. vniuerso clero rei gestæ seriem omnem retulit, recenti miraculo confirmatâ. omnes ilicò ad indicatum locum conuolant, repertamq. imaginem, tumultuariâ excitatâ ædiculâ reponunt. Miraculi huius fama vniuersam momento Hispaniam peruasit: magnus eò statim concursus fieri

feri, frequentes se D. Virginicommandare, vniuersi opem auxiliumque ærumnis suis experiri. Rex ipse Alphons. XI. fama rei excitus huc venit, multumque agri, Castri Iulij & Talabricæ, templo & cœnobio assignauit, vt Deo commodius obsequium præstarent: templum etiam maiori ambitu exstruxit, varijsque ornamentis decorauit. nec incassum. Nam vix elapso triennio D. Virginis præsens numen sensit. Memorabile enim aduersus quinque potentissimos Pœnorum Reges, prælium commisit, prope Annem Salsum, non procul à Tariffa, & adiuuante Alphonso Lusitanix Rege, socero suo, victor euasit. Circa annum clō. ccc. xl. ipse Rex hostium spolia Deo obtulit, inter quæ adhuc magni ex ære tripodes templi parieti affixi visuntur.

Templū vndique varijs donarijs, & frequenti anathemate septum est, columnæ votiuīs tabellis testæ. hæc inter conspicuus est cereus immensæ magnitudinis ex cera alba, quem Olisiponensis populus, sæua pestilentix lue D. Virginis ope liberatus, anno clō. cccc. xc. offerendum curauit: nam vasa sacra, tam aurea quàm argentea recensere immensum foret. Argenteæ lampades XXX. perpetuo lumine visuntur, inter quas aliquæ opere & magnitudine conspicuæ. Inter multa Regum Principumque donaria videre est maioris tormenti bellici

bellici ferreum globum, quem Alphonſus Albuquerſius, auorum memoria, Indiæ Prorex, in monumentum miraculi, quo eum D. Virgo in Goëſi obſidione tutata eſt, miſit: nam cum ſcapſa flumen ſubiret, comes quidam eius ita tormenti globo diſcerptus fuit, vt illius cerebro fœdatus fuerit: quo ille periculo commotus, in D. Virginis Guadalupæ ſe tutelam commendat. Vix orationem finierat, cùm tormento excuſſus globus pectus illi percuſſit, ſed innoxie & ad pedes eius delapſus fuit, licet vix à XL. paſſibus excuſſus fuiſſet, nunc argenteis incruſtratus bracteis hîc ſeruatur. cum quo monile miſit, multis gemmis & adamantibus ornatum. Effigies hæc D. Virginis ex ligno eſt, quod cum cariei obnoxium admodum eſt, mira tamẽ Dei prouidentia, per DC. annos ſub terra incorruptum durauit. Fuſci verò coloris eſt, & vultui maietas ineſt tanta, vt referant æditui, ſe fixis oculis non poſſe illam intueri. reuerentia enim ſentiunt ſibi oculorũ aciem præſtingui. Multa eſſent hoc loco de ſacra hac æde dicenda, quæ ſpatiis excluſus iniquis, præterire cogor.

Opidum eſt exiguum, amœnum, fontiumque frequentia irriguum admodum. Flumen *Guadalupe* (nam *Guada* Mauris aquam notat) muros eius præterfluit, cuius vtramque ripam, bicolores vndique

undique & proceræ populi obumbrât, alicubi in tantam altitudinem enatæ, vt nauium malis inferuiant; nonnullis in locis luci instar ita densæ, vt vel flagrantissimi solis radios non admittât. Ager suburbanus vini, mellisque, & cuiusque generis fructuum ferax, cetera copiosè à vicinis suppetantur.

CAP. LXII.

*Oretum Germanorum, num Calatrauz. Taraphæ crassus error. Inscriptio vetus.
Origo Calatrauæ militum.*

Calatraua non obscuri nominis opidum, ad flumen Anam situm, & sacræ militiæ nomine præcipuè clarum. Ptolemæo *Oretum Germanorū* dictum, teste Car. Clusio, Ios. Moletio, & Tarapha, inter Oretanos situm. Stephano verò Byzant. *ἠ' προία*, quam cum Castulone inter Oretanos etiam recenset. num Strabonis *Oria* sit inter Oretanos, non abhorret animus: præcipuè cūm & Casaubonus, & Ortelius eò inclinent. Addit Tarapha nominis etymon: *Imp. Valeriani*, inquit, *temporibus, superiores Germani, abraſa potiti Hispania, à quibus, Oretum Germanorum, Eſtremadura opidum,*

N

hodie

hodie vero Calatraua, conditum. Sed ô Lucumonis acumen!

Bæotûm in crasso iurares aère natum.

Cùm videat à Cl. Ptolemæo *Oreti Germanici* mentionem factam, qui teste Suida, M. Antonini temporibus scripsit: Plinius etiam, qui sub Vespasiano vixit, *Oretanos* hos cognomine *Germanos* vocat, vnde constat Tarapham nimis sapino animo hæc scripto mandasse; cùm Valerianus multis pòst sæculis rerum potitus sit. Ambr. Morales *Calatrauam* negat *Oretum Germanorum* fuisse; sed non procul ab vrbe ædiculam esse, quam incolæ *Neustra Señora de Oreto* vocant, atque hîc antiquum *Oretum* fuisse. nam. & templum illud Romanam architecturam præsefert, pontemque habet vicinum eiusdem operis. Indicat hoc vetus inscriptio, quæ ab hoc ponte in vicinam urbem *Almargo* translata fuit:

P. BÆBIVS. VENVSTVS.

P. BÆBIL. VENETI. F.

P. BÆSISCERIS. NEPOS.

ORETANVS.

PETENTE. ORDINE. ET. POP.

IN. HON. DOMVS. DIVINAE.

PONTEM. FECIT.

EX. HS. XXC. CIRCENS. EDITIS. D. D.

Vrbs

Vrbs hæc *Calatraua* militibus à Rege Sãctio III. cognomine *Desiderato*, data fuit, circa annum cLo. c. LViii. cuius militiæ primordia non pigebit ab ouo, quod aiunt, breuibus enarrare. Quo tempore Mauris erepta fuit *Calatraua*, Templarijs militibus (quorum magna tunc temporis erat virtutis opinio) munienda data est, vt firmum aduersus barbarorum insultus propugnaculum esset: illi, quòd Mauros magnis copijs eò venturos fama erat, opido diffisi, Regi id restituere, nec erat inter procures, qui se periculo exponeret. Aderant forte Toleti, duo Cistercienses monachi, Raimundus Fiterij ad Pisoracam Abbas, & Didacus Velascus, spectatæ olim virtutis miles (nunc Christo militabat) qui monendo, suadendoque Abbatem tandem impulit, vt opidi muniendi in se curam susciperet, gloriosum id illi, reip. verò christianæ utilissimum futurum: consilium specie erat temerarium, annuit tamen. Regi Sãctio id gratissimũ fuit, Præsuliq̃ue Toletano: qui quoniam eius ditionis esset, pecuniam de suo suppeditauit, & auctoritate sua orationeque, multos tum nobiles, tum populares exciuit, vt vnà cum Abbate pro christiana rep. discrimini se obijcerent. Multi vndique eò mortales confluxere, omnes lubenter difficultates subituri. diligentia hac opidum aduersus omnes hostium iniurias egregiè munitum

fuit. Mauri spe deiectioni, an alijs difficultatibus implicati, obsidionem non tentarunt. id faustum militiæ eius omen fuit. Rex in laboris præmium, opidum Abbati cum subiecto agro & ordini Cisterciensi dono dedit. Is militibus suis vestem rubra cruce insignitam attribuit. Equitum Magistro quadraginta millia aureorum quotannis cedunt. his initijs sacram hanc militiam in hoc, quod videre est, fastigium excretam Alexander III. Pont. Max. suo diplomate confirmavit.

CAP. LXIII.

Talabricam non esse Talauera. Ptolemæi Libora, & T. Liuij Ebura eadem cum Talauera sunt.

NON obscurum *Talauera* municipium, nisi priscum nomen in obscuro esset. Cl. Marius Aretius, & Ant. Nebrissensis, nuda nominis similitudine allekti *Talabricam* olim dictam credidere; sed cum Antonino Aug. in Itinerario *Talabrica* à Conimbrica distet L. M. P. qui sunt paulo plus XII. leucis, quæ Conimbrica Caciæ usque numerantur, unde diligentissimus Barrerius *Talabricam* Caciæ esse non malè colligit. Plinius etiam
lib.

lib. iv. cap. xxi. clarè *Talabricam* in Lusitania collocet: *A Durio*, inquit, *Lusitania incipit*, *Turduli veteres*, *Pæsures*, *flumen Vacca*, *opidum Vacca*, *opidum Talabrica*. Cùm autem *Talauera* sit ad Tagum sita in Tarraconensi prouincia, non poterit *Talabrica* esse, quæ in Lusitania est. Rod. Ximenius Tole-
tanus antiquitus *Aquis* nomen illi fuisse dicit; sed cùm apud classicum scriptorem hoc non constet, non potest probari eius opinio. Ioannes Mariana Societatis I E S V Theologus Hist. De rebus Hispaniæ lib. iv. cap. xiiij. *Liborã* Ptolemæi & *T. Liuij Eburam* esse contendit. Qua in re suffragatur illi Ant. Beuterus, quæ tam Ptolemæo, quàm Liuius in *Carpetania* non procul à *Toleto* sita est, non le-
cus atque *Talauera*. Quod verò idem Mariana, *Elboram* vocat, & Diuorum Vincentij, Sabinæ, & Christeridis Martyrum patriam asserit, omni-
que ope adnitatur probare, parum efficit. Nam doctis-
simus Andr. Resendius, tamquam pro aris & fo-
cis, in Epistola ad Bartholomeum Kebedium, om-
nia eius argumenta refellit, atque *Eboræ* in Lusi-
taniæ hæc quadrare, & non *Talaueræ* docet. T. Liuij *Eburam* credamus esse, quæ cum Ptolemæi *Libora* eadem est. Auctor est Liuius, lib. xxx. anno
ab Vrbe Cõdita D. LXXIII. Fuluium Flaccum
Prætorem Celtiberos memorabili prælio ad *Ebu-
ram* Carpetaniæ urbem fudisse. Diligentiores

Hispani prælij locum à Liuiio explicatum, cum suburbano *Talauera* conuenire affirmant.

Vrbs sita est loco plano, in valle, IV. M. P. ea in parte lata, ad amnem Tagum : mœnia sunt opere firmissimo, altitudine & latitudine paucis cedunt. Pœnorum tempore aut Gothorum restaurata videntur, quod indicant lapides, Romanis inscripti litteris, nullo ordine dispositi. turribus egregiè & propugnaculis distincta. Contributus opido ager egregiè felix, vini, mellis, pecorisque admodum ferax : cœnobijs & templis ornatur: nobilitas ibi frequēs. Vocatur autem *Talauera de la Reyna*, quia vna erat vrbum, quas reginæ in quotidianos sumtus obtinebant: qua postea Gomesius Toleranus Archiepiscopus, ob egregiam nauatam operam reginæ, vxori Henrici II. Castellæ Regis, donatus est, & deinceps Toletano Præsuli attributa fuit.



CAP. LXIV.

*Castulo Oretanorum vrbs à Phocensibus
condita. Appianus deprauatè Castaca
vocat. Variè à Plutarcho & Stra-
bone vocata. Res ibi gestæ.*

CONSTANS est Scriptorum opinio, *Castulonem* olim fuisse, vbi nunc *Castlona*: nec multùm ab antiqua appellatione, licèt à splendore, & nobilitate, multùm deflexit. Ptolemæus illam inter *Oretanos* collocat. Stephanus Byzantinus deprauatus hoc loco, vt alijs multis. ait enim: *Κασάλων μεγίστη πόλις ῥητανίας*: cùm ex Ptolemæo legendum sit *ὠρητανίας*, vt benè notauit Hieronymus Surita. Conuentus verò erat Carthaginensis, teste Plinio, qui addit *Castulonenses* populos, ex Colonia *Salariensi*, Latij veteris esse, qui Cæsari *Venales* appellantur. Olim valida vrbs erat & nobilis. condita fuit à Phocensibus, non quidem ab illis, qui Ioniam incolebant, sed qui Bæotiam, vnde & in fontis Castalij memoriam, *Castu'onis* nomen impositum. Hinc Silius Italicus lib. III.

Fulget præcipuis Parnassia Castulo signis.

Nec immeritò, nam quo monte sita est, non

obscuram Parnassi imaginem præfert. Siquidem & duplici vertice erat, quem vallis angusta interfecabat, ab vno latere fons tenui scaturigine manabat, licèt hac in re Castalio fonti dispar. Sed liceat

— *magnis componere parua.*

Originem hanc probant plurima argentea numismata, ante paucos annos hîc reperta; vt luculentus auctor est Ambr. Morales, quæ alatum Pegasus ab vna parte ostendebant; litteris iniuria temporis prorsus deletis. Olim etiam Municipium fuisse, antiqua inscriptio ostendit, quam Ambr. Morales non procul ab vrbe, loco dicto *Linares* conspici auctor est, notatque aspirationem præter omnium Scriptorum mentem habere:

VALERIÆ. CIPATINÆ.

TVCCITANÆ. SACRVM.

COL. PATRICIAE

CORDVBENSIS. FLAMINICAE.

COL. AVG. GEMELLAE.

TVCCITANÆ. FLAMINICAE.

SIVE. SACERDOTI.

MVNICIPII. CHASTVLONENSIS.

Vrbs ipsa ingenio, & natura loci egregiè munita: siquidem & monte, & conuallibus profundis

dis ambitur, ita vt tantum ab occidua parte commodus in urbem ingressus pateret; sed angustus admodum, & si ex prisca vestigijs conijcere licet muro, turribusque egregie tutus. Appianus Alex. deprauate admodum in Ibericis vocat hanc urbem *Κάσακα*: nec me mouet patrocinium Stephani Byzantini, qui *Κασάλονα*, & *Κάσακα*, vt diuerlas vrbes enumerat. nam quæ circa Castacem Appianus refert accidisse, T. Liuius Castuloni adscribit. Vt liquidò apparebit conferenti vtrumque locum. Plutarchus verò in Sertorio *Castonē*, Græcorum more, qui vocalem ante Δ sæpe elidunt, vt videre est in dictione *Τεσκλόν* & *Ασκλόν*. Strabo verò sæpe voce *Clastonis*, & *Castanionis* vtitur, sed mendose, vt monent H. Casaubonus, & Surita. Agrum habet non secundum modum, sed & diuitem: cum propè hanc urbem, teste Polybio, Plinio, T. Liuius & Strabone, argenti fodinæ erant, quarum adhuc vestigium exstat; plumbi etiam fodinas habet in hodiernum æuum. Vestigia hinc aquæductus exstant, Romanæ munificentiae. Auctor est T. Liuius lib. xxviij. hanc urbem post cæsos Scipiones in Hispania, à Romanis ad Carthaginienses defecisse, & ex prælio profugis portas urbis occlusisse, motos tamen vicinæ Illiturgis excidio, ad priores dominos rediisse, tradito etiam Punico præsidio.

Hac etiam vrbe oriunda erat *Imilcè* Hannibalis vxor, auctore T. Liuiο lib. xxiv. *Castulo*, inquit, *vrbs Hispaniæ, nobilis & valida; & adeò coniuncta societate Pœnis, vt vxor inde Hannibalis esset.* Et Silio Italico his versibus:

— *at contra Cyrrhæi sanguis Imilce
Castali, cui materno de nomine dicta
Castulo Phœbei seruat cognomina vatis.*

Hoc opido citerioris Hispaniæ longitudinem finiri auctor est Plinius, quam à Pyrenæis mōtibus huc vsque dicit comprehendere DCC. vii. M. P. Episcopatu olim ornata fuit, qui tamen Tolera- no subiectus erat, vt ostendunt Annales Regis Alphonfi Prudentis. nunc, quæ rerum sunt vicissitu- dines, Episcopo caret.

CAP. LXV.

Murgim non esse Murtiam ostenditur.

*Num Oreola vocata. Fabula de eius origine
explosa. Menlaria Ptolemæi est Murtia.*

Regi Alphonso X. fidiſſima.

Obscurum olim opidum, nunc regni caput *Murtia*, & magni nominis: quam Clusius, alijque *Murgim* esse opinati sunt, quamque Pto- lemæus inter Turdulos in Bætica statuit, Plinius
verò

verò Baticæ finem esse dicit, ita vt vel hac sola
 ratione *Murtia* esse nequeat, vtpote quæ inter
 Carthaginem nouam & Valentiam, procul à Ba-
 ticæ limitibus sita. Rodericus Archiepisc. Toleta-
 nus lib. iij. cap. xxij. qua tempestate Mauri vni-
 uersam Hispaniam deuastabant, dictam fuisse
Oreolam, postmodum verò *Murtiam* affirmat;
 quod vnde hauserit, me quidem fugit. Scio Pro-
 tolemæum *Orceus* in Bastetanis meminisse, quam
 hodie *Horiguela* vocât, non procul à *Murtia*: An-
 tonius verò Beuterus, ceterique fabularum pa-
 troni, à *Morgetibus* populis deriuant, quos aunt
 cum Atlantis filio Morgeto in Italiam primò
 traiecisse, dein reduces *Murtiam*, aliasque eius no-
 minis vrbes condidisse. Ego verò Ioan. Marietæ
 Dominicani, & Iosephi Moletij potiore opin-
 ionem duco, qui *Menlariam* Ptolemæi hodie-
 nam esse *Murtiam* asserunt: siquidem inter medi-
 terraneas Contestanorum vrbes recensetur, non
 procul à Valentia, quo in loco *Murtiæ* *Valētiæ*q.
 regna sunt; & si Abrahami Ortelij Hispaniæ ve-
 teris descriptioni fides aliqua danda, nemini erit
 dubium eodem prorsus loco *Murtiam* nostram,
 quo *Menlaria* olim, sitam esse.

Alphonſus X. cognomento *Sapiens* hanc è Pœ-
 norum manibus eripuit; qua de causa illi ob-
 noxia admodum & fidelissima, vel in maximo
 illo

illo Hispania æstu, quo vrbes omnes, Hispali vnâ cum hac exceptâ, ad Sanctium Filium descinerât; qua de causa illam septem coronarum insignibus, in fidei memoriam honestauit. Sita est in planicie, amœnissîma regione, quam *Staberum* amnis interfluit (alij *Setabim* vocant) & deriuatis hinc inde riuulis, agros irriguos facit: malis citreis confiti campi: sed bombycum præcipuus prouentus, & sericæ vestis copia.

CAP. LXVI.

Appiani error de Carthaginis nouæ auctore.

Opinio Silij Italici reiecta. A Carthaginensibus condita. Cur Spartaria dicta. Urbis situs.

Argenti fodinæ celebres.

INter principes olim Hispaniæ vrbes, *Carthago* noua locum tenuit, quæ & prouinciæ vni nomen dedit. nunc tenue tantùm clarissimæ vrbis vestigium superest; proinde conabor illam excinere & ruinis excitare. Appianus Alex. in Ibericis putat ab Hānibale, ex Saguntinæ vrbis reliquijs exstructam esse. Sed mirum non est, Græcū in Hispanicis lapsum esse, cum & Romanis, quibus notior erat Hispania, non semel id acciderit. Silius Italicus ad Teucrum eius originem refert:

Dat Carthago viros Teucro fundata vetusto.

Sed

Sed cum historica veritate pugnat. Nam vetus Carthago, à qua noua nomen sumsit, teste Velleio Paterculo, annis tantum LXV. prius quam Roma conderetur, ab Elyssa Tyria, quam & Didonem nominant, condita est: ita vt à capta Troia anno CCC. LXI. exstructa fuerit. Nulla ergo erat Carthago, cum Teucer Hispaniæ litoribus appulit. Iustinus certè non dicit Teucrū condidisse Carthaginem, sed Hispaniæ litoribus, vbi nunc *Carthago noua* est, appulisse, indeque in Gallæciam transiisse. Polybius, Strabo, & Pomp. Mela ab Hasdrubale Hamilcaris genero, cui Hannibal in imperio successit, exstructam dicunt. Isidorus lib. xv. Orig. cap. i. ab Hannibale conditam auctor est. Plinius verò Pœnorum opus esse, vt & Tarraconem Scipionū: à Polybio lib. ij. κατὰ πολίς .i. *Noua vrbs*, similiter & à Stephano Byzantino, non secus ac Libyca Carthago vocatur; ab alijs verò καρχηδὼν νέα; ab Antonino Augusto, & Ap-
 piano, & Plinio lib. xxxi. *Spartaria* nominatur, ob insignem, quem habet, sparti copiam, inter Contestanos à Ptolemæo recensetur. Iuridicum olim conuentum habebat, quo LXII. populi iura petebant, exceptis Insularum incolis, auctore Plinio. nam teste Strabone lib. iij. cum murorum munitione, structura, & pulcritudine, tum portus commoditate, & lacus amœnitate ornatissima: huius
 vrbis

urbis situm cùm T. Liuius lib. xxvi. graphicè admodùm describat, non pigebit hîc adducere, vt hanc purpuram lacinia meâ adnectâ: *Sita*, inquit, *Carthago sic est. Sinus est maris media ferme Hispania ora, maximè Africo vento oppositus, & quingentos passus introrsus retractus, paululo plus passuum in latitudinem patens. huius in ostio sinus, parua insula obiecta ab alto, portum ab omnibus ventis, præterquàm Africo tutum facit, ab intimo sinu peninsula excurrit: tumulus is ipse in quo condita vrbs est, ab ortu solis, & meridie, cinctus mari; ab occasu claudit stagnum, paulum etiam ad septentrionem fusum, incertæ altitudinis vtrumq. exæstuat aut deficit mare. continenti urbem iugum ducentos ferè & quinquaginta passus patens coniungit. Polybius lib. x. tumulum illum, in quo vrbs condita est, Cherro-nesicum vocat, totamq. ciuitatem in quinq. tumulos ait diuisam: è quibus maximus ab oriente adiacet prominens in mare, in quo structum est templum Asclepij. E regione huius ab occidente alius est situ similis, cui imposita est regia, magno sumtu ab Hasdrubale exstructa. Ceteri tres minores colles septentrionale latus claudunt, quorum qui magis orienti obuersus est Ἡφαίστος, seu *Vulcani* dicitur: huic vicinus *Aleti*, qui argenti fodinas detexisse videtur, quare diuinos honores illi decreuere: vltimus verò Σάτων, seu *Saturni* vocatur. T. verò Liuius lib. xxvi. refert extra urbem fuisse*

tumu-

tumulum quemdam, quem *Mercurium Theutatem* vocabant. Vbi forsan ad imitationem magnæ Carthaginis humanis hostijs litabant, non secus ac illi Saturno. vnde Lucanus:

*Et quibus immitis placatur sanguine diro
Theutates, horrensque feris altaribus Esus.*

Sed quàm graphicè vrbis situm exprimat Si-
lius Italicus lib. xv. nunc videamus:

*Carthago impenso naturæ adiuta fauore
Excelsos tollit pelago circumflua muros,
Arctatas ponti fauces modica insula claudit,
Quà Titan ortu terras aspergit Eoo.
Et quà prospectat Phæbi iuga sera cadentis,
Pigram in planitiem stagnantes egerit undas,
Quas auget veniens, refluxusq; reciprocatur astus.
Sed gelidas à fronte sedet sublimis ad Arctos
Vrbs imposta iugo, pronumq; excurrit in aquor,
Et tuta aeterno defendit mania fluctu.*

Portus vrbis quantævis classis capax; nec totâ
quidem Hispania tutiorem inuenias, & ex Liuij
descriptione eundem patet esse, quem Virgilius
Maro I. *Æneidos* expressit:

*Est in secessu longo locus, insula portum
Efficit obiectu laterum: quibus omnis ab alto
Frangitur, inque sinus scindit sese vnda reductos.
Hinc atque hinc vastæ rupes, geminiq; minantur
In cælum scopuli.*

Hanc

Hanc urbem cum Carthaginenses in belli sedem & armamentarium elegissent, atque huc universæ Hispaniæ obsides, pecunias, & quidquid ad usus bellicos necessarium erat contulissent, vno die à P. Scipione per vim capta fuit, ut latius apud Polybium & Liuium legas licet.

Circa hanc urbem plurimas argenti fodinas fuisse refert Strabo, quibus erant occupatæ quatuor hominum myriades, qui P.R. indies XXV. drachmarum millia referebant, seu secundum Budæum lib. IV. De asse 2500. coronatos. Sed per barbarorum in Hispaniam inundationes, à Vandalis primò, mox verò à Gothis, solo æquata fuit, non totis sexcentis annis decursis, postquam exstructa fuit, atque inter miserandas ruinas, multis sæculis sepulta iacuit. Donec eam Philippus II. Hispaniarum Rex potentissimus, parentum memoria, instaurandam curauit, ne Turcæ & Africanæ piratæ portus præstantia allekti, eundem occuparent. Quod à Vespasiano Gonzaga summa diligentia & industria curatum fuit, ita ut nunc egregiè munita sit.

Episcopalis vrbs in hodiernum diem usque, primum autem Episcopum habuit Sanctum *Esficium* martyrem: habuit & Episcopos *D. Eugenium*, & *Fulgentium*, qui DD. Leandri & Isidori, frater fuit. Etsi verò hæc vrbs totius Carthaginensis pro-

prouinciæ caput erat, cui etiam Toletum parebat, ipse tamē Episcopus Toletano subditus fuit: quæ res non paucos induxit, vt crederent Toletanum Archiepiscopatum primò Carthagine fuisse, pòst verò Toletum translata esse sedem. Inter quos Ioannes Vafæus; sed errare eos crediderim, cū nusquam apud probatæ fidei Scriptorē hoc reperias. Illud tantū, iuridicum conuentum, pòst euersam Carthaginem, Toletum migrasse. qua de re plura apud Ambr. Moralem lib. xi. Annalium Hispaniæ cap. xix. videbit curiosus Lector.

Hac in vrbe laudatissimum olim garum parari solitum fuisse, refert Plinius lib. xxxi. cap. viij. *Nunc, inquit, laudatissimum ex scombro pisce in Carthaginis Spartariæ cetarijs: sociorum id appellatur, singulis millibus nummūm permutantibus congios pœne binos.* Auctor est & Strabo circa Carthaginem nouam arborem esse, quæ de spina corticem emittat, ex quo telæ pulcerrimæ conficiantur.



CAP. LXVII.

*Danium & Hemeroscopium dictum.
Dianæ fano nobile. A Phocensibus ex-
structum. Promontorium Ferrariæ,
quod & Tenebrium.*

OPidum est *Denia*, priscis temporibus Dianæ fano celeberrimum, à quo *Danium* vocatum. Plinius stipendiarium esse dicit, & conuentus Carthaginensis, Ptolemæus inter Edetanos recenset. ad Balearicum mare situm, inter Carthaginem nouam, & Sucronem amnem. Strabo lib. ij. ἡμεροσκοπεῖον .i. *diurnam speculam* dicit vocari, in extremitate habebat Dianæ Ephesiæ templum, frequenti religione cultum, vnde & *Artemisium* dictum; & adhuc, teste Antonio Beutero, promontorium vrbs huius, tribus leucis distans, *Artemus* vulgò dicitur. Stephanus Byzant. ex Artemidori sententia Phocensium Coloniam esse dictitat; Strabo verò à Massiliensibus conditam, qua in re exigua est diuersitas. Nam & Massilienses à Phocensibus originem duxere, vt Phocenses primò Massiliam appulerint, deinde verò aggrauante multitudine, in Hispaniam colonias deduxerint

xerint (quæ tamē ad Phocenses etiam referri possunt) vt Emporias, Hemeroscopium: vbique tamen auitæ religionis memores, Dianæ Ephesinæ templa erexere.

Opidum est ad rem maritimam peropportuum. Cum enim in colle exstructum sit, speculam etiam habet mari imminentem; quæ longinquum nauigantibus prospectum præbet, qua de causa Q. Sertorius hoc opido ad res maritimas, vt receptaculo vsus est, teste Strabone, qui locus & ante pauca lustra, vulgò *Attalaia de Sertorio* dicebatur. Huc illa Ciceronis pertinent V. Verrinarum: *Quicumque accesserant ad Siciliam paulo pleniores, eos Sertorianos milites esse, atque à Dianio fugere dicebat.* Festus verò Auienus suo æuo dirutam urbem dicit:

— *Hemeroscopium quoque*

*Habitata pridem hinc ciuitas, nunc iam solum
Vacuum incolarum languido stagno madet.*

Promontorium hoc à Pomponio Mela *Ferrariam* vocari putat Ioachimus Vadianus in Melam, & Florianus Occampo: cui suffragatur ipse Strabo, qui *Dianium* in propinquo habere ferrarias effossiones admodum feraces scribit. Vnde verisimile est promontorio nomen inditum. Abrahamus verò Ortelius in veteris sua Hispaniæ descriptione idem promontorium, à Cl. Ptolemæo

Tenebrium vocari auctor est: miror ego quid Strabonem mouerit, quòd paulo inferiùs scribat Sertorium, postquam ex Celtiberis eiectus esset, aduersa valetudine diem suum clausisse *Hemeroscopi*, cùm apud ceteros assiduos Auctores constet, à Perpenna esse interemtum, idque Oscæ, teste Velleio Paterculo. Episcopalis olim vrbs fuit, sed dignitate illa per Maurorum tempora spoliata fuit, nunc Marchionem habet.

CAP. LXVIII.

Setabis Augusta Valeria dicta. Tenuissimum hic linum. Silius Italicus obiter correctus.

Setabis, quam nunc *Xatua* vocant, vrbs est Regni Valentiaë, non procul ab ipsa Valētia: inter Contestanos refert Ptolemæus, qui etiam fluminis eiusdem nominis meminit. conuentus Carthaginensis est Plinio. Hanc Franciscus Tarapha ab Augusto Cæsare cognominatam *Augustam Valeriam* tradit, quod ex Plinio colligere est, licet ob distinctionem importunè interiectam aliter videatur. Habet enim sic Pliniana dictio: *Setabitani qui Augustani, Valerenses*, cùm citra interpunctionem legendum esset.

Sita est editiori in colle, & flumine Sucrone al-
luitur: fontibus saluberrimis, arborum fructibus, &
præcipuè malis punicis abundat: laudatissimi re-
nuissimique lini prouentu celebris, adeò ut Plî-
nius lib. xix. cap. i. primam illi palmam deferre
videatur his verbis: *Similiter & in Italia, ratione alia
inter Padum Ticinumque amnes, ubi à Setabi, tertia in
Europa lino palma: secundam enim in vicino capeffunt
Retouina, & in Æmia via, Fauentina.* Silius etiam
Italicus lib. iij. egregiam eius mentionem facit:

*Sedentana cohors, quam Sucro rigentibus vndis,
Atque altrix celsa mittebat Setabis arce,
Setabis, & telas Arabum spreuisse superbas
Et Peleusiaco filum componere lino.*

Quo in loco obiter mihi notandum videtur,
non esse legendum cum vulgo *Sedentana cohors*,
sed *Sedetana*: siquidem *Sedetani* (qui Ptolemæo
Hedetani) Tarraconensis erant prouinciæ; *Sedentani*
verò nuspiam leguntur. Hoc in populo Silius Se-
tabim statuit, licet Ptolemæus inter Contestanos,
illi vicinos locet. eadem etiam ratione, Catullus
commendat sudaria Setaba hendecasyllabo illo in
Asinium:

*Nam sudaria Setaba ex Iberis
Miserunt mihi muneri Fabullus
Et Veranius.*

Horum etiam Strabo meminisse videtur, licet mendose apud eum legatur (ut primus monuit Doctissimus Casaubonus) Σαλιῖται : *Telarum*, inquit, *summa tenuitas atque copia*, quas *Setabitæ* conficiunt : nusquam enim gentium *Saltiatæ* sunt. Hinc & Poëta Gratius in *Cynegetico* suo circa initium,

Hispaniâ, alio spectantur Setabes rſu.

Nimis enim tenuia lina sunt, quam ut retibus conuenire possint.

C A P. L X I X.

Valentia à D. Iunio Bruto condita. Cur Veterani & Veteres dicti. Colonia Iulia appellata.

Hispaniæ citerioris nobilissima, & amœnissima vrbs est *Valentia*, à mari, teste Plinio III. tantum M. P. distans, quam inter Contestanos populos Ptolemæus; Plinius verò inter Edetanos recenset. hanc ab Hispaniæ Rege Romo, non solum secundum Annium Viterbiensem in Manethoné, sed & præcipuos Hispaniæ Scriptores, conditam esse ferunt: dictamque ab illius nomine *Romam*, idque CCC. pœnè annis ante orbis caput Romam: postea verò nomen in *Valentiam* mutatum.

tum. Sed miror ego ineptum illum Annium cum
 spurio suo Manethone & Beroso, multorum ani-
 mis ita se insinuasse, vt quidquid ille effutiat, tam-
 quam ex tripode dictum putent. Manifestū enim
 ex Liuij epitome lib. LV. Iunium Brutum circa
 annum V. C. DC. xvi. militibus, qui sub Viriato
 militauerant, opidum dedisse, quod *Valentia* nun-
 cupatum est. Hieronymus verò Surita in Antoni-
 ni Imp. Itinerarium credit, non hanc *Edetanorum*
Valentiam, sed illam, quæ in Lusitania prope Ta-
 gum, Viriati militibus à D. Iunio Bruto datam.
 sed cum apud classicos Scriptores huius *Valentiæ*
 ad Tagum, nusquam mentio fiat, nulla ratio euin-
 cet, hanc à Viriati militibus habitatā. nullius etiam
 momenti est, quòd vrgent *Valentiam Edetanorum*,
 nimis à Lusitania distare (vbi bellū cum Viriato
 gestum) quàm vt eò Colonia mitteretur. non
 enim in sola Lusitania, sed & Carpetania, & Cel-
 tiberia, bellum circumtulit Viriatus, & vt refert
 Appianus in Ibericis, etiam post mortem Viriati,
 milites eius duce Tantalo, à Sagunto auspicijs Q.
 Seruiliij Cæpionis repulsi sunt : & exiguo inter-
 cedente tempore, deditiōem fecere, agrique illis
 assignati & sedes, quibus habitarent : quæ certè
 omnia *Valentiæ* nostræ fauent & Liuianę Epitome
 consonāt. Opinioni meæ subscribit Andreas Re-
 sendius, in D. Vincentio heroico sanè poëmāte :

— *haud ita multis*

*Millibus à pelago seiuncta Valentia surgit,
Bruti opus, Hesperiam Viriati cæde madentem
Ille petens, acies palantes vrbis honore
Donavit, positisque diu victricibus armis,
Ex auctorato complevit milite.*

Qua de causa forsan in antiquis inscriptionibus incolæ *Veterani* & *Veteres* nuncupantur, ut indicium facit illa, quæ Valentia spectatur:

C. VALENTI. HOSTILIANO.

MESSIO. QVINCTIO.

NOBILISSIMO. CÆS.

PRINCIPI. IVVENTVTIS.

VALENTINI.

VETERA. ET VETERES.

Eandem verò Coloniam fuisse testatur Plinius. antiquus verò nummus à Goltzio productus, referente Ortelio, *Coloniam Iuliam Valentiam* vocat. Sed quo tempore Colonia effecta fuerit, in tanta antiquitatis caligine latere quis miretur?

Sita autem est ad amnem Turiam, licet Pomp. Mela lib. ij. *Duriam* vocet, tamen, monente doctissimo Hermolao Barbaro, *Turia* legendum; quam-

quamvis Gerundensis Episcopus dicat *Pallentiam* vocari flumen, quod per *Valentiam* decurrit, *Turiam* verò Saguntum præterfluere: sed crassior est error, quàm vt refelli postulet. Vrbs hæc cæli, solique miti temperie nulli cedit, nec felici, ac superbæ Campaniæ inferior. Toto hîc anno floribus abundant prata, horti que, vernante semper aura. Hiemis hîc rigor exulat: equitum splendore nobilis, mercimonijs opulenta, opificum numerosa turba instructa egregiè: lanificium hîc diligentissimè excolitur, vt panni Valentini & ipsa lana inter ceteras Hispaniæ palmam ferant. Incolæ elegantis, & festiui sunt ingenij, nec à Musis alieni. Auctor est Beuterus urbem à Cn. Scipione maximis cloacis donatam, & publicis priuatîsq. ædificijs excultâ; sed more suo, citra testes. Bello Sertoriano à Cn. Pompeio deletam fuisse, auctor est Sallustius lib. iv. Historiarum in Epistola eiusdem Pompeij ad Senatû his verbis: *Castra hostium apud Sucronem capta, prælium apud flumen Turiam, & dux hostium C. Herennius, cum vrbe Valentia & exercitu deleti, satis clara vobis sunt.* quam tamen postea à Sertorio restitutam dicunt. E Maurorum verò seruitute eam Rodericus Biuar, cognomine *Cid*, anno Cl. xxv. asseruit, rei bellicæ vir peritissimus qui cum maximis numerosissimîsq. hostibus collatis signis, frequenter dimicauit, victor tamen

semper euasit, in cuius memoriam *Valentia del Cid* vulgò dicitur: sed illo vita functo, iterum à Pœnis occupata fuit, donec anno M. CC. xxxviii. Iacobus I. Aragonum Rex eam iterum Christianis restituerit.

Hac in vrbe *D. Vincentius* Diaconus sub Diocletiano martyrio affectus est. Duos Pontifices Max. Ecclesiæ dedit, Callistum III. & Alexandrū VI. vtrumq. ex stirpe Borgia. Archiepiscopatum habet celebrem & opimum. Sed non vltimo loco duxerim ciuem habuisse *Ludonicum Viuem*, virum doctissimum, quem ingenij sui fetus posteritati faciunt interesse.

CAP. LXX.

*Saguntus olim, vbi nunc Moruiedro. à Zacynthijs, & Ardeatibus condita. Dianæ hic templum vetustissimum.
Theatri reliquæ.*

Reliquias esse Saguntinæ cladis *Moruiedro*, nemo Hispanicarum rerum gnarus ignorat, quasi *muri veteres* dicta. non procul enim à *Valentia Ederanorum*, vt & olim *Saguntus*, distat, à mari aliquantulum magis. Olim enim tantum
mille

mille passibus, nunc verò II. M. P. mare remotum habet: siue quòd olim tanta vrbs magnitudo fuerit, & eò vsque protensa excurrerit, siue quòd pelagus arenarum adgestione in tantum recesserit, ne tantæ vrbs calamitates ex propinquo adspiceret. De origine eius & primo cōditore multa effutiunt Hispani, Franciscus Tarapha à Saga filio Chus, nepote Cham, qui cum Tubale in Hispaniam venit, nomen habuisse asserit. Alij à Sagis Ibericis conditam esse fabulantur. T. Liuius lib. xxi. à Zacyntho insula oriundos dicit, quibus etiam misti ab Ardea, Rutulorum generis. Recentiores Hispaniæ Scriptores ad Herculis comitem Zacynthum originem referunt, auctore Silio Italico lib. I.

*Haud procul, Herculei tollunt se litore muri,
Clementer crescentie iugo, queis nobile nomen
Conditus excelso sacrauit colle Zacynthus.
Hic comes Alcida remeabat in agmine Thebas
Geryone extincto.*

Idem tamen Poëta mox subnectit & à Zacynthijs & Ardeatibus auctam urbem, cuius non pigebit versus producere:

*Mox profugi, ducente noto, aduertère coloni,
Insula quos genuit Graio circumflua ponto,
Atque auxit quondam Laërtia regna Zacynthus,
Firmauit tenues ortus mox Daunia pubes*

Sedis

*Sedis inops, misit largo quem dives alumno
Magnanimis regnata viris, nunc Ardea nomen.*

Vrbs olim opulentissima, maritimis & terrestribus fructibus felix, sanctitate disciplinæ, & sociali fide imprimis illustris, quam usque in perniciem suam pertinacissimè coluit. Potius enim quàm à Romanis ad victorem Hannibalem desciscerent, communi rogo sese ciues superiecere, cuius excidio secundum bellum Punicum excitatum, & innumeris cædibus illi parentatum est. Octauo demum anno quàm à Pœnis capta est, à Cn. Scipione, depulso Punico præsidio recepta, & antiquis cultoribus, quos belli vis reliquerat, est restituta, teste Liuiο lib. xxiv. vnde manifestò Appianum Alexandr. in Ibericis lapsum videre est, qui Spartariam Carthaginem ex Saguntinis ruinis excitatam crediderit. Templum hîc erat Dianæ sacrum, magna religione, quod & ad Plinij ætatem perdurauit, eodem teste lib. xvi. cap. xl. his verbis: *In Hispania, Sagunti aiunt templum Dianæ à Zacyntho aduectæ, cum conditoribus, annis ducentis ante Troiæ excidium, ut auctor est Boechus, infraq. opidum id haberi, cui pepercit religione indutus Hannibal, iuniperi trabibus etiam nunc duratibus.* Hoc verò æuo ruinæ eius indicio sunt, qualis olim vrbs fuerit; inter quas Amphitheatri vestigia spectantur. Huius hemicycli ambitus est pedum

dum Rom. CCC. LIV. latitudo parietis obuersi
pedum cc. vomitoriorum crassitudo pedum xij.
cum dimidio in L. gradus etiam consurgebat.
Laudatissimos olim calices parabat *Saguntus*, teste
Plinio lib. xxxv. cap. xij. vnde & Martialis lib. xiv.

Quæ non sollicitus teneat, seruetque minister

Sume Saguntino pocula ficta luto.

Exstat etiam hac in vrbe vetusta admodum
Claudio Cæsari, Galieni successori dicata in-
scriptio:

SENATVS. POPVLVSQVE.

SAGVNTINORVM.

CLAUDIO.

INVICTO. PIO. FEL. IMP.

CÆS. PONT. MAX.

TRIB. POT. P.P.

PROCOS.

CAP. LX XI.

*Mantua Carpetanorum Madritium est
Escuriacum moles regia.*

INter Carpetanos, non procul à Toletò, Ptole-
mæus *Mantuam* urbem collocat. *Viseriam* etiam
dictam referunt Moletius & Tarapha; sed ab illis

tantum. hodie *Madritium* esse in confesso est, licet nonnulli non hoc loco, sed vbi vicus est *Villamanta* dictus, olim *Mantuam* fuisse dicant. *Mantue* conditorem dicit Tarapha, Ocnum Tiberini Latinorum Regis filium, qui à nomine matris *Mantus*, Tirefiæ vatis filix, aliamque in Italia urbem appellauit, sed huic Palaphato, quis aurem præbeat?

Hodie opidum est ex totius Toletanæ diocesis felicissimum: situm est editiori in cliuo, & septentrioni maiori ex parte expositum, cuius radices alluit modicus amnis, vulgò *Guadarrama* dictus, qui saxeo ponte transitur: non procul à Madritio oritur, & Tago se admiscet. Situs amœnitate, aëris insigni salubritate, & soli egregia fecunditate, inter primas totius Hispaniæ vrbes, non iniuriâ potest adnumerari. Aiunt Imp. Carolum V. diuturna quartana affectum, sola aëris huius clementia, breui molestissimo morbo liberatum. Saltus habet vmbrosos, & frequentes, filuas Regum venationibus dedicatas. In Madritij etymo multa & insulsa vulgò feruntur, quæ cum inepta sunt, silentio premam. Ioannes de Meña Cordubensis, Poëta vernaculus, sed non insulsi ingenij, *Madritium* igne cinctum suis rythmis prædicat, quia tam murorum fundamenta, quàm priuatorum ædes pleræque pyrite lapide constant, cuius
copio-

copiosus toto territorio prouentus est. Frequens. hîc recessus & habitatio Regû, præsertim Philippi II. qui varijs illud operibus exornauit, vt nunc in splendidissimum opidum euaserit: siquidem toto regno huc excita nobilitas, sumtuosa sibi ædificia exstruxit. Nefas duxerim, si Madritio relicto, de vicino illi sexto indelapide *Eſcuriaco*, Hieronymianorum monasterio ad S. Laurentium tacerem. Visitur ibi mirandi operis egregia mœles, & plane Regia, quam maximus HISPANIAE Regum Philippus II. regio sumtu dedicauit. Celeberrimo enim illo prælio ad opidū S. Quintini Veromanduorum caput, D. Laurentio ædem vouit, cuius die anniuersario & tutelari patrono, florem Gallicæ nobilitatis fudit, & firmissimam urbem expugnauit, anno Christi Seruatoris M. D. LVII. Iactitet Roma licèt Amphitheatra sua, Pantheon, Capitolium, palatia, & vanis numinibus sacrata templa: dum sese Hispania hac môle cetera orbis miracula non iniuriâ superare contendat. nam præter templum, & monasterium rarissimæ structuræ, Bibliothecam habet omnis generis librorum, & præcipuè manuscriptorum copia instructissimam: vt vnicâ Vaticanâ exceptâ, inter ceteras palmam ferat; qua in re cum Ptolemæo Philadelpho certare videtur. De regio vero palatio, quid attinet dicere, nisi quòd

Ars ibi materia vincitur ipsa sua.

An architecturam requires? ne Vitruuius quidem aliam. an marmora & nobiles lapides? nusquam rariores. Nam hortorum nitore, fontium amœnitate, siluularū vmbraculis nec ipsa Antiochiæ Daphne huic se comparauerit. magnitudo eius tanta, vt vel in quatuor Regum vsus commodè sufficiat. qui singula huius molis scire desiderat, Abrah. Ortelij parergon editionis vltimæ adeat.

CAP. LXXII.

Complutum hodie Alcala de Henares.

*Olim & Alcala S. Iusti. Academia
hic illustris.*

Vicinum Toletum etiam inter Carpetanos est *Complutum*, Cæsaraugustani olim conuentus teste Plinio, hoc æuo *Alcala de Henares*, ab amne *Henares*, qui vrbis muros præterfluit. Elapsis sæculis trans flumen sita erat, teste Barrerio, vbi adhuc priscae vrbis vestigia. Tempore Regis Alphonsi Sapientis vocabatur *Alcala S. Iusti*, quia is Sanctus vnà cum fratre suo S. Pastore, sub Daciano Præfide extra vrbis pomœrium martyrio affecti sunt: quorum his versibus memoriam celebrat Poëta Prudentius:

San-

Sanguinem Iusti, cui Pastor hæret

Ferculum duplex, geminumque donum

Ferre Complutum gremio iuuabit

Membra duorum.

Vrbs est in planicie sita, figura ouali, concinnis ædificijs, agro feracissimo : vnde nescio quis sciolus *Complutum*, tamquam *complementum* dictum somniat, sed

Res est ridicula & nimis iocosa.

Plateam habet insignem, in longitudinem porrectam, porticibus vtrimque ornatam, sub quibus frequentes, ditæque mercatorum tabernæ sunt. Sed præcipuè se iactat insigni Academia, quæ meritò Hispaniarum Athenæ dici posset, ex qua tamquam ex Durateo illo equo, præclarissima ingeniorum lumina prodierunt, quæ doctrina sua totam Hispaniam, depulsa barbarie illustrarunt: debet hoc insigni heroi Francisco Ximenio Cisnerio, Præsuli Toletano, & S. R. E. Cardinali, instituti S. Francisci, qui Liceum hoc excitauit, & magnis præmijs viros doctos vndique euocauit: atque ibidem multa collegia (vnum verò augustissimum) & cœnobîa & templa excitauit. sacra Biblia hîc Hebraicè, Chaldaicè, Græcè, Latinè, accuratissimè & proprio ære excudenda curauit; qui præter doctrinam, vitæque sanctimoniam, consilio prudentiaque incomparabili fuit: vt non

immeritò à Ferdinando rege, Hispaniæ gubernandæ præfectus sit, dum nepos eius Carolus V. adolesceret: quæ de causâ inter præcipua HISPANIÆ lumina meritò adnumerandus. Cuius tumulo Compluti hi versus inscripti leguntur:

Condideram Musis Franciscus grande Liceum:

Condor in exiguo nunc ego sarcophago.

Prætextam iunxi sacco, galeamque galero,

Frater, Dux, Præsul, Cardineusque pater.

Quin virtute mea iunctum est diadema cucullo:

Quum mihi regnanti paruit Hesperia.

Vrbs hæc Archiepiscoporum Toleti est: tempore enim Alphonsi VI. Castellæ Regis, & Legionis, post ereptum Pænis Toletum, Bernardo cuidam inculpata vitæ, Archiepiscopatus à Rege delatus fuit, qui postmodum coacto milite *Complutum* diuturna obsidione fatigatum, ad deditiorem compulit, vnde in hoc ævum Toletanæ est diœceseos. olim tamen florenti Gothorum imperio, Episcopalis sedes fuit, vt ex Toletanis Concilijs docet Vassæus. Ciuem habuit inter ceteros *Christophorum à Vega* medicum præstantissimum, vt eius testantur opera.

CAP. LXXIII.

*Carraca eadem cum Antonini Arriacā
Guadalaiaara hodie. Tagonius amnis,
Sertorij stratagema.*

NON procul Compluto vrbs est *Guadalaiaara* vulgò dicta, Punico sermone flumen lapidum signare, plerisque Hispaniæ Scriptoribus persuasum, vt Lucio Marineo Siculo, & Mario Aretio. Sed fœdè illos hallucinari ostendit Gaspar Barrerius, qui vnà cum Ambr. Morales Ptolemæi *Carracam*, & Antonini Imp. in Itinerario *Arriacam* esse asserunt (licet Iofias Smilerus *Arriacam* legendum suspicetur) vnde Pœni primò *Guadariaca* deflexere, posterior verò ætas, magis corruptè, *Guadalaiaara*, quasi flumen *Arriacæ* dixerunt. moris enim illis dictionem *Guada* frequenter præponere, vt *Guadalupe*, *Guadiana*, alijsque sexcentis. *Arriacam* verò, vel *Carracam* esse, suadet passuum numerus, quo Antoninus Compluto *Arriacam* XXII. M. P. distare dicit, qui V. cum dimidia leucas conficiunt, licèt Compluto nunc *Guadalaiaara* tantùm IV. sed maximas incolæ numerant : rarò enim exæquantur milliaria cum

leucarum numero. Sed scrupulum omnem adi-
mit, æquari distantiam, quam Arriaca vsque Cef-
satam Antoninus numerat, cum ea quam *Guada-*
lajara Hitam vsque (ea enim *Cessata* est) XXIV.
M. P. sex leucis respondent.

Sita est modicè accliui in tumulo ad ripas *He-*
nates amnis, quem Ambr. Morales à Plutarcho
Tagonium olim dictum putat. modica, sed non
spernenda vrbs, sedes olim præcipua Mendozæ
familiaë, & Ducum *de Infantado*, quorum splendi-
dis ædibus & amœnissimis hortis egregiè ornata.
Præcipuè verò nobili Q. Sertorij stratagemate
celebris. refert enim Plutarchus in eius vita, pul-
sum à Metello Sertorium, non procul à Characi-
tanis (ita enim vocat) ad amnem Tagonium ca-
stra habuisse, qui vt sæculi illa barbaries erat, non
opida colere, nec per vicos habitare, sed antra &
speluncas adiacentis montis incolere norant, &
naturæ hoc munimine freti, Sertorium vt victum
despicere: ille ægrè contumeliam ferre, excidium
ipsis minitari; sed frustra: obseruat interim spelun-
cas omnes in Boream obuersas patere, vicinumq.
latè solum puluereum esse, ilicò iubet milites ad-
iacentem terram suffodere, quasi aggerem admo-
turus. Barbari conatus eius risere: sequenti die
spirante valido Aquilone, iubet milites aggerem
quaterè, equitesque magis tellurem concutere,
quò

quò ventus excitati pulueris nubes in ipsorum ora oculosque volueret, quibus cum nullum effugium pateret, repletis faucibus, spiritusque meatibus præclusis, tertia se illi die tradidere: magna Sertorij fama & gloria, quod non tam hostium, quàm naturæ victor esset.

CAP. LXXIV.

Seguntia hodie Siguenza. Variè olim vocata. Reijciuntur qui à Sagunto ortam dicunt.

S*eguntia* olim Celtiberorum vrbs non obscura, nunc leuiter deflexo nomine, *Siguenza* vocatur, Plinio *Saguntia*, Ptolemæo *Segobriga*, Antonino in Itinerario *Segoncia*, T. verò Liuius *Seguntia* dicta est. Est & altera *Segoncia* versus fretum Herculeum, à Plinio nominata. Cuius vestigia hodie circa Guadelete fluminis ripam conspici, & *Gisgonca* locum vocari, auctor est Ambrosius Morales. Antoninus etiam præter has inter Nertobricam & Cæsaream Augustam, *Secontiam* urbem recenset, quam Gaspar Barrerius *Muellam* dictam scribit, non dubijs coniecturis fretus: lubuit has ita strictim vrbes recensere, ne nominis affinitas

Lectori erroris ansam præbeat. Statuit autem Antoninus *Segontiam*, inter Complutum & Bilbilim, & à Cessata M. P. XXIV. distare ait, qui sunt septem leucæ ab Hita (quæ Cessata est) *Siguenza* usque. licet hic parum exactè M. P. leucis respondeant, sed hoc mirari subiit, nonnullos, nullâ mensuræ habitâ ratione, in mera meridie ita cæcutiisse, ut crediderint hanc urbem, *Saguntum* olim fuisse, nobilem illam memoria seruata in Romanos fidei. Sed magno à se mutuo interuallo distare quis ignorat? Ad Iberum enim *Saguntus* est, ut apud Liuium ceterosque. Geographos videre est, à quo *Seguntia* plusquam XXX. leucarum interuallo distita est; alij verò à Saguntinis reliquijs conditam ferunt, inter quos est Ioannes Gillius Zamorrensis, sed citra probati alicuius Scriptoris suffragium. Nam & T. Liuius in bello Macedonico *Seguntia* memin- nit, quod extincto secundo bello Punico statim enatum est: dubio procul originis *Seguntia* meminisset, cum recens apud omnes miserandæ illius cladis memoria vigeret. Ambr. Morales auctor est veterem *Seguntiam* non eò loci fuisse, ubi nunc *Siguenza*, sed media ab hinc leuca, loco vulgò dicto *villa veja*, ubi multa circumiacentia rudera urbem olim fuisse testantur.

Sita hæc vrbs est in cliuo, muris egregiè vallata, & adiuncta arce, collis pedem flumen *Henares* alluit:

alluit : Episcopali dignitate ornata est iam pridē,
vt frequētes in prouincialibus Hispaniæ Conci-
lijs subscriptiones *Seguntinensis Episcopi* testantur.
templum habet non vulgaris operis, binis turri-
bus conspicuum : multa hīc marmorea sepulcra
Præfulum, & illustrium virorum se offerunt spe-
ctantibus, inter cetera *S. Liberatæ* affabrè ornatum
visitur, quod ibi magna in religione habetur. Epi-
scopo in annuos vsus supra XX. aureorum millia
cedunt. Habet etiam *Seguntia* liberalioris discipli-
næ, & Theologiæ Collegium non spernendum.

CAP. LXXV.

*Bilbilim non esse Calatajud. Municipium
fuit. Cognominata Augusta. Salone am-
ne clara & ferri temperie. Plinius
emendatus.*

Ita est *Calatajud* in Celtiberis, quam plerique
Sæstiuissimi Poëtæ Martialis (quem Ælius Ve-
rus Imperator suum appellabat *Virgilium*) credi-
dere patriam, Bilbilim inquam; sed refellit rece-
ptam hanc opinionem diligētissimus Gaspar Bar-
rerius. potissima illi ratio à situ petita : *Calatajud*
enim in conualle; *Bilbilis* verò in monte posita

erat, vt non semel testatur. Martialis ita enim ad Licianum:

Videbis altam Liciane Bilbilim

Aquis, & armis nobilem.

Ita enim felicissimè emendauit primus Hieronymus Surita Cæsaraugustanus, homo doctissimus, cùm passim legeretur, *Equis & armis nobilem*. Bilbilitanos enim equos, magno in pretio fuisse non vidi qui scriberet: non enim est

Aptus equis Ithacæ locus,

dicebat ille, cùm in aspero monte sit: aquis verò nobilitatam esse Salonis amnis, quibus optimum hodieque armis ferrum temperetur, & incolæ testantur, & Trogus Pompeius, ac Plinius auctores. clariùs verò *Bilbilis* situm exprimit S. Paulinus ad Ausoniũ præceptorè hisce versibus:

*Montanamq. mihi Calagurim, & Bilbilim acutis
Pendentem scopulis, collemque iacentis Ilerdæ
Exprobras.*

Idem verò Martialis patriæ suæ situm alibi clariùs explicat:

Municipes Augusta mihi, quos Bilbilis acri

Monte creat, rapidis quos Salo cingit aquis

Ita enim legit ibidem doctissimus Surita, & Ant. Augustinus, cùm antea passim legeretur *Agri*, loco *Acri*, quæ verè agrestis, & insulsa erat lectio. cùm itaque *Bilbilim* editiori loco sitam fuisse

fuisse constet, non poterit esse *Calatajud*, quæ humiliori loco est. Adde *Bilbilim* vniuersam pœnè Salone cinctam fuisse, vt ex versu superiori constat, *Calatajud* verò Salone tantùm alluitur. mons etiam, vbi olim *Bilbilis* fuit, nunc corrupto nomine *Baubula* vocatur ab incolis, media leuca distans à *Calatajud*, vbi multa antiquarum ædium vestigiæ visuntur. Frequentia hîc etiam Romanorum numismata eruuntur, quæ, quia rudi plebi ignota, mille figmentorum occasionem præbent. Illud pro rato saltem habent, his in locis quondam inclytam, & populosam urbem fuisse. Minimè etiam prætereundum, *Bilbilim* olim municipium fuisse, & *Augustam* cognominatam: cuius rei licèt à Plinio non fiat mentio, innuere fatis clarè videtur Martialis supracitato versu:

*Municipes Augusta mihi quos Bibilis acris
Monte creat.*

Idem antiqua numismata ostendunt, quorum vnum adducit Ant. Augustinus cum hac inscriptione, in medio inscriptum habet: II. VIR. & circumcirca: M. AVGVSTÆ. BILBILIS. M. SEMP. TIB. L. LICI. VARO. Amne autem Salone olim inclyta, cuius mirifica vis in durando ferro est, vt diximus, & non semel innuit Martialis, præcipuè hoc versu lib. IV. Epig. V.

*Grato non pudeat referre versis
 Sæuo Bilbilin optimam metallo:
 Quæ vincit Chalybasque, Noricosque,
 Et ferro Plateam suo sonantem:
 Quam fluctu tenui, sed inquieto
 Armorum Salo temperator ambit.*

Locus hic me monet, Plinium à mendo aut à
 Scriptoris potius incuria vindicandum lib. xxxiv.
 cap. xiv. de ferro agentem: *Alicubi*, inquit, *vena*
bonitatem hanc præstat, ut in Noricis, alicubi factura, ut
Sulmone aqua: ut diximus: Sed quis quæso *Sulmo-*
nem aquam ferro bonitatem præstare scribit? non
 licuit vidisse hætenus. Et quod mirum, ipse *Sul-*
monensis Poëta nihil hac de re, solum ait:

Sulmo mihi patria est, gelidisque vberimus undis.

Quare secundo Delio legerem, *Salone aqua*. ipse
 hoc auctor ostendit, cum ait *Uti diximus*: nusquam
 enim toto hoc capite de *Sulmone* verbū, de *Salone*
 satis clarè: paulo enim superiùs dixerat: *Summa*
autem differentia est in aqua, cui subinde candens im-
mergitur, hæc alibi atque alibi utilior, nobilitavit loca
gloria ferri, sicuti Bilbilim in Hispania, & Turiaffo-
nem; Comum in Italia. Sed quæ aqua *Bilbilim* nobi-
 litat, præter *Salonem*? cur *Sulmonem*, si idem face-
 ret, præterijisset Plinius, in *Italia* alioquin laudes
 satis effusus? tanta autem temperaturæ illius erat
 gloria, ut teste Iustino ex Trogo Pompeio, inter
 Hispa.

Hispanos nulla arma in pretio fuerint, præter ea quæ Bilbilis aut Chalybis aquis erant temperata. Sed præter ferri gloriam, auro etiam gloriabatur olim, teste Martiale lib. xij. Epigr. xvij.

Auro Bilbilis, & superba ferro.

Sed fatis extra carceres euagatus sum; Manibus hoc optimi Poëtæ datum sit, ne patria eius hominum memoria exsularet. *Calatajud* verò ex Bilbilitanis ruinis accreuisse vicinitas loci facit ut credam. Dimidia enim leuca tantum ab illa distat. Ex præcipuis Aragoniæ hoc ævo urbibus est, subdita Turiaffonensi Episcopo: solum habet secundum, frumenti, vini, olei, frugiferarumque arborum patiens: omnis generis opifices alit. Quod ad nominis originem spectat. Beuterus auctor est, quemdam è Punicis Regibus nomine *Aiub*, Bilbilim bellis dirutam restituisse, & nomine suo vocasse *Calatajub*. Veritas sit penes auctorem. Incolæ quoque etiamnum hodie armorum se ferriq. præstantia, & gloria iactant.



CAP. LXXVI.

*Turiasso hodie Tarazona. Ferri temperies
clarus. Mons Caunus. Martialis
emendatus.*

NON incelebris est *Tarazona*, in *Aragonia*, & *Castellæ* limitibus sita, quam *Ptolemæus* inter *Celtiberos*, *Turiassonis* nomine collocat; *Plinius Cæsaraugustani* illam conuētus facit. *Vr-*
bis huius incunabula *Lucius Marineus*, *Rodericus Toletanus*, alijque *Hispaniæ* *Scriptores* ad *Tyrios* & *Ausonios* referunt, qui cum *Hercule* secundò in *Hispaniam* venerunt. *Beuterus*, *Ioannes Marieta*, alijque non ad *Tyrios*, sed ad *Thurios* *Italiæ* populos in *Tarentino* sinu (quo loci *Herodotum* suam scripsisse historiam auctor est *Plinius*) originem referunt: sed quia hæc nullius classici auctoris sunt firmata suffragijs, penes Lectorem sit iudicium. Romano ævo non obscuri nominis vrbs: siquidem egregia ferri temperies, quam aque illi subministrant (non secus ac *Bilbili*, ut modò diximus) tenebris illam exemit, ut auctor est *Plinius* lib. xxxiv. cap. xiv. loquitur autem de aquis: *Hæc alibi atque alibi utilior nobilitauit loca gloria ferri,*
sicur

sicuti Bilbilim in Hispania & Turiaſſonem, Commun in Italia: cùm ferraria metalla in his locis non ſint. Hanc Alphoſus VII. vnà cum Calatajūd alijsq̃ue vrbi-
bus Mauris eripuit circa annum clō.cx.

Sita eſt vrbs non procul à monte Cauno, quem incolæ *Montayo*, recentiores verò montem *Caci* vocant, à Caco illo Vulcani filio, qui ab Hercule poſtea in Italia cēſus fuit, nomē obtinuiſſe ferunt: ſed meras nugas effundere hos, qui T. Liuium obiter legerit, deprehendet: qui lib.xlix. refert, Gracchum cum Celtiberis à prima luce ad ſextam horam diei ſignis collatis ad montem Caunum, incerta victoria pugnāſſe. An verò hic mons *Caunus* idem ſit cum monte *Cano*, vel *Cato*, (variant enim exemplaria) apud Martialem, lib.i. Epigr. ad Licianum:

*Sterilemque Canum niuibꝯ & fractis ſacrum
Vadaucronem montibus.*

non abhorret animus vt credam, & *Caunum* potiùs legendum. nam *Canì* vel *Catì* montis, in Celtiberia non vidi qui meminerit.

Camporum glebis feliciffima, & annonæ copia abundans: Episcopali dignitate à multis ſæculis ornata, atque inter ſuos Præſules *B. Prudentium* habuit, imperante Gratiano, vt refert Tarapha, qui à Poëta Prudentio diuerſus fuit, ſcripſit non pauca aduerſus Sabellianos, & Iudæos, quo etiam

tem-

tempore claruisse Rufum Festum Auienum, eruditum Poëtam Hispanum, auctor est Ioannes Vassæus in Chronico

CAP. LXXVII.

Clunia hodie Crunna del Conde. Municipium olim. Sulpitia dicta. Plutarchus emendatus.

Romanorum tempestate, præclarum fuisse opidum *Cluniam*, nemo vel leuiter in historijs versatus negabit; vtpote in quo iuridicus Conuentus agebatur, vt auctor est Plinius, qui in *Areuacis* illud esse, & *Celtiberiæ* finem ait. vt & *Ptolemæus*, qui & *Coloniam Cluniam* vocat. *Ant. Augustinus* Dialogo VIII. ex *Tiberij Cæsaris* nummo docet olim etiam Municipium fuisse *Cluniam*. *Cl. vir Læuinus Torrentius* in *Suetonium* ex antiquo numismate, *Cluniam Sulpitiam* dictam refert. In *Antonini Itinerario* mendosè legebatur hoc nomen, *Raudacluniam* coniunctim, cum duæ sint mansiones, & separatim legendæ, vt monet *Hieronimus Surita*. Apud *Plutarchum* etiam in *Galba* deprauatè legitur Κολωνία pro Κληνία, cuius hæc sunt verba: αὐτῆς δὲ μὲν τὴν φίλων εἰς Κολωνίαν

Ἰβηρικὴν πόλιν ἀναχώρησας .i. *Rursus verò cum amicis in Coloniam Hispaniæ urbem recessit.* Ex Suetonio enim in Galba *Cluniam* esse legendū in aperto est, vbi loquitur, quòd secundissimis auspicijs ad imperium capeßendū confirmaretur Galba: *Tantò magis*, inquit, *quòd illa carmina sacerdos Iouis Cluniæ, ex penetrali, somnio monitus eruerat: ante ducentos annos similiter à fatidica puella pronuntiata.* Auctor est Dion lib. xxxix. Metellum Nepoté à Vaccæis, oppugnantem *Cluniam*, superatum fuisse, & urbem obsidione liberatam.

Hoc ævo *Ciudad real* esse antiquam *Cluniam* credit Iosephus Moletius, sed perperam: siquidem *Ciudad real* prope Alcantaram est, quæ procul admodum ab Areuacis distat; Antonio verò Nebriscensi, Floriano Occampio & Ioan. Vascæo *Crunna del conde* vocatur (ad differentiam *Crunnæ*, quæ est in Gallæcia) quæ ab Vxama, seu Osma sex leucis differt, nec abludente multum vocabulo. Facilis enim lapsus est à *Clunia* in *Crunnam*, licèt nonnulli suspicentur locum vrbi vicinum, vbi nunc D. Virginis ædícula est, & *Casiro* vocatur, *Cluniam* olim fuisse. Fidem faciunt dirutæ vrbis vestigia, & sparsæ quædā amphitheatri, aliæque non spernendæ antiquitatis reliquæ. Auctor est Ioannes Vascæus, hoc in loco repertum fuisse ante paucos annos sigillum conuentus Cluniensis: qui penes opidi

opidi comitem adseruatur. Non procul ab hac vrbe feruntur laudatissimi iaspidis feraces esse latumiæ.

CAP. LXXVIII.

Numantia diutissimè Romanis restitit. Gerundensis Episc. duplex error. Ridicula opinio de etymo. Non esse Zamorram, sed Sciriam. Pomponius Mela defensus.

Occurrit nunc summum illud Hispaniæ decus, & urbium, si viros spectes, princeps *Numantia*; quæ licet multis Hispaniæ urbibus, murorum ambitu, opibusq. inferior fuerit, bellica tamè gloria, & vera virtute cunctis superior. nam sine muro & turribus, ciues patriæ erant propugnaculo, non secus ac prisca Spartani. Et cum tantum quatuor armatorum millia essent, teste L. Floro; seu vt Appiano placet, octo millia, maximos exercitus P. Romani, non solum per viginti annos, Strabone teste, sustinuit fortissimè, sed magnis cladibus, & pudendis foederibus frequenter affecit: ita vt Numantini viri, non vocem, non conspectum ferret Romanus miles. Sed tandem à fatali urbium euersore Scipione Africano victa fuit, si victa dici posset, quæ nullum de se hostibus gau-

gaudiū, nec spolia quidem reliquit. Vnde Florus:
*Vnus enim vir Numantinus non fuit, qui in catenis
 duceretur: præda, ut de pauperibus, nulla arma crema-
 uerant: triumphus fuit tantum de nomine.* Græci tamen
 Scriptores à Romanis hac in re dissentiūt: Strabo
 paucos superfuisse dicit, qui cedentes murum de-
 diderunt, Appianus verò, se suaque Scipionis ar-
 bitrio permisisse, eumq. quinquaginta triumpho
 reseruasse, ceteros sub hasta vendidisse. mulieres
 verò etiam libertatis retinendæ adeò pertinaces
 fuere, ut referat Petronius Arbiter in Satyrico:
*Inuenias esse matres capta vrbe, quæ liberorum suorum
 semesa corpora in sinu tenerent.* Sed satis extra orbi-
 bitam.

Sita erat in Pelendonibus Celtiberiæ populis,
 teste Plinio, non procul ab amnis Duriij exortu,
 modicè edito in tumulo: Ptolemæus in vicinis
 Areuacis statuit. Ambitu suo, teste Appiano in
 Ibericis, complectebatur M. P. bis mille octin-
 genta & octuaginta; Orosius ad tria millia exten-
 dit. Non possum non mirari Io. Margarinū Epif.
 Gerundensem, hominem Hispanum, tam soluto
 animo fuisse, ut asserat, *Numantiam* ad oram Iberi
 fluminis sitam, & vrbis radices ab hoc amne ri-
 gari, repugnātibus omnibus classicis auctoribus.
 Idem asserit à Numidis conditam, quæ opinio ne
 scintillam quidem veritatis præferebat, præter no-

Q

minis

minis aliquam affinitatem; cuius farinæ est, quod ab Ant. Geuara Imp. Caroli V. Historiographo dicitur, à Numa Pompilio II. Rege Romanorum conditam.

Numantiam olim fuisse, vbi nunc Soria est, melior Scriptorum pars asserit: licet nonnulli credant fuisse, vbi nunc ignobilis vicus est *Garay* dictus, ibique perantiqui pontis vestigia adhuc seruantur, vt adstruit Ambr. Morales; sed cum exigua sit admodum distantia, nolim de re nauci anxie rixari. Sufficiat in Soriano agro fuisse nobilem illam urbem. Nam quod Lucas Tudenfis alijque imi subsellij auctores asserant, *Zamorram* eo loci nunc esse, quo priscis sæculis *Numantia*, præterquàm quod Plinio nimis clarè repugnet, qui dicit prope Durij exortum illam fuisse, à quo *Zamorra* procul admodum dissita est, refellit hos diligentissimè Ant. Nebrissenfis Decadis I. lib. v. cap. iv. Non possum, quin hoc loco Pomp. Melam optimè de Hispania meritum à stigmate malè illi ab Episcopo Gerundenfi inuisto vindicem, ait enim lib. i. Paralipomenon, Melam asserere, *Cæsaraugustam* nunc esse, quæ olim *Numantia*; cum ne per somnium hoc illi exciderit, sed lubet tabulis resignatis agere: sic enim hic lib. ij. cap. vi. *In Tarraconensi vrbes clarissimæ fuerunt Pallentia & Numantia. Nunc est Cæsaraugusta.* Non dicit *Cæsaraugusta*.

faraugustam esse *Numantiam*, sed suo æuo clarissimam esse urbium *Tarraconensis* prouinciæ, vt olim fuere *Numantia* & *Pallentia*. Quis ferat tantam oscitantiam in tam graui auctore reprehendendo. Paulus quoque Orosius, *Numantiam* Metropolim olim vniuersæ Gallæciæ fuisse asserit. Zamorrenses testimonium hoc Hispani scriptoris sibi patrocinari credunt, sed toto cælo aberrare eos facit diuisio Hispaniæ, tempore Orosij, quo Gallæciæ termini *Numantiam* vsque extensi erant: vt bene obseruauere Hieronymus Surita, & Ambr. Morales.

CAP. LXXIX.

Flauiobriga nunc Bilbao. Olim hinc Amanum portus. Situs eius & descriptio.

QVÆ vernaculè *Bilbao*, antiquorū *Flauiobrigam* credūt esse, Moletius & Tarapha: quam Ptolemæus inter Autrigones recenset. Io. Marieta carpit Ant. Nebrissensem, quòd *Bilbao* putarit *Flauiobrigā* olim dictam; dicitq. non antiquam esse, vtpote exstructam à Didaco Lopez de Haro, Cantabriæ Domino, an. M. CCC. eo loci, vbi olim Amanum portus fuit, nescius à Plinio statui

Flauicbrigam, vbi Amanum portus olim fuit lib. i. v. cap. xx. auctor est Tarapha, in Vespasiani honorem prænomen *Flauij* inditum. non defuere qui hanc urbem Martialis patriam *Bilbilim* nimis impudenter asseruerint: sed hos somniare clarum est; quare hos ad Atlantes religandos auctor sim, vbi memorantur somnia non videri.

Vrbs est Cantabriæ præcipua, non solum ob situs opportunitatem, sed & ob vberem annonæ copiam, & mercatorum insignem concursum. Sita est loco plano: à mari distat duobus milliaribus, loco egregiè portuoso: aëre vititur temperato & salubri admodum, qua parte continentem spectat. Magnos habet obiectos montes, vt nec frigori nimio obnoxia sit, nec calori: annonam hîc tanta affluere copia aiunt, vt nulla pœnè in Hispania vrbs sit hac in re illi comparanda. Piscium omne genus vicinum mare larga manu supeditat. Lanæ hîc commercium summopere viget, vt quotannis circiter quinquaginta naues; in varias partes hîc onerentur: puellæ hîc passim incedunt capite nudo, & tonso capillitio, nec virginibus fas est, antequam nuptiæ sint, aut capillum alere, aut caput peplo velare; Lacedæmoniorum pœnè more, quæ intecto corpore, donec nupsent, incedebant.

CAP. XXC.

*Pompelon à Pompeio exstructa. Diuersa à
Pompeij trophæis. Vbi hæc exstant.
Occupatur à Ferdinando Rege.*

SVblato per domesticas insidias Q. Sertorio,
sedatisque Hispaniæ motibus, Cn. Pompeius
ad optatum triumphum festinans, *Pompelonem* vr-
bem inter Vascones condidit, quasi *Pompeiopolim*
vocans, teste Strabone lib. iij. quam etiam à Pto-
lemæo putant quidam *Martuam* dictam, hodie
regni Nauarræ metropolis est. ridiculum est Lucæ
Tudensis figmentum, de vrbis etymo. refert enim
Pompelonam dici, quasi *Bambæ Lunam*, quòd Rex
Bamba ciuitatem ampliavit, nomenq. antiquum
Martuæ oblitteratū. Conuentus erat olim Cæsar-
augustani, teste Plinio, qui cū initio capitis iij.
lib. iij. dixerat Pompeium in Pyrenæo trophæa
statuisse, quibus testabatur D. CCC. XLVI. opida
ab Alpibus, ad fines vltioris Hispaniæ in ditio-
nem à se redacta, credidit Pet. Antonius Beute-
rus, hæc trophæa Pompeij nihil aliud fuisse, quàm
à Pompeio exstructam urbem *Pompelonam*, in me-
moriæ rerum ab se gestarum: sed commentiti-
um hoc esse quis non videat? cū eodem modo

constet, Augusto Cæsari victis Alpinis gentibus, in ipsis Alpibus erecta trophæa : cuius inscriptionem videre est apud Plinium lib. iij. cap. xx. Ad-
do Pompeij trophæorum adhuc hodie non ob-
scura vestigia exstare. Refert enim Ioannes Ma-
riana lib. iij. cap. xvi. & Ambr. Morales lib. viij.
cap. xxij. in *Andorre*, & *Altauaca* Pyrenæi con-
uallibus, exstare circulos ferreos, liquato plumbo
rupibus affixos, decem ampliùs pedum ambitu,
quibus affigi trophæa solent: cui rei fauent trium-
phalium fornicum imagines, vt Emeritæ conspi-
ciuntur. qua de caussa diligentissimus Abr. Orte-
lius in antiquæ sua Hispaniæ descriptione, *Pom-
pelonem* inter Vascones, trophæa verò Pompeij,
prope Ruscinonem & Salsulas collocat; Strabo
trophæa Pompeij prope Iuncarium campum
statuit, qui non procul à Ruscinone est.

Sita autem est vrbs, non procul à Pyrenæi ra-
dicibus, in fertilissimis Nauarræ campis, ad flumen
Argam vocatum: ciuitas est magna, & opulenta.
Auctor est Beuterus, & Ioannes Vasaëus urbem
hanc Christi religione, in ipsius Ecclesiæ primor-
dijs imbutam esse, idque à *S. Saturnino*, qui à D.
Petro Roma missus, XL. amplius hominum mil-
lia, septem dierum spatio, ad Christum traduxit,
& in his *S. Firminum*, ciuem Pompelonensem,
quem & Ecclesiæ præfecisse, & *Ambianensi* in
vrbe

vrbe postea martyrio affectum ferunt sacrae Martyrum tabulae. In hunc usque diem Episcopalis dignitas permanfit. Vrbs hæc cum vniuerso Nauarrae regno, anno clō. D. XII. à Ferdinando Castellæ & Aragoniæ Rege occupatur; Ioanne primùm Rege à Iulio II. Pont. Max. habito pro schismatico.

CAP. XXCI.

Duplex Calaguris. Taraphæ error. Fidißima suis ducibus. Egregia inscriptio.

DVas in Hispania citeriore *Calaguris* nomine fuisse vrbes, auctor est Plinius; quarum vna *Nascica* cognominata, inter *Nascicos* populos collocata, prope *Oscam*, quam & *Municipium Calagurim Iuliam Nascicam* ex antiquo nummo dicunt vocari, Amb. Morales, & Hieronymus Surita: cuius hodie ne vestigia quidem supersunt. Altera verò *Calaguris fibularia* vocata, *Calagorina* verò Ptolemæo; nostro æuo *Calahorra* dicta. Conuentus erat olim Cæsaraugustani: Franciscus Tarapha hoc nomen à C. Caligula illi inditum putat. non credidissẽm Tarapham, tam obseæ naris fuisse, vt tales tricas adstrueret: cùm legerit apud

Iulium Cæsarem, bello quod aduersus Petreium & Afranium gessit, *Calaguris* mentionem. T. Liuius etiam lib. xxx. meminit magni prælij prope *Calagurim* commissi, inter Celtiberos & Romanos, duce L. Manlio Acidino Prætore citerioris Hispaniæ: in quo ad XII. Celtiberorum millia cæsa, capta ad duo M. fuere. quæ fanè omnia multis lustris ante Caligulam gesta fuere.

Sita autem est vrbs ad Iberi amnis ripas, & quidem in monte, vnde Paulinus ad Ausonium:

*Montanamque mihi Calagurim, & Bilbilim acutis
Pendentem scopulis, collemque iacentis Ilerdæ
Exprobras?*

Rara in primis in duces suos fide, sed in Q. Sertorium clara admodum, quæ nec morte eius interrupta fuit. qui, vt auctor est Val. Maximus lib. vij. cap. vi. *Quo perseuerantiùs interemti Sertorij cineribus, obsidionem Cn. Pompeij frustrantes, fidem præstarent, quia nullum iam aliud in vrbe eorum supererat animal, vxores suas, natosque ad vsum nefariæ dapis verterunt, quæque diutiùs armata iuuentus, viscera sua visceribus suis aleret, infelices cadauerum reliquias salire non dubitauit.* Hoc etiam Iuuenalis Satyra xv. innuit his versibus:

*Vascones, vt fama est, alimentis talibus vfi
Produxêre animas: sed res diuersa: sed illic
Fortunæ*

*Fortune inuidia, bellorumque plima, casus
Extremi, longæ dira obsidionis egestas.*

Iugi tandem obsidione eam Afranius Cn. Pompeij legatus occupatam, cæde incendioq. deleuit. publicum illud & infelix fidei exemplum, & cum quouis prisce æui comparandum, peculiare Bebricij Calaguritani confirmat: quod prope Lauronam (Logronno hodie) antiquus cippus, referente Ambrosio Morales, ostendit:

DIIS. MANIBVS.

Q. SERTORII.

ME. BEBRICIVS. CALAGVRITANVS.

DEVOVI.

ARBITRATVS.

RELIGIONEM. ESSE.

EO. SVBLATO.

QVI. OMNIA.

CVM. DIIS. IMMORTALIBVS.

COMMVNIA. HABEBAT.

ME. INCOLVMEM.

RETINERE. ANIMAM.

VALE. VIATOR. QVI. HÆC. LEGIS.

ET. MEO. DISCE. EXEMPLO.

FIDEM. SERVARE.

IPSA. FIDES.

ETIAM. MORTVIS. PLACET.
CORPORE. HUMANO. EXVITIS.

Cuius fidelitatis memor Aug. Cæsar *Cohortem Calaguritanorum*, in corporis sibi custodes delegit, ut auctor est Suetonius in Augusto.

Fabij Quintiliani Rhetoris præstantissimi natalibus nobilitata; qui sub Nerone, à Galba Romam fuit adhuc adolescens perductus. Is cum causis agendis magnum sibi nomen comparasset, primus Romæ publicam scholam instituit, atque ex fisco salarium accepit, ut testatur D. Hieronymus ad Eusebij Chronicon his verbis: *Quintilianus ex Hispania Calaguritanus, primus Romæ publicam scholam tenuit, & salario cohonestatus publico claruit.* Vnde & Ausonius in Commemoratione Rhetorum Burdigalensium:

*Afferat usque licet Fabium Calaguris alumnum,
Non fit Burdigala dum cathedra inferior..*

Episcopatum habuit non incelebrem olim, nec hodie eo caret. Non defuere, qui crederent *Calagurim*, B. Dominici patriam, vocum affinitate decepti: nempe *Callaroge* illius patriam, & *Calahorre* eadem

eadem opida putantes. Martyres patronos habuit SS. *Emetrium & Chelidonium*, milites legionarios, Marcelli centurionis filios, quos Aurelius Prudentius Hymno peculiari prosequitur.

CAP. XXCII.

Cæsaraugusta Colonia immunis. Salduba vocata. Variæ opiniones & fabulæ de prisco nomine refelluntur. Colonia huc ab Augusto deducta.

INter nobilissimas totius Hispaniæ vrbes, iure referetur *Cæsaraugusta*, Aragoniæ Metropolis: quam Ptolemæus in Edetania collocat, vt & Plinius; qui etiam Coloniam immunem, & primò *Saldubam* vocatam dicit. Pomponius verò Mela, suo tempore nobilissimā Tarraconensis prouinciæ urbem, ex mediterraneis dicit fuisse. De antiqua eius appellatione multa neoterici comminiscuntur, quæ libet breuiter refellere, ne alijs officias diutius faciant. Lucius Marineus, quia apud Plinium legerat, *Saldubam* olim vocatam, dicit à Rege Mauritanæ Iuba exstructam fuisse, vnde illi nomen *Salduba*, tamquam *Iubæ domus*. Sed nullius hæc opinio momenti est. Nam cum duos tan-

tum Iubas constet fuisse, patrem scilicet, qui à C. Iulio Cæsare vnà cum Corn. Scipione, fusus fugatusque seipsum interemit: & filium eius, qui Romanis litteris ita liberaliter initiatus fuit, vt clarissimus apud Afros sui æui scriptor sit habitus, & ab Augusto Cæsare in autum regnum restitutus. quorum neutrum in Hispania quidquam possedisse constat, quo sublato totum Marini commentum in auras euanescit. Io. Margarinus Episcopus Gerundensis hanc urbem primò *Agrippam* à conditore suo dictam asserit, & in suam sententiam vocat velinuitos, Strabonem & Plinium, apud quos tamen ne verbum quidem hac de re. Rodericus verò Ximenius Toletanus Archiepisc. lib. i. cap. iij. Cæsaraugustā primò *Auripam* vocatam fuisse autumat. Sed pari in errore cum Gerundensi versatur. Io. Annii Viterbiensis *Saldubam* principem urbem fuisse tradit, quam Tubal in Hispania exstruxit. Addit etiam in Bætica ab eodem urbem exstructam, quam Pomponius Mela *Dubal* vocauit. Non tam anxie ab Hercule quæsitus Hylas, quàm mihi hic locus; sed frustra. nam passim *Salduba* legitur. Quamobrem credo Annio Viterbiensi glaucomā ob oculos obiectam fuisse, vt quod non viderit, id se vidisse putarit. nisi forsitan deprauato codice usus fuerit. Gaspar Barre-
 rius eliminatis hisce fabulis, potius à salinis frequen-

quentibus nomen fluxisse credit. montes enim salis fecundos, non procul ab hac vrbe distare in confesso est: D. verò Isidorus à Cæsare Augusto exstructam & nominatam dicit. Vero tamen propius est, ante Augusti tempora ignobile opidum fuisse, & postea Coloniam huc deductam. Probat hoc æreus Augusti nummus, in quo vexillum erectum, hasta in base adfixa visitur (quod signum erat deducendæ Colonix) ab vna parte Augusti effigies, cum hoc titulo: AVGVSTVS. D. F. auersa verò parte: CÆSARA VGUSTA. M. POR. CN. FAB. II. VIR.

Sita est ad amnem *Iberum* (à quo vniuersa provincia nomen sumsit) loco campestri, & patenti, in qua siue soli vbertatem, siue situs amœnitatem, vrbis nitorem, & ornamenta requiras nihil in ea deesse comperies, ædium splendore, nulli Hispaniarum vrbi secunda, quam tamen Barcino audet æmulari, è laterculo coctili plurimùm sunt: vicos, plateasque latas, & apertas, ac pontem habet egregij operis, quo Iberus transitur. inter multa templa, quæ XVII. maiora numerantur, præter XIV. monasteria, & alia minora fana, & sacella, celeberrimum est & magnæ religionis, quod D. Virgini ad columnam, incolæ, *Nuestra Señora del pilar* vocant. Posteris transmissum est, ædem hanc sacram primam esse, quæ in orbe in Seruatoris nostri hono-

honorem exstructa fuit, idque quo tempore D. Iacobus Hispanias obibat, cui ferunt D. Virginem hac in vrbe apparuisse, cælesti fulgore cinctam, dedisseque Apostolo ex iaspide columnam, vnà cum sacrata effigie, vtque hoc in templo locaretur mandasse. Conspicitur hîc imago exigua Deiparę Virginis, vndique cancellis inauratis septa; coram verò quindecim argenteæ lampades perpetuis lucent ignibus. frequentia hîc edita miracula loci pietatem auxere: hac in vrbe martyrum frequentia tanta, quanta vix alibi integris in prouincijs, vt innumerabilium massa, & eius nominis monasterium ostendit. Diocletiani enim & Maximiniani temporibus, Pręses Dacianus, vt funditus Christianorum in Hispania nomen deleteret, per præconem denuntiauit, vt qui vellent Christiani, Cæsaraugusta statim hora excedere, tutò & illæsos discessuros: qui cùm summo gaudio continuò se portis effunderent, repentè militum copijs cincti, ad vnum omnes pro Christo obtruncati sunt. Credebat nimirum immanis ille Dei hostis hoc Christiani sanguinis torrente, nouæ ardorem fidei se exstincturum. at frustra fuit tyrannus. Celebrati enim hi martyres innumerabiles, quos Prudentius libro De Coronis decorandos putauit Hymno, quo Cæsaraugustæ vrbis sit meminit:

*Sola in occursum numerosiores
Martyrum turbas Domino parasti,
Sola prædiues pietate multa
Luce fruêris.
Omnibus portis sacer immolatus
Sanguis, exclusit genus inuidorum
Daemonum, & nigras pepulit tenebras
Urbe piata.*

Hac etiam vrbe *D. Encratis* (vulgò *Engratia*) Dynastæ cuiusdam Lusitanix filia, & duci limitaneo Rhodani, prouinciæ Narbonêsis Gallix desponsa, cum XIIX. comitibus, ab eodem Daciano martyrio affecta fuit: quorum etiam omnium ibidem meminit Prudentius, postea verò ita subdit de *S. Encratide*:

*Hic & Encrati recubant tuarum
Ossa virtutum, quibus efferrati
Spiritus mundi violenta virgo
Dedecorasti.*

D. etiam *Lambertus* indigena, hîc martyrio affectus fuit. Episcopatus est antiquissimus, tempore verò *Alphonfi XI.* à *Ioanne XXII.* Pont. Max. in Metropolitanam dignitatem mutatus: cui quatuor subditi parent Episcopi, *Oscensis, Turiaffonensis, Pompelnenfis, Calaguritanus.* Inter Episcopos habuit *S. Braulionem*, cui *Isidorus* libros viginti *Originum* eruditum sane opus inscripsit: doctrina verò

verò conspicuos viros protulit *Antonium Augustinum* Archiepiscopum Tarraconensem, de Hispania omniq̃ue adeò antiquitate optimè meritum, & *Hieronymum Suritam*, qui Antonini Itinerarium emédauit, & Aragoniæ Historiam patrio idioma-
te libris XXX. totidemq̃. annis conscripsit. Latine quoque indices Aragoniæ concinnauit. D. verò Vincentij martyris natalibus præcipuè se tollit hæc vrbs, licèt aliqui Oscæ natum volũt, qui & sub Daciano Abulæ martyrio affectus. clarè enim Prudētius & ipse Cæsar augustanus eum pro ciue agnoscit hymno citato.

*Noster est, quamvis procul hinc in vrbe
Passus ignota, dedit sepulcri
Gloriam victor prope litus altæ
Forte Sagunti.*

CAP. XXIII.

*Oscæ Victrix cognominata. A Sertorio hic
scholæ institutæ. Velleius Patercu-
lus correctus.*

QVÆ priscis geographis *Oscæ*, recentioribus *Huescæ* leuiter flexo nomine dicitur : vrbs erat olim regionis Vescitanæ (Surita verò *Vasci-
tania*

tania vult legi, Notis ad Antonini Itinerarium) Conuentus verò Cæsaraugustani, teste Plinio : Ptolemæus autem Illergetū esse, Franciscus Tarapha ex Manethone, dicit ab Osco Vetulonensi, qui Italiæ imperabat, exstructam fuisse : Episc. verò Gerundensis lib. ij. Paralipomenon à Caco conditam credit, & *Oscam* vocatam, tamquam *Os caci*, multo ante Herculis in Hispanias aduentum eundemq. asserit Cacam, qui ab Hercule interfectus sit in Italia,

Spectatum admitti risum teneatis amici.

Sed cū de illius origine nihil liquidò mihi constet, satiùs de illa tacere putem, quàm nugas asserere. Antonius Aug. & Hieronymus Surita ex antiquis nummis aiunt urbem *Vitricem* cognominari. Hac in vrbe olim Q. Sertorius Latinæ, Græcæq. linguæ Academiam erexit, teste Plutarcho in vita Sertorij, quò nobilissimos Hispaniæ adolescentes, eruditionis causâ euocauerat; re ipsa verò vt obsides haberet, erudiendi prætextu, quasi cū maturuisset ætas, in partem administrationis, & imperij eos admissurus: qui eadem in vrbe inter epulas à Perpenna alijsq. coniuratis occisus, teste Velleio Paterculo lib. ij. Tum M. Perpenna prætorius, è proscriptis, generis clarioris, quàm animi, Sertorium inter cænam Aetoscæ interemit, Romaniq. que certam victoriam, partibus suis excidium, sibi turpissi-

nam mortem pessimo auctorauit facinore. quo loco *Oscæ* legendum clarum est. Nusquam enim *Ætoscæ* mentio; licet Plutarchus, Appianus, & Sallustius in Historiarum Fragmentis vrbis nomen prætereant, vbi Sertorius interfectus fuit. Claudius Puteanus, quo loco Strabo dicit Sertorium morbo extinctum, ἐτέλευται καὶ νόσῳ, feliciter ex Vel-
leio emendat ἐτέλευτα δ' οὐ δόκη. i. *Exstinctus est Oscæ*. apud Strabonem etiam lib. iij. corruptè *Ileosca* legitur, loco *Oscæ*, his verbis, loquitur de Iaccetania: *Hæc à Pyrenæis radicibus inchoans, in campos vsque latiùs extenditur, & Ilerdæ ac Ileoscæ, Illergetarum locis adiungitur, non procul ab Ibero*. Nusquam enim apud Ptolemæum, aliumve classicum scriptorem, *Ileoscæ* mentio inter Illergetas, sed *Oscæ* passim. Hoc æuo, ex Catalonia præcipuis vrbibus, Episcopali dignitate prædita, Tarraconensi Præsuli, ex Constantini diuisione subiacet. Academiam etiam habet antiquam, & à Sertorio, vt dixi, institutam: sed nulla re magis gloriantur incolæ, quàm *D. Laurentium* ciuem habuisse, inuictum illum Christi Athletam, qui Romæ sub Decio Imp. martyrio affectus fuit. *D.* etiam *Orontium*, *D. Laurentij* fratrem.

C A P. XXCIV.

llerda hodie Lerida. Sardones vbi. De origine llerdæ. Sicani nomen à Sicori amne traxerunt. Antiqua hic Academia.

Lerda non ignota vrbs, ob res maximas circa illam à C. Iulio Cæsare, contra Afranium & Petreium Pompeij duces gestas. Ptolemæus inter Illergetes annumerat, quos Fuluius Vrsinus apud Abr. Ortelium, eosdem esse cum Illurgauonensibus Cæsaris facit. Sed exactiùs rimanti, non subsistit Fuluij coniectura; dicit enim Cæsar Illurgauonenses flumen Iberum attingere, quo Illergetes non pertingunt, vt ex Ptolemæo liquet, potiùs credo hos *Illurgauonenses* eosdem esse, cum Ptolemæi Illercaonibus, qui ad Iberi ostia sunt. Plinius lib. iij. cap. iij. *llerdenses*, ait, *Surdaonum gentis, iuxta quos Sicoris fluius*. Sed quo loco Surdaones? aut quis illorum præter Plinium meminit? Feliciter Gaspar Barrerius mendosum hunc locum sanat, ab Hermolao Barbaro, & Ferdinando Nonio Pintiano maximis viris præteritum, & *Sardonum* legendum censet. Erant enim *Sardones*, Ruscinonensis comitatus incolæ, qui hæc in partes

forte se effuderant : vt etiam monet Beuterus. Pomponius sanè Mela horum meminit lib. ii. cap. v. *Inde est, inquit, ora Sardonum, & parua flumina Thelis, & Thicis, vbi accreuerè persæua : Colonia Ruscono.* Plinius etiam lib. iij. cap. iv. his verbis: *In ora regio Sardonum, intusque Consuarnorum, flumina Thelis, & Obris: quorū regionem etiam hodie, Campos de Cerdania nuncupari idem auctor est Barrelius: huius vrbis originem Ioannes Gerundensis Episc. lib. ij. ad Illyricos refert, satis herculè remotè, & more suo ineptè. Nonnulli ex Stephani Byzantini obscuris verbis, ad Troianos referunt, quòd addat, Ileus autem Troianis Apollo dicitur. Vibius Sequester ab Ilerda amne vrbis nomē inditum dicit, sed vbi gentium hic amnis? vel quis Sicorim Ilerdam vocatum scribit? viderint alij.*

Sita verò est, modico in colle, qui paulatim in vallē definit, ad Sicoris amnis ripas, ob auriferas, quas vehit arenas, celeberrimi, vt ferunt Tarapha, & Lucius Marineus lib. xv. sed quia graphicè eius situm Lucanus exprimit, non pigebit eius verlus ex lib. iv. adducere:

*Colle tumet modico, lenique excreuit in altum
Pingue solum tumulo, super hunc fundata vetusta
Suroit Ilerda manu, placidis prælabitur undis
Hesperios inter Sicoris non vltimus amnes.*

*Saxeus ingenti quem pons amplectitur arcu;
Hybernas passurus aquas.*

Aufonius etiam ad Paulinum *Ilerdæ* sic meminit:

*Aut quæ deiectis iuga per scruposa ruinis,
Arida torrentem Sicorim despectat Ilerdæ.*

A quo amne nonnulli credunt Siculos primùm *Sicanos* appellatos, testis est Thucydides lib. vi. qui amnem hunc *Sicanum* appellat.

Vrbis muri ex viuo saxo structi; ædes non contemnendæ: suburbano agro Bacchus, Ceres & Pomona mirum in modum fauent; nec Pallas fecundam oleam inuidet: Cathedrale templum affabrè exstructum, editiori vrbis loco situm. Vnde iucundus in subiectos campos prospectus patet. Episcopali dignitate à multis sæculis ornata fuit, & sub Sergio huius vrbis Episcopo an. D. xxviii. prouinciale Concilium celebratū fuit, sub Theodorico rege. Antiqua etiam Academia hinc excitata an. clo. ccc. quæ licèt nec opulentiis redditibus tumeat, nec splendidis ædificijs superbiat, vberes tamen hinc ingeniorum riuuli emanant, qui vniuersam Cataloniam fecundant. Et licèt vrbs felici satis sit solo, vberes etiam quæstus ex salsamentis, & salitis piscibus, qui vndique huc aduehebantur, percipit, vnde Horatius librum suum alloquens:

Aut fugies Vticam, aut vnctus mitteris Ilerdam,
quasi diceret, vbi neglectui habebitur, folia eius

cessura in piscium aut fassamentorum tectoria,
non secus ac Persius alibi scribit:

Linquere nec scombro metuentia carmina nec thus,
Refert Lucius Marineus lib. x. Ilerdenses Valen-
tiæ pondera, mensuras, & monetam dedisse; idq.
quo tempore Iacobus I. Aragonum Rex anno
CL. cc. xxxviij. Valentiam obsedisset, sanciens ut
cuius ciuitatis ciues primò urbem irrupissent, il-
lorum moneta ponderibusq. Valentini vterentur.
Ilerdenses ante omnes in urbem irruentes eò Co-
loniam deduxere, vnde in hodiernum diem Va-
lencia publicis in litteris *Ilerdam* matrem vocat.

CAP. XXCV.

*De Tarraconis origine. Scipionũ opus. Dicta
Colonia Iulia Victrix Tyrrenica.
Strabonis lapsus. Circi vestigia. Inscri-
ptiones veteres. Vno linoq. nobilis.*

Nobilissima est Hispaniæ Citerioris vrbs Tar-
racon, à quâ & vniuersa prouincia Tarra-
conensis vocata: de cuius primordijs, & condito-
re variè sentiunt Hispanicarum rerum Scripto-
res. Annius Viterbiensis, alijsque triuiales ex opi-
nione Beroñ, a Tubale, filio Iaphet, conditam
fuisse

fuisse asseuerant, & lingua Aramea dictam fuisse *Tharacoam* quod pastorum congregationem illis significat: quorum ego opinionem nauci non fecerim, cum apud doctiores adulterina esse Berosi scripta hæc in confesso sit, & nugatoris Annij suppositicium partum, vt Ioannes Goropius Becanus in Hispanicis, & in Originibus non semel ostendit. Gaspar etiam Barrerius, peculiari libello, Berosum, Manethonem, Metasthenem, ceterosque eius farinae, quibus Annius tantopere innititur, ita excussit, vt imposturam, & laruam cuiusvis detractam ostenderit: Franciscus Tarapha Ægyptios, duce quodam *Tarracone*, in Hispanias venisse, atque ibi urbem in illius memoriam condidisse refert: Episcopus verò Gerundensis ad Herculem eius originem refert, atque à Phœnicæ populis, quos *Aconitas* vocat (qui nuspian sunt) conditam, dictamque *Tarraconem*, quasi *terram Acon*, sed mittamus hos nugivendulos, & secundioris famæ Scriptoribus innitamur,

Queis meliore luto finxit præcordia Phœbus.

Plinius itaque, Solinus, & Martianus Capella, vnanimi voce, Scipionum opus esse *Tarraconem*, sicut Carthaginem Pœnorum asserunt, non quòd prima vrbs fundamenta iecerint. Constat enim ante Scipionum aduentum ex T. Litio urbem fuisse, sed quòd ex obscura in clarissimam ciuita-

tem illorum opera euaserit: nam de primis eius
 initijs apud fide dignos auctores altum silentium.
 Colonia igitur fuit Scipionum *Tarraco*, cognomi-
 nata *Iulia victrix Tyrrenica*, vt ostendit doctissi-
 mus Ant. Augustinus, Antiquitatū dialogo VII.
 ex antiquis inscriptionibus tum *Tarracone*, tum
Barcinone repertis. *Tarraconensis* huiusmodi est:

GENIO.

COL. I. V. T. TARRAC.

L. MVNATIVS. APRONIANVS.

II. VIR.

Q. Q. TESTAMENTO.

EX. ARG. LIB. XV.

PONI. IVSSIT.

Barcinone verò pluribus in locis hæc conspi-
 citur inscriptio:

IIII. VIR. AVG.

COL. I. V. T. TARRACON.

ET. COL. F. I. A. BARCIN.

Id est. *Seuir Augustalis Colonia Iulie victricis Tyr-
 rhenica Tarraconis*, & *Colonia Fauentia Iulie Augu-
 ste Barcinonis*. Scio nonnullos legere *Colonia Iulie
 Vlpie Traianæ*, vel *togata*, sed ἀπροσδυνυτον, est præ-
 fertim cū & *Aulonio Tyrrenica* dicatur. Epi-
 stola est apud Paulinum:

Cæsarea !

*Cæsareæ Augustæque domus, Tyrrhenica propter
Tarraco.*

Pomponius Mela opulentissimam esse dicit, inter illius oræ maritimas vrbes, *quam Thulcis modicus amnis super, ingens Iberus deorsum attingit.* quam Strabo ad principum peregrinationes excipien- das commodissimam, & natam esse, sitamque in sinu quodam maris, sed portu carere. reclamat ta- men T. Livius, qui lib. xxij. Scipionem magna classe portum *Tarraconis* ex alto tenuisse, mili- temque ibi exposuisse scribit. Hodierna certè die multa indicia antiquitus portum fuisse ostèdunt. rudera enim non pauca obiectæ molis, quò à ventis tutiores essent naues, visuntur; & hoc æuo, non rarò triremes hinc soluere compertum est.

Locus hic est (quem incolæ *placa de la fuente* vocant (amplitude, & latitudine insignis, qui ex non obscuris vestigijs Circus olim fuisse credi- tur, quod vt facilius credam, faciunt binæ inscri- ptiones antiquæ, Aurigis nobilioribus dedicatæ: quarum prior in templo D. Virginis dictæ *del Milagro* conspicitur. quas lubet attexere:

D. M.

*Factionis Venetæ Fusco sacrauimus aram
De nostro: certè studiosi, & bene amantes.
Vt scirent cuncti monimentum & pignus amoris.
Integra fama tibi, laudem cursus meruisti,*

*Certaſti multis, nullum pauper timuiſti,
Inuidiam paſſus, ſemper fortis tacuiſti,
Pulcrè vixiſti, fato mortalis obiſti.*

*Quiſquis homo es, quærens talem ſubiſte viator,
Perlege ſi memor es, ſi noſti quis fuerit vir.*

Fortunam metuant omnes, dices tamen vnum:

Fuſcus habet titulos, mortis habet tumulum.

Contegit oſſa lapis, bene habet, fortuna valebis.

*Fundimus in fonti lacrymas, nunc vina precamur,
Vt iaceas placidè nemo tui ſimilis.*

Τοὺς σοὺς ἀγῶνας αἴδῳ λαλήσει.

Id eſt: Tua certamina æuum loquetur.

Altera inſcripta eſt ſtatuae, quæ ſiniſtra manu palmam, in victoriæ ſignum continet, quæ in hor-
tis exſtat doctiſſimi Ant. Auguſtini Archiepiſco-
pi Tarraconenſis:

D. M.

EVTYCHETI. AVRIGÆ. ANN.
XXII. FL. RVFINVS. ET. SEMP.
DIOFANS. SERVO. B. M. F.

*Hoc rudis aurigæ requieſcunt oſſa ſepulcro,
Nec tamen ignari flectere lora manu.*

*Iam qui quadrijugos auderem ſcandere currus,
Et tamen à bijugis non remouerer equis.*

*Inuidère meis annis crudelia fata,
Fata quibus nequeas oppoſuiſſe manus.*

Nec !

*Nec mihi concessa est morituro gloria circi,
 Donaret lacrymas ne pia turba mihi.
 Vssere ardentem intus mea viscera morbi,
 Vincere quos medicæ non valere manus.
 Sparge precor flores super mea busta, viator,
 Fauisti viuo forsitan ipse mihi.*

Et nequid vrbaniis delicijs splendorique deesset, Theatrum olim egregij operis habuit, vt ruinæ testantur, eo loci, vbi nunc templum est D. Virginis dictæ *del Milagro*, licet nunc deforme, & incultum sit: siquidem in templi structuram pulcherrimi lapides sunt ablati, eratque ab vna parte in viuâ rupe excisum, vnde & sedilia & gradus. Suburbanus ager frumenti, olei, pecorisq. abundans admodum, vini laudatissimi ferax, vt testis Silius Italicus lib. iij. belli Punici:

— dat Tarraco pubem

Vitifera, & Latio tantum cessura Lyæo.

Et Martialis etiam lib. xij. Epigr. xvij.

Tarraco Campano tantum cessura Lyæo,

Hæc genuit Thuscis æmula vina cadis.

Laudatissimi etiam lini ager est patiens, cui torrens, qui Tarracone alluit, eximium splendorem conciliat, teste Plinio lib. xix. cap. i. *Et citerior Hispania habet splendorem lini præcipuum torrentis, in quo politur, natura, qui Tarraconem alluit, & tenuitas mira: ibi primum carbassis repertis.*

Archiepiscopatum habet hæc vrbs percelebrem, & vetustum, & si Gerundenſi Episcopo fides habenda, Toletano prior est. Illud certè non minimum est, non agnouisse vñquam huius vrbis Præsules, Toletanum Archiepiscopum pro superiore, & primatè: vt ceteræ omnes Hispaniæ vrbes, & ab illius se iurisdictione semper exemptæ, vt nec iter facienti Toletano Præsuli per diocesim suam, erectâ ferre crucem permiserint.

Augusto Cæsari olim dedita fuit, ob beneficia multa illi collata, dum bellum in Cantabros pararet. cuius memoriam & post mortem ita prosecuti sunt, vt teste Corn. Tacito, à Tiberio Cæsare obtinuerint, vt Tarracone templum illi exstrueret. Plurimis hæc vrbs SS. Martyribus abundat, inter ceteros verò habuit *S. Fructuosum*, *Augurium*, & *Eulogium* Episcopum Tarraconensem, quorum abunde meminit Poëta Prudentius, hymno illis dedicato:

*Felix Tarraco, Fructuose, vestris
Attollit caput ignibus coruscans.*

Hac præterea vrbe oriundus fuit *Paulus Orosius*, D. Augustini discipulus, doctrina & eloquentia singulari, qui ab orbe condito Chronicon ad sua vñque tempora eleganti filo contexuit.

CAP. XXCVI.

Emporiæ hodie Ampurias. A Phocensibus condita. Incolæ diuersi. Inscriptio vetus.

Maritima est Indigetorum vrbs, inter Tarraconem & Pyrenæos montes sita. Portu commodo ornata. Clari olim nominis fuisse præter historias, testantur non spernendæ ruinæ. A Phocensibus Græciæ populis condita, vt nonnullæ aliæ illo in tractu: vnde Silius Italicus lib. iij. vocat *Phocaicas*:

Phocaicæ dant Emporiæ, dat Tarraco urbem.

Stephanus *Emporias* *κελικὴν πόλιν*, esse dicit, contra omnem rationem. nam etsi Mafsilienses, qui illam condiderāt, in Celtica seu Gallia erant, non tamen Celtas fuisse dicendum. Ptolemæus *Emporias* inter duo flumina collocat, Sambrocam videlicet, & Clodianum. Pomponius Mela Clodiani tātūm meminit: Plinius verò lib. iij. cap. iij. pro Clodiano flumen Albam refert. Prius tamen exiguam insulam vrbi oppositam, teste Strabone lib. iij. incoluere, quam *Παλαρόπολιν* vocat, hanc Gerundensis Episc. nunc *Medam* vocari auctor est. Quâ tandem relictâ in continentem traiecere.

Vrbs

Vrbs ipsa primò in duas partes diuisa , & duo opida , quorum vnum Græci , alterum indigenæ Hispani habitant; post deuictos verò Pompeij liberos, deductis Romanis Colonis à Iulio Cæsare, triplex effectum est. quæ quia disertè & graphicè à T. Liuiio lib. xxxiv. descripta sunt , lubuit hîc verba eius inferere; loquitur autem de Catonis in Hispaniam aduentu : *Iam tunc Emporiæ , duo opida erant, muro diuisa, vnum Græci habebant à Phoea, unde & Massilienses oriundi, alterum Hispani: sed Græcum opidum , in mare expositum , totum orbem muri, minùs CCC. passus patentem habebat. Hispanis retrahior à mari, trium M. P. in circuitu murus erat. Tertium genus , Romani Coloni ab Diuo Iulio post deuictos Pompeij liberos adiecti , nunc in corpus vnum cõfusi omnes, Hispanis priùs, postremo Græcis in ciuitatem Romanam ascitis. miraretur quis cùm cerneret aperto mari, ab altera parte, ab altera Hispanis tam feræ & bellicose genti obiectos, quæ res eos tutaretur? Disciplina erat custos infirmitatis , quam inter validiores optimè timor continet, partem muri versam in agros egregiè munitam habebant. Vna tantum in eam regionem porta imposita, cuius assiduus custos semper aliquis ex magistratibus erat. Nocte pars tertia ciuium in muris excubabat, neque moris tantum aut legis caussa, sed quanta si hostis ad portas esset, obseruabant vigilias , & circumibant cura. Hispanum neminem in urbem recipiebant, ne ipsi quidem*

temerè

temerè vrbe excedebant : ad mare patebat omnibus exitus. Porta ad Hispanorum opidum versa, numquam nisi frequentes, pars tertiâ ferè, cuius proxima nocte vigilia in muris fuerant, egrediebantur. Causa exeundi hæc erat, commercio eorum Hispani imprudentes maris gaudebāt, mercariq̃ue & ipsi ea, quæ externa nauibus inueherentur, & agrorum exhibere fructus volebant : huius mutui vsus desiderium, vt Hispana vrbs Græcis pateret, faciebat. erant etiam eò tutiores quòd sub vmbra Romanæ amicitiae latebant, quam sicut minoribus viribus quàm Massilienses, ita pari colebant fide. Haftenus Liuius.

Inter antiquas verò Emporitanorum ruinas cippus repertus non inelegans, qui docet Græcos, nec Hispanorum moribus linguaq̃ue pollutos, in Romanorum tandem ditionem celsisse; quam inscriptionem Ambrosio Morales de *Hispania* optimè merito acceptam fero:

EMPORITANI. POPVLI. GRÆCI.
HOC. TEMPLVM. SVB. NO-
MINE. DIANÆ. EPHESIÆ. EO.
SAECVLO. CONDIDERE. QVO.
NEC. RELICTA. GRAECORVM.
LINGVA. NEC. IDIOMATE.
PATRIAE. IBERAE. RECEPTO.
IN.

IN. MORES. IN. LINGVAM,
IN. IVRA. IN. DITIONEM,
CESSERE. ROMANAM.

M. CETHEGO.

ET. L. APRONIO. COSS.

Non procul ab Emporijs M. Cato Hispanos pugna memorabili deuicit, cæsis quadraginta hostium millibus. Cuius abunde Appianus & T. Liuius meminere. Incolæ, teste Strabone, colligendo lino opus agebant: interior ager sparti erat ferax, inutilior verò agri pars iuncum producit, qua de caussa *Iuncarium campum* vocant, à quo crediderim opido *Iuncariæ* nomen inditum. Hac in vrbe olim Episcopalis sedes fuit, nunc verò Gerundensi paret.

CAP. XXXCVII.

Montis Serrati descriptio. Quando D. Virgini hic exstructum templum.

CVM non inter postrema naturæ miracula, hunc montem reponi putem; non omittam, quin situm eius tenui colore, pro ingenij mei ca-

ptu adumbré. Nam si exactè graphiceq. eum describerem, nec naturæ maiestati satisfacerem, nec infantia mea permetteret, & licèt mons hic crebris vndique rupibus ambiatur, ipse tamen longè super omnes eminet, vt procul visentibus egregiè turritæ arcis, monti impositæ speciem præbeat: taliq. ordine rupes hæ dispositæ videntur, vt natura religioso quodam horrore intuentium oculos in se conuertere videatur. Ambitu suo IV. leucas complectitur, nubibusq. se condere ob eximiam altitudinem creditur: vertice eius despectantibus vicini montes camporum imaginem præbent: raræ hîc conualles, plerumque solidæ rupes, & immensæ altitudinis aspreta, atque vbi in rupis verticē magno labore te euasisse putas, statim se offert alia multo altior, in quam vbi per ligneos gradus enixus es, crescere adhuc rupis altitudo videtur: interdum in vastæ magnitudinis murum excurrunt, varijs hinc inde quasi castellis prominentibus: interdum seorsum collocatæ, ceterisq. auulsæ montibus, turrium imaginem præbent, & licèt horredæ procul appareant, frequenti tamen, & viridante arbore confitæ Thessala tempe referūt: & cùm prorsus inaccessæ videantur, humanæ tamen industriæ hîc natura victa cessit. Nam inuijs in locis, summa arte subliceas scalas durissimis scopulis affixere, quæ

cùm multa fronde sunt testæ, aduenis gratissimas umbras aduersus solis æstum præbent. aiunt à montis iugo, sudo cælo, Baleares insulas (vulgò *Mallorca & Menorca*) quæ sexaginta hinc leucis distant, posse conspici. Montis radices alluit amnis, vulgò dictus *Lobregat*; Ptolemæo verò *Rubricatum*: quod sanè nomen potiori ratione illi impositum fuisse puto, quam Arabico sinui, mare rubrum. Fluctus enim toto anni tempore maximè rubent, colorem ab arenis, quas pertransit, mutuatur: annis est inglorius nulliusque pœnè utilitatis: nam hybernis aquis summopere exæstuat, æstate verò agris inutilis, & arescēte pœnè alueo, iners voluitur. Restat vt paucis D. Virginis Cœnobij, illis in locis exstructi originem referam. Quo tempore Barcinonæ Guifrius Pilosus cognomine, III. Comes imperabat anno D. CCC. Lxxx. opiliones qui his in rupibus gregem pascebant, frequenter animaduenterunt diebus sabbathi, post meridiem, in rupem vnā frequens lumen cælo descendere, vnā cum iucundissimo musices concentu. Hoc ostentum vbi parentibus retulerunt, & reipsa illis compertum esset, villæ illius parrocho, & Episcopo Manresæ rem totam significarunt: qui cùm eadem oculis vidissent, frequenti clero, supplicatione indicta, deducente eos insolito quodā & fragranti odore, ad rupem
per-

peruenere, vbi D. Virginis imago, in antro re-
ta fuit (nunc in cœnobio visitur) quā Episcopus
vnā cum clero, Manresam versus magno honore
deferebant: cū vix eò loci ventum, vbi nunc
Cœnobium est, non potuere imaginem loco mo-
uere, sed ibi fixa permanfit: quo conspecto Epi-
scopus ibi ædem vouit Diuæ Virgini, dedicauitq̃.
Cœnobium in medio montis situm est, sub inac-
cessa rupe, vt è propinquo spectantibus, ruinam
minari videatur. nec immeritò. Nam ante paucos
annos, pars præcipitis scopuli diuulsa decidit, vt
nosocomiū protriuerit multosq̃ue in illo ægros
afflixerit. templum est exiguum & obscurius pau-
lo: frequentibus vndiq̃. votiuis tabellis ornatum:
spectantur supra XC. argenteæ lampades: ima-
go D. Virginis colore est subfusco, & intuentium
oculos cælesti quadam maiestate præstinguens.
His in rupibus XII. sunt anachoretarum casæ:
nec admiratione caret, videre inter confragosas,
& asperrimas rupes, domunculam quamdā, tam-
quam hirundinis nidum, scopulo affixam, & quia
pensiles sunt, videntur quouis vento casum mini-
tari: & quod captum pœnè omnem superat, vbi
eo perueneris, videas vno in tuguriolo conclaue,
triclinium, musæum, sacrarium, atrium, hortum,
& quidquid demum concinnis ædibus conuenit,
omnia affabrè facta: nec modicis impensis his in

locis casula vna exstrui potest. Multa de hoc mō-
 te dicenda supersunt, quæ vt orationis satietatem
 effugiam silentio inuoluo, si hoc vnum instar co-
 lophonis addidero. montem hunc natum videri
 ad solitariam vitam degendam: nullæ hîc turbæ,
 nulli importuni strepitus, qui mentem à diuina
 contemplatione possint auocare, solùm hic audi-
 re est iucundos auicularum garritus, ipsasque
 aues videre Anachoretarum manibus intrepidè
 alludere, & cibum capere: miraculorum seriem
 enarrare non est huius instituti, neque paucis ea
 complecti possem.

CAP. XXCVIII.

*De Barcinonis origine reiectæ fabulæ. A
 Carthaginensibus condita. Barcinus & Barcilo-
 na dicta. Fauentia Iulia Augusta cog-
 nominata. Urbis descriptio.*

DE nobilissimæ huius vrbis exordijs varia, in-
 certaque, & magna ex parte fabulosa cir-
 cumferuntur: quibus barbarorum Scriptorum li-
 bri ad nauseam vsque referti sunt. Nonnulli enim
 quibus gnarum, Iberos, Persas, & Phœnices re-
 lictâ Asiâ in Hispaniam commigrasse, cùm legis-
 sent

sent in maculato codice, esse in Caria urbem *Barcillam* (quæ Plinio *Bargyla*, Ptolemæo verò *Bargylia* vocatur) calidè nimis, & incallidè, nec ratione, nec auctoritate vllâ adhibitâ, à *Barcilla* illa *Barcilonâ* originè dixerunt trahere. alij nescio quas duodecim cymbas (vulgò *Barcas* vocant) sibi finxerunt, ex quibus nonam cymbam, quia illa Hercules aduectus fuerat, vrbi nomè dedisse. Qua in re non vulgus solùm, sed etiam Rex Alphonsus, *Prudens* licèt cognomento, imprudenter lapsus fuit, in suis Hispaniæ Annalibus. tantumque hæc putida fabella apud rudem bonarum artium populum valuit, vt publicis vrbis nummis ridicula hæc inscriptio adderetur: BARCA NONA. in Herculis æternam memoriam. Mihi de vrbis initijs hætenus nihil certi liquet, nisi illam Carthaginensibus debere primordia, vt testatur Ausonius ad Paulinum his versibus:

*Quid queror? Eoi que insector crimina monstri,
Occidui me ripa Tagi, me Punica lædit
Barcino, me bimaris iuga ninguida Pyrenæi.*

Non absurdè quidam hariolantur Hamilcarem Barchinum, Hannibalis fratrem exstruxisse *Barcinonem*, cui rei aliquantulum fauere videtur Martianus Capella, his verbis lib. vi. Nam *Pæni* qui fundauere Carthaginem, conditas vbicumque vrbes, amico sibi nomine præsignarūt. Hæc sufficiant de *Bar-*

cinonis origine in tam spissa caligine, exiguo conjecturæ lumine detexisse. Vocatur etiam *Barcinus* à Paulino Epistola ad Ausonium hoc versu:

Cæsarea est Augusta tui Barcinus amœna.

Paulus Orosius lib. i. cap. iij. & Æthicus *Barcilonam* vocant. Eamdem verò Romanorum *Coloniā* fuisse, testis est Plinius lib. iij. his verbis: *In ora autem Colonia est Barcino, cognominata Fauentia.*

Florianus Occampius, non parum hîc lapsus, dum ait Romanos, *Barcinonis* nomen in *Fauentiam* mutasse, nescius cognomen non abolere nomen, sed potius adaugere. Ant. Augustinus Dialogo VII. è nummis antiquis, dicit vocari *Coloniā Fauentiam Iuliam Augustam Barcinonem*: hoc pacto COL. F. I. A. BAR. Vrbs hæc Pomponij Melæ ætate exigui nominis aut famæ fuit: *Inde*, inquit, *ad Tarraconem parua sunt opida Blanda, Illuro, Betullo, Barcino.* Hodie verò ex totius Hispaniæ nobilissimis vrbibus est, & rerum gestarum magnitudine nullis inferior, paucis æqualis. Omnibus enim bellis, quæ in Sicilia, & Italia latè per Aragoniæ Reges, feliciter gesta sunt, naualibus maximè prælijs, magnis copijs interfuere *Barcinonenses*. Quin etiā cum ceteris Catalanis (quorum Metropolis *Barcino* est) felices in Africam & Orientem expeditiones aliquot fecere. & cum terrore Catalanorum ibi vulgatum nomen. Comites

mites habuit, à tempore Caroli Magni, qui Maurorum illam iugo exemit, circa annum D. CCCI. constituto Bernardo quodam Comite, quo extincto successus à Ludonico Pio Imp. Iamfredus (alij *Guifrium* vocāt) à quo series continua Comitum fluxit, donec an. M. CLXII. Aragoniæ regno Barcinonensis Comitatus coniunctus fuit. Sita autem est in agro Laetano, quā mediterranea respicit, loco campestri, multis hinc inde villis conspicua, quæ amœnissimum oculis prospectum præbent, ideoque meritò à Festo Auieno *amœna* vocatur:

Et Barcinonum amœnas sedes ditium.

Nam pandit illic tuta portus brachia

Vuetque semper dulcibus tellus aquis.

Muro cingitur ex laterculo coctili, quem turres opportunis locis dispositæ interstinguunt: fossam habet latam & profundam. Domus sunt passim ex viuo saxo constructæ, quas hortorum amœnitas egregiè exornat. horti ipsi, frequenti myrto, & lauro ornati, iasminio, citreisque intercurrentibus. Plateas habet latas & apertas, & quod in Hispania rarum est, cloacarum beneficio munda. Tempia affabrè exstructa, picturis & altaribus exculta. Mercimonijs in primis floret, & opificum industria. vitri cōflandi adeò periti, vt Venetis vix cedant. Bellica olim laude, dum sub Co-

mitibus fuit, egregiè floruit. Vini, leguminum, & horariorum fructuum ferax admodum; frumenti, oleique indiga, sed defectum vicini abundè suppleant. inter geminos amnes sita est, qui sub incolarum pœnè oculis, mari se infundunt: ab oriente est Betullo, à Melas sic vocatus, hodie truncatâ voce *Besons* dicitur, ab occidua parte Rubricatum. Non procul ab vrbe mons se extollit præruptè altus, vulgò *Monjui*, ab antiquis verò, auctore Gaspare Barrerio, *Mons Iouis*, quo in loco (quod C. Plinius inter Italiæ miracula recenset) inexhausta & perennis est lapicidina, & licèt ad vrbis muros, & ad complures nobilium domus, assiduò hinc materia petatur, adimplet tamen liberalis natura montis illa vlcera, & cicatricem obducit, vt tot annorum decursu, nihil pœnè excisum videatur. Hac in vrbe palmam martyrij adeptus est sanctus *Cucufas*, natione Arabs, attestante Prudentio his verbis:

Barcinon claro Cucufate freta.

Sublatus est hîc per insidias, Gothorum Rex Ataulphus, vnâ cum sex filiis, teste Paulo Orosio. Cuius adhuc aliqua sepulcri vestigia exstant, vnâ cum hoc Epitaphio, licèt imperitæ plebi, vel Herculis vel Regis Hispani esse persuasum sit:

Bellipotens valida natus de gente Gothorum

Hic cum sex natis, Rex Ataulphe iaces.

Rufus.

*Ausus es Hispanas primus descendere in oras,
Quem comitabantur millia multa virum
Gens tua tunc natos, & te inuidiosa peremit,
Quem post amplexa est Barcino magna gemens.*

CAP. XXCIX.

De Gerundæ origine varia. Hodie Girona dicta. Situs eius & descriptio.

QVam vulgò *Gironam* vocant, Plinio, Ptolemæo, Antonino, & Prudentio *Gerunda* est; Florianus Occampius, aliique apud me sublestæ fidei Annalium confarcinatores, à Geryone constructam credunt, ab eo scilicet primùm *Geryonā*, & mutato leuiter nomine *Gironā* dictam esse. Decepti procul dubio à Geryone, qui olim aliquo Beticæ in angulo imperauit: interim meridiana in luce cæcutientes, non vident corruptum esse à *Gerunda*, nec apud vllum spectatæ fidei scriptorem antiquum hoc legi, nisi forsan Annales aliqui Hispaniarum nuper nati hoc prodant, vt & Franciscus Tarapha: quorum apud me diluta nimium est auctoritas; nec dubito quin Florianus ex Ioanne Annio Viterbienfi hæc hauserit, qui mihi instar alterius Palæphati est, ita meras nugas & ger-

ras Siculas blaterat. Is Commentarijs in Berosum *Gerundam* à Geryone conditam fuisse contendit: qua auctoritate innixus, ignoro: nisi, vt passim solet, nudo similitudinis præstigio allectus, neglectis interim peritissimorum Geographorum rationibus. Assurgit *Gerunda* leui tumulo, antiquo muro circumdata, triquetra forma; quod in Geryonis memoriam factum esse fabulantur. Gerundenfis ait, in vnoquoque angulo arcem fuisse singulis fratribus attributam: sed quis est tam ἀγέλας, cui hæc non moueant risum? quasi verò ab Herculis aut Geryonis ætate, non dicam vrbs aliqua, sed murorum rudera aliqua, in hodiernam diem extare potuissent, in Hispania præsertim, tot bellis lacerata, & barbarorum inundationibus vastata: quod si Romanorū opera, multis sæculis Geryone posteriora, quæ & architecturæ peritia, & materiæ firmitate, aduersus quasvis æui iniurias firmissima videbantur, ita vt nec ipsa

Possset diruere, aut innumerabilis

Annorum series, & fuga temporum:

funditus præne perierunt, & citra historias ex hominum memoria sublata essent, quid de antiquioribus dicemus? Hanc urbem Ptolemæus, inter Tarraconensis prouinciæ populos *Aethetanos* collocat. Alluitur flumine *Vnda* vocato, vulgò verò *Onhar*: immiscet se alteri flumini ab incolis voca-

to *Ter*, cuius etymologiam deducunt etiam à trigemino Geryone. Mihi videtur hic esse amnis, qui Pomponio Melæ *Thicis* dicitur, à quo corruptè *Ter* nunc dicitur. Cuius verba sunt: *Aceruaria est proxima rupes, quæ in altum Pyrenæum extrudit, dein Thicis flumen ad Rhodam, Clodianum ad Emporias.* Et licet vrbs parua sit, opificum tamen, mercatorumque numero est locuples: spectatur hîc in Cathedrali ecclesia altare, vnà cum imagine ex argento fusili, varijs vtriusque testamenti emblematis insculptis: frontispicium verò lateraque altaris auro, multisque gemmis coruscant. D. Felicis corpus hac in vrbe spectatur, vt testatur Prudentius:

Parua Felicis decus exhibebit

Artubus sacris locuples Gerunda.

D. etiam Narcissi martyris hîc reliquiae seruantur in cuius honorè plurima miracula Deus fecit. sufficiet vnum, sed memorabile, adduxisse. Quo tempore Petrus IX. Aragonū Rex & Cataloniae Comes rerum potiebatur, Galli, auspicijs Philippi III. Regis (Marineus Siculus lib. xi. sub Carolo Siciliae Rege hoc accidisse refert) Gerundam vi occupant, qua victoria elati, humana pariter & diuina spernentes, eò impietatis venerant, vt templum stabuli loco ducerent. Qua de caussa, Deo vindice, magna copia muscarum ex viridi candi-

canti-

cantibus alis, ex sepulcro D. Narcissi erupit, quæ lethali aculeo Gallos, multo celerius ipsa peste necabat. Quamobrem amissâ magnâ copiarum parte, coacti fuere urbem deserere. Rex ipse æger Emporijs diem clausit, alij verò Perpiniani obijisse tradunt. Sedem habet Episcopalem, cui olim præfuit Ioannes Margarinus, vnde passim Gerundensis Episcopus vocatur. Anno Domini D. xvij. celebratum hîc Concilium VII. Episcoporum, sub illius vrbis Præsule Fortuniano, vt auctor est Ioannes Vaszus in Chronico.

CAP. XXC.

Pyrenæi montes. De etymo varia.

GAlliam ab Hispania Pyrenæi montes dirimunt, geminis promontorijs, in duo maria procurrentibus: in mediterraneum quidem *Templo Veneris*, priscis Geographis vocato, vulgò *Cabo de Creus*: in oceanum verò Gallicum *Olearsone*, hodie corrupto nomine *Oiarco*: frequentes hinc inde, in Hispaniam & Galliam montes hi ramos spargunt; inter vtrumque mare LXXX. circiter leucarum spatium occupant. Hac in parte Hispania seipsa angustior est multo, hinc verò, quò magis in septentrionē, & occidentem, ad oceanum

& à meridie in mediterraneum mare excurrit, eò latior euadit; insultante hinc inde pelago, præter-quàm quàm Pyrenæi Hispaniam claudunt. qua de caussa Paulo Orosio *Peninsula* vocatur, Straboni verò quam optimè bubulo corio assimilatur, ita vt quàm Pyrenæos spectat, caput referat, reliqua verò corpus, qua se inter duo maria exporrigit. nonnulli, inter quos Beuterus, opinati sunt hanc montiū seriem vniuersam non deberi Pyrenæos appellari, sed diuidi in Antipyrenæos, & Pyrenæos; sed non ita facile à recepta priscorum Geographorum opinione recedendum. Nomen autem Pyrenæi à Græco nomine πῦρ videtur deriuatū, quòd olim iniecto ibi ab armentarijs igne confla-grarunt, teste Diodoro Siculo lib. v. alijsq̃. Geo-graphis, & Aristotele libro De mirandis ausculta-tionibus: *In Iberia, inquit, combustis aliquando à pastoribus siluis, calenteq̃ue ignibus terra, manifestum argentum defluxisse, cumq̃ue postmodum terramotus superuenisset, eruptis hiatibus, magnam copiam argenti collectam, atque inde Massiliensibus prouentus non vul-gares obtigisse.* Alij verò dicunt nomen fluxisse à Pyrena virgine, ab Hercule vitiata, cuius ita me-minit Silius Italicus:

*Pyrene celsa nimborum verticis arce,
Diuisos Celtis, latè prospectat Iberos;
Atque æterna tenet magnis diuorcia terris:*

Hospitis

*Hospitis Alcida crimen, qui sorte laborum,
Geryonis peteret cum longa tricoloris arma,
Possessus Baccho, sæua Bæbrycis in aula
Lugendam formæ sine virginitate reliquit
Pyrenem.*

Defletumque tenent montes per sæcula nomen.

Sed hoc à Plinio pro fabuloso rejicitur: ridiculum verò est, quod Annales Regis Alphonsi circa Pyrenæi nomenclaturam adducunt. Aiunt enim à *Pyrrho* Hispaniarum rege Pyrenæos vocatos fuisse, cum primo *Cetubales* à Tubale vocarentur. sed præ vetustate putida est hæc opinio, proinde nugatoribus hanc relinquamus, quibus ne mica quibus salis est, ut hanc conseruent. Isidorus Orig. lib. xiv. cap. viij. Pyrenæum dicit nuncupatum à crebris fulminum ignibus: quod ferè celsi montes fulgure petantur, unde & aptissimè Claudianus lib. de laudibus Serenæ:

— Pyrenæique sub antris,

Igneâ fulmineis legere Ceraunia nympha.

Aiunt enim naturæ sagaciores indagatores gemmam Cerauniam, locis fulmine ictis tantum reperiri (quales Pyrenæi montes feruntur) unde & illi nomen. hinc Marbodeus lib. De gemmis.

Illis quippe locis, quos constat fulmine tactos,

Iste lapis tantum reperiri posse putatur.

Vnde Κεραύνιος est Græco sermone vocatus.

Refert

Refert Strabo lib. iij. Pyrenes latus, quod in Hispaniam vergit frequentibus arboribus confitum esse, quod verò Galliam spectat, nudum pœnè aridumque spectari.

CAP. XCI.

Rhuscinò olim Galliæ annexa. Perpinianum veteribus ignotum. Opinio Anny Viterbiensis explosa. Descriptio eius.

QVI Hispaniæ terminus, potuisset & operis mei esse Pyrenæus: quidquid enim terrarum est citra illum, Gallijs olim annumerabatur. Sed quia Rhuscinonensis comitatus, ab aliquot sæculis Hispaniæ annexus, & non ignobilis est: iure videbor extra ordinem pauca de illo dicere. Functō Gerardo Comite Rhuscinonensi, absque herede anno M. C. LXVIII. ad Alphonsum Nonum Aragoniæ regem deuolutus est. Cœpitq. tum primum in publicis monumentis vocari Rex Aragoniæ, Rhuscinonis Comes, & Prouincię Marchio. Sed Ioan. II. Arag. Rex ærarij inopia compulsus, Ludouico XI. Gallorum Regi trecentis aureorum millibus hunc comitatū oppignorauit: quem Carolus VIII. anno M. CCCC. xciv. Ferdinando

do Regi iterum restituit. Nomen autem illi dedit antiqua Romanorum Colonia, quæ *Rhuscino Latinorum* vocabatur, quam Athenæus, & Geographi, in Gallia Narbonensi collocant, licet nunc à multis sæculis Catalonia sit annexa: Pomponius Mela describens Gallias à flumine Rheno ad Pyrenæos usque, hæc de Rhuscinone prædicat: *Inde est ora Sardonium, & parua flumina The-
lis & Thicis, ubi accreuere persæua: Colonia Rhuscino,
vicus Iliberis, magnæ quondam urbis, & magna-
rum opum tenuæ vestigium.* Strabo pœnè eadem, mutatis urbis: *E Pyrene quidem Rhuscino & Ilibe-
ris amnes exeunt, è quibus uterque eiusdem nominis vr-
bem habet.*

Solebat hæc urbs esse, ubi nunc castellum quoddam est, media leuca à Perpiniano, circa quod, multa rudera, & ædium præscarum passim dissecta vestigia videre est. Vnde & hodierno ævo arx Rhuscinonensis vocatur. Incolæ etiam opinantur, eo loci quondam non incelebrè urbem fuisse, in cuius locum *Perpinianum* successisse putant. Nomen recens, nec penes Geographos celebratum; quæ res nonnullos mouit (inter quos Pet. Oliarius Valentinus) *Perpinianum* olim *Rhuscinonem* fuisse. Ioanni verò Margarino Gerundenfi Episcopo, longè aliter visum: quippe cùm nomen *Perpiniani* nusquam apud exploratæ fidei Geographum

graphum reperisset, in eum impegit scôpulum, vt *Perpinianum* credat urbem esse, quam in Itinerario Antoninus *Stabulum* vocat, ego sanè crediderim eum, dum hæc scriberet, aliud egisse Antonini locum legendo, nullâ scilicet distantiae habitâ ratione: siquidem is numerat à Salsulis *Stabulum* vsque xxxviii. M. P. qui XII. leucas conficiunt, cùm Salsulis *Perpinianum* tres tantùm sint. Castellum verò eò loci esse, vbi olim *Rhuscino*, docet manifestè Antoninus: siquidem Narbone *Rhuscinonem* XL. M. P. numerat, qui X. leucæ sunt, quot Narbone ad *Rhuscinonis* castellum numeramus. Refert P. Ioannes Mariana lib. ix. an. M. LXVIII. opera Guinardi Ruscinonensis Comitis, conditum esse *Perpinianum*.

Vrbs hæc tribus leucis trans Pyrenæos montes sita est, loco plano, nisi quòd meridiem versus incliuum leuiter assurgat, cui arx imminet. Alluitur amne Theli, cuius pars intra muros recepta est. Post vltimam Gallorum obsidionem, anno c. l. l. xliij. muros egregiè communierunt incolæ, additis nonnullis propugnaculis. Lanificij hîc frequentes opifices: vrbs ipsa citra iniuriam inter amcenissimas totius Hispaniæ reponenda; licèt aura minima de causâ maximas mutationes patiatur, & vt vniuersa Narbonensis prouincia, sæuis ventorum turbinibus obnoxia. Magna in ve-

neratione hîc habentur D. Honorati Episcopi Arelattensis reliquiæ, in Carmelitarû monasterio repositæ, tum etiam corpora SS. Iuliani & Basilissæ. Hoc in Comitatu Episcopalis est vnica vrbs *Helna* nomine, Diuo Hieronymo verò in appendice ad Chronicon Eusebij Cæsariensis, *Helena* vocatur: vbi de Imperatore Constante loquitur: *Constans non longè ab Hispania, in castro, cui Helenæ nomen est, interficitur.* Eutropio etiam eodem nomine appellatur, his verbis: *Obijt Constans, non longè ab Hispanijs, in castro, cui Helenæ nomen est, anno imperij XVII. Ætatis verò suæ XXX.* Episcopus idem Gerundensis putat reginam Helenam, Magni Constantini matrem hanc urbem exstruxissè, aut nepotem eius Constantem in eius memoriam; sed vt solet, sine auctore id asserit.

Ad Perpinianum redeo: Beuterus ita dictum putat à $\pi\sigma\rho$, incendio scilicet in Pyrenæis montibus à pastoribus excitato, ductus in errorem à Ioanne Annio Viterbiensi, qui incendium illud auspicatum fuisse ab illa parte fingit; sed iuuabit eius nugas in medium adducere: *Regio, inquit, proxima his mōtibus, corrupta nunc Perpiniana dicitur; cū scribenda sit & dicenda Pyrepiniana, id est, incendiij & conflagrationis ostium, quia ibi cœpere pastores ignem arboribus inijcere. nam $\pi\upsilon\sigma$ ignis; Pini verò, os originis dicunt etiā Phœnices, vt testatur Talmudistæ: quin etiam*
hor

hoc addunt, ut *Pi*, os & origo dicatur, *Ni* verò & *No*, magni nominis & famæ interpretetur. hinc *Pyripini*, combustionis origo magni nominis, à quo *Pyrepiniana* regio scribi debet, nisi forsan quod vſitatissimum est in compositione illa, per *synæresim* & *synecpam* *E* littera abijciatur, & dicatur rectè *Pyrpiniana*. Hactenus ille, dum deliramenta sua vult rata esse, *Phœnices*, *Hebræos*, & *Græcos* in subsidium non solum vocat; sed inuitos obtorto collo trahit, ut scilicet

Desinat in piscem mulier formosa superne.

Auctor est *L. Marineus Siculus*, dum *Ludovicus XII. Gallix Rex*, *Perpinianum* obsidione premeret arctissima, ciues ad extremam compulſos penuriam, consumtis etiam immundis animalibus, primò hostium corporibus, tandem & suorum pro dapibus vſos esse. quid illis, si acerbitatem casus intuearis, miserius? si constantiam respicias, fidelius? qui ne à Rege suo desciscerent, extrema pati voluerunt potius, quàm honestè se victori tradere.



CAP. XCII.

*Salsulæ hodie Salsas. Fontis ibi descriptio.
De piscibus fossilibus multa.*

AR X hæc hodierno die *Salsas*, antiquitus *Salsulæ* vocabatur: meminit eius in Itinerario Antoninus, is siquidem Narbone *Salsulas* XXX. M. P. numerat, qui septem magnis leucis respondent, quæ hodie numerantur. Pomponius Mela in Galliæ Narbonensis descriptione fontis meminit, quem *Salsulas* vocat, qui leuca tantum ab hac arce distat: priscis scriptoribus non incelebris, nostris vero recentioribus omnino præteritus, & quia res est admiratione digna, nollem etiam mihi obliuionis notam, ut ceteris, iniuri: proinde fusius paulò de illo in præsentiarum agam. De eo sic Pomponius Mela: *Ultra Leocata litoris nomē, & Salsulæ fons, non dulcibus, sed salsioribus, quam marinæ sint aquis defluens, iuxta campus minuta arundine graciliq̃ue peruiridis, ceterum stagno subeunte suspensus, id manifestat mediâ pars eius quæ abscissa proximis, velut insula natat, peiliq̃ue se aq̃ue attrahi patitur, quin & ex ijs quæ ad imum perfossa sunt, suffusum mare ostenditur, vnde Graijs nostrisq̃ue auctoribus, veri ne ignorantia, an prudenti.*

dentibus etiam, mendacij libidine visum est tradere posteris, in ea regione piscem è terra penitus erui, qui vbi ex alto hucusque penetrauerit, per eius foramina ictu captantium interfectus extrahitur. Athenæus verò lib. viij. ex Polybij opinione eadem pœnè refert, licèt alijs verbis: Polybius, inquit, XXXIV. Historiarum libro, vltra Pyrenem ad Narbonem fluium, campum pertinere ait, quem Illiberis, & Rhuscino intersecant, eiusdem nominis vrbis præterfluentes, quas incolunt Celtæ, in hoc campo pisces eos, qui fossiles vocantur, erui tradit. Campus ipse exilis parumque fecundus est, multo tamen gramine letus, subtus verò cum arenosa duorum vel trium cubitorum altitudine ea terra sit, ex proximis fluminibus aqua influit, cuius tortuosos atque multiplices cursus cum pisces cibi gratia sectentur (avidissimè enim graminis radices dicuntur appetere) effecerunt, vbi vniversus ille ager, subterraneis piscibus sit referius. Aristoteles verò his omnibus antiquior, libro De mirandis auscultationibus, circa locum, vbi fons hic erumpit, non solùm longè à verò deuiauit, sed alia etiam de hac piscatura diuersa tradit: In finibus Mafsiliensium, inquit, circa Ligusticam lacus esse fertur, qui ebulliens effususque, piscium multitudinem immensam, verique fidem superantem eijciat; ceterum flantibus Etesijs, tantum puluerem concitari, vt coacernata in lacum humo sicca, superficiem obtegat, in formamque areæ redigat, vnde indigenis licet, pertusa sic-

citare, in triuijs quoscumq. pisces citra negotium eximere. Strabo etiam lib. iv. idem manifestè asserit, his verbis: Iuxta Ruscinonem, inquit, lacus est & ager quem alluit paulum supra mare refertus salinis; habet & effossiles Cestrias pisces. nam si quis duos aut tres fodiat pedes, & in limosam aquam fuscinam demiserit, piscem eximia magnitudinis fixum penetrat. Quod ne cui forte mirum videatur; non vno id loco accidere testatur Theophrastus libello De piscibus. refert enim circa Heracleam, & alibi in Ponto & circa Tium Ponti, Milesiorum Coloniam, fossiles reperiri pisces. nascuntur verò illi circa fluuios & aquosa loca, quæ cum siccantur paulatim, pisces subinde humorè sectando terram subeunt. Quod verò in Paphlagonia contingit, peculiarem & abditā rationē habet. Illic enim multos & bonos pisces effodi aiunt, cum neque restagnent ijs in locis amnes, miraturq. & ipse gigni sine coitu. Eadem pœnè ex Theophrasto narrat Plinius lib. ix. cap. lvij. Lepidè hac de re Seneca lib. iij. Quest. Nat. ad Lucilium: Theophrastus affirmat, pisces quibusdam locis erui. Multa hoc in loco tibi in mentem venere, quæ urbanè in re incredibili fabulosaque dicas; non cum retibus aliquem aut cum hamis, sed cum dolabra ire piscatum. Exspecta ut aliquis in mari versetur, quid est autem quare pisces in terram non transeant, si nos maria transimus? T. Liuius prodigij loco narrat lib. liij. in Gallico

lico agro, quàm induceretur aratrum, sub existentibus glebis emerfisse pisces. Iuuenalis idem vt valdè rarum, & instar porteti Satyra XIII. esse dicit:

— *miranti iam sub aratro*

Piscibus inuentis, & fetæ compare mulsæ.

Sed nihil æquè mirandum duco quàm quod Appuleius Apologia pro se prima dicat, in Getuliæ mediterraneis mōtibus pisces, per Deucalionis diluuiâ reperiri. Fossiles verò pisces & hoc æuo quandoque inueniri referunt Rondeletius lib. De piscibus, & Georgius Agricola lib. De animantibus subterraneis: sed ad carceres redeo.

Fontem hunc à *Salsulis* non tota leuca distare, oculatus testis refert Gaspar Barrerius: cuius aqua falsâ est, hyberno tempore percalida, æstiuo verò gelida; adiacet huic fonti campus multa humiliq. arundine & aquaticis herbis frequens (vt notauit Mela) & continua aquarum ex hoc fonte emanantium illuuiæ vdus, hinc verò per canales quosdam in vicinum lacum aqua omnis se exonerat. Fons verò piscosus admodum est. nam & hyberno tempore aquæ calore, æstiuo verò grato eius frigore allekti; gregatim huc pisces confluunt. Arx verò loco campestri sita est, egregiè munita, & propugnaculis instructa, vt hostiles impetus contemnere videatur. Tali verò arte propugnacula hæc disposita sunt, vt non vna, sed plures ar-

ces videantur. Sublicijs enim pontibus ita sunt distincta, vt vno capto nihil damni hinc reliqua percipiant.

CAP. XCIII.

*Cassiterides stanno nobiles. De situ illarum
dijquisitio. Plinij lectio controuersa. Oestrymni-
des Festo. Hesperides Dionysio Alex.
dictæ. Festus Auienus correctus. Vbi-
nam hodie sint.*

Illustrata hætenus Hispaniæ continentis potissima pars : nunc æquum est, inter fluenta emergentes terras, (quæ quòd in *salo* sunt, *insulae* vocantur) illustrare, sed cum delectu, & nobiliores tantum, quas præterire iniquum esset. *Cassiterides* primò occurrunt, stanno plumboque nobiles, vnde & illis nomen (*κασσίτερος* enim *stannum* est.) Cl. Ptolemæus in occiduo illas Oceano statuit, numero decem; Plinius verò lib. iv. cap. xxij. *Ex aduerso*, inquit, *Celtiberiæ*, complures sunt *insulae*, *Cassiterides* Græcis dictæ, à fertilitate plumbi. Sed quo pacto ex aduerso *Celtiberiæ*? si illa non solum mediterranea est, sed etiam in orientem porrecta, nimis diuerso situ à Ptolemæi mente. Vero prior Pomponij Melæ opinio, lib. iij. cap. vi. *In Celticis*,

Celticis, inquit, aliquot sunt insulæ, quas, quia plumbo abundant, vno omnes nomine, Cassiterides appellant.

Celtici enim populi cognomine Nerie, vel auctore Plinio lib. iv. cap. xx. circa promontorium *Celticum* habitât, quod *Artabrû* & *Nerium* dictum, & in Occiduum Oceanum procurrit: vnde Ferdinandus Nonius Pintianus, non *Celtiberiæ*, sed *Celticorum Neriarum* apud Plinium legendum monet. Sed cum Iulius Solinus Plinio adstipuletur, qui has insulas aduersus Celtiberiæ latus spectare dicat, nihil contra fidem omnium librorum innouare ausim: nisi quis dicat vtrobiq. mendum esse. Prefertim cum & Diodorus Siculus lib. vi. cap. ix. à Ptolemæo & Mela parum dissentiat: *Supra*, inquit, *Lusitaniam plurimum stannum effoditur in insulis Oceani Iberiæ proximis, quæ à stanno Cassiterides nominantur.* Adde Strabonem lib. ij. & iij. qui has insulas *Artabris* opponi scribit, nemo verò Celtiberiæ. Insulæ hæ à Festo Auieno *Oestrymnides* vocantur, vt etiam suspicatur Ortelius, quas stanni plumbique diuites facit his versibus:

*In quo insulæ sese exerunt Oestrymnides
Laxe iacentes, & metallo diuites
Stanni, atque plumbi, multa vis hîc gentis est,
Superbus animus, efficax solertia,
Negotiandi cura iugis omnibus.
Nolusque cumbis; turbidum latè fretum*

*Et belluosi gurgitem Oceani secant.
 Non hi carinas quippe pinu texere
 Facere morem, non abiete ut usus est
 Curuant faselo. Sed rei ad miraculum
 Nauigia iunctis semper aptant pellibus,
 Corioque vastum sæpe percurrunt salum.*

Sed vnde dictæ *Oestrymnides* hæ insulæ, mihi æquè ignotum, ac pleraque alia nomina, quæ solus hic Poëta vsurpat. Sed emaculandus mihi hîc obiter est. vbi enim habet, *Nolusque cumbis*, legendum

*Nullisque cymbis turbidum latè fretum.
 Nam quod Guilelmus Camdenus legit
 Non vsque nauibus,*

& præter auctoris mentem est, & nimis violenta & à vero aliena est lectio. Poëta enim innuit, illos omnes esse negotiandi studiosos, nec nauibus uti, quæ hac Camdeni lectione tolluntur. Emen-
 dandus etiam videtur, vbi habet:

*Non hi carinas quippe pinu texere
 Facere morem, non abiete ut usus est
 Curuant faselo.*

Atque ita legendum putô:

*Non hi carinas quippe pinu texere
 Acerève norunt, non abiete ut usus est
 Curuant faselos.*

Innuvit enim illos ignorare naues ex pinu, acere,

aut

aut abiete texere, seu faselum curuare, sed ex pel-
libus aptare nauigia. Vnde nec Camdeni lectio
probari potest, quæ habet:

Fecere remos, non abiete ut usus est.

Siquidem *pinu texere*, & *fecere remos* incongruum
sensem efficere, cuius erudito patere putem. De
coriacis verò nauigijs loquitur Plinius lib. vij.
cap. lvi. his verbis: *Etiam nunc in Britannico Oceano*
viles naues corio circumfute fiunt.

Dionysius Alex. in περιήγησι has insulas vocat
Hesperidas, quas statuit non procul à promonto-
rio sacro, ab aliquibus vocato *caput Europæ*:

Νήσους δ' ἑσπερίδας τοδὶ κασιτέροιο γενέδλη
Ἀφνειοὶ νάυστιν ἀγαύων πᾶδες ἰβήρων.

Subter & Hesperidum flammæ felicibus oris

Magnanimi dites nati dominantur Iberum

Eustathius certè Scholiastes confirmat has esse
insulas *Cassiteridas*, à Poëta vocatas *Hesperidas*,
stanno fertiles. Soli olim Phœnices has nouerant,
teste Strabone, ceteros mortales celabant, lucri
caussa, quod ex stanno plumboque illis veniebat:
vnde cum Romani summo studio illarum notitiam
indagarent, cursum naucleri cuiusdam obserua-
runt, qui, ne insulas detegeret, nauem in limosa
loca & breuia sponte impegit, ubi & Romani nau-
fragium fecerunt, ipse verò incolumis enatauit,
& ex publico ærario amissi oneris pretium illi so-
lutum

lutum fuit. sed frequenti tandem nauigatione insulas adiere. Missusque aduersus incolas P. Crassus, sed cum miti illos ingenio, paci que deditos reperisset, effodiendi ipsis metalla industriam aperuit. Plinius lib. vij. cap. lvij. refert Midacritum quemdam, primum ex Cassiteride insula plumbum asportasse. Strabo sub finem lib. iij. & in Dionysium Alex. Eustathius, incolas esse *μεταχλαίνες* aiunt, indutos talaribus tunicis, cum baculis ambulantes, persimiles tragicarum furiarum, & Nomadum instar, ex armentis victum quærere. Sed lubet inquirere, quo loco nostra tempestate *Cassiterides* sint, præsertim cum de hoc egregiè variant auctorum sententiæ. Abrahamus Ortelius suspicatur esse *Britannias*, plumbo stannoque hodie nobiles. Sed non placet vel eo nomine, quod *Cassiterides*, inter Britanniam & Hispaniam auctores pœnè omnes statuunt, & ipse Dionysius Alex. statim post *Cassiterides*, fusè prosequitur *Britanniæ* descriptionem: adde non decem has esse, ut ait Ptolemæus, sed geminas tantum. Guilielmus Camdenus credit esse insulas *Sylly*, quas & nautarum vulgus vocat *Sorlinges*, tum quod Artabris, seu Gallæciæ sint oppositæ, vergantque in Aquilonem; tum quod stanni venis abundant, quæ ut omnia *Cassiteridibus* congruunt, ita etiam numerus negat illas esse. refert enim illas esse CXL. numero, cum

Cassi-

Cassiterides decem tantum sint, ex quibus etiam incultæ aliquot, teste Strabone, præterquam quòd Syllý insulæ propiores multo sint Britannię, quàm Hispaniæ. Ego hæc in re, lubens Ortelij opinionioni subscribam, qui insulas Syllý esse Iulij Solini *Silurum* insulas affirmat: quarum & Corn. Tacitus in Iulij Agricolæ vita sic meminit: *Silurum colorati vultus, & torti plerumque crines, & positi contra Hispaniam, Iberos veteres traiecisse, easque sedes occupasse fidem faciunt.* Gemma verò Frisius mari obrutas latere credidit *Cassiterides*, & nomen tantum posteris trāsmissum. sed quia facilius est singulorū opiniones conuellere, quàm quid certi, in re tam anticipi statuere, dicam cum Herodoto in Thalia, mihi *Cassiterides* ignotas esse, vel illas esse, quæ non procul à Flavio Brigantio, seu *la Crunna* distant, quarum præcipua *Cyzarga* vocatur, teste Ioanne Oliuario in Pomponium Melam, quæ hodie incultæ & neglectæ iacent, vel quòd stanni vena defecit, vel quòd copia tot ditissimarum insularum, ab Hispanis vt viliores spernantur.



CAP. XCIV.

Pityusæ insulæ, Ebusus & Ophiusa. Serpentibus infesta Ebusus. Eiusdem nominis vrbs. Colonia Carthagenensium. Isidorus emendatus. Plinij lectio defensa contra Suritam.

Mediterraneum mare intrantibus, geminæ se offerunt insulæ, à frequenti pineo frutice dictæ *Pityusæ*, postea *Ebusus* vtraque vocata: dehinc vna vocata est *Ebusus*, altera verò *Ophiusa*, quæ & *Colubraria*. Distant à Balearibus CCC. stadijs, vt Antonini fert Itinerarium, vt verò Plinius lib. iij. cap. v. septingentis : subiacet verò *Ebusus* Maiori insulæ Balearidum, vt refert in Cosmographia sua *Æthicus*. De vtraque verò insula sic Strabo lib. iij. *Pityusæ*, inquit, longius in pelago existentes quàm *Gymnesiæ*, declinantur in occasum, è quibus vna quidem vocatur *Ebusus*, urbem eiusdem nominis continens, circuitus insulæ stadiorum CCCC. latitudo inæqualis, vti & longitudo: prope iacet insula *Ophiusa* longè minor & deserta. Cur verò deserta sit, serpentum facit copia, aduentibus perniciosa, nisi, vt Mela sub finem lib. iij. Ingressis eam, intra id spatium, quod *Ebusitana* humo circumsignauerunt, sine pernicië tuta est; iisdem illis serpenti-

pentibus, qui solent obuios appetere, aspectum eius pulueris, aliudve, quod verius, procul & cum pauore fugientibus. Vnde & Plinius lib. iij. cap. v. *Ebusi terra serpentes fugat, Colubraria parit: ideo infesta omnibus, nisi Ebusitanam terram inferentibus.* Vocatur autem hodie *Mencolobrer*, vt auctor est Ambrosius Morales, qui ait illos falli, qui vicinam illi insulam *Dragoneram Ophiusam* credunt. *Ebusus* verò, interfluente tantum freto, ab *Ophiusa* separata; quæ à Dionysio Alexandrino, & ab Eustathio eius Commentatore *Βούσος* vocatur, prorsus contrarijs dotibus exornata: siquidem teste Pomponio Mela citato loco, *Frumentis tantum non fecunda, ad alia largior, & omnium quæ nocent animalium adeo expers, vt nec ea quidem, quæ de agrestibus mitia fiunt, aut generet, aut si inuecta sunt sustineat.*

Plinius etiam, *Nec cuniculos, inquit, Ebusus gignit populates Balearium messes.* idem asserit lib. viij. cap. lvij. Diodorus verò Siculus lib. vi. cap. v. vires ibi & lanam prouenire, palmisquæ fertilem esse refert. Plinius autem & ficus ferre lib. xv. cap. xix. dicit: *Honos laudatas seruat [ficus] in capsis, in Ebuso insula præstantissimas amplissimasquæ, mox in Mar- rucinis.*

Saccarum etiam, rarum olim felicitatis donum tulisse innuit Statius Papinius Siluarum lib. i. hoc Hendecasyllabo:

Quod

*Quod ramis pia germinat Damascus
Et quas præcoquit Ebofia cannas
Largis gratuitum cadit rapinis.*

Nihil enim moror illos, qui contra omnium librorum consensum, *Hypasita*, substituunt. Compascuam verò pecori etiam fuisse, ostendit Festus Auienus in sua orbis terrarum descriptione:

Ac dilecta vago pecori consurgit Ebusus.

Vrbem habuit cognominem, & Carthaginensium Coloniam, quæ CLX. annis post conditam Carthaginem, teste Diodoro Siculo deducta fuit; vnde Silius Italicus lib. iij. *Phœnissam* vocat:

Iamq̃, Ebusus Phœnissa mouet, mouet Artabrus arma. Liuius etiam lib. xxviii. Magonem tota Hispania pulsum, *Ebusum*, vt ad sociam urbem traiecisse dicit: *Inde nauibus ad Pitryusam insulam, centum millia fermè à continenti (Pœni tunc eam incolebant) traiecit, itaque classis bona cum pace accepta est: nec commeatus modò benignè præbiti, sed in classis supplementum, iuentus, armaque data.* Firmam autem & validam fuisse urbem idem asserit lib. xxij. Plinius verò fœderatam ciuitatem fuisse auctor est. Distat autem à Dianio Ebusus, teste Plinio D. CC. stadijs, licèt Hieronymus Surita, ex Isidoro lib. xiv. Originum cap. vi. septuaginta vult substituere, nixus etiam ms. Plinij exemplari, sed à vero deuiare palam est. Nam præterquam quòd Iulius Solinus

cap.

cap. xxvi. Plinio subscribat. accedit T. Liuius, qui lib. xxviij. dicit fermè centum millia passuum à continenti distare : & bene, nam huic numero explendo centum tantum stadia defunt. Adde his Diodorum Siculum, qui diei vnus tantum navigatione ab Iberia abesse dicit. quare retinendam puto Plinianam lectionē, & Isidori locum emendandum, & *Septingenta* stadia, pro LXX. substituendum. nam cum LXX. stadia vix X. M. P. explent, ipse visus longius à continenti distare iudicabit. Proinde ita legendum censeo in Isidoro : *Ebusus insula Hispaniæ dicta, quod à Dianio non procul sit quasi Ebozos, nam septingentis stadijs ab eo distat.* Sed quid sibi vult etymon illud *quasi Ebozos*? Delio opus habet natatore: nisi placeat legere, quasi *ἐπιδοτα*, quod videlicet Dianium statim excipiat & subsequatur, nam Græcam vocem ætatis lapsu corruptam esse : & in *Ebozos*, aut, vt alij Codices præferunt, *Abozos* migrasse, nihil certius est. Sed Lectorum iudicio coniecturam hanc expono. Insula hæc hodie *Yuiça* vocatur, clara inexhausta & perenni falis copia, quæ non solum Hispaniæ, sed & vicinis prouincijs sufficit. Hac in insula antiqua hæc reperta est inscriptio:

IMP. CÆS.

M. AVRELIO. CARO.

PIO. FELICI. INVICTO. AVG.

PONT. MAX. TRIB. POT.

P. P. COS. II. PROCOS.

ORDO. EBVSII.

D. N. MER.

CAP. XCV.

Baleares insulæ cur Gymnesiæ dictæ. Antonini lectio stabilita contra Smilerum. Vnde nomen. Funditores optimi. Latitudo primi vsi. Mores & ritus.

IN Mediterraneo mari, inter Tarraconis & Sueronis maritima, geminæ iacent insulæ *Baleares*, vel *Balearides* olim dictæ, nunc *Mallorca* & *Menorca*, à Græcis verò γυμνήσιαι vocatæ. Vel quòd æstate nudi incederent incolæ; vel quòd facto naufragio Bæotorum aliqui nudi huc appulerint,

ut Tzetzes in Lycophroné, & Eustathius in Dionysium Alexandrinum innuunt. Harum vna *Maior*, altera *Minor* dicebatur. Illa teste Plinio lib. iij. cap. v. *C. M. P. longitudine, circuitu verò ccc. LXXX. patebat: opida habebat Ciuium Romanorum, Palmam & Pollentiam, Iatina, Cinium & Cunicum, & foederatum Bochri fuit, ab ea XXX. M. P. distat minor, longiudine LX. circuitu verò CL. M. P. ciuitates habet Iamnonem, Ianiferam, Magonem. Haftenus Plinius: à quo tamen diuersi sunt Ptolemæus, Strabo, & Pomponius Mela lib. I. qui tantum in *Maiori* insula, Palmam & Pollentiam, in *Minori*, Iamnam & Magonem collocant. Antonini Itinerarium, cur *Maiorem* Balearium *Columbam* vocet, *Minorem* verò *Nuram*, me fugit. Vnde & Smilerum in Annotationibus suis credo reiecisse priscam lectionem, & velle legere *Insula Colubraria*, & postea separatim, *Insula Balearis Maior*. Sed non persuadet. debuisset enim hoc pacto etiam emendasse sequentia: *Insula Nura Balearis Minor*. Adde in Smileri lectione deesse stadiorum numerum, quem nefas est in Itinerario præterijisse, quare retinendam veterem lectionem puto. T. Liuius lib. xxviij. auctor est maiorem Balearidum armis virisque copiosiore, Strabo verò magnitudine tantum à se mutuo differre, virtute autem incolarum, & soli bonitate æquales esse; portus habet*

capaces & satis tutos, nisi brevia aliqua ostijs vicina essent, seu, vt auctoris verbo vtar, χειράδεis essent. Vnde & Lycophronē χειράδεis vocasse has insulas crediderim. Vocatæ autem sunt *Baleares*, vel à Baleo Herculis comite, vt auctor est L. Florus Liuianæ Epitomes lib. lx. vel potius à βάλλειν, id est, *Iacere*, quòd optimi funditores ab omni æuo fuerint, adeò vt Vegetius lib. i. cap. xvi. *Primos illos fundis vsos fuisse* scribat. Strabo tamen à Phœnicibus hanc artem edoctos scribit, cùm insularū potiti essent, qui teste Plinio lib. vij. cap. lvi. *funda primi inuenere. Certos esse quis miretur iætus?* (inquit Florus lib. iij. cap. viij.) *cùm hæc sola genti arma sint, & vnum ab infantia studium. Cibum puer à matre non accipit, nisi quæ ipsa monstrante percussit.* Quod & Lycophron in Cassandra his versibus explicat:

Οὐ γάρ τις αὐτῷ ψίσει πύρρον γνάθῳ,
 Πρὶν ἂν κρατῇσει ἰασον εὐσόχῳ λίθῳ
 Ὃ' πέρ τράφηκος, σῆμα κείμενον σκοπῷ.

*Non enim aliquis illorum edet panem maxillâ,
 Priusquàm ibi ineat panem bene iaculato lapidæ
 Super lignum, signum iacentis scopi.*

Incolarum verò originem Strabo lib. xiv. secundum plurimorum opinionem, à Rhodijs fluxisse dicit, qui euerlâ Troiâ, huc nauigarunt. Silius ve-
 rò

rò Italicus lib. iij. ad Tlepolemum, & ad Lindum Rhodiorum urbem refert:

*Iam cui Tlepolemus sator, & cui Lindus origo,
Fervida bella ferens Balearis, & alite plumbo.*

Isacius verò Tzetzes in Lycophronē refert Tlepolemi socios in Cretam, expugnato Illo venisse: deinde ventis pulsos, in Ibericas peruenisse insulas, ibique habitasse. Vtraque insula egregiè felix, & fecunda est, & omnis generis armenta ferens. Generosi etiam vini, olim feraces fuisse refert Plinius lib. xiv. cap. vi. *Balearica*, inquit, [vina] ex insulis conferuntur Italiae primis. Oleo carebant olim, quare teste Aristotele lib. De mirandis auditionibus, oleum ex terebintho parabant, sed mitescere solo assidua cultura hodie eo abundant: præter agrum fertilem, non facilè his in locis est reperire noxium vllum animal; immò refert Plinius lib. xxxv. cap. xix. terram Bailearem non secus ac Ebusitanam serpentes necare; nec cuniculos quidem indigenas fuisse multi asserunt, sed ex vicina insula masculum & femellam aduectos, tanta sobole succrenisse, ut populatis messibus, fame periclitati fuerint, & ab Augusto Cæsare militare præsidium aduersus illos coacti petere. teste Plinio lib. viij. cap. lv. Auro nec argento olim vsos fuisse testatur Diodorus Siculus lib. vi.

& Aristoteles lib. De mirandis auditionibus, nec in insulā inferri passos fuisse, memores, Geryonē Chrysaoris filium, ob diuitias ab Hercule interfectum. Cumq. olim Carthaginensibus militassent, ex stipendio debito, vinum & mulieres, quarū impensē cupidi, secum attulere, rati sese omnes vitæ insidias facile euasuros, si auro argētoq. caruissent. Memorat & Strabo lib. iij. primos omnium mortalium Baleares, Laticlauum induisse, quod & ab Eustathio in Dionysiu Alexandrinum, notatū video: mirorq. apud rudes & incultos homines, senatoriæ dignitatis ornamentum primò repertum fuisse. num verò hinc ad Romanos tunica laticlauiā peruenerit, nulla mihi ratio suadet vt credam: præsertim cū Plinius lib. ix. cap. xxxix. refert latiore clauo Tullum Hostilium primū è regbus, deuictis Hetruscis, vsum fuisse, multis annis, priusquam Baleares P. R. noti essent. Cl. Iustus Lipsius vnicū rei litterariæ (heu quondā) decus, suis ad me litteris credit Baleares πλατυσείμοις χιτῶσι vfos primū; quas Romani paulò aliter vsurparunt, in lino nempe illi, non in lana: à quibus & Hispani ita vicini sumserunt. de quibus Linius lib. xxi. *Hispani linteis prætextis purpura tunicis constiterant.* Idem dixerat Polybius, χιτωνίσκος περιπορφύρος gestare. Non erat forsan purpura ea in clauos distincta, nec tam Augusta vt Senatorum laticlauius.

Ad

Ad prælia erumpunt inermes, tribus tantum præcincti fundis circa caput, teste Strabone. Diodorus verò Siculus paulo aliter, ut una funda caput, altera ventrem cingant, tertia manu gestetur, quibus ita peritè & tanta vi, lapides iactabant, teste Flauio Vegetio lib. i. cap. xvi. *Ut sæpe aduersus bellatores, cassidibus & cataphractis, loriciisque munitos, teretes lapides de funda, vel fustibulo destinati sagittis sint omnibus grauiores, cum membris integris lethale tamen vulnus importent, & sine inuidia sanguinis, hostis lapidis ictu intereat.* Primus autem Romanorum hos deuicit Metellus, teste L. Floro lib. ij. unde & *Balearici* illi cognomen. Ridiculum est quod Diodorus Siculus lib. vi. de nuptiali Balearidum ritu prodit: finitis enim epulis, qui altioris inter amicos est ætatis, sponsam imminuit, ceterique pro ætas quemque magis honestat, illi accubat. Omnium ultimò sponso pater accessus. Has insulas Iacobus Aragonum Rex anno M. CC. xxx. deuictis Mauris, Hispaniæ restituit. Nostro æuo omnium rerum copia præsertim vini, oleique egregiè sunt felices. Ex *Maiore Balearidum* ortus *Raymundus Lullus*, ingenij acumine & varia doctrina còspicius, quem populares sui tanto honore prosequuntur, ut in vicem Aristotelis, iuuetuti illum exponant, qui cum omnium litterarum esset expers, ac ne Latinè sciret quidem, multa patrio sermone

euulgauit, vbi non tantum Philosophia, quam rerum diuinarum cognitionem inducit, ita tamen obscure, vt doctissimilicet, pauci admodum ea capiant. Variè posteritas de ijs iudicauit, & vt cuique suus captus, alij ea laudare, alij culpae. Illud constat supra quingentos in Religionem Christianam errores, ex ijs decerptos, Gregorij XI. Pont. Max. iussu Auenione anathematis ignominia notatos.



NOBILIORES
HISPANIAE
FLVVII.
ANAS.

TER Hispaniæ præcipuos amnes iure censetur *Anas*, qui corruptè hodie *Guadiana* dictus, tum quòd notissimus inter Bæticam & Lusitaniam limes, tum quòd magnitudine sua conspicuus sit. Oritur autem, teste Plinio, Laminitano in agro Citerioris Hispaniæ (quem alij *Mancha de Aragõ*, alij *Campo de Montiel* vocant) modò se in stagna fundens, modò in angustias resorbens, aut in totum cuniculis condens, & sæpiùs nasci gaudens in Atlanticum Oceanum effunditur. nam quum procul ab ortu suo ex hominum conspectu se eripiat, per cæcos, & subterraneos meatus, ad septem milliaria lucifugus fluit; donec prope *Villaharta* (loci id nomen est) iterum in lucem erumpat, maiori vi & latiori alueo. Video tamen has *Anæ* latebras controuerti, & vt fabulosas à plerisque eliminari. Sed Plinio & receptæ passim opinioni

suffragatur Hieronymus Giraua, & Hieronymus Paulus, & Gaspar Barrerius doctissimi Hispani, qui in re tam aperta non passi essent palpū sibi obtrudi. Iactitet se nunc fabuloso suo *Alpheo* Græcia, quem ferunt in Peloponeso Pisas transire, & in Mediterraneum mare influere, nec adulterari pelagi falsugine, sed sub ima maria, hospitales suas aquas seruare, & in Arethufam fontem propè Syracusas refundere: hoc tamē vno, *Alpheo* *Anas* inferior, quòd Græcorum præconijs caruerit. amnis huius latebræ incolis iocandi materiam præbere, dum patrio sermone ferunt, pontem esse in Hispania, vbi perpetuò plurima armentorum milia pascantur. Aufonius, vbi de Emerita loquitur, vocat *Anam æquorem*. Prudentius verò hymno in S. Eulalam (loquitur de Emerita:)

*Quam memorabilis amnis Anas
Præterit, & viridante rapax
Mœnia pulcra alluit.*

Festus Auienus in Iambis dicit per Cynetas populos fluere:

*Ana amnis illic per Cynetas effluit,
Sulcatque glebam.*

Sed si Ortelio fides aliqua, hallucinatur egregiè Auienus. nam cūm *Cynetæ* circa promontorium Sacrum sint, multis millibus passuum inferiùs fluere *Anam* in comperto est.

B A E T I S.

Nobilissimum Hispaniæ flumen *Bætis*, à quo & prouinciæ nomen inditum, Tugienti saltu exoritur, teste Plinio. Strabo verò & Stephanus Byzantinus ex Argenteo monte, quem Festus Auienus *Argentarium* vocat, prope Castulonem, dicunt erumpere. Sed idem Strabo ex Orospecta monte oriri auctor est. Aristoteles verò æui sui ignorantiam secutus, lib. i. Meteorum vnà cum Danubio ex Pyrenæis montibus putat fluere. Polybius verò vnà cum Ana ex Celtiberia credidit oriri, qui tamen annes nongentis inter se distant stadijs, auctore Strabone. Modicus autem primo impetu fertur *Bætis*, sed multis stipatus fluuijs, quibus aquas, famamq. ingratus aufert, non procul à mari grandem lacum efficit (qui Festo Auieno *Ligusticus* vocatur, meminit & Suidas *Ligustici* in Hispania, sed quid esset nō expressit) atq. hinc tamquā vno fonte, geminus exoritur, quantusque ynico alueo venerat, tantus singulis se mari miscet: licet temporis iniuria, alterum eius ostium quod ad meridiem vergebat, oblimatum nunc sit. Dissentit tamen à passim recepta hac opinione Cl. V. Ioannes Genesius Sepulueda, & geminis ostijs in mare adhuc hodierno æuo dicit erumi-

erumpere: infra enim Hispalim constat, quatuor insulas ab hoc amne effici, sed duas esse præcipuas; alteram XVI. alteram XXVIII. circiter M. P. longitudine patere. *Minor* illa, hæc *Maior*, ab indigenis dicitur, quarum inferiorem Bætis quasi duobus brachijs complexus alluit: donec Oceano, breui sinu terras usque ad insulam intranti occurrat; quæ duo brachia, Oceanum dextra lævaque influentia, veteres duo Bætis ostia esse dixerunt. Hinc Strabo: *Bætis bifariam partitus, in Oceanum exit; inter cuius ostia intercepta insula, centum, vel (ut quidam tradunt) amplius stadijs à litore distat.* Festus verò Auienus triplici se ostio mari quondam infudisse auctor est:

— sed insulam

*Tartessus amnis ex Ligustico lacu
Per aperta fusus undique adlapsu ligat.
Neque iste tractu simplici prouoluitur,
Unusve sulcat subiacentem cespitem.
Tria ora quippe parte eoi luminis
Infert in agros, ore bis gemino quoque
Meridiana ciuitatis alluit.*

Vulgò Guadalquivir, id est *Fluvius magnus* vocatur, olim verò ab incolis *Cirtium* appellatum, auctor est T. Livius lib. xxviii. *Martius*, inquit, superato Bæti, quem incolæ *Cirtium* appellant, duas opulentas ciuitates sine certamine in deditionem accepit. Stepha-

phanus verò Byzantinus ab incolis περκύην scribit vocari, sed perperam vtroque, vt in Epistolicis quæstionibus obseruauit Cl. I. Lipsius, & *Certim* ex manuscripto Liuii substituit. Fuit etiam *Tartessus* antiquis dictus, vt ex Stesichoro ostendit Strabo, quomodo etiam Aristoteli citato loco dicitur: quibus Stephanus suffragatur, qui *Tartessu* amnis prope urbem Tartessum meminit, vnde & Festus Auienus in Iambis suis:

— *Tartessus*

Ager his adhæret, adluit quæ cesspit

Tartessus amnis.

Isidorus Originum lib. xiiij. *Bætis* etymon à *Bald* deducit, quòd scilicet per humilia loca fluat. Sed pace tanti viri, insulsa nimis est etymologia. Et si longinquo non pigeat petere, melius forsan noster Becanus, à Belgica dictione *Bæt*, quod utilitatem designat, *Bætis* nomen deriuat, quia illius aquis commodissimè lanæ inficiuntur, cuius causa maximè commendantur ab antiquis. Vnde Martialis:

Bætis oliuifera crinem redimite corona,

Aurea qui nitidis vellera tingis aquis.

Huc etiam allusisse videtur Iuuenalis Satyra XII.

— *generosi graminis ipsum*

Infecit natura pecus. sed & egregius fons

Viribus occultis, & Bæticus adiuuat aër.

Re.

Refert Philoſtratus lib. v. cap. ij. Vitæ Apollonij Tyanæi, *Bætim* Oceani quaſi naturam præſe ferre: ſiquidem increſcente Oceani æſtu, verſus fontes agi, ſpiritu quodam ipſum à mari impellente, vnde & Statius Papinius Sil. lib. ij.

*Attollat reſluos in aſtra fontes
Graio nobilior Mclite Bætis.*

CINGA.

Rapidus potiùs, quàm magnus inter Illegitimates Citerioris Hiſpaniæ populos, eſt fluuius *Cinga*, à Pyrenæis montibus decurrens, Gallicam Flauiam urbem, nunc *Fragua* dictam pertransit, & Ibero ſociales vndas deſert. Meminit huius Iulius Cæſar lib. i. De bello ciuili, qui magno ſuo periculo eius violentiam expertus fuit. Lucanus lib. iv. graphicè eius mentionem facit:

— *camposque cœrcet.*

*Cinga rapax, vetitus fluctus & litora curſu
Oceani pepuliſſe ſuo. nam gurgite mixto
Qui præſtat terris, aufert tibi nomen Iberus.*

Eiuſdem etiam nominis in Gallia recenset fluuium idem Poëta lib. I.

— *quà Cinga pererrat*

*Gurgite: quà Rhodanus raptum velocibus vndis
In mare fert Ararim.*

COGEDVS.

Nisi potissima instituti mei pars esset, loca illa Hispaniæ detegere, quorum apud classicos auctores mentio, *Cogedum* amnem præterire in animo erat. nam & tenuis & obscuri nominis est; sed quia apud Martialem eius est memoria, aliquid illi dandum censui. Oritur hic prope montem Caunum non procul à Bilbili, & Vobertam prælabitur, quæ nunc *Bouierca* dicitur, & Salonî se immiscet, hodie adhuc prisco nomine gaudet, licet. Benedicto Ariæ Montano apud Ortelium, *Rio de Codes* dicatur. Martialis lib. i. Epigrammat. ad Licinianum de Hispaniæ locis eius meminit his versibus:

*Tepidi innatabis lene Congedi vadum
Mollesque nympharum lacus.*

Gaspar Barrerius vocat hunc amnem *Cogedum*, & versum hunc Martialis hoc modo censet legendum:

Tepida natabis lene Cogedi vada
Sed perperam, nam otiosa esset dictio *Lene*.

DURIUS.

DVrius ex maximis Hispaniæ amnibus, ortus in Pelendonibus, teste Plinio, & iuxta Numantiam fluens, dein per Arreuacos, & Vaccæos lapsus, determinat ab Austuria Vettones, & à Lusitania Gallæcos, in Oceanum Atlanticum multis fluminibus auctus procurrit. Straboni *δούριος*; Ptolemæo verò *δούρις*; Appiano in Ibericis *δούριος* vocatur, nostra verò ætate incolis *Duero* dictus. Isidorus lib. xij. cap. xxi. *Durium* à Græcis, quasi *Doricum* cognominatum dicit. Amnis est egregiè piscosus, & optimas alosas, & lampetras (quas *murænas fluminales* nonnulli vocant) & salares, magna frequentia fundit. Sed præcipuè clarus olim ob auríferas arenas, quod & Silius Italicus cecinit lib. I.

Hinc certant Pætole tibi, Duriusque Tagusque.

Licèt nostro ævo ob accolarum inertiam admodum rarò inueniantur.!

IBERVS.

Placulum pœnè esset *Iberum* præterire nobilissimum Hispaniæ amnem; quippe qui toti provinciæ, *Iberia* nomen dedit, ut multis placuit, qui teste

teste Plinio lib. iij. cap. iij. *Nauigabili commercio diues, oritur in Cantabris, haud procul opido Iuliobriga. CCCC. L. M. P. fluens, nauium per C C. L. M. P. à Varia opido capax.* Idem tamen exactiùs lib. iv. cap. xx. à portu Victoriæ Iuliobrigensium fontes Iberi XL. M. P. abesse scribit: Florianus verò Oc-campius pensiculatiùs eius exortum rimatus, dicit non procul ab *Aguilar del campo* (loco id nomen est) Iberum binis fontibus scaturire, & ab incolis locum indigetari *Fontible*, quasi Iberi fontes dicas. multis hic stipatus fluminibus, à septemtrione in austrum fertur, cùm ceteri Hispaniæ fluuij ab ortu in occasum delabantur. in caussa est *Iubeda*, mons, à quo in occasum ire prohibetur, vnde in austrum necesse se flectit, multas & illustres præteriens vrbes, infra Dertosam, indignanti similis, mari se infundit, tanto quidem impetu vt vltra quinquaginta passus Mediterranei maris salvas vndas edulcoret. Nobilitatus etiam Luætatiij Catuli fœdere, quo inter potentissimos populos, Romanos & Carthaginenses, vtriusque imperij terminus est statutus: vnde prima Hispaniæ diuisio, *Vltra Iberum & Cis Iberum* manauit. Sed & præter hunc Iberum amnem, alterius in eadem Hispania meminisse videtur Fest. Auienus, & in Bætica statuere. nam cum multa de Tartessijs dixisset, subdit:

*Iberus inde manat amnis, & locos
Fecundat vnda : plurimi ab ipso ferunt
Dictos Iberos, non ab illo flumine
Quod inquietos Vascones prælabitur.*

Vnde forsan Florianus Occampius Bæticiæ flu-
uiolum *Rio Tinto*, vocatū olim fuisse dicit *Iberum*.

L E T H E.

NON tam aquarum gloria, quàm præscorum
fabulis celebratus est *Limia*, Lusitaniæ amnis,
Græcis *Λήθη*, vt & Silio Italico *Lethe* vocatus; Pom-
ponio Melæ & Plinio *Oblivionis flumen* dictū; Fran-
cisco Taraphæ, & Hieronymo Paulo libello De
fluminibus Hispaniæ, *Eunemius* vocatur; sed pa-
rum exactè, cū secundū Pliniū lib. iv. cap. xxij.
Æminius sit dicendus, cuius hæc sunt verba: *Æ-*
Minio, quem supra diximus C. C. M. P. (vt auctor est
Varro) abest *Æminius*, quem alibi quidam intelligunt,
& *Limeam* vocant, *Oblivionis antiquis dictus, multumq̃*
fabulosus. Strabo ex Celtiberis & Vaccæis dicit
Limeam fluere, sed ab Andrea Resendio erroris
conuincitur, qui refert ex palustribus quibusdam
locis, inter Aquis-caldensem urbem & opidum
Monteregium erumpere, cuius accolæ olim *Li-*
micos ex verustio lapide docet vocatos. Sed vnde
fabularum origo, & *Oblivionis* nomen? refert Stra-
bo,

bo, Celticos Lusitanos & Turdulos, cùm socijs armis ad hæc loca peruenissent, traiecto Limea exorta seditione ducem amisisse; quare palantes & vagos, proximas amnis ripas occupasse, obli-
tosq. expeditionis susceptæ, & iniuriarum, anni nomen *Obluionis* indidisse. Vanum hoc nomen, vanior deinde religio auxit, cùm passim percre-
buisset his aquis epotis obliuionem incurri, adeò vt Decius Brutus, omnium ore ferretur, quòd pri-
mus tantopere formidatum militibus flumen traiecisset, vt testantur Appianus lib. de bello Iberico, L. Florus lib. ij. cap. xvij. & Plutarchus in. *Questiõibus Romanis*. Auri etiam grumulos, vt pleraque Hispaniæ flumina suis vndis, com-
mixtos defert. Vnde Silius Italicus lib. ij.

*Quique super Grauios lucentes voluit arenas,
Infernæ populis referens obliuia Lethæ.*

In Bætica etiam fluuiolus est, *Guadalete* dictus, quem Florianus Occampius nuda nominis simi-
litudine allectus, *Lethem* etiam indigetat, quasi flumen *Lethem* dixeris.

MINIVS.

Maximum esse Lusitaniæ flumen Minium, auctor est Strabo; Plinio verò, & Melæ, Tarraconénsis est prouinciæ, & per Bracaros fluit.

Posidonius hunc è Cantabris oriri dicit, insulamque ante eius ostium vnà cum binis scopulis refert procumbere : sed nullum huiusce rei hodie vestigium exstare ferunt. Strabo etiam *Banim* ait vocatū, seu vt Hermolao Barbaro placet, *Nabim*. Pomponius tamen Mela, *Nabim* à *Minio* diuersum statuit. miror ego vbi Æthico mens fuerit, dum Minium prope Pyrenæum nasci, & in orbem verti ait, vt Brigantiū maritimam urbem includere asserat, cū multis millibus à Pyrenæis oriatur, nec Brigantium, quod inter Callaicos Lucenses est, vlla ex parte attingat. Iustinus libro vltimo à *Minij* venis, & colore ita dictum amnem credit, vt & Isidorus lib. xiiij. Etymol. & cū paucorum fluminum aquas recipiat, natiuis tamen vndis ita diues, vt IV. M. P. ore spatiosus in Oceanum influat, teste Plinio. amnis est egregiè piscosus, præcipuè verò prægrandes asturiones nutrit.

M V N D A.

INter Durium & Tagum non inglorius fertur *Munda*, æquis ab vtroque spacijs distans, qui & *Mulias* Straboni vocatur, hoc æuo *Mondego* indigenis dictus; nec ipse auriferæ arenæ gloria caret; licet incolarum inertia, rarò admodum nunc inueniantur. Conimbricam, sacram Musis urbem, lato

lato alueo præterfluit, & ponte firmi & egregij
admodum operis transitur, nec procul ab ipsa vr-
be mari commiscetur; agris non inutilis & pis-
cosus affatim, sed vbi vel largiori imbre, vel hy-
bernis niuibus augetur, ad insaniam vsque excre-
scit, & latè per adiacentes campos magna cum
strage

*Sternit agros, sternit sata læta, boumq; labores
Præcipitesq; trahit siluas.*

SALO.

INter Hispaniæ amnes, clarus admodum est *Salò*,
qui licet nec lato alueo tumeat, nec auriferis
arenis superbiat; nulli tamen cedit ferri gloria:
omni enim ferro ipsius aqua est violentior. Aquæ
enim temperamento, ferrum acrius robur, & mi-
ram duritiem acquirit, vnde Martialis, vbi de
Congedo amne egit, subdit:

*Quibus remissum corpus astringes breui
Salone qui ferrum gelat,*

Et libro iv. Epigr. V. vbi de Bilbili:

*Quam fluctu tenui sed iniquito
Armorum Salo temperator ambit.*

Num verò hic sit idem amnis, qui Iustino libro
ultimo *Bilbilis* vocatur, vel vt manuscripti aliqui
Birbilis, non abhorret animus vt credam, præfer-

tim cùm illi maximam ferri temperiem adscribat, adeò vt nullum apud eos telum probetur, inquit, quod non aut Bilbili flumine, aut Chalybe intingatur; quæ certè Saloni nostro in primis quadrât. nullus enim præter Salonem ferri gloria in Hispania notior est, nec ea de caussa magis celebris. Potuit enim ab adiacente vrbe *Bilbilis* vocari. Vnde mihi nata suspicio non incommodùm, apud Iustinum legi posse: *Quod non aut Bilbilis flumine*, vt nomen fluminis prætereat, urbem verò ostendat. Sed Lectori hoc dispiciendum relinquo.

SICORIS.

Illergetum est amnis *Sicoris*, inter Ceretanos ortus, & Ilerdam, nobilem & validam urbem præterfluit: notissimus bello, quod inter Cæsarem, & Pompeij duces, Petreium & Afranium, circa illum gestum fuit, vnde Lucanus:

*Hesperios inter Sicoris non vltimus amnis:
Saxeus ingenti quem pons amplectitur arcu,
Hybernas passurus aquas.*

Vocatum fuisse & *Sicanum* quondam hunc amnem, non obscurè conijcias, vnde & accolæ *Sicani* dicti, qui Siciliæ olim *Sicania* nomen indiderunt vt testatur Dionysius Halicarnassæus lib.i. & Thucydides lib.vi. *Veritas*, inquit, *Sicanos arguit Iberos esse,*

esse, oriundos à flumine Sicano, quod in Iberia est; à Ligys eiectos, & ab his tunc dictam Sicaniam insulam, prius Trinacriam nominatam. Idem sentit etiam Silius Italicus lib. xiv.

Vomere verterunt primum noua rura Sicano.

Pyrene misit populos, qui nomen ab amne

Ascitum patrio, terræ imposuere vacanti.

Quæ omnia de Siccri dicta eo facilius crediderim, quòd nullus in Hispania locus sit, cui magis hæc aptari possint. Vocatur hodie incolis Segre, & auratas etiam arenas Oceano deferre, testantur Franciscus Tarapha, & Lucius Marineus.

S V C R O.

INter Contestanos Citerioris Hispaniæ populos non procul à Valentia Sucro amnis labitur, ex Orospedanis montibus originem trahens, hodie Xucar vocatur. Silius Italicus inter Sedetanos videtur ponere, cum ait lib. iij.

Sedetana cohors, quam Sucro rigentibus vndis.

Sed nulla re clarior, quàm Sertorij circa illum clade, vbi & castris à Pompeio exutus fuit. Vt testatur Sallustius in Epistolæ fragmēto à Pompeio ad Senatum missæ. Ab hoc etiam amne Sinum Sucronensem dictum testatur Pomponius Mela: eiusdem etiam nominis opidum eodē in tractu commemorat cum Strabone T. Lilius.

TVRIA.

NON procul à Valentia Edetanorum, Turia amnis labitur, amœnissimos eius agros irrigans, & omni deliciarum genere fecundans. Unde meritò à Claudiano lib. de laudibus Serenæ *formosus* dicitur:

— & roseis formosus Turia ripis.

In eius nomine variant Scriptores. Pomponius enim Mela lib. ij. *Duriam* vocat, sic etiam Cicero in oratione pro Cornelio Balbo, *Acerrimis*, inquit, *illis prælijs*, *Sucronensi & Duriensi* interfuit Balbus. Plinij verò exemplaria variant, nunc *Turium*, interdum *Turiam* vocant. Potior tamen scriptorum pars *Turiam* vocat. Ita enim in fragmentis historiarum Sallustius, & Plutarchus in Sertorio. Amnem hunc eundem esse cum *Turuli* Ptolomæi, non malè coniiciunt Hermolaus Barbarus, & Iosephus Moletius, & situs suadet. Hieronymus Paulus ita dictum ex quorundam opinione dicit, à Phœnicibus, qui tempestate amnis huius ostijs appulsi, multitudinem boum conspicati, *Turiam* vocarunt, quòd illis patrio sermone *Tur bos* esset. alij verò à dictione *τὸ ὑπερ* dictum putant, quæ celerem & impetuosum denotat.

TAGVS.

TAM apud Græcos quàm Latinos scriptores *Tagi* nomen illustre fuit, adeo vt cum Marone dicere liceat,

Cui non dictus Hylas?

Oritur autem nobilissimus hic amnis in Celtiberis, teste Strabone, & per Vetrone, & Carpentanos lapsus Toletum, præpotentem urbem pœnè circuit, tandem Lusitaniam mediam secans, pleno alueo sub Olisiponensium mœnibus Atlantico pelago infunditur. Quid in mentem Isidoro lib. xiiij. venerit, de *Tagi* etymo, lubet potiùs admirari, quàm inscitiam illum arguere: *Tagum*, inquit, *fluvium Carthago Hispaniæ nuncupavit, ex qua ortus procedit, arenis auriferis copiosus, & ob hoc ceteris fluvijis prælatus.*

Sed vnde *Tagi* etymon à *Carthagine* deducit, aut quidnam *Tago* cum *Carthagine* cōmercij. nam procul admodùm à noua *Carthagine*, oriri ex Strabone iam dictum. fama illi præcipua ex auri arenis, grumulisq̃ue, quos tamquam telluris spolia Oceano defert. Vnde Iuuenalis:

Omnis arena Tagi, quodq̃ in mare voluitur aurum.
Ceterique passim Poëtæ, quos recensere operosum esset. Mela verò non aurum solum, sed & gem-

gemmas illi ascribit, lib. iij. cap. i. his verbis. *In altero [sinu] Olysipto & Tagi ostium, amnis aurum gemmasque generantis.* Mirantur multi, celebris illius & passim vulgatæ auri famæ rara adeò exstare vestigia. Causam refert Andreas Resendius. Lege cautum id scrutari, ne commotis arenis, depressiores frumentarij agri aquarum illuuiem patiantur, in fidem tamen vetustæ gloriæ, Lusitanorum Regum sceptrum ex Tagano auro conflatum, quo purius nullum reperiri possit.

F I N I S.



PRæfens Hispaniæ descriptio, auctore Ludouico Nonio Medico nihil, quod aut Religioni nostrę contrarium sit, aut pias aures offendat, habet. Poterit ergo in multorum hominum vsum imprimi. Quod censeo xxij. Iun. anno 1606.

*Egbertus Spitholdius S. T. L.
Canonicus, & Plebanus
Antuerpiensis*

Cum gratia & priuilegio ad sexennium.

Buschere.



78

772

